



## 華嚴經合論

唐 李通玄造論 唐 志寧釐經合論

(一百二十卷・之二：第 21 卷至第 40 卷)

大眾閱藏・法海觀瀾彙編之禪觀要典

## 佛經安置須知

- 一、經典應恭敬放在清淨高處以及其他書籍的上面，不可隨意扔放床上、座椅上等不淨處。
- 二、凡經書等法寶閱畢，可輾轉流通，贈送其他道友，不可任意燒毀或丟棄。
- 三、如手捧或裝于口袋攜帶時，不得低於腰部，不可挾腋下。
- 四、不得口吹經上灰塵，應以專用淨布拭去。
- 五、不可在經典所在的地方，有種種污穢行為。

## 讀誦佛經須知

- 一、經典乃三世諸佛之師，如來法身舍利，亦當作真佛看，不可作紙墨等看。禮誦持念，種種修持，皆當以誠敬為主。
- 二、不可躺著看經書，以口水沾指翻經頁，不可以汗手觸經。
- 三、經書上不可塗寫。不得一邊散心雜話，一邊看經書。
- 四、中斷不看時，應夾放紙條、書簽做記號。不可折頁、折角，或經書面朝下作“人”字形擱置。

## 保甯勇禪師示看經警策文

夫看經之法後學須知：當淨三業。若三業無虧，則百福俱集。三業者，身、口、意業也。

（一）端身正坐，如對聖容，則身業淨也。

（二）口無雜言，斷諸嬉笑，則口業淨也。

（三）意不散亂，屏息萬緣，則意業淨也。

內心既寂，外境俱捐。方契悟於真源，庶研窮于法理，可謂水澄珠瑩，雲散月明。義海湧于胸襟，智岳凝於耳目。輒莫容易，實非小緣。心法雙忘，自他俱利。若能如是，真報佛恩。

# 閱藏儀軌

## 零、閱藏準備：

- 一、關閉手機，淨手等
- 二、準備經本、法器等
- 三、焚香後，靜坐 5 分鐘清淨身口意三業準備閱藏

## 壹、前行：

### 一、頂禮三寶（三拜/三問訊）

### 二、淨三業真言

唵，娑嚩，娑嚩秫馱，娑嚩達摩娑嚩，娑嚩秫度憾。（三遍）

### 三、發願（三遍）

稽首禮諸佛 及法比丘僧 我今為自利 亦利諸有情  
與諸善同修 正聞大藏經 傳承三聖學 令正法久住

### 四、稱佛號 南無本師釋迦牟尼佛（三稱）

### 五、開經偈 無上甚深微妙法 百千萬劫難遭遇 我今見聞得受持 願解如來真實義

## 貳、正行：深入經藏 慎勿放逸

## 叁、結行：

### 一、補闕真言 南謨喝嚩怛那，哆嚩夜耶。佉嚩佉嚩。俱住俱住。摩嚩摩嚩。虎嚩，吽。賀賀，蘇怛拏，吽。潑抹拏，娑婆訶。（三遍）

### 二、七佛滅罪真言 離婆離婆帝。求訶求訶帝。陀羅尼帝。尼訶嚩帝。毗黎你帝。摩訶伽帝。真陵乾帝。娑婆訶。（三遍）

### 三、回向 閱藏功德殊勝行 無邊勝福皆回向 普願沉溺諸眾生 速往無量光佛刹 十方三世一切佛 一切菩薩摩訶薩 摩訶般若波羅蜜

祈願 佛日增輝 法輪常轉 僧寶紹隆 國道遐昌

祈願 一切善業 三寶加被 順緣具足 廣度群生

### 四、三皈依 自皈依佛 當願眾生 體解大道 發無上心

自皈依法 當願眾生 深入經藏 智慧如海

自皈依僧 當願眾生 統理大眾 一切無礙 和南聖眾

### 五、禮謝三寶（三拜/三問訊）

（注：此閱藏儀軌可以根據需要增加香贊、別回向等）

# 目 錄

卅新纂大日本續藏經第 4 冊 No. 223 《華嚴經合論》

大方廣佛新華嚴經合論卷第二十一 .....	1
華藏世界品第五之一 .....	1
大方廣佛新華嚴經合論卷第二十二 .....	19
華藏世界品第五之二 .....	19
大方廣佛新華嚴經合論卷第二十三 .....	32
華藏世界品第五之三 .....	32
大方廣佛新華嚴經合論卷第二十四 .....	49
毗盧遮那品第六 .....	49
大方廣佛新華嚴經合論卷第二十五 .....	65
佛名號品第七 .....	65
大方廣佛新華嚴經合論卷第二十六 .....	80
佛名號品第七之餘 .....	80
大方廣佛新華嚴經合論卷第二十七 .....	95
四聖諦品第八 .....	95
光明覺品第九 .....	101
大方廣佛新華嚴經合論卷第二十八 .....	115
光明覺品第九之餘 .....	115
菩薩問明品第十 .....	119
大方廣佛新華嚴經合論卷第二十九 .....	136
菩薩問明品第十之餘 .....	136

淨行品第十一.....	138
賢首品第十二之一.....	146
大方廣佛新華嚴經合論卷第三十 .....	155
賢首品第十二之二.....	155
大方廣佛新華嚴經合論卷第三十一 .....	178
賢首品第十二之三.....	178
昇須彌山頂品第十三.....	185
須彌頂上偈讚品第十四.....	191
大方廣佛新華嚴經合論卷第三十二 .....	198
須彌頂上偈讚品第十四之餘.....	198
十住品第十五.....	208
大方廣佛新華嚴經合論卷第三十三 .....	215
十住品第十五之餘.....	215
大方廣佛新華嚴經合論卷第三十四 .....	232
梵行品第十六.....	232
初發心功德品第十七.....	235
大方廣佛新華嚴經合論卷第三十五 .....	251
初發心功德品第十七之餘.....	251
明法品第十八.....	263
大方廣佛新華嚴經合論卷第三十六 .....	272
明法品第十八之餘.....	272
昇夜摩天宮品第十九.....	282

大方廣佛新華嚴經合論卷第三十七 .....	288
夜摩天宮偈讚品第二十 .....	288
十行品第二十一 .....	298
大方廣佛新華嚴經合論卷第三十八 .....	310
十行品第二十一之餘 .....	310
大方廣佛新華嚴經合論卷第三十九 .....	330
十無盡藏品第二十二 .....	330
大方廣佛新華嚴經合論卷第四十 .....	344
昇兜率天宮品第二十三 .....	344

# 大方廣佛新華嚴經合論卷第二十一

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

## 華藏世界品第五之一

【論】將釋此品略作十門分別一釋品來意二釋品名目三釋華藏世界海因何報得四釋華藏世界形狀安立五配華藏世界安立屬因六釋華藏世界海純襍無礙七釋華藏世界海圓攝三世業境八釋華藏世界本空出生所緣九明華藏世界因何得隱現自在十隨文釋義一釋品來意者此品答前三十七問中佛世界海眾生海波羅蜜海等此品舉如來五位中行業因果報得答前三十七問故此品須來二釋品名目者為說此佛境界得之土蓮華所持含藏一切淨穢境界皆在其中故名華藏三釋華藏世界因何報得者以從初信心至於八地已來恒以大志願力持令其不退菩提諸波羅蜜海教化饒益一切眾生至於八地任利無功當知風輪是大願波羅蜜所成報故眾生世間妄想業風所持如來世間以大願力智風能持諸境為以智能隨願願能成智還以大願法身大智之所報成風輪之體若不以法身一切諸行總有為故若無志願法身無性不能自成何況成他以此三事為緣方堪利生不滯空有進修功熟任利無功且取初因大願為首令持萬境總以大願智風以為持境是故此品下文普散摩尼妙寶華以昔願力空中住如是華藏世界所有莊嚴總是風輪上持諸境由諸福行本從願生還將本因以持諸果以此用願波羅蜜能成一切諸波羅蜜海以本因如此故因果相持今以第八及初

發心時願波羅蜜中十波羅蜜以成十種風輪用持其上十種一切莊嚴以願波羅蜜互體相參能持其上諸行報得一切莊嚴如最下風輪名平等是願波羅蜜中檀波羅蜜報得故能持其上一切寶燄熾然莊嚴還是願波羅蜜中檀度門法財慧施之所報生還自相持因果相徹法不虛得因不唐捐以次准此用願波羅蜜中十度法門配之十種風輪報得因果相持故還如眾生世間妄想業風最居其下上持水際金剛地山令其安住孛象玄光以成天文運遊不墮蓮華藏體是法身隨行無依住智體之所報得及宮殿總大悲含育之所報得樓閣即是智照觀根順悲濟物之所報得其地金剛平等自性法身之所報得但是諸莊嚴中所有金剛為莊嚴者皆法身隨行之報但是摩尼莊嚴皆法身成戒體隨行報得金剛輪圍山即是大悲戒防護之業之所報得眾華莊嚴者萬行利生開敷眾善之所報得故寶樹莊嚴者建行利生覆蔭含識之所報得如十行位中功德林等十箇菩薩下名悉同名之曰林為行覆蔭故師子座莊嚴者即是以法身隨智建法輪報得故略而言之且復如是廣說報業所因不可具悉夫報不虛得皆有所因若不知因云何修果是故此品之初云此華藏莊嚴世界海是毗盧遮那如來往昔於世界海微塵數佛一一佛所淨修世界海微塵數大願之所嚴淨但云願者為行由願成又下云普賢智地行悉成一切莊嚴從此出如香水海大慈悲業之所報得香水河是進修之行之所報得如下文殊師利常隨眾中總以名表法即見名知行如此華藏世界海見果知因不可別引餘經將來證此此經見名即知法見果即知因方可識此經之意趣餘經法相門戶多不與此經相應餘經云苦諦此經云苦聖諦即義有餘餘經說四諦此經說十種聖諦及十十二因緣若廣說無量差別不可卒申以是義故此配因果不可引於餘教配此經文此經見名知行以果識因如文殊師利常隨之眾云明練十方儀式主方



神除滅無明黑闇主夜神一心匪懈闡明佛日主晝神即其例矣此華藏世界報得之體大要總言大願法身大智萬行大慈大悲以此五事成滿盡法界虛空界乃至塵毫之內重重剎海中一切眾生行皆悉等利至八地任用無功自常充徧以此為體非是滯寂自安及人天自求樂果者之所境界故亦非樂生淨土菩薩者境界故此淨土菩薩設修六波羅蜜得六神通亦未能生信故為本不以法界根本智差別智乘發生信進修行故四釋華藏世界海形狀者以無盡大願風輪持大悲水生無邊行華以法性虛空能容萬境重疊無礙於其水上生一大蓮華周空法界名種種藥香幢明根本智起差別智行差別行名藥香幢於蓮華內日珠王寶上有大輪圍山經云日珠王蓮華之上者只是華內有寶名曰珠王非別有華也具寶所成林樹香水妙華開敷經自有文具陳其事其華內地金剛所成地具眾寶間錯嚴飾經自具言於其地上無數香水海眾寶為底如經具說一一香水海外各有四天下微塵數香水河右旋圍遶從南向東以次遶之如六甲等為右其河嚴飾經自具言於不可說香水海中一一海內各有一大世界種而住其中其世界種者同流所居名之曰種種者類也如先德釋云三千大千世界數至恒沙為一世界海海世界數至恒沙為一世界性性數至恒沙為一世界種此中世界種有不可說佛剎微塵數一一香水海中各有其一世界種如經且略舉世界種於最中心香水海名名無邊妙華光明中道智悲之妙用為作名也即是風輪向上種種藥香幢大蓮華之內處中香水海也此中海內出大蓮華名一切香摩尼王莊號有世界種於中而住名普照十方熾然寶光明此世界種上下有二十重世界各各相去佛剎微塵數此娑婆世界在第十三重中最下重中有佛剎微塵數世界周帀圍遶次上重有二佛剎塵次上重中三佛剎塵數世界周帀圍遶一重增一至最上二十重有二十佛剎微塵數世界圍遶

如是周旋通中心有十一箇世界種各有二十重上下相去遠近相似此十一箇世界種外周圍至輪圍山復有一百箇世界種隨方各十於中布列直往隨方行列而住近輪圍山周匝十箇世界種各各上下四重重數雖少上下相去極遠每第三重與此娑婆世界齊等最上重或言相去七佛剎塵向下第二重與下相去多言十佛剎微塵數計四重世界還與中心十一箇二十重世界種高下齊等此近輪圍山十箇世界種即有四重餘九十箇世界種不言重數且略舉世界種中心有十一箇世界種周圍有一百箇世界種共有一百一十一箇世界種如天帝網分布而住大都總數有不可說佛剎微塵數諸世界種總於種種藥香幢大蓮華之上諸香水海各出蓮華諸世界種各各而住即於其大華之上別華而居即是第二重各別蓮華之上布列而住最下有須彌山微塵數風輪而持其上種種莊嚴及持其上重重世界猶如日月眾星以風所持處空而住餘廣者經自有文若廣引文繁恐當不見略陳綱紀麤而言之五配華藏世界海安立屬因者夫果不自生從因而得經云廣大願雲周法界於一切劫化羣生普賢智地行悉成所有莊嚴從此出如經總舉不可說佛剎微塵數世界種者明普賢行攝化之境徧法界故即是座內眾眉間眾所行覺行報得之境總是都舉果行圓周之境於彼但言佛世界微塵眾對不可說佛剎微塵數於彼是略舉數此是廣數如說普賢之行且但言萬行此是略言意在無盡等法界行也即此二重舉果中普賢滿行即如座內眾眉間眾即此華藏莊嚴世界海不可說佛剎微塵世界種如天帝網分布在種種藥香幢大蓮華之中是其彼果行所攝生報滿果所得之境今在經中不舉大數但舉中心十一箇世界種上下二十重重別相去一佛剎塵最下重世界各有一佛剎塵世界周匝圍遶而住其中次上第二重中即云二佛剎世界周匝圍遶次上第三重中即言三佛剎微塵數世界周匝圍遶以

次向上一重加一直至最上重世界中有二十佛刹塵世界周匝圍遶此中心十一箇世界種總皆如是此明十一地行門進修攝化境界報得中心十一箇即十一地報得上下二十重漸漸增廣者明十一地行門中一地有兩重因果為地地進修中皆一正果一向果其二十重中所有佛號皆是勝進中因果佛也所有世界是隨位中所化之境界也即明十一地進修攝化層降佛果故各隨位配之可見除此十一箇世界外周圍別舉出一百箇世界種者即明此十一地攝化十波羅蜜行徧輪圍山法界內故且隨方次第各有其十都言一百明徧不可說佛刹塵境界滿故近金剛輪圍山周圍有十箇世界種上下有四重者明十一地中四攝法徧故餘九十箇世界種不云重數者明但是十波羅蜜十中具百所攝化境故此是一箇因果竟自餘十箇四重世界配四攝法更作一配總舉中心十一箇世界種并周圍直至金剛輪圍山一百箇世界種總共有一百一十一箇世界種配十住十行十迴向十地十一地五位法各有佛因果都有一百本五位中本自有十重因果為本五位中各有兩重因果即是十此為本五位佛因果與五位中作進修故即如此初會五位佛果是都有一百一十更有一箇世界種為明佛位是一徧一切中作一故若無此一位諸位不成故又明緣生之法皆須有一故緣生之法始成如一三五七九與十作緣但置二四六八十具滿數故是圓數不可加減是佛法世間法皆相似故如一日三日五日七日九日皆一三五七九為法者成緣生無盡一多相徹故明其一者非同時無前後中間故為一不自一與萬法作一故為萬法不自多為一作多故為成緣起法合如是一多自在無作任相成故如俗法一為陽二為陰陽動陰隨不可自用陰若自用即天地兩乖雲不興雨不施皆主伴陰陽動靜相順互為主伴方成緣生兩剛即缺兩柔即離為不成濟故是如來出世意在利生真不隨俗故行無所設也德無所

濟也即佛自佛眾生自眾生若為利生施設法則即佛為陽德所設教為陰是故此經名為圓教佛處坎之一而設教即十以坎為師卦故是故普賢菩薩為明設教利生因果緣起法須自在不滯緣生故舉一百一十一世界種配其五位因果有一百一十之門為攝生報得有一箇世界種明其佛位與五位及一切諸行作多故還如眉間之眾勝音菩薩獨坐蓮華臺諸菩薩眾生其華鬚明主伴萬行一多相即故定慧觀之可見十下作一是其土字明仁士之法法合十一今以十一箇世界安立十一地法門四重世界明十波羅蜜四攝法之方便大意舉前座內眾及眉間眾明其所行之行此華藏世界明彼行中報得依果於中襍類世界即明所攝之眾生同住一處而境各異者約法界理智真俗不殊六釋華藏世界純襍無礙者為佛所行之行徧法界眾生界故既是行徧所得依果亦徧但業不相應者同住居而不見猶如靈神及諸鬼趣與人同處人不能見如經云譬如人身常有二天隨逐天常見人人不見天此經為佛行周徧依正亦徧不同三乘推淨土於餘方而致去來自他之相為彼小心根劣者且如是設教網故畢竟求大菩提心者還須歸此不二之門興徧周法界之行願也七明華藏世界圓攝三世業境者此華藏世界海明此教法一念三世故一念者為無念也無念即無三世古今等法以明法身無念一切眾生妄念三世多劫之法不離無念之中以是義故此華藏世界所有莊嚴境界能現諸佛業眾生三世所行行業因果總現其中或過去業現未來中或未來業現過去中或過去未來業現現在中或現在業現過去未來中如百千明鏡俱懸四面前後影像互相徹故為法界之體性無時故妄計三世之業頓現無時法中是故經言智入三世而無來往經云佛子汝應觀剎種威神力未來諸國土如夢悉令見十方諸世界過去國土海咸於一剎中現像猶如化三世一切佛及以其國土於一剎種中一切悉觀見論

主頌曰三世無有時妄計三世法以真無妄想一念現三世三世無時者亦無有一念計著三世法總現無時中了達無時法一念成正覺八釋佛國本空何為華藏世界出生所緣者緣何事意緣意有四一為明二乘雖得解脫三界羸業無有福智不利眾生滯於涅槃二為三乘菩薩有樂生淨土淨相常存障法性如理染淨當情知見不普情存淨土不得自在不如此法隱現自在為利眾生顯勝福德故即具相萬差光明顯照若令眾生情無取著如幻雲散一物便無無有所得存其繫故三為怖一切法空眾生為法空無相之理謂言斷見空無福智不樂觀空樂取相縛隨境存業不能解脫者所現福德依正果故令觀空法空却無明成福德業四總為一切三乘及一切凡夫現廣大願行福智境界量度樣式令其做學不偏執故經云諸佛國土如虛空無等無生無有相為利眾生普嚴淨本願力故住其中九明華藏世界因何得隱現自在者為從一切法空之理隨智現故得隱現自在世間龍鬼具有三毒猶能隱現何況法空空諸三毒純清淨智不能隱現自在如善財入彌勒樓閣以三昧力具見眾莊嚴從三昧起忽然不見一相都無善財白言此莊嚴何處去彌勒答言從來處去曰從何處來曰從菩薩智慧神通來依菩薩智慧神力而住無有去處亦無住處非集非常遠離一切又如幻師作諸幻事無所從來無所至去雖無來去以幻力故分明可見彼莊嚴事亦復如是無所從來亦無所去雖無來去然以慣習不可思議幻智力故及往昔大願力故如是顯現華藏世界亦復如是以如來大願智力法性自體空無性力隱現自在若隨法性萬相都無隨願智力眾相隨現隱現隨緣都無作者但以理智法爾自具不思議功不思議變無能作者自在隱現凡夫執著用作無明執障既無智用自在順法身萬象俱寂隨智用萬象俱生隨大悲常居生死但隨理智生死恒

真以此三事隱顯萬端不離一真之智化儀百變十隨文釋義者此一品經長科為十二段。

【經】爾時普賢菩薩復告大眾言諸佛子此華藏莊嚴世界海是毗羅遮那如來往昔於世界海微塵數劫修菩薩行時一一劫中親近世界海微塵數佛一一佛所淨修世界海微塵數大願之所嚴淨諸佛子此華藏莊嚴世界海有須彌山微塵數風輪所持其最下風輪名平等住能持其上一切寶焰熾然莊嚴次上風輪名出生種種寶莊嚴能持其上淨光照曜摩尼王幢次上風輪名寶威德能持其上一切寶鈴次上風輪名平等焰能持其上日光明相摩尼王輪次上風輪名種種普莊嚴能持其上光明輪華次上風輪名普清淨能持其上一切華焰師子座次上風輪名聲徧十方能持其上一切珠王幢次上風輪名一切寶光明能持其上一切摩尼王樹華次上風輪名速疾普持能持其上一切香摩尼須彌雲次上風輪名種種宮殿遊行能持其上一切寶色香臺雲諸佛子彼須彌山微塵數風輪最在上者名殊勝威光藏能持普光摩尼莊嚴香水海此香水海有大蓮華名種種光明藥香幢華藏莊嚴世界海住在其中四方均平清淨堅固金剛輪山周帀圍遶地海眾樹各有區別是時普賢菩薩欲重宣其義承佛神力觀察十方而說頌言。

世尊往昔於諸有	微塵佛所修淨業
故獲種種寶光明	華藏莊嚴世界海
廣大悲雲徧一切	捨身無量等剎塵
以昔劫海修行力	今此世界無諸垢
放大光明徧住空	風力所持無動搖
佛藏摩尼普嚴飾	如來願力令清淨
普散摩尼妙藏華	以昔願力空中住
種種堅固莊嚴海	光雲垂布滿十方

諸摩尼中菩薩雲	普詣十方光熾然
光燄成輪妙華飾	法界周流靡不徧
一切寶中放淨光	其光普照眾生海
十方國土皆周徧	咸令出苦向菩提
寶中佛數等眾生	從其毛孔出化形
梵主帝釋輪王等	一切眾生及諸佛
化現光明等法界	光中演說諸佛名
種種方便示調伏	普應羣心無不盡
華藏世界所有塵	一一塵中見法界
寶光現佛如雲集	此是如來剎自在
廣大願雲周法界	於一切劫化羣生
普賢智地行悉成	所有莊嚴從此出

【論】第一爾時普賢菩薩已下長行有二十四行經并二十行頌明歎佛往因行菩薩行修淨大願力報得風輪以持華藏世界及眾莊嚴。

【經】爾時普賢菩薩復告大眾言諸佛子此華藏莊嚴世界海大輪圍山住日珠王蓮華之上栴檀摩尼以為其身威德寶王以為其峯妙香摩尼而作其輪燄藏金剛所共成立一切香水流注其間眾寶為林妙華開敷香艸布地明珠開飾種種香華處處盈滿摩尼為網周帀垂覆如是等有世界海微塵數眾妙莊嚴爾時普賢菩薩欲重宣其義承佛神力觀察十方而說頌言。

世界大海無有邊	寶輪清淨種種色
所有莊嚴盡奇妙	此由如來神力起
摩尼寶輪妙香輪	及以真珠燈燄輪
種種妙寶為嚴飾	清淨輪圍所安住
堅固摩尼以為藏	閻浮檀金作嚴飾
舒光發燄徧十方	內外映徹皆清淨

金剛摩尼所集成	復雨摩尼諸妙寶
其實精奇非一種	放淨光明普嚴麗
香水分流無量色	散諸華寶及栴檀
眾蓮競發如衣布	珍艸羅生悉芬馥
無量寶樹普莊嚴	開華發藥色熾然
種種名衣在其內	光雲四照常圓滿
無量無邊大菩薩	執蓋焚香充法界
悉發一切妙音聲	普轉如來正法輪
諸摩尼樹寶栴成	一一寶栴現光明
毗盧遮那清淨身	悉入其中普令見
諸莊嚴中現佛身	無邊色相無央數
悉往十方無不徧	所化眾生亦無限
一切莊嚴出妙音	演說如來本願輪
十方所有淨刹海	佛自在力咸令徧

【論】二爾時已下有八行半經并二十行頌明歎蓮華之上寶輪圍山具眾嚴飾由如來神力所生。

【經】爾時普賢菩薩復告大眾言諸佛子此世界海大輪圍山內所有大地一切皆以金剛所成堅固莊嚴不可沮壞清淨平坦無有高下摩尼為輪眾寶為藏一切眾生種種形狀諸摩尼寶以為間錯散眾寶栴布以蓮華香藏摩尼分置其間諸莊嚴具充徧如雲三世一切諸佛國土所有莊嚴而為校飾摩尼妙寶以為其網普現如來所有境界如天帝網於中布列諸佛子此世界海地有如是等世界海微塵數莊嚴爾時普賢菩薩欲重宣其義承佛神力觀察十方而說頌言。

其地平坦極清淨	安住堅固無能壞
摩尼處處以為嚴	眾寶於中相間錯
金剛為地甚可悅	寶輪寶網具莊嚴



蓮華布上皆圓滿	妙衣彌覆悉周徧
菩薩天冠寶纓珞	悉布其地為嚴好
栴檀摩尼普散中	咸舒離垢妙光明
寶華發燄出妙光	光燄如雲照一切
散此妙華及眾寶	普覆於地為嚴飾
密雲興布滿十方	廣大光明無有盡
普至十方一切土	演說如來甘露法
一切佛願摩尼內	普現無邊廣大劫
最勝智者昔所行	於此寶中無不見
其地所有摩尼寶	一切佛刹咸來入
彼諸佛刹一一塵	一切國土亦入中
妙寶莊嚴華藏界	菩薩遊行徧十方
演說大士諸弘願	此是道場自在力
摩尼妙寶莊嚴地	放淨光明備眾飾
充滿法界等虛空	佛力自然如是現
諸有修治普賢願	入佛境界大智人
能知於此刹海中	如是一切諸神變

【論】三爾時已下十行半經并二十行頌歎輪圍山內平地金剛所成具足眾寶間錯其地華網莊嚴。

【經】爾時普賢菩薩復告大眾言諸佛子此世界海大地中有不可說佛刹微塵數香水海一切妙寶莊嚴其底妙香摩尼莊嚴其岸毗盧遮那摩尼寶王以為其網香水映徹具眾寶色充滿其中種種寶華旋布其上栴檀細末澄沍其下演佛言音放寶光明無邊菩薩持種種蓋現神通力一切世界所有莊嚴悉於中現十寶階陞行列分布十寶欄楯周帀圍遶四天下微塵數一切寶莊嚴芬陀利華敷榮水中不可說百千億那由他數十寶尸羅幢恒河沙數一切寶衣鈴網幢恒河沙數無邊色相寶華樓閣百千

億那由他數十寶蓮華城四天下微塵數眾寶樹林寶燄摩尼以  
為其網恒河沙數栴檀香諸佛言音光燄摩尼不可說百千億那  
由他數眾寶垣牆悉共圍遶周徧嚴飾爾時普賢菩薩欲重宣其  
義承佛神力觀察十力而說頌言。

此世界中大地上	有香水海摩尼嚴
清淨妙寶布其底	安住金剛不可壞
香藏摩尼積成岸	日燄珠輪布若雲
蓮華妙寶為纓珞	處處莊嚴淨無垢
香水澄淨具眾色	寶華旋布放光明
普震音聲聞遠近	以佛威神演妙法
階陛莊嚴具眾寶	復以摩尼為間飾
周迴欄楯悉寶成	蓮華珠網如雲布
摩尼寶樹列成行	華藥敷榮光赫奕
種種樂音恒競奏	佛神通力令如是
種種妙寶芬陀利	敷布莊嚴香水海
香燄光明無暫停	廣大圓滿皆充徧
明珠寶幢恒熾盛	妙衣垂布為嚴飾
摩尼鈴網演法音	令其聞者趣佛智
妙寶蓮華作城郭	眾彩摩尼所嚴瑩
真珠雲影布四隅	如是莊嚴香水海
垣牆繚繞皆周帀	樓閣相望布其上
無量光明恒熾然	種種莊嚴清淨海
毗盧遮那於往昔	種種剎海皆嚴淨
如是廣大無有邊	悉是如來自在力

【論】四爾時已下一十六行半經二十行頌明金剛寶地有  
眾香水海眾寶為底妙香嚴岸具眾莊飾。

【經】爾時普賢菩薩復告大眾言諸佛子一一香水海各有四天下微塵數香水河右旋圍遶一切皆以金剛為岸淨光摩尼以為嚴飾常現諸佛寶色光雲及諸眾生所有言音其河所有漩澓之處一切諸佛所修因行種種形相皆從中出摩尼為網眾寶鈴鐸諸世界海所有莊嚴悉於中現摩尼寶雲以覆其上其雲普現華藏世界毗盧遮那十方化佛及一切佛神通之事復出妙音稱揚三世佛菩薩名其香水中常出一切寶焰光雲相續不絕若廣說者一一河各有世界海微塵數莊嚴爾時普賢菩薩欲重宣其義承佛神力觀察十方而說頌言。

清淨香流滿大河	金剛妙寶為其岸
寶糝為輪布其地	種種嚴飾皆珍好
寶階行列妙莊嚴	欄楯周迴悉殊麗
真珠為藏眾華飾	種種纓鬘共垂下
香水寶光清淨色	恒吐摩尼競疾流
眾華隨浪皆搖動	悉奏樂音宣妙法
細糝栴檀作泥塗	一切妙寶同洄澓
香藏氤氳布在中	發焰流芬普周徧
河中出生諸妙寶	悉放光明色熾然
其光布影成臺座	華蓋珠纓皆具足
摩尼王中現佛身	光明普照十方刹
以此為輪嚴飾地	香水映徹常盈滿
摩尼為網金為鐸	徧覆香河演佛音
克宣一切菩提道	及以普賢之妙行
寶岸摩尼極清淨	恒出如來本願音
一切諸佛曩所行	其音普演皆令見
其河所有漩流處	菩薩如雲常踊出
悉往廣大刹土中	乃至法界咸充滿

清淨珠王布若雲      一切香河悉彌覆  
其珠等佛眉間相      炳然顯現諸佛影

【論】五爾時已下十二行半經二十行頌明各各香海具眾  
香河其河底岸具諸嚴飾右旋遶海。

【經】爾時普賢菩薩復告大眾言諸佛子此諸香水河兩間  
之地悉以妙寶種種莊嚴一一各有四天下微塵數眾寶莊嚴芬  
陀利華周帀徧滿各有四天下微塵數眾寶樹林次第行列一一  
樹中恒出一切諸莊嚴雲摩尼寶王照耀其間種種華香處處盈  
滿其樹復出微妙音聲說諸如來一切劫中所修大願復散種種  
摩尼寶王充徧其地所謂蓮華輪摩尼寶王香燄光雲摩尼寶王  
種種嚴飾摩尼寶王現不可思議莊嚴色摩尼寶王日光明衣藏  
摩尼寶王周徧十方普垂布光網雲摩尼寶王現一切諸佛神變  
摩尼寶王現一切眾生業報海摩尼寶王如是等有世界海微塵  
數其香水河兩間之地一一悉具如是莊嚴爾時普賢菩薩欲重  
宣其義承佛神力觀察十方而說頌言。

其地平坦極清淨	真金摩尼共嚴飾
諸樹行列蔭其中	聳榦垂條萃若雲
枝條妙寶所莊嚴	華燄成輪光四照
摩尼為果如雲布	普使十方常現覩
摩尼布地皆充滿	眾華寶林共莊嚴
復以摩尼作宮殿	悉現眾生諸影像
諸佛影像摩尼王	普散其地靡不周
如是赫奕徧十方	一一塵中咸見佛
妙寶莊嚴善分布	真珠燈網相間錯
處處悉有摩尼輪	一一皆現佛神通
眾寶莊嚴放大光	光中普現諸化佛
一周行靡不徧	悉以十方廣開演

摩尼妙寶芬陀利	一切水中咸徧滿
其華種種各不同	悉現光明無盡歇
三世所有諸莊嚴	摩尼果中皆顯現
體性無生不可取	此是如來自在力
此地一切莊嚴中	悉現如來廣大身
彼亦不來亦不去	佛昔願力皆令見
此地一一微塵中	一切佛子修行道
各見所記當來剎	隨其意樂悉清淨

【論】六爾時已下十五行半經二十行頌明香河兩間平地具樹華果眾妙莊嚴芬陀利華此云百葉白蓮華。

【經】爾時普賢菩薩復告大眾言諸佛子諸佛世尊世界海莊嚴不可思議何以故諸佛子此華藏莊嚴世界海一切境界一一皆以世界海微塵數清淨功德之所莊嚴爾時普賢菩薩欲重宣其義承佛神力觀察十方而說頌言。

此剎海中一切處	悉以眾寶為嚴飾
發燄騰空布若雲	光明洞徹常彌覆
摩尼吐雲無有盡	十方佛影於中現
神通變化靡暫停	一切菩薩咸來集
一切摩尼演佛音	其音美妙不思議
毗盧遮那昔所行	於此寶內恒聞見
清淨光明徧照尊	莊嚴具中皆現影
變化分身眾圍遶	一切剎海咸周徧
所有化佛皆如幻	求其來處不可得
以佛境界威神力	一切剎中如是現
如來自在神通事	悉徧十方諸國土
以此剎海淨莊嚴	一切皆於寶中見
十方所有諸變化	一切皆如鏡中像

但由如來昔所行	神通願力而出生
若有能修普賢行	入於菩薩勝智海
能於一切微塵中	普現其身淨眾刹
不可思議億大劫	親近一切諸如來
如其一切之所行	一刹那中悉能現
諸佛國土如虛空	無等無生無有相
為利眾生普嚴淨	本願力故住其中

【論】七爾時已下五行經二十行頌都結總歎此世界海如來無量功德莊嚴。

## 大方廣佛新華嚴經合論卷第二十一

音切

洄

(戶灰切)。

復

(伏音)。

壇

(徒干切)。

埵

(常演切)。

佉

(丘伽切)。

芬

(分音)。

馥

(房六切)。

沮

(才與切)。

暎

(於命切)。

徹

(丑列切)。

麗

(力制切)。

藥

(如水切)。

澄

(直陵切)。

𩚑

(魚斬切)。

陞

(旁禮切)。

欄

(勒丹切)。

楯

(述尹切)。

渟

(笛令切)。

競

(巨敬切)。

奏

(則候切)。

垣

(于元切)。

牆

(才良切)。

繚

(了音)。

繞

(而沼切)。

𠂔

(萬音)。

歇

(許揭切)。

𠂔

(蒲沒切)。

縛

(符郭切)。

慣

(古患切)。



# 大方廣佛新華嚴經合論卷第二十二

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

## 華藏世界品第五之二

【經】爾時普賢菩薩復告大眾言諸佛子此中有何等世界住我今當說諸佛子此十不可說佛刹微塵數香水海中有十不可說佛刹微塵數世界種安住一一世界種復有十不可說佛刹微塵數世界諸佛子彼諸世界種於世界海中各各依住各各形狀各各體性各各方所各各趣入各各莊嚴各各分齊各各行列各各無差別各各力加持諸佛子此世界種或有依大蓮華海住或有依無邊色寶華海住或有依一切真珠藏寶纓珞海住或有依香水海住或有依一切華海住或有依摩尼寶網海住或有依旋流光海住或有依菩薩寶莊嚴冠海住或有依種種眾生身海住或有依一切佛音聲摩尼王海住如是等若廣說者有世界海微塵數諸佛子彼一切世界種或有作須彌山形或作江河形或作迴轉形或作漩流形或作輪輞形或作壇墀形或作樹林形或作樓閣形或作山幢形或作普方形或作胎藏形或作蓮華形或作佉迦形或作眾生身形或作雲形或作諸佛相好形或作圓滿光明形或作種種珠網形或作一切門闥形或作諸莊嚴具形如是等若廣說者有世界海微塵數諸佛子彼一切世界種或有以十方摩尼雲為體或有以眾色燄為體或有以諸光明為體或有以寶香燄為體或有以一切寶莊嚴多羅華為體或有以菩薩影像為體或有以諸佛光明為體或有以佛色相為體或有以一

寶光為體或有以眾寶光為體或有以一切眾生福德海音聲為體或有以一切眾生諸業海音聲為體或有以一切佛境界清淨音聲為體或有以一切菩薩大願海音聲為體或有以一切佛方便音聲為體或有以一切刹莊嚴具成壞音聲為體或有以無邊佛音聲為體或有以一切佛變化音聲為體或有以一切眾生善音聲為體或有以一切佛功德海清淨音聲為體如是等若廣說者有世界海微塵數爾時普賢菩薩欲重宣其義承佛神力觀察十方而說頌言。

刹種堅固妙莊嚴	廣大清淨光明藏
依止蓮華寶海住	或有住於香海等
須彌成樹壇墀形	一切刹種徧十方
種種莊嚴形相別	各各布列而安住
或有體是淨光明	或是華藏及寶雲
或有刹種燄所成	安住摩尼不壞藏
燈雲燄彩光明等	種種無邊清淨色
或有言音以為體	是佛所演不思議
或是願力所出音	神變音聲為體性
一切眾生大福業	佛功德音亦如是
刹種一一差別門	不可思議無有盡
如是十方皆徧滿	廣大莊嚴現神力
十方所有廣大刹	悉來入此世界種
雖見十方普入中	而實無來無所入
以一刹種入一切	一切入一亦無餘
體相如本無差別	無等無量悉周徧
一切國土微塵中	普見如來在其所
願海言音若雷震	一切眾生悉調伏
佛身周徧一切刹	無數菩薩亦充滿

如來自在無等倫 普化一切諸含識

【論】八爾時已下三十八行經二十行頌明世界種體性形狀依住。

【經】爾時普賢菩薩復告大眾言諸佛子此十不可說佛刹微塵數香水海在華藏莊嚴世界海中如天帝網分布而住諸佛子此最中央香水海名無邊妙華光以現一切菩薩形摩尼王幢為底出大蓮華名一切香摩尼王莊嚴有世界種而住其上名普照十方熾然寶光明以一切莊嚴具為體有十不可說佛刹微塵數世界於中布列其最下方有世界名最勝光徧照以一切金剛莊嚴光曜輪為際依眾寶摩尼華而住其狀猶如摩尼寶形一切寶華莊嚴雲彌覆其上佛刹微塵數世界周帀圍遶種種安住種種莊嚴佛號淨眼離垢燈此上過佛刹微塵數世界有世界名種種香蓮華妙莊嚴以一切莊嚴具為際依寶蓮華網而住其狀猶如師子之座一切寶色珠帳雲彌覆其上二佛刹微塵數世界周帀圍遶佛號師子光勝照此上過佛刹微塵數世界有世界名一切寶莊嚴普照光以香風輪為際依種種寶華纓珞住其形八隅妙光摩尼日輪雲而覆其上三佛刹微塵數世界周帀圍遶佛號淨光智勝幢此上過佛刹微塵數世界有世界名種種光明華莊嚴以一切寶王為際依眾色金剛尸羅幢海住其狀猶如摩尼蓮華以金剛摩尼寶光雲而覆其上四佛刹微塵數世界周帀圍遶純一清淨佛號金剛光明無量精進力善出現此上過佛刹微塵數世界有世界名普放妙華光以一切寶鈴莊嚴網為際依一切樹林莊嚴寶輪網海住其形普方而多有隅角梵音摩尼王雲以覆其上五佛刹微塵數世界周帀圍遶佛號香光喜力海此上過佛刹微塵數世界有世界名淨妙光明以寶王莊嚴幢為際依金剛宮殿海住其形四方摩尼輪髻帳雲而覆其上六佛刹微塵數世界周帀圍遶佛號普光自在幢此上過佛刹微塵數世界有世

界名眾華燄莊嚴以種種華莊嚴為際依一切寶色燄海住其狀  
猶如樓閣之形一切寶色衣真珠欄楯雲而覆其上七佛刹微塵  
數世界周帀圍遶純一清淨佛號歡喜海功德名稱自在光此上  
過佛刹微塵數世界有世界名出生威力地以出一切聲摩尼王  
莊嚴為際依種種寶色蓮華座虛空海住其狀猶如因陀羅網以  
無邊色華網雲而覆其上八佛刹微塵數世界周帀圍遶佛號廣  
大名稱智海幢此上過佛刹微塵數世界有世界名出妙音聲以  
心王摩尼莊嚴輪為際依恒出一切妙音聲莊嚴雲摩尼王海住  
其狀猶如梵天身形無量寶莊嚴師子座雲而覆其上九佛刹微  
塵數世界周帀圍遶佛號清淨月光明相無能摧伏此上過佛刹  
微塵數世界有世界名金剛幢以無邊莊嚴真珠藏寶纓珞為際  
依一切莊嚴寶師子座摩尼海住其狀周圓十須彌山微塵數一  
切香摩尼華須彌雲彌覆其上十佛刹微塵數世界周帀圍遶純  
一清淨佛號一切法海最勝王此上過佛刹微塵數世界有世界  
名恒出現帝青寶光明以極堅牢不可壞金剛莊嚴為際依種種  
殊異華海住其狀猶如半月之形諸天寶帳雲而覆其上十一佛  
刹微塵數世界周帀圍遶佛號無量功德法此上過佛刹微塵數  
世界有世界名光明照耀以普光莊嚴為際依華旋香水海住狀  
如華旋種種衣雲而覆其上十二佛刹微塵數世界周帀圍遶佛  
號超釋梵此上過佛刹微塵數世界至此世界名娑婆以金剛莊  
嚴為際依種種色風輪所持蓮華網住狀如虛空以普圓滿天宮  
殿莊嚴虛空雲而覆其上十三佛刹微塵數世界周帀圍遶其佛  
即是毗盧遮那如來世尊此上過佛刹微塵數世界有世界名寂  
靜離塵光以一切寶莊嚴為際依種種寶衣海住其狀猶如執金  
剛形無邊色金剛雲而覆其上十四佛刹微塵數世界周帀圍遶  
佛號徧法界勝音此上過佛刹微塵數世界有世界名眾妙光明  
燈以一切莊嚴帳為際依淨華網海住其狀猶如卍字之形摩尼

樹香水海雲而覆其上十五佛刹微塵數世界周帀圍遶純一清淨佛號不可摧伏力普照幢此上過佛刹微塵數世界有世界名清淨光徧照以無盡寶雲摩尼王為際依種種香燄蓮華海住其狀猶如龜甲之形圓光摩尼輪栴檀雲而覆其上十六佛刹微塵數世界周帀圍遶佛號清淨日功德眼此上過佛刹微塵數世界有世界名寶莊嚴藏以一切眾生形摩尼王為際依光明藏摩尼王海住其形八隅以一切輪圍山寶莊嚴華樹網彌覆其上十七佛刹微塵數世界周帀圍遶佛號無礙智光明徧照十方此上過佛刹微塵數世界有世界名離塵以一切殊妙相莊嚴為際依眾妙華師子座海住狀如珠纓以一切寶香摩尼王圓光雲而覆其上十八佛刹微塵數世界周帀圍遶純一清淨佛號無量方便最勝幢此上過佛刹微塵數世界有世界名清淨光普照以出無盡寶雲摩尼王為際依無量色香燄須彌山海住其狀猶如寶華旋布以無邊色光明摩尼王帝青雲而覆其上十九佛刹微塵數世界周帀圍遶佛號普照法界虛空光此上過佛刹微塵數世界有世界名妙寶燄以普光明日月寶為際依一切諸天形摩尼王海住其狀猶如寶莊嚴具以一切寶衣幢雲及摩尼燈藏網而覆其上二十佛刹微塵數世界周帀圍遶純一清淨佛號福德相光明諸佛子此徧照十方熾然寶光明世界種有如是等不可說佛刹微塵數廣大世界各各所依住各各形狀各各體性各各方面各各趣入各各莊嚴各各分齊各各行列各各無差別各各力加持周帀圍遶所謂十佛刹微塵數迴轉形世界十佛刹微塵數江河形世界十佛刹微塵數漩流形世界十佛刹微塵數輪輞形世界十佛刹微塵數壇墀形世界十佛刹微塵數樹林形世界十佛刹微塵數樓觀形世界十佛刹微塵數尸羅幢形世界十佛刹微塵數普方形世界十佛刹微塵數胎藏形世界十佛刹微塵數蓮華形世界十佛刹微塵數佉勒迦形世界十佛刹微塵數種種眾生

形世界十佛刹微塵數佛相形世界十佛刹微塵數圓光形世界十佛刹微塵數雲形世界十佛刹微塵數網形世界十佛刹微塵數門闢形世界如是等有不可說佛刹微塵數此一一世界各有十佛刹微塵數廣大世界周帀圍遶此諸世界一一復有如上所說微塵數世界而為眷屬如是所說一切世界皆在此無邊妙華光香水海及圍遶此海香水河中。

【論】九爾時以下直至卷末及初都結諸世界種於此大蓮華上分布而住并別舉此中心華藏世界海有世界種名普照十方熾然寶光明上下二十重世界於中大意如前已釋。

【經】爾時普賢菩薩復告大眾言諸佛子此無邊妙華光香水海東次有香水海名離垢燄藏出大蓮華名一切香摩尼王妙莊嚴有世界種而住其上名徧照刹旋以菩薩行吼音為體此中最下方有世界名宮殿莊嚴幢其形四方依一切寶莊嚴海住蓮華光網雲彌覆其上佛刹微塵數世界圍遶純一清淨佛號眉間光徧照此上過佛刹微塵數世界有世界名德華藏其形周圓依一切寶華藥海住真珠幢師子座雲彌覆其上二佛刹微塵數世界圍遶佛號一切無邊法海慧此上過佛刹微塵數世界有世界名善變化妙香輪形如金剛依一切寶莊嚴鈴網海住種種莊嚴圓光雲彌覆其上三佛刹微塵數世界圍遶佛號功德相光明普照此上過佛刹微塵數世界有世界名妙色光明其狀猶如摩尼寶輪依無邊色寶香水海住普光明真珠樓閣雲彌覆其上四佛刹微塵數世界圍遶純一清淨佛號善眷屬出興徧照此上過佛刹微塵數世界有世界名善蓋覆狀如蓮華依金剛香水海住離塵光明香水雲彌覆其上五佛刹微塵數世界圍遶佛號法喜無盡慧此上過佛刹微塵數世界有世界名尸利華光輪其形三角依一切堅固寶莊嚴海住菩薩摩尼冠光明雲彌覆其上六佛刹微塵數世界圍遶佛號清淨普光明此上過佛刹微塵數世界有

世界名寶蓮華莊嚴形如半月依一切蓮華莊嚴海住一切寶華雲彌覆其上七佛刹微塵數世界圍遶純一清淨佛號功德華清淨眼此上過佛刹微塵數世界有世界名無垢燄莊嚴其狀猶如寶燈行列依寶燄藏海住常雨香水種種身雲彌覆其上八佛刹微塵數世界圍遶佛號慧力無能勝此上過佛刹微塵數世界有世界名妙梵音形如卍字依寶衣幢海住一切華莊嚴帳雲彌覆其上九佛刹微塵數世界圍遶佛號廣大目如空中淨月此上過佛刹微塵數世界有世界名微塵數音聲其狀猶如因陀羅網依一切寶水海住一切樂音寶蓋雲彌覆其上十佛刹微塵數世界圍遶純一清淨佛號金色須彌燈此上過佛刹微塵數世界有世界名寶色莊嚴形如卍字依帝釋形寶王海住日光明華雲彌覆其上十一佛刹微塵數世界圍遶佛號迴照法界光明智此上過佛刹微塵數世界有世界名金色妙光其狀猶如廣大城郭依一切寶莊嚴海住道場寶華雲彌覆其上十二佛刹微塵數世界圍遶佛號寶燈普照幢此上過佛刹微塵數世界有世界名徧照光明輪狀如華旋依寶衣旋海住佛音聲寶王樓閣雲彌覆其上十三佛刹微塵數世界圍遶純一清淨佛號蓮華燄徧照此上過佛刹微塵數世界有世界名寶藏莊嚴狀如四洲依寶纓珞須彌住寶燄摩尼雲彌覆其上十四佛刹微塵數世界圍遶佛號無盡福開敷華此上過佛刹微塵數世界有世界名如鏡像普現其狀猶如阿脩羅身依金剛蓮華海住寶冠光影雲彌覆其上十五佛刹微塵數世界圍遶佛號甘露音此上過佛刹微塵數世界有世界名栴檀月其形八隅依金剛栴檀寶海住真珠華摩尼雲彌覆其上十六佛刹微塵數世界圍遶純一清淨佛號最勝法無等智此上過佛刹微塵數世界有世界名離垢光明其狀猶如香水漩流依無邊色寶光海住妙香光明雲彌覆其上十七佛刹微塵數世界圍遶佛號徧照虛空光明音此上過佛刹微塵數世界有世界

名妙華莊嚴其狀猶如旋遶之形依一切華海住一切樂音摩尼雲彌覆其上十八佛刹微塵數世界圍遶佛號普現勝光明此上過佛刹微塵數世界有世界名勝音莊嚴其狀猶如師子之座依金師子座海住眾色蓮華藏師子座雲彌覆其上十九佛刹微塵數世界圍遶佛號無邊功德稱普光明此上過佛刹微塵數世界有世界名高勝燈狀如佛掌依寶衣服香幢海住日輪普照寶王樓閣雲彌覆其上二十佛刹微塵數世界圍遶統一清淨佛號普照虛空燈諸佛子此離垢藏香水海南次有香水海名無盡光明輪世界種名佛幢莊嚴以一切佛功德海音聲為體此中最下方有世界名愛見華狀如寶輪依摩尼樹藏寶王海住化現菩薩形寶藏雲彌覆其上佛刹微塵數世界圍遶統一清淨佛號蓮華光歡喜面此上過佛刹微塵數世界有世界名妙音佛號須彌寶燈此上過佛刹微塵數世界有世界名眾寶莊嚴光佛號法界音聲幢此上過佛刹微塵數世界有世界名香藏金剛佛號光明音此上過佛刹微塵數世界有世界名淨妙音佛號最勝精進力此上過佛刹微塵數世界有世界名寶蓮華莊嚴佛號法城雲雷音此上過佛刹微塵數世界有世界名與安樂佛號大名稱智慧燈此上過佛刹微塵數世界有世界名無垢網佛號師子光功德海此上過佛刹微塵數世界有世界名華林幢徧照佛號大智蓮華光此上過佛刹微塵數世界有世界名無量莊嚴佛號普眼法界幢此上過佛刹微塵數世界有世界名普光明寶莊嚴佛號勝智大商主此上過佛刹微塵數世界有世界名華王佛號月光幢此上過佛刹微塵數世界有世界名離垢藏佛號清淨覺此上過佛刹微塵數世界有世界名寶光明佛號一切智虛空燈此上過佛刹微塵數世界有世界名出生寶纓珞佛號諸度福海相光明此上過佛刹微塵數世界有世界名妙輪徧覆佛號調伏一切染著心令歡喜此上過佛刹微塵數世界有世界名寶華幢佛號廣博



功德音大名稱此上過佛刹微塵數世界有世界名無量莊嚴佛  
號平等智光明功德海此上過佛刹微塵數世界有世界名無盡  
光莊嚴幢狀如蓮華依一切寶網海住蓮華光摩尼網彌覆其上  
二十佛刹微塵數世界圍遶純一清淨佛號法界淨光明諸佛子  
此無盡光明輪香水海右旋次有香水海名金剛寶燄光世界種  
名佛光莊嚴藏以稱說一切如來名音聲為體此中最下方有世  
界名寶燄蓮華其狀猶如摩尼色眉間毫相依一切寶色水漩海  
住一切莊嚴樓閣雲彌覆其上佛刹微塵數世界圍遶純一清淨  
佛號無垢寶光明此上過佛刹微塵數世界有世界名光燄藏佛  
號無礙自在智慧光此上過佛刹微塵數世界有世界名寶輪妙  
莊嚴佛號一切寶光明此上過佛刹微塵數世界有世界名栴檀  
樹華幢佛號清淨智光明此上過佛刹微塵數世界有世界名佛  
刹妙莊嚴佛號廣大歡喜音此上過佛刹微塵數世界有世界名  
妙光莊嚴佛號法界自在智此上過佛刹微塵數世界有世界名  
無邊相佛號無礙智此上過佛刹微塵數世界有世界名燄雲幢  
佛號演說不退輪此上過佛刹微塵數世界有世界名眾寶莊嚴  
清淨輪佛號離垢華光明此上過佛刹微塵數世界有世界名廣  
大出離佛號無礙智日眼此上過佛刹微塵數世界有世界名妙  
莊嚴金剛座佛號法界智大光明此上過佛刹微塵數世界有世  
界名智慧普莊嚴佛號智炬光明王此上過佛刹微塵數世界有  
世界名蓮華池深妙音佛號一切智普照此上過佛刹微塵數世  
界有世界名種種色光明佛號普光華王雲此上過佛刹微塵數  
世界有世界名妙寶幢佛號功德光此上過佛刹微塵數世界有  
世界名摩尼華毫相光佛號普音雲此上過佛刹微塵數世界有  
世界名甚深海佛號十方眾生主此上過佛刹微塵數世界有世  
界名須彌光佛號法界普智音此上過佛刹微塵數世界有世界  
名金蓮華佛號福德藏普光明此上過佛刹微塵數世界有世界

名寶莊嚴藏形如卍字依一切香摩尼莊嚴樹海住清淨光明雲  
彌覆其上二十佛刹微塵數世界圍遶純一清淨佛號大變化光  
明網諸佛子此金剛寶藏香水海右旋次有香水海名帝青寶莊  
嚴世界種名光照十方依一切妙莊嚴蓮華香雲住以無邊佛音  
聲為體於此最下方有世界名十方無盡色藏輪其狀周迴有無  
量角依無邊色一切寶藏海住因陀羅網而覆其上佛刹微塵數  
世界圍遶純一清淨佛號蓮華眼光明徧照此上過佛刹微塵數  
世界有世界名淨妙莊嚴藏佛號無上慧大師子此上過佛刹微  
塵數世界有世界名出現蓮華座佛號徧照法界光明王此上過  
佛刹微塵數世界有世界名寶幢音佛號大功德普名稱此上過  
佛刹微塵數世界有世界名金剛寶莊嚴藏佛號蓮華日光明此  
上過佛刹微塵數世界有世界名因陀羅華月佛號法自在智慧  
幢此上過佛刹微塵數世界有世界名妙輪藏佛號大喜清淨音  
此上過佛刹微塵數世界有世界名妙音藏佛號大力善商主此  
上過佛刹微塵數世界有世界名清淨月佛號須彌光智慧力此  
上過佛刹微塵數世界有世界名無邊莊嚴相佛號方便願淨月  
光此上過佛刹微塵數世界有世界名妙華音佛號法海大願音  
此上過佛刹微塵數世界有世界名一切寶莊嚴佛號功德寶光  
明相此上過佛刹微塵數世界有世界名堅固地佛號美音最勝  
天此上過佛刹微塵數世界有世界名普光善化佛號大精進寂  
靜慧此上過佛刹微塵數世界有世界名善守護莊嚴行佛號見  
者生歡喜此上過佛刹微塵數世界有世界名栴檀寶華藏佛號  
甚深不可動智慧光徧照此上過佛刹微塵數世界有世界名現  
種種色相海佛號普放不思議勝義王光明此上過佛刹微塵數  
世界有世界名化現十方大光明佛號勝功德威光無與等此上  
過佛刹微塵數世界有世界名須彌雲幢佛號極淨光明眼此上  
過佛刹微塵數世界有世界名蓮華徧照其狀周圍依無邊色眾

妙香摩尼海住一切乘莊嚴雲而覆其上二十佛刹微塵數世界  
圍遶純一清淨佛號解脫精進日諸佛子此帝青寶莊嚴香水海  
右旋次有香水海名金剛輪莊嚴底世界種名妙間錯因陀羅網  
普賢智所生音聲為體此中最下方有世界名蓮華網其狀猶如  
須彌山形依眾妙華山幢海住佛境界摩尼王帝網雲而覆其上  
佛刹微塵數世界圍遶純一清淨佛號法身普覺慧此上過佛刹  
微塵數世界有世界名無盡日光明佛號最勝大覺慧此上過佛  
刹微塵數世界有世界名普放妙光明佛號大福雲無盡力此上  
過佛刹微塵數世界有世界名樹華幢佛號無邊智法界音此上  
過佛刹微塵數世界有世界名真珠蓋佛號波羅蜜師子頻申此  
上過佛刹微塵數世界有世界名無邊音佛號一切智妙覺慧此  
上過佛刹微塵數世界有世界名普見樹峯佛號普現眾生前此  
上過佛刹微塵數世界有世界名師子帝網光佛號無垢日金色  
光燄雲此上過佛刹微塵數世界有世界名眾寶間錯佛號帝幢  
最勝慧此上過佛刹微塵數世界有世界名無垢光明地佛號一  
切力清淨月此上過佛刹微塵數世界有世界名恒出歎佛功德  
音佛號如虛空普覺慧此上過佛刹微塵數世界有世界名高猋  
藏佛號化現十方大雲幢此上過佛刹微塵數世界有世界名光  
嚴道場佛號無等智徧照此上過佛刹微塵數世界有世界名出  
生一切寶莊嚴佛號廣度眾生神通王此上過佛刹微塵數世界  
有世界名光嚴妙宮殿佛號一切義成廣大慧此上過佛刹微塵  
數世界有世界名離塵寂靜佛號不唐現此上過佛刹微塵數世  
界有世界名摩尼華幢佛號悅意吉祥音此上過佛刹微塵數世  
界有世界名普雲藏其狀猶如樓閣之形依種種宮殿香水海住  
一切寶燈雲彌覆其上二十佛刹微塵數世界圍遶純一清淨佛  
號最勝覺神通王諸佛子此金剛輪莊嚴底香水海右旋次有香  
水海名蓮華因陀羅網世界種名普現十方影依一切香摩尼莊

嚴蓮華住一切佛智光音聲為體此中最下方有世界名眾生海  
寶光明其狀猶如真珠之藏依一切摩尼纓珞海漩住水光明摩  
尼雲而覆其上佛刹微塵數世界圍遶純一清淨佛號不思議功  
德徧照月此上過佛刹微塵數世界有世界名妙香輪佛號無量  
力幢此上過佛刹微塵數世界有世界名妙光輪佛號法界光音  
覺悟慧此上過佛刹微塵數世界有世界名吼聲摩尼幢佛號蓮  
華光恒垂妙臂此上過佛刹微塵數世界有世界名極堅固輪佛  
號不退轉功德海光明此上過佛刹微塵數世界有世界名眾行  
光莊嚴佛號一切智普勝尊此上過佛刹微塵數世界有世界名  
師子座徧照佛號師子光無量力覺慧此上過佛刹微塵數世界  
有世界名寶燄莊嚴佛號一切法清淨智此上過佛刹微塵數世  
界有世界名無量燈佛號無憂相此上過佛刹微塵數世界有世  
界名常聞佛音佛號自然勝威光此上過佛刹微塵數世界有世  
界名清淨變化佛號金蓮華光明此上過佛刹微塵數世界有世  
界名普入十方佛號觀法界頻申慧此上過佛刹微塵數世界有  
世界名熾然燄佛號光燄樹緊那羅王此上過佛刹微塵數世界  
有世界名香光徧照佛號香燈善化王此上過佛刹微塵數世界  
有世界名無量華聚輪佛號普現佛功德此上過佛刹微塵數世  
界有世界名眾妙普清淨佛號一切法平等神通王此上過佛刹  
微塵數世界有世界名金光海佛號十方自在大變化此上過佛  
刹微塵數世界有世界名真珠華藏佛號法界寶光明不可思議  
慧此上過佛刹微塵數世界有世界名帝釋須彌師子座佛號勝  
力光此上過佛刹微塵數世界有世界名無邊寶普照其形四方  
依華林海住普雨無邊色摩尼王帝網而覆其上二十佛刹微塵  
數世界圍遶純一清淨佛號徧照世間最勝音。

## 大方廣佛新華嚴經合論卷第二十二

音切

輜

(网音)。

龜

(居為切)。

胎

(台音)。

商

(式羊切)。

噸

(頻音)。

摧

(昨回切)。

# 大方廣佛新華嚴經合論卷第二十三

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

## 華藏世界品第五之三

【經】諸佛子此蓮華因陀羅網香水海右旋次有香水海名積集寶香藏世界種名一切威德莊嚴以一切佛法輪音聲為體此中最下方有世界名種種出生形如金剛依種種金剛山幢住金剛寶光雲而覆其上佛刹微塵數世界圍遶純一清淨佛號蓮華眼此上過佛刹微塵數世界有世界名喜見音佛號生喜樂此上過佛刹微塵數世界有世界名寶莊嚴幢佛號一切智此上過佛刹微塵數世界有世界名多羅華普照佛號無垢寂妙音此上過佛刹微塵數世界有世界名變化光佛號清淨空智慧月此上過佛刹微塵數世界有世界名眾妙間錯佛號開示福德海密雲相此上過佛刹微塵數世界有世界名一切莊嚴具妙音聲佛號歡喜雲此上過佛刹微塵數世界有世界名蓮華池佛號名稱幢此上過佛刹微塵數世界有世界名一切寶莊嚴佛號嚩呬觀察眼此上過佛刹微塵數世界有世界名淨妙華佛號無盡金剛智此上過佛刹微塵數世界有世界名蓮華莊嚴城佛號日藏眼普光明此上過佛刹微塵數世界有世界名無量樹峯佛號一切法雷音此上過佛刹微塵數世界有世界名日光明佛號開示無量智此上過佛刹微塵數世界有世界名依止蓮華葉佛號一切福德山此上過佛刹微塵數世界有世界名風普持佛號日耀根此上過佛刹微塵數世界有世界名光明顯現佛號身光普照此上

過佛刹微塵數世界有世界名香鬘音金剛寶普照佛號最勝華  
開敷相此上過佛刹微塵數世界有世界名帝網莊嚴形如欄楯  
依一切莊嚴海住光燄樓閣雲彌覆其上二十佛刹微塵數世界  
圍遶純一清淨佛號示現無畏雲諸佛子此積集寶香藏香水海  
右旋次有香水海名寶莊嚴世界種名普無垢以一切微塵中佛  
刹神變聲為體此中最下方有世界名淨妙平坦形如寶身依一  
切寶光輪海住種種栴檀摩尼真珠雲彌覆其上佛刹微塵數世  
界圍遶純一清淨佛號難摧伏無等幢此上過佛刹微塵數世界  
有世界名熾然妙莊嚴佛號蓮華慧神通王此上過佛刹微塵數  
世界有世界名微妙相輪幢佛號十方大名稱無盡光此上過佛  
刹微塵數世界有世界名燄藏摩尼妙莊嚴佛號大智慧見聞皆  
歡喜此上過佛刹微塵數世界有世界名妙華莊嚴佛號無量力  
最勝智此上過佛刹微塵數世界有世界名出生淨微塵佛號超  
勝梵此上過佛刹微塵數世界有世界名普光明變化香佛號香  
象金剛大力勢此上過佛刹微塵數世界有世界名光明旋佛號  
義成善名稱此上過佛刹微塵數世界有世界名寶纓珞海佛號  
無比光徧照此上過佛刹微塵數世界有世界名妙華燈幢佛號  
究竟功德無礙慧燈此上過佛刹微塵數世界有世界名善巧莊  
嚴佛號慧日波羅蜜此上過佛刹微塵數世界有世界名栴檀華  
普光明佛號無邊慧法界音此上過佛刹微塵數世界有世界名  
帝網幢佛號燈光迴照此上過佛刹微塵數世界有世界名淨華  
輪佛號法界日光明此上過佛刹微塵數世界有世界名大威耀  
佛號無邊功德海法輪音此上過佛刹微塵數世界有世界名同  
安住寶蓮華池佛號開示入不可思議智此上過佛刹微塵數世  
界有世界名平坦地佛號功德寶光明王此上過佛刹微塵數世  
界有世界名香摩尼聚佛號無盡福德海妙莊嚴此上過佛刹微  
塵數世界有世界名微妙光明佛號無等力普徧音此上過佛刹

微塵數世界有世界名十方普堅固莊嚴照耀其形八隅依心王  
摩尼輪海住一切寶莊嚴帳雲彌覆其上二十佛刹微塵數世界  
圍遶純一清淨佛號普眼大明燈諸佛子此寶莊嚴香水海右旋  
次有香水海名金剛寶聚世界種名法界行以一切菩薩地方便  
法音聲為體此中最下方有世界名淨光照耀形如珠貫依一切  
寶色珠纓海住菩薩珠髻光明摩尼雲而覆其上佛刹微塵數世  
界圍遶純一清淨佛號最勝功德光此上過佛刹微塵數世界有  
世界名妙蓋佛號法自在慧此上過佛刹微塵數世界有世界名  
寶莊嚴師子座佛號大龍淵此上過佛刹微塵數世界有世界名  
出現金剛座佛號昇師子座蓮華臺此上過佛刹微塵數世界有  
世界名蓮華勝音佛號智光普開悟此上過佛刹微塵數世界有  
世界名善慣習佛號持地妙光王此上過佛刹微塵數世界有世  
界名喜樂音佛號法燈王此上過佛刹微塵數世界有世界名摩  
尼藏因陀羅網佛號不空見此上過佛刹微塵數世界有世界名  
眾妙地藏佛號燄身幢此上過佛刹微塵數世界有世界名金光  
輪佛號淨治眾生行此上過佛刹微塵數世界有世界名須彌山  
莊嚴佛號一切功德雲普照此上過佛刹微塵數世界有世界名  
眾樹形佛號寶華相淨月覺此上過佛刹微塵數世界有世界名  
無怖畏佛號最勝金光炬此上過佛刹微塵數世界有世界名大  
名稱龍王幢佛號觀等一切法此上過佛刹微塵數世界有世界  
名示現摩尼色佛號變化日此上過佛刹微塵數世界有世界名  
光燄燈莊嚴佛號寶蓋光徧照此上過佛刹微塵數世界有世界  
名香光雲佛號思惟慧此上過佛刹微塵數世界有世界名無怨  
讎佛號精進勝慧海此上過佛刹微塵數世界有世界名一切莊  
嚴具光明幢佛號普現悅意蓮華自在王此上過佛刹微塵數世  
界有世界名毫相莊嚴形如半月依須彌山摩尼華海住一切莊  
嚴熾盛光摩尼王雲而覆其上二十佛刹微塵數世界圍遶純一



清淨佛號清淨眼諸佛子此金剛寶聚香水海右旋次有香水海名天城寶堞世界種名燈燄光明以普示一切平等法輪音為體此中最下方有世界名寶月光燄輪形如一切莊嚴具依一切寶莊嚴華海住琉璃色師子座雲而覆其上佛刹微塵數世界圍遶純一清淨佛號日月自在光此上過佛刹微塵數世界有世界名須彌寶光佛號無盡法寶幢此上過佛刹微塵數世界有世界名眾妙光明幢佛號大華聚此上過佛刹微塵數世界有世界名摩尼光明華佛號人中最自在此上過佛刹微塵數世界有世界名普音佛號一切智徧照此上過佛刹微塵數世界有世界名大樹緊那羅音佛號無量福德自在龍此上過佛刹微塵數世界有世界名無邊淨光明佛號功德寶華光此上過佛刹微塵數世界有世界名最勝音佛號一切智莊嚴此上過佛刹微塵數世界有世界名眾寶間飾佛號寶燄須彌山此上過佛刹微塵數世界有世界名清淨須彌音佛號出現一切行光明此上過佛刹微塵數世界有世界名香水蓋佛號一切波羅蜜無礙海此上過佛刹微塵數世界有世界名師子華網佛號寶燄幢此上過佛刹微塵數世界有世界名金剛妙華燈佛號一切大願光此上過佛刹微塵數世界有世界名一切法光明地佛號一切法廣大真實義此上過佛刹微塵數世界有世界名真珠毼平坦莊嚴佛號勝慧光明網此上過佛刹微塵數世界有世界名琉璃華佛號寶積幢此上過佛刹微塵數世界有世界名無量妙光輪佛號大威力智海藏此上過佛刹微塵數世界有世界名明見十方佛號淨修一切功德幢此上過佛刹微塵數世界有世界名可愛樂梵音形如佛手依寶光網海住菩薩身一切莊嚴雲而覆其上二十佛刹微塵數世界圍遶純一清淨佛號普照法界無礙光。

【論】十此第九卷經都有十箇二十重世界種遶此中心世界種總都有十一箇二十重世界種於中意趣前已釋畢。

【經】爾時普賢菩薩復告大眾言諸佛子後離垢燄藏香水海東次有香水海名變化微妙身此海中有世界種名善布差別方次有香水海名金剛眼幢世界種名莊嚴法界橋次有香水海名種種蓮華妙莊嚴世界種名恒出十方變化次有香水海名無間寶王輪世界種名寶蓮華莖密雲次有香水海名妙香燄普莊嚴世界種名毗盧遮那變化行次有香水海名寶栴閻浮幢世界種名諸佛護念境界次有香水海名一切色熾然光世界種名最勝光徧照次有香水海名一切莊嚴具境界世界種名寶燄燈如是等不可說佛剎微塵數香水海其最近輪圍山香水海名頗梨地世界種名常放光明以世界海清淨劫音聲為體此中最下方有世界名可愛樂淨光幢佛剎微塵數世界圍遶純一清淨佛號最勝三昧精進慧此上過十佛剎微塵數世界與金剛幢世界齊等有世界名香莊嚴幢十佛剎微塵數世界圍遶純一清淨佛號無障礙法界燈此上過三佛剎微塵數世界與娑婆世界齊等有世界名放光藏佛號徧法界無障礙慧明此上過七佛剎微塵數世界至此世界種最上方有世界名最勝身香二十佛剎微塵數世界圍遶純一清淨佛號覺分華諸佛子彼無盡光明輪香水海外次有香水海名具足妙光世界種名徧無垢次有香水海名光耀蓋世界種名無邊普莊嚴次有香水海名妙寶莊嚴世界種名香摩尼軌度形次有香水海名出佛音聲世界種名善建立莊嚴次有香水海名香幢須彌藏世界種名光明徧滿次有香水海名栴檀妙光明世界種名華燄輪次有香水海名風力持世界種名寶燄雲幢次有香水海名帝釋身莊嚴世界種名真珠藏次有香水海名平坦嚴淨世界種名毗琉璃栴種種莊嚴如是等不可說佛剎微塵數香水海其最近輪圍山香水海名妙樹華世界種名出生諸方廣大剎以一切佛摧伏魔音為體此中最下方有世界名燄炬幢佛號世間功德海此上過十佛剎微塵數世界與金剛

幢世界齊等有世界名出生寶佛號師子力寶雲此上與娑婆世界齊等有世界名衣服幢佛號一切智海王於此世界種最上方有世界名寶纓珞師子光明佛號善變化蓮華幢諸佛子彼金剛燄光明香水海外次有香水海名一切莊嚴具瑩飾幢世界種名清淨行莊嚴次有香水海名一切寶華光耀海世界種名功德相莊嚴次有香水海名蓮華開敷世界種名菩薩摩尼冠莊嚴次有香水海名妙寶衣服世界種名淨珠輪次有香水海名可愛華徧照世界種名百光雲照耀次有香水海名徧虛空大光明世界種名寶光普照次有香水海名妙華莊嚴幢世界種名金月眼纓珞次有香水海名真珠香海藏世界種名佛光明次有香水海名寶輪光明世界種名善化現佛境界光明如是等不可說佛刹微塵數香水海其最近輪圍山香水海名無邊輪莊嚴底世界種名無量方差別以一切國土種種言說音為體此中最下方有世界名金剛華蓋佛號無盡相光明普門音此上過十佛刹微塵數世界有世界與金剛幢世界齊等名出生寶衣幢佛號福德雲大威勢此上與娑婆世界齊等有世界名眾寶具妙莊嚴佛號勝慧海於此世界種最上方有世界名日光明衣服幢佛號智日蓮華雲諸佛子彼帝青寶莊嚴香水海外次有香水海名阿脩羅宮殿世界種名香水光所持次有香水海名寶師子莊嚴世界種名徧示十方一切寶次有香水海名宮殿色光明雲世界種名寶輪妙莊嚴次有香水海名出大蓮華世界種名妙莊嚴徧照法界次有香水海名燈燄妙眼世界種名徧觀察十方變化次有香水海名不思議莊嚴輪世界種名十方光明普名稱次有香水海名寶積莊嚴世界種名燈光照耀次有香水海名清淨寶光明世界種名須彌無能為礙風次有香水海名寶衣欄楯世界種名如來身光明如是等不可說佛刹微塵數香水海其最近輪圍山香水海名樹莊嚴幢世界種名安住帝網以一切菩薩智地音聲為體此中最下

方有世界名妙金色佛號香燄勝威光此上過十佛刹微塵數世界與金剛幢世界齊等有世界名摩尼樹華佛號無礙普現此上與娑婆世界齊等有世界名毗琉璃妙莊嚴佛號法自在堅固慧於此世界種最上方有世界名梵音妙莊嚴佛號蓮華開敷光明王諸佛子彼金剛輪莊嚴底香水海外次有香水海名化現蓮華處世界種名國土平正次有香水海名摩尼光世界種名徧法界無迷惑次有香水海名眾妙香日摩尼世界種名普現十方次有香水海名恒納寶流世界種名普行佛言音次有香水海名無邊深妙音世界種名無邊方差別次有香水海名堅實積聚世界種名無量處差別次有香水海名清淨梵音世界種名普清淨莊嚴次有香水海名栴檀欄楯音聲藏世界種名迴出幢次有香水海名妙香寶王光莊嚴世界種名普現光明力諸佛子彼蓮華因陀羅網香水海外次有香水海名銀蓮華妙莊嚴世界種名普徧行次有香水海名毗琉璃竹密燄雲世界種名普出十方音次有香水海名十方光燄聚世界種名恒出變化分布十方次有香水海名出現真金摩尼幢世界種名金剛幢相次有香水海名平等大莊嚴世界種名法界勇猛旋次有香水海名寶華叢無盡光世界種名無邊淨光明次有香水海名妙金幢世界種名演說微密處次有香水海名光影徧照世界種名普莊嚴次有香水海名寂音世界種名現前垂布如是等不可說佛刹微塵數香水海其最近輪圍山香水海名密燄雲幢世界種名一切光莊嚴以一切如來道場眾會音為體於此最下方有世界名淨眼莊嚴佛號金剛月徧照十方此上過十佛刹微塵數世界與金剛幢世界齊等有世界名蓮華德佛號大精進善覺慧此上與娑婆世界齊等有世界名金剛密莊嚴佛號娑羅王幢此上過七佛刹微塵數世界有世界名淨海莊嚴佛號威德絕倫無能制伏諸佛子彼積集寶香藏香水海外次有香水海名一切寶光明徧照世界種名無垢稱莊

嚴次有香水海名眾寶華開敷世界種名虛空相次有香水海名吉祥幢徧照世界種名無礙光普莊嚴次有香水海名栴檀樹華世界種名普現十方旋次有香水海名出生妙色寶世界種名勝幢周徧行次有香水海名普生金剛華世界種名現不思議莊嚴次有香水海名心王摩尼輪嚴飾世界種名示現無礙佛光明次有香水海名積集寶纓珞世界種名淨除疑次有香水海名真珠輪普莊嚴世界種名諸佛願所流如是等不可說佛刹微塵數香水海其最近輪圍山香水海名閻浮檀寶藏輪世界種名普音幢以入一切智門音聲為體此中最下方有世界名華藥燄佛號精進施此上過十佛刹微塵數世界與金剛幢世界齊等有世界名蓮華光明幢佛號一切功德最勝心王此上過三佛刹微塵數世界與娑婆世界齊等有世界名十力莊嚴佛號善出現無量功德王於此世界種最上方有世界名摩尼香山幢佛號廣大善眼淨除疑諸佛子彼寶莊嚴香水海外次有香水海名持須彌光明藏世界種名出生廣大雲次有香水海名種種莊嚴大威力境界世界種名無礙淨莊嚴次有香水海名密布寶蓮華世界種名最勝燈莊嚴次有香水海名依止一切寶莊嚴世界種名日光明網藏次有香水海名眾多嚴淨世界種名寶華依處次有香水海名極聰慧行世界種名最勝形莊嚴次有香水海名持妙摩尼峯世界種名普淨虛空藏次有香水海名大光徧照世界種名帝青炬光明次有香水海名可愛摩尼珠充滿徧照世界種名普吼聲如是等不可說佛刹微塵數香水海其最近輪圍山香水海名出帝青寶世界種名周徧無差別以一切菩薩震吼聲為體此中最下方有世界名妙勝藏佛號最勝功德慧此上過十佛刹微塵數世界與金剛幢世界齊等有世界名莊嚴相佛號超勝大光明此上與娑婆世界齊等有世界名琉璃輪普莊嚴佛號須彌燈於此世界種最上方有世界名華幢海佛號無盡變化妙慧雲諸佛子彼金

剛寶聚香水海外次有香水海名崇飾寶埤垵世界種名秀出寶幢次有香水海名寶幢莊嚴世界種名現一切光明次有香水海名妙寶雲世界種名一切寶莊嚴光明徧照次有香水海名寶樹華莊嚴世界種名妙華間飾次有香水海名妙寶衣莊嚴世界種名光明海次有香水海名寶樹峯世界種名寶燄雲次有香水海名示現光明世界種名入金剛無所礙次有香水海名蓮華普莊嚴世界種名無邊岸海淵次有香水海名妙寶莊嚴世界種名普示現國土藏如是等不可說佛刹微塵數香水海其最近輪圍山香水海名不可壞海世界種名妙輪間錯蓮華場以一切佛力所出音為體此中最下方有世界名最妙香佛號變化無量塵數光此上過十佛刹微塵數世界與金剛幢世界齊等有世界名不思議差別莊嚴門佛號無量智此上與娑婆世界齊等有世界名十方光明妙華藏佛號師子眼光燄雲於此最上方有世界名海音聲佛號水天光燄門諸佛子彼天城寶堞香水海外次有香水海名燄輪赫弈光世界種名不可說種種莊嚴次有香水海名寶塵路世界種名普入無量旋次有香水海名具一切莊嚴世界種名寶光徧照次有香水海名布眾寶網世界種名安布深密次有香水海名妙寶莊嚴幢世界種名世界海明了音次有香水海名日宮清淨影世界種名徧入因陀羅網次有香水海名一切鼓樂美妙音世界種名圓滿平正次有香水海名種種妙莊嚴世界種名淨密光燄雲次有香水海名周徧寶燄燈世界種名隨佛本願種種形如是等不可說佛刹微塵數香水海其最近輪圍山香水海名積集纓珞衣世界種名化現妙衣以三世一切佛音聲為體此中最下方有香水海名因陀羅華藏世界名發生歡喜佛刹微塵數世界圍遶純一清淨佛號堅悟智此上過十佛刹微塵數世界與金剛幢世界齊等有世界名寶網莊嚴十佛刹微塵數世界圍遶純一清淨佛號無量歡喜光此上過三佛刹微塵數世界與娑

婆世界齊等有世界名寶蓮華師子座十三佛刹微塵數世界圍遶佛號最清淨不空聞此上過七佛刹微塵數世界至此世界種最上方有世界名寶色龍光明二十佛刹微塵數世界圍遶純一清淨佛號徧法界普照明。

【論】等十一此第十卷中總舉一百箇世界種圍遶中心十一箇二十重世界種布列而住近輪圍山十箇世界種上下四重高下與此中心十一箇世界種相似中間相去極遠自餘九十箇世界種不云重數大數有一百一十一箇世界種於中表意如前已釋。

【經】諸佛子如是十不可說佛刹微塵數香水海中有十不可說佛刹微塵數世界種皆依現一切菩薩形摩尼王幢莊嚴蓮華住各各莊嚴際無有間斷各各放寶色光明各各光明雲而覆其上各各莊嚴具各各劫差別各各佛出現各各演法海各各眾生徧充滿各各十方普趣入各各一切佛神力所加持此一一世界種中一切世界依種種莊嚴住遞相接連成世界網於華藏莊嚴世界海種種差別周徧建立爾時普賢菩薩欲重宣其義承佛威力而說頌言。

華藏世界海	法界等無別	莊嚴極清淨
安住於虛空	此世界海中	刹種難思議
一一皆自在	各各無雜亂	華藏世界海
刹種善安布	殊形異莊嚴	種種相不同
諸佛變化音	種種為其體	隨其業力現
刹種妙嚴飾	須彌山城網	水漩輪圍形
廣大蓮華開	彼彼互圍遶	山幢樓閣形
旋輪金剛形	如是不思議	廣大諸刹種
大海真珠燄	光網不思議	如是諸刹種
悉在蓮華住	一一諸刹種	光網不可說

光中現眾刹  
所有莊嚴具  
刹種不思議  
皆由大仙力  
或成或有壞  
有生亦有落  
譬如依樹林  
種種眾生住  
業力差別故  
隨心見眾色  
譬如大龍王  
出生諸國土  
眾生業力故  
畫師之所作  
眾生身各異  
莫不皆由業  
隨眾生心行  
周布蓮華網  
彼諸蓮華網  
種種眾生居  
由眾生煩惱  
無量諸刹種  
或有刹土中  
菩薩之所化  
種種妙嚴飾  
劫燒不思議  
由眾生業力

普徧十方海  
國土悉入中  
世界無邊際  
一切刹種中  
或有已壞滅  
如是刹種中  
種種果差別  
譬如種子別  
眾生刹不同  
眾生心淨故  
興雲徧虛空  
如幻師呪術  
國土不思議  
如是一切刹  
隨心分別起  
譬如見導師  
見諸刹亦然  
種種相不同  
刹網所安住  
或有刹土中  
於彼如是見  
隨眾生心起  
雜染又清淨  
有刹放光明  
諸佛令清淨  
所現雖敗惡  
出生多刹土

一切諸刹種  
普見無有盡  
種種妙嚴好  
世界不思議  
譬如林中葉  
世界有成壞  
如是依刹種  
生果各殊異  
譬如心王寶  
得見清淨刹  
如是佛願力  
能現種種事  
譬如眾續像  
心畫師所成  
如是刹種種  
種種色差別  
一切諸刹際  
莊嚴悉清淨  
種種莊嚴事  
險惡不平坦  
雜染及清淨  
菩薩力所持  
斯由業力起  
離垢寶所成  
一一刹種中  
其處常堅固  
依止於風輪



及以水輪住  
而實無有生  
出生無量剎  
有剎泥土成  
惡業者所居  
苦多而樂少  
或以赤銅作  
剎中有地獄  
燄海所燒然  
由其自惡業  
飢渴所煎逼  
或有諸剎土  
斯由淨業得  
淨業果成就  
億剎不思議  
眾生各各業  
受苦樂不同  
金剛妙蓮華  
依止光輪住  
有剎月輪成  
菩薩皆充滿  
譬如天帝網  
或是金剛華  
或有難思剎  
菩薩普光明  
妙枝布道場  
金剛華所成

世界法如是  
亦復無滅壞  
以佛威神力  
其體甚堅硬  
有剎金剛成  
薄福之所處  
石山險可畏  
眾生苦無捄  
或復有畜生  
常受諸苦惱  
登上大火山  
七寶所合成  
汝應觀世間  
隨時受快樂  
種種相莊嚴  
世界無量種  
有剎眾寶成  
莊嚴淨無垢  
金色栴檀香  
香衣悉周布  
有剎眾寶成  
光明恒照耀  
摩尼光影形  
華旋所成就  
或有清淨剎  
蔭以摩尼雲  
有是佛化音

種種見不同  
一一心念中  
悉見淨無垢  
黑闇無光照  
雜染大憂怖  
或有用鐵成  
罪惡者充滿  
常在黑闇中  
種種醜陋形  
或見閻羅界  
受諸極重苦  
種種諸宮殿  
其中人與天  
一一毛孔中  
未曾有迫隘  
於中取著生  
常放無邊光  
有剎光為體  
燄雲普照明  
於一蓮華內  
色相無諸垢  
有剎香為體  
觀察甚清淨  
化佛皆充滿  
悉是眾華樹  
有剎淨光照  
無邊列成網

有刹如菩薩  
從化光明出  
或佛光中音  
以一光莊嚴  
或用十國土  
一切為莊校  
種種相不同  
莊嚴於一刹  
或有諸國土  
普見眾刹海  
三世刹莊嚴  
刹種威神力  
十方諸世界  
現像猶如化  
於一刹種中  
塵中現眾生  
或有眾多刹  
世界不思議  
或如樹林形  
或作蓮華狀  
或有如座形  
城郭梵王身  
或如摩尼山  
譬如香海漩  
或有輪網形  
肉髻廣長眼  
或如燄山形

摩尼妙寶冠  
或是栴檀栴  
而成斯妙刹  
或見多莊嚴  
妙物作嚴飾  
或以億刹物  
皆如影像現  
各各放光明  
願力所淨治  
諸修普賢願  
一切於中現  
未來諸國土  
過去國土海  
三世一切佛  
一切悉觀見  
種種悉明見  
其形如大海  
有刹善安住  
諸佛滿其中  
八隅備眾飾  
或復有三隅  
或如天主髻  
或如日輪形  
或作光明輪  
或有壇墀形  
或有如佛手  
菩薩悉周徧

或有如座形  
或是眉間光  
有見清淨刹  
種種皆奇妙  
或以千土中  
莊嚴於一土  
不可說土物  
如來願力起  
一切莊嚴中  
所得清淨土  
佛子汝應觀  
如夢悉令見  
咸於一刹中  
及其國土  
一切佛神力  
如影無真實  
或如須彌山  
其形如帝網  
或作寶輪形  
種種悉清淨  
或如佉勒迦  
或有如半月  
或有世界形  
佛昔所嚴淨  
或如佛毫相  
或如金剛杵  
或如師子形

或如海蚌形  
於一剎種中  
護念得安住  
乃至過百千  
見剎有成壞  
或有剎有佛  
或有無量佛  
有佛變化來  
處胎及出生  
隨眾生心樂  
悉應其根欲  
經於億千歲  
不能見諸佛  
一一剎土中  
億數不思議  
悉徧於法界  
黑闇多恐懼  
或有諸天光  
剎網難思議  
未曾有苦惱  
或有摩尼光  
或有佛光明  
燄色甚嚴好  
塗香燒香照  
摩尼蟬光照  
或以寶光照  
所至無眾苦

無量諸色相  
剎形無有盡  
有剎住一劫  
國土微塵數  
或無量無數  
或有剎無佛  
國土若無佛  
為現諸能事  
魔降成正覺  
示現種種相  
一一佛剎中  
演說無上法  
若有心樂者  
各有佛興世  
此中一一佛  
調伏眾生海  
苦觸如刀劍  
或有宮殿光  
有剎自光明  
眾生福力故  
或以燈光明  
菩薩滿其中  
有剎華光照  
皆由淨願力  
佛神力光照  
或金剛燄照  
或有摩尼光

體性各差別  
皆由佛願力  
或住於十劫  
或於一劫中  
乃至不思議  
或有惟一佛  
他方世界中  
歿天與降神  
轉無上法輪  
為轉妙法輪  
一佛出興世  
眾生非法器  
一切處皆見  
一切剎中佛  
現無量神變  
有剎無光明  
見者自酸毒  
或日月光明  
或樹放淨光  
或有山光明  
悉眾生業力  
有是蓮華光  
有以香水照  
有以雲光照  
能宣悅意聲  
淨音能遠震  
或是嚴具光

或道場光明	照耀眾會中	佛放大光明
化佛滿其中	其光普照觸	法界悉周徧
有刹甚可畏	號叫大苦聲	其聲極酸楚
聞者生厭怖	地獄畜生道	及以閻羅處
是濁惡世界	恒出憂苦聲	或有國土中
常出可樂音	悅意順其教	斯由淨業得
或有國土中	恒聞帝釋音	或聞梵天音
一切世主音	或有諸刹土	雲中出妙聲
寶海摩尼樹	及樂音徧滿	諸佛圓光內
化聲無有盡	及菩薩妙音	周聞十方刹
不可思議國	普轉法輪聲	願海所出聲
修行妙音聲	三世一切佛	出生諸世界
名號皆具足	音聲無有盡	或有刹中聞
一切佛力音	地度及無量	如是法皆演
普賢誓願力	億刹演妙音	其音若雷震
住劫亦無盡	佛於清淨國	示現自在音
十方法界中	一切無不聞	

【論】十二第十卷經末一段頌都頌已前諸世界海安住虛空或淨或穢純雜同居而不相障皆由業力所起經文廣博不可子細科文文句亂繁障其義趣於中義味大意前已略述餘之廣義經文自具不同小經小經即須多引外文莊飾其義此大部一乘之典餘經義與此多不相應意況與三乘全別不可例此經典此已上十卷經明三度舉果一前如來始成正覺及座內眾舉佛果行果明佛自證二眉間眾是舉佛中道行果與一切未信者作成信之因三華藏世界海明是所向前座內眾眉間眾所行之行報得之果大意以佛報業之果答前三十七問見果知因使後學者如是倣之行如是行願得如是果報。

大方廣佛新華嚴經合論卷第二十三

音切

淵

(烏玄切)。

怨

(於袁切)。

讎

(市流切)。

堞

(徒賴切)。

魔

(莫和切)。

軌

(居水切)。

幄

(於角切)。

埤

(頻支切)。

塊

(研禮切)。

績

(胡對切)。

燒

(書曜切)。

硬

(五更切)。

怖

(普布切)。

醜

(昌有切)。

隘

(於戒切)。

杵

(昌與切)。

蟀

(蒲項切)。

觸

(五欲切)。

號

(胡刀切)。

叫

(占弔音)。

酸

(蘇官切)。

楚

(初舉切)。

趣

(七千切)。

# 大方廣佛新華嚴經合論卷第二十四

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

## 毗盧遮那品第六

【論】將釋此品約作三門分別一釋品來意二釋品名目三隨文釋義一釋品來意者前之五品以舉現世毗盧遮那佛果恐不成信何以然者為古無舊迹今何所來以此引古證今明道不謬故又明古今諸佛三世法相似故成其信者不狐疑故二釋品名毗盧遮那品者此品依主得名明引古佛成今信還以佛號以為品名毗云種種遮那云光明言以法身悲智設種種教行之光破眾生之業暗故問曰古佛今佛為一為異答曰為一為異何以然者為法身智身九十七大人之相大慈大悲智慧解脫是一各各眾生發心成佛是異又無量三世諸佛皆同一念成佛無前後際是一然亦不壞一念中見無量眾生三世劫量是異以十玄門六相義該通可解經云一切諸佛身唯是一法身一身一智慧力無畏亦然三隨文釋義者於此一品經中長科總有十五段經文於此十五段文中有四佛出世總明毗盧遮那一號各隨世間應緣名異非是佛名號異此經下文佛名號品一一佛皆具等法界眾生界隨緣名號世間一切名號皆是諸佛名為如來德徧一切法故猶如虛空徧含眾法無不淨故一切眾生名入佛名號無不淨故又如有香名為象藏因龍鬬而生燒之一丸凝停七日降金色雨霑人身者悉皆金色一切名言入佛名號者悉皆清淨亦復

如是如是佛名號徧一切世界名字故始名毗盧遮那以種種教行之光徧照一切以法眼照之其長科十五段者。

【經】爾時普賢菩薩復告大眾言諸佛子乃往古世過世界微塵數劫復倍是數有世界海名普門淨光明此世界海中有世界名勝音依摩尼華網海住須彌山微塵數世界而為眷屬其形正圓其地具有無量莊嚴三百重眾寶樹輪圍山所共圍遶一切寶雲而覆其上清淨無垢光明照耀城邑宮殿如須彌山衣服飲食隨念而至其劫名曰種種莊嚴。

【論】一爾時已下一段八行經明普賢告眾欲說其法於此段中復分為十一舉古佛所過之劫數二舉古世界海之名三舉世界海中別有世界之號四舉世界所依住處五舉世界周圍眷屬之數六舉世界形狀七舉世界地上莊嚴八舉世界寶樹及山輪圍重數九舉世界城邑宮殿十舉世界人飲食衣服隨念而至及舉劫名此已上但隨文自具不煩更解。

【經】諸佛子彼勝音世界中有香水海名清淨光明其海中有大蓮華須彌山出現名華燄普莊嚴幢十寶欄楯周帀圍遶於其山上有一大林名摩尼華枝輪無量華樓閣無量寶臺觀周迴布列無量妙香幢無量寶山幢迴極莊嚴無量寶芬陀利華處處敷榮無量香摩尼蓮華網周帀垂布樂音和悅香雲照耀數各無量不可紀極有百萬億那由他城周帀圍遶種種眾生於中止住。

【論】二諸佛子已下有八行半經於中大意義分為八一明勝音世界中香水海及舉其名二明海中有華山出現形如須彌三明山上莊嚴有十四明山上有一大樹林及舉林名五舉山上五種無量眾事莊嚴六明都舉莊嚴難紀七明山上諸城之數八明裸類眾生共居云芬陀利華者此云白蓮華也此上一段文自顯著不煩更解。



【經】諸佛子此林東有一大城名燄光明人王所都百萬億那由他城周帀圍遶清淨妙寶所共成立縱廣各有七千由旬七寶為郭樓櫓却敵悉皆崇麗七重寶塹香水盈滿優鉢羅華波頭摩華拘物頭華芬陀利華悉是眾寶處處分布以為嚴飾寶多羅樹七重圍遶宮殿樓閣悉寶莊嚴種種妙網張施其上塗香散華芬瑩其中有百萬億那由他門悉寶莊嚴一一門前各有四十九寶尸羅幢次第行列復有百萬億園林周帀圍遶其中皆有種種裸香摩尼樹香周流普熏眾鳥和鳴聽者歡悅此大城中所有居人靡不成就業報神足乘空往來行同諸天心有所欲應念皆至其城次南有一天城名樹華莊嚴其次右旋有大龍城名曰究竟次有夜叉城名金剛勝妙幢次有乾闥婆城名曰妙宮次有阿脩羅城名曰寶輪次有迦樓羅城名妙寶莊嚴次有梵天王城名種種妙莊嚴如是等百萬億那由他數此一一城各有百萬億那由他樓閣所共圍遶一一皆有無量莊嚴。

【論】三諸佛子已下十九行半經明林東之城於此段中義分為十一舉城之名二舉人王所居三舉諸城圍遶四明城體眾寶所成五明城廣狹六明城郭莊嚴悉皆崇麗七明城上下眾事莊嚴言櫓者依音義解云城上守禦曰櫓出頭前引曰敵眾飾高勝曰崇美而可觀曰麗城下遶而長坑深廣者曰壕狹者曰塹優鉢羅華者此云青色華根似藕其葉狹長近下小圓上漸尖似佛眼故其華莖無刺准歎佛中目淨脩廣如青蓮即是青蓮華葉也波頭摩華此云赤蓮華其華莖有刺拘物頭華其莖有刺或曰赤白華也其華葉頭稍短未開敷時狀如郁蹙然也芬陀利華者白蓮華也寶多羅樹者(或云無憂樹此之未定檢文未得也)七重圍遶法事中或一三五七九契陽數也尸羅此云清淨寶幢(已上莊嚴總為眾寶)八明城中居人九明人得業報神通也所念皆至十明城四遶天龍乾闥婆等七種裸類諸城所居及都結城及莊

嚴無量問曰此中一種是人非天龍神何得業報神通衣服飲食隨念而至又所居高勝依報寶嚴以何業故報得如是答曰為因廣大故業報廣大為因高勝故業報所居高勝問曰何者是因廣大高勝答曰為於往因於此毗盧遮那法界智體用無依住門性清淨法而生信心修信解力常信自他凡聖一體同知來智無所依住無我無我所心境平等無二相故無我所故一切凡聖本唯法界無造作性無生滅性依真而住住無所住與一切諸佛眾生同一心智住性真法界所有分別是一切諸佛本不動智凡聖一真共同此智全信自心是佛種智及一切智故不於心外別有信佛之心亦不於自心之內見自心有佛相故信如斯法自力未充以此是人獲諸人中一切勝報以是信力還得毗盧遮那佛在國同居而恒出現神足通力與天同處一切諸城所居神天龍八部等皆是同緣於此法中而生信解故以此信因高勝廣大獲得如斯勝妙依正果報故。

【經】諸佛子此寶華枝輪大林之中有一道場名寶華徧照以眾大寶分布莊嚴摩尼華輪徧滿開敷然以香燈具眾寶色焰雲彌覆光網普照諸莊嚴具常出妙寶一切樂中恒奏雅音摩尼寶王現菩薩身種種妙華周徧十方其道場前有一大海名香摩尼金剛出大蓮華名華藥焰輪其華廣大百億由旬莖葉鬚臺皆是妙寶十不可說百千億那由他蓮華所共圍遶常放光明恒出妙音周徧十方。

【論】四諸佛子已下有九行經明華枝林中道場并陳嚴飾廣大此林眾華嚴飾常有妓樂之音。

【經】諸佛子彼勝音世界最初劫中有十須彌山微塵數如來出興於世其第一佛號一切功德山須彌勝雲諸佛子應知彼佛將出現時一百年前此摩尼華枝輪大林中一切莊嚴周徧清淨所謂出不思議寶焰雲發歎佛功德音演無數佛音聲舒光布

網彌覆十方宮殿樓閣互相照耀寶華光明騰聚成雲復出妙音說一切眾生前世所行廣大善根說三世一切諸佛名號說諸菩薩所修願行究竟之道說諸如來轉妙法輪種種言辭現如是等莊嚴之相顯示如來當出於世其世界中一切諸王見此相故善根成熟悉欲見佛而來道場。

【論】五諸佛子已下有十二行半經明初劫中佛出現之數并陳初佛名號及舉華枝大林先現之瑞。

【經】爾時一切功德山須彌勝雲佛於其道場大蓮華中忽然出現其身周普等真法界一切佛刹皆示出生一切道場悉詣其所無邊妙色具足清淨一切世間無能曠奪具眾寶相一一分明一切宮殿悉現其像一切眾生咸得目見無邊化佛從其身出種種色光充滿世界如於此清淨光明香水海華鬖莊嚴幢須彌頂上摩尼華枝輪大林中出現其身而坐於座其勝音世界有六十八千億須彌山頂悉亦於彼現身而坐。

【論】六爾時已下有九行半經明初佛蓮華中忽然出現并陳佛身徧坐一切法界道場眾生皆見等事問曰何故此佛蓮華化現出興釋迦佛母胎出現答曰隨根所見母胎出現唯劣解眾生自根見爾如離世間品云為劣解眾生母胎出爾應大根眾生皆見蓮華出現也。

【經】爾時彼佛即於眉間放大光明其光名發起一切善根音十佛刹微塵數光明而為眷屬充滿一切十方國土若有眾生應可調伏其光照觸即自開悟息諸惑熱裂諸蓋網摧諸障山淨諸垢濁發大信解生勝善根永離一切諸難恐怖滅除一切身心苦惱起見佛心趣一切智時一切世間主并其眷屬無量百千蒙佛光明所開覺故悉詣佛所頭面禮足。

【論】七爾時已下有八行經明初佛出現放光集眾并陳光德大眾來集。

【經】諸佛子彼燄光明大城中有王名喜見善慧統領百萬億那由他城夫人嫫女三萬七千人福吉祥為上首王子五百人(別本云二萬五千人)大威光為上首大威光太子有十千夫人妙見為上首爾時大威光太子見佛光明已以昔所修善根力故即時證得十種法門何謂為十所謂證得一切諸佛功德輪三昧證得一切佛法普門陀羅尼證得廣大方便藏般若波羅蜜證得調伏一切眾生大莊嚴大慈證得普雲音大悲證得生無邊功德最勝心大喜證得如實覺悟一切法大捨證得廣大方便平等藏大神通證得增長信解力大願證得普入一切智光明辯才門爾時大威光太子獲得如是法光明已承佛威力普觀大眾而說頌言。

世尊坐道場	清淨大光明	譬如千日出
普照虛空界	無量億千劫	導師時乃現
佛今出世間	一切所瞻奉	汝觀佛光明
化佛難思議	一切宮殿中	寂然而正受
汝觀佛神通	毛孔出燄雲	照耀於世間
光明無有盡	汝應觀佛身	光網極清淨
現形等一切	徧滿於十方	妙音徧世間
聞者皆欣樂	隨諸眾生語	讚歎佛功德
世尊光所照	眾生悉安樂	有苦皆滅除
心生大歡喜	觀諸菩薩眾	十方來萃止
悉放摩尼雲	現前稱讚佛	道場出妙音
其音極深遠	能滅眾生苦	此是佛神力
一切咸恭敬	心生大歡喜	共在世尊前
瞻仰於法王		

【論】八諸佛子已下有十四行經明光明大城有人王名喜見善慧王與眷屬俱集并陳太子威光以自善根見佛光明得十

種法門具如經說最下三句明威光說頌歎佛於此十行頌中歎佛之德及德與眾生益如文可知。

【經】諸佛子彼大威光太子說此頌時以佛神力其聲普遍勝音世界時喜見善慧王聞此頌已心大歡喜觀諸眷屬而說頌言。

汝應速召集	一切諸王眾	王子及大臣
城邑宰官等	普告諸城內	疾應擊大鼓
共集所有人	俱行往見佛	一切四衢道
悉應鳴寶鐸	妻子眷屬俱	共往觀如來
一切諸城郭	宜令悉清淨	普建勝妙幢
摩尼以嚴飾	寶帳羅眾網	妓樂如雲布
嚴備在虛空	處處令充滿	道路皆嚴淨
普雨妙衣服	巾馭汝寶乘	與我同觀佛
各各隨自力	普雨莊嚴具	一切如雲布
徧滿虛空中	香燄蓮華蓋	半月寶纓珞
及無數妙衣	汝等皆應雨	須彌香水海
上妙摩尼輪	及清淨栴檀	悉應雨滿空
眾寶華纓珞	莊嚴淨無垢	及以摩尼燈
皆令在空住	一切持向佛	心生大歡喜
妻子眷屬俱	往見世所尊	

【論】九諸佛子已下有兩行半經明威光說頌以佛神力其聲徧聞父王聞之歡喜說頌於此十一行頌中明其善慧王敕眾令集并令辦供具。

【經】爾時喜見善慧王與三萬七千夫人婁女俱福吉祥為上首五百王子俱大威光為上首六萬大臣俱慧力為上首如是等七十七百千億那由他眾前後圍遶從燄光明大城出以王力故一切大眾乘空而往諸供養具徧滿虛空至於佛所頂禮佛足

却坐一面復有妙華城善化幢天王與十億那由他眷屬俱復有  
究竟大城淨光龍王與二十五億眷屬俱復有金剛勝幢城猛健  
夜叉王與七十七億眷屬俱復有無垢城喜見乾闥婆王與九十  
七億眷屬俱復有妙輪城淨色思惟阿脩羅王與五十八億眷屬  
俱復有妙莊嚴城十方行迦樓羅王與九十九千眷屬俱復有遊  
戲快樂城金剛德緊那羅王與十八億眷屬俱復有金剛幢城寶  
稱幢摩睺羅伽王與三億百千那由他眷屬俱復有淨妙莊嚴城  
最勝梵王與十八億眷屬俱如是等百萬億那由他大城中所有  
諸王并其眷屬悉共往詣一切功德須彌勝雲如來所頂禮佛足  
却坐一面時彼如來為欲調伏諸眾生故於眾會道場海中說普  
集一切三世佛自在法脩多羅世界微塵數脩多羅而為眷屬隨  
眾生心悉令獲益是時大威光菩薩聞是法已即獲一切功德須  
彌勝雲佛宿世所集法海光明所謂得一切法聚平等三昧智光  
明一切法悉入最初菩提心中住智光明十方法界普光明藏清  
淨眼智光明觀察一切佛法大願海智光明入無邊功德海清淨  
行智光明趣向不退轉大力速疾藏智光明法界中無量變化力  
出離輪智光明決定入無量功德圓滿海智光明了知一切佛決  
定解莊嚴成就海智光明了知法界無邊佛現一切眾生前神通  
海智光明了知一切佛力無所畏法智光明爾時大威光菩薩得  
如是無量智光明已承佛威力而說頌言。

我聞佛妙法	而得智光明	以是見世尊
往昔所行事	一切所生處	名號身差別
及供養於佛	如是我咸見	往昔諸佛所
一切皆承事	無量劫修行	嚴淨諸刹海
捨施於自身	廣大無涯際	修治最勝行
嚴淨諸刹海	耳鼻頭手足	及以諸宮殿
捨之無有量	嚴淨諸刹海	能於一一刹

億劫不思議	修習菩提行	嚴淨諸刹海
普賢大願力	一切佛海中	修行無量行
嚴淨諸刹海	如因日光照	還見於日輪
我以佛智光	見佛所行道	我觀佛刹海
清淨大光明	寂靜證菩提	法界悉周徧
我當如世尊	廣淨諸刹海	以佛威神力
修習菩提行		

【論】十爾時已下有三十四行半經明十王興供見佛并陳所聞脩多羅經威光獲益脩多羅者此為長行經也最下兩句明威光說偈此十行頌中明威光聞法獲益得宿命智力見佛所行往因之事并自立願如佛所行。

【經】諸佛子時大威光菩薩以見一切功德山須彌勝雲佛承事供養故於如來所心得悟了為一切世間顯示如來往昔行海顯示往昔菩薩行方便顯示一切佛功德海顯示普入一切法界清淨智顯示一切道場中成佛自在力顯示佛力無畏無差別智顯示普示現如來身顯示不可思議佛神變顯示莊嚴無量清淨佛土顯示普賢菩薩所有行願令如須彌山微塵數眾生發菩提心佛刹微塵數眾生成就如來清淨國土爾時一切功德山須彌勝雲佛為大威光菩薩而說頌言。

善哉大威光	福藏廣名稱	為利眾生故
發趣菩提道	汝獲智光明	法界悉充滿
福慧咸廣大	當得深智海	一刹中修行
經於刹塵劫	如汝見於我	當獲如是智
非諸劣行者	能知此方便	獲大精進力
乃能淨刹海	一一微塵中	無量劫修行
彼人乃能得	莊嚴諸佛刹	為一一眾生
輪迴經劫海	其心不疲懈	當成世導師

供養一一佛	悉盡未來際	心無暫疲厭
當成無上道	三世一切佛	當共滿汝願
一切佛會中	汝身安住彼	一切諸如來
誓願無有邊	大智通達者	能知此方便
大光供養我	故獲大威力	令塵數眾生
成熟向菩提	諸修普賢行	大名稱菩薩
莊嚴佛刹海	法界普周徧	

【論】十一諸佛子已下有十一行經明威光菩薩以見初佛承事供養故得十種顯示如來所行法令須彌山塵數眾生發菩提心功德山須彌勝雲如來為威光說頌歎威光之德於此十一行頌中明功德山如來歎威光所得如佛所行廣大如文可知。

【經】諸佛子汝等應知彼大莊嚴劫中有恒河沙數小劫人壽命二小劫諸佛子彼一切功德須彌勝雲佛壽命五十億歲彼佛滅度後有佛出世名波羅蜜善眼莊嚴王亦於彼摩尼華枝輪大林中而成正覺爾時大威光童子見彼如來成等正覺現神通力即得念佛三昧名無邊海藏門即得陀羅尼名大智力法淵即得大慈名普隨眾生調伏度脫即得大悲名徧覆一切境界雲即得大喜名一切佛功德海威力藏即得大捨名法性虛空平等清淨即得般若波羅蜜名自性離垢法界清淨身即得神通名無礙光普隨現即得辯才名善入離垢淵即得智光名一切佛法清淨藏如是等十千法門皆得通達爾時大威光童子承佛威力為諸眷屬而說頌言。

不可思議億劫中	導世明師難一遇
此土眾生多善利	而今得見第二佛
佛身普放大光明	色相無邊極清淨
如雲充滿一切土	處處稱揚佛功德
光明所照咸歡喜	眾生有苦悉除滅



各令恭敬起慈心	此是如來自在用
出不思議變化雲	放無量色光明網
十方國土皆充滿	此佛神通之所現
一一毛孔現光雲	普徧虛空發大音
所有幽冥靡不照	地獄眾苦咸令滅
如來妙音徧十方	一切言音咸具演
隨諸眾生宿善力	此是大師神變用
無量無邊大眾海	佛於其中皆出現
普轉無盡妙法輪	調伏一切諸眾生
佛神通力無有邊	一切剎中皆出現
善逝如是智無礙	為利眾生成正覺
汝等應生歡喜心	踊躍愛樂極尊重
我當與汝同詣彼	若見如來眾苦滅
發心迴向趣菩提	慈念一切諸眾生
悉住普賢廣大願	當如法王得自在

【論】十二諸佛子已下有十四行半經明莊嚴劫中佛及人壽命長短初佛去世第二佛出興并明威光見第二佛得十種利并為眷屬說頌此二十行頌中明威光歎佛慈悲出世難遇勸其眷屬同往佛所。

【經】諸佛子大威光童子說此頌時以佛神力其聲無礙一切世界皆悉得聞無量眾生發菩提心時大威光王子與其父母并諸眷屬及無量百千億那由他眾生前後圍遶寶蓋如雲徧覆虛空共詣波羅蜜善眼莊嚴王如來所其佛為說法界體性清淨莊嚴脩多羅世界海微塵等脩多羅而為眷屬彼諸大眾聞此經已得清淨智名入一切淨方便得於地名離垢光明得波羅蜜輪名示現一切世間愛樂莊嚴得增廣行輪名普入一切剎土無邊光明清淨見得趣向行輪名離垢福德雲光明幢得隨入證輪名

一切法海廣大光明得轉深發趣行名大智莊嚴得灌頂智慧海  
名無功用修極妙見得顯了大光明名如來功德海相光影徧照  
得出生願力清淨智名無量願力信解藏時彼佛為大威光菩薩  
而說頌言。

善哉功德智慧海	發心趣向大菩提
汝當得佛不思議	普為眾生作依處
汝已出生大智海	悉能徧了一切法
當以難思妙方便	入佛無盡所行境
已見諸佛功德雲	已入無盡智慧地
諸波羅蜜方便海	大名稱者當滿足
已得方便總持門	及以無盡辯才門
種種行願皆修習	當成無等大智慧
汝已出生諸願海	汝已入於三昧海
當具種種大神通	不可思議諸佛法
究竟法界不思議	廣大深心已清淨
普見十方一切佛	離垢莊嚴眾剎海
汝已入我菩提行	昔時本事方便海
如我修行所淨治	如是妙行汝皆悟
我於無量一一剎	種種供養諸佛海
如彼修行所得果	如是莊嚴汝咸見
廣大劫海無有盡	一切剎中修淨行
堅固誓願不可思	當得如來此神力
諸佛供養盡無餘	國土莊嚴悉清淨
一切劫中修妙行	汝當成佛大功德

【論】十三諸佛子已下有十六行經明威光說頌其聲徧聞  
威光與眷屬同往佛所得十種利第二佛為威光說頌此二十行

頌中明第二如來歎威光入道得益所得之益是八地法門如經云得灌頂智慧海名無功用修極妙見。

【經】諸佛子波羅蜜善眼莊嚴王如來入涅槃已喜見善慧王尋亦去世大威光童子受轉輪王位彼摩尼華枝輪大林中第三如來出現於世名最勝功德海時大威光轉輪聖王見彼如來成佛之相與其眷屬及四兵眾城邑聚落一切人民并持七寶俱往佛所以一切香摩尼莊嚴大樓閣奉上於佛時彼如來於其林中說菩薩普眼光明行修多羅世界微塵數修多羅而為眷屬爾時大威光菩薩聞此法已得三昧名大福德普光明得此三昧故悉能了知一切菩薩一切眾生過現未來福非福海時彼佛為大威光菩薩而說頌言。

善哉福德大威光	汝等今來至我所
愍念一切眾生海	發勝菩提大願心
汝為一切苦眾生	起大悲心令解脫
當作羣迷所依怙	是名菩薩方便行
若有菩薩能堅固	修諸勝行無厭怠
最勝最上無礙解	如是妙智彼當得
福德光者福幢者	福德處者福海者
普賢菩薩所有願	是汝大光能趣入
汝能以此廣大願	入不思議諸佛海
諸佛福海無有邊	汝以妙解皆能見
汝於十方國土中	悉見無量無邊佛
彼佛往昔諸行海	如是一切汝咸見
若有住此方便海	必得入於智地中
地是隨順諸佛學	決定當成一切智
汝於一切剎海中	微塵劫海修諸行
一切如來諸行海	汝皆學已當成佛

如汝所見十方中	一切剎海極嚴淨
汝剎嚴淨亦如是	無邊願者所當得
今此道場眾會海	聞汝願已生欣樂
皆入普賢廣大乘	發心迴向趣菩提
無邊國土一一中	悉入修行經劫海
以諸願力能圓滿	普賢菩薩一切行

【論】十四諸佛子已下有十二行經明第二佛去世善慧王亦去世大威光受輪王位第三如來於舊道場出興於世威光見佛聞法得益第三如來說頌歎威光之德此二十二行頌明第三如來歎威光所得之法。

【經】諸佛子彼摩尼華枝輪大林中復有佛出號名稱普聞蓮華眼幢是時大威光於此命終生須彌山上寂靜寶宮天城中為大天王名離垢福德幢共諸天眾俱詣佛所雨寶華雲以為供養時彼如來為說廣大方便普門徧照脩多羅世界海微塵數脩多羅而為眷屬時天王眾聞此經已得三昧名普門歡喜藏以三昧力能入一切法實相海獲是益已從道場出還歸本處。

【論】十五諸佛子已下有八行半經明第四如來於舊道場中出現大威光去世生須彌山頂為大天王還來見佛獲益而去此一品經來文未足未有結終之處此品但明引古印今毗盧遮那出世之法古今相襲不異又明所信樂道高法勝人壽命長遠福德所居依正果勝見佛聞法所獲利益勝故。

## 大方廣佛新華嚴經合論卷第二十四

音切

縱

(足容切)。

櫓

(魯音)。

崇

(土弓切)。

敵

(徒力切)。

塹

(七焰切)。

奪

(徒活切)。

裂

(列音)。

萃

(秦醉切)。

妓

(奇綺切)。

馭

(魚據切)。

乘

(去聲)劣(力月切)。

怙

(胡古切)。

禦

(魚舉切)。

壕

(乎刀切)。

郁

(於六切)。

蹙

(子六切)。

# 大方廣佛新華嚴經合論卷第二十五

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

## 佛名號品第七

【論】第二會六品經明菩薩信心門於此一會之中自有序分正說流通今從第十二卷初爾時已下有四行半經是序分已下至賢首品是正說分賢首品末有三行半經是流通分第七如來名號品從此已下至賢首品是第三長科文中以果成信信自己心是佛分於此一段之中約有六法以成信心佛果以令信者入佛果故一佛名號品令信心者信佛名號徧一切世間名知名性離故二四聖諦品令信心者自信一切世間苦諦即聖諦不別求故三光明覺品令信心者自以自心光明覺照一切世間無盡大千世界總佛境界自亦同等以心隨光一一照之心境合一內外見亡初三千大千世界已次還以東方為首光至東方十三千大千世界照百三千大千世界如是十方十重倍倍周迴十方圓照身心一性無礙徧周同佛境界一一作意如是觀察然後以無作方便定印之入十住初心生如來智慧家為如來智慧法王之真子一如光明所照如經具明不可作佛光明自無其分須當自以心光如佛光開覺其心圓照法界四問明品令信心者所信之法門五淨行品令信心者所信菩薩初發心時皆發大願為首又令信心者便迴無始妄念以成智海無生滅性六賢首品令信心者信佛神力通化無邊得大自在及信心之福信此六法名為賢首以此六法觀行相應名為信心皆以不動智佛等十智如來是

自心之果以不動智為體餘智為用至下方明文殊師利覺首目  
首十首菩薩等是修行信心者之身此品已下至賢首品已來六  
品經是長科一部經中第三以果成信門也為明初會是舉佛果  
勸修信諸佛所得此第二會一會以果成信信自心是佛與果佛  
不異故至文方明前之已成佛果將用勸修此舉佛名號果歡修  
十方世界無有一名非佛名者名體性自解脫故但隨眾生所聞  
不同故此明佛名號徧周即明於一切名無所著故釋此品作三  
門一釋品來意二釋品名目三隨文釋義一釋品來意者明前之  
初會但明如來成正覺之身及智攝生未明如來名號攝生廣  
狹今此第二會普光明殿方明佛果名號攝生故此品須來又為  
舉佛果名令生信解故此品須來前會明身智徧周此會明名身  
及智俱徧周故初會世主雖問未有其答此品答前所問使令生  
後信者之心令使信佛名身及智普徧法界應機利物照俗破迷  
故成普光明殿約德名殿約殿明德故此品須來於此佛名號中  
約有五緣以成佛號一以法界自體根本智緣以成佛號二約如  
來示成正覺約自德緣以成佛號三約如來利生方便緣約位進  
修以成佛號四明如來以一切眾生隨根所樂緣以成佛號五約  
法界體用平等緣一切諸法總名佛號一以法界自體根本智以  
成佛號者如下不動智佛無礙智佛滅闇智佛如是十智佛號是  
也以此法界根本智上以施十種之名以成十種信力至位方明  
廣意大意令眾生達自根本無明本唯如來根本大智令諸眾生  
頓識本故頓作佛故二約如來示成正覺自德成號者即十方諸  
佛示成正覺共同十號所謂如來應供正徧知是又毗盧遮那是  
總名是大智光明照耀種種諸法及種種眾生故故毗云種種盧  
遮那云徧照三明如來利生方便約位進修緣以成佛號者即如  
下舉十箇根本不動智佛以成十信舉十箇月佛下名悉同號之  
為月以成十住明創契法身本智心得清涼為明此位菩薩契理



惑亡得法性智清涼故約自得益之法以成佛號十行位中以十箇眼佛下名悉同號之為眼為明十行以智知根利生攝益故佛號為眼以善知根性故皆是約自得益立名為佛十迴向中以十箇妙佛上名悉同號之為妙為明十迴向位中菩薩進修漸熟妙智現前故佛號為妙十地同妙已上以明從十信中自信自心分別之智與一切諸佛根本不動智佛本來是一以成信心心外見法不成信心也從此信已下以三昧力契理會源名為十住佛號為月皆是約修行之人所得之法以成佛號安立五位五十箇佛名五十箇因五十箇果為當位具因果故成一百重因果為根本五位中本有五因五果成一百一十重因果法門不異法界體不異十信中所信之法根本不動智佛以為諸位進修且約如是廣意至下本位廣明是名隨位進修以成佛號四明如來以一切眾生隨根所樂以成佛號者即以對現色身等眾生界為佛為天為神為主為人為仙徧眾生界令諸眾生不作惡者總是不可以自凡情所測也總是佛名號徧周五明法界體用平等一切諸法總名佛號者為一切諸法及以名言自體性離故一切法自體性離即法界性法界性即佛號故是故一切法及名言皆是佛號故為如來稱此一切法自性離之法以成佛故欲廣引經文證義為此教文弘廣言繁翳本作業難解但依此經上下自相契會作業易解故如三乘中亦說根本智後得智今欲令三乘人迴心指此金色世界不動智佛令使直認是自心能分別智本無所動文殊師利即是自心善簡擇無相妙慧覺首目首等菩薩即是自心隨信解中所見之理智如是三乘之人未迴心者定當不信何以故為立三阿僧祇劫後當得佛故為直認自身及心總是凡夫但信佛有不動智等不自信自心是根本不動智佛與佛無異以是義故不成此教法界乘中以根本智為信心此經信心應當如是直信自心分別之性是法界性中根本不動智佛金色世界是自

心無染之理文殊師利是自心善簡擇妙慧覺首目首等菩薩是隨信心中理智現前以信因中契諸佛果法分毫不謬方成信心從此信已以定慧進修經歷十住十行十迴向十地十一地日月歲劫時分無遷法界如本不動智佛如舊而成一切種智海教化眾生因果不遷時劫不改方成信也若立僧祇定實身是凡夫凡聖二途時劫移改心外有佛不成信心如是已上有此五種佛名號不同問曰名之與號何異答曰有二同別何者為二約父母所生幼稚無德且作字呼之為名有德即約德立名其名可尊稱之為號名即下人不得呼稱其號即下人得呼稱之故雖有德無德之異亦總屬名收為名言所攝故若約此經佛號總是約法約德立名不同世俗也三隨文釋義者於此段中義分為二一長科三十二品經意第三禪中說十一地一品未來二科當品經意一長科三十二品者從此如來名號品第二會世主起問二十八問已下直至向後如來出現品是世主所問一終因果所答總有三十二品經是答二十八問故以從普光明智法界佛果報居之殿舉佛果名號并舉佛果所行教化眾生四聖諦法門并舉法界根本智體佛號不動智佛以成信修直至彼如來出現品三十二品經是信進修行之一終因果之極也明此普光明智殿佛果至如來出現品此信進修行因果不二故又明此始成正覺果德之上起信心修行至後如來出現品中明法界無時可隔故以明法界體中凡夫妄見見無量劫始起信進修行者依真起行以為進修經歷五位行門無時可移故若未起信進修行時常謂已前諸佛先已成佛經無量劫及其以正信力便見十方無量劫已成佛者而自身與彼先成佛者一時成佛無先後故以是義故如來始成正覺時如今凡夫始發菩提心起行進修自行已滿畢竟不離如來初成正覺初出現時為無情量依本法界本無時故是故經言信心畢竟二不別者為法界性無三世別故以三世時無別以無時

故無別以智無別故無別為不異不動智佛體故妙慧用無別不異文殊善簡擇妙慧故行無別為從初發心不異十波羅蜜行普賢行而為修行故大悲無別常教化故大願無別不捨眾生故四攝無別四無量心無別故三十七道品無別以此十種無別故云發心畢竟二不別是故發心先心難為明入此十種信解者難故若心外信有他佛得道我是凡夫者即世間人情量是此乃不論信進修行直是生死長流常隨見網何大苦哉以此如今第二會及初會明始成正覺如來出現後三十二品又著如來出現品明始終信進修行者與三世佛一時出現明法界總一時故如持寶鏡普臨眾像頓照顯現無前後時故明於法界根本佛智境界中頓現眾法不可將情量度量作前後解故一依彌勒樓閣中境界初會中始成正覺佛是舉果勸修佛出現品中佛是明諸菩薩進修五位因果行終佛與信位中不動智佛相對故問曰何故諸品諸菩薩說唯阿僧祇品隨好品是佛自說答曰如菩薩加行如五位煩惱無明以如來位中不思議菩薩眾寄成五位菩薩當位自彰次第法門即如十慧十林十幢十藏等菩薩是如佛位之內迷法無明如來自說如此阿僧祇品隨好品是佛位之內無明至佛位內方決此二迷是故無明住地佛位方終如勝鬘經說一分教網三乘相似唯不許二乘及淨土菩薩斷得根本無明為不了無明是根本智故以此一乘教以不動智佛為信心以此所有修行證照眾法不同此經故此教明當念初心畢竟心總盡以法界中無三世故三乘定滿僧祇又三賢十聖進修路別地上加行地前四資糧等佛果定滿僧祇如前已明以此經十住即見道加行資糧一時何以故以法界大智用資其行命行無染以行資糧法界智體使慣習令熟為明從凡創見如來理智性故又此五位中修行位位各有佛果隨位慣習處安立名別三乘教中前位向後位但有菩薩果非佛果故後至位廣明此法界法門說之經無量劫

不延說之一剎那中亦不促唯迷之者妄作長短延促之解即不稱應真之心自此如來名號品已去直至如來出現品總有三十二品經是十信十住十行十迴向十地十一地進修因果以初即後以後即初不二之位故如大王路其法常爾非故新體也如文殊師利頌云一念普觀無量劫無去無來亦無住如是了知三世事超諸方便成十力二科當品者於當品中長科為四。

【經】爾時世尊在摩竭提國阿蘭若法菩提場中始成正覺於普光明殿坐蓮華藏師子之座妙悟皆滿二行永絕達無相法住於佛住得佛平等到無障處不可轉法所行無礙立不思議普見三世與十佛剎微塵數諸菩薩俱莫不皆是一生補處悉從他方而共來集普善觀察諸眾生界法界世界涅槃界諸業果報心行次第一切文義世出世間有為無為過現未來。

【論】一從爾時世尊已下有八行半經明歎德集眾分文分為二一歎如來德二歎菩薩大眾德從初歎如來德中爾時已下兩行經是序分敘前初得菩提處并普光明殿意明二處不異為不移本處道場而身徧坐一切處故為菩提場體是法界體故為普光明殿是法界報居所都故法報二體性相一真本末因果本無異故由斯道理故重敘古人釋云由相近故故須重敘者經意不然又云見佛露居龍造普光明殿此義亦不然設有此事是三乘之說又云菩提場在熙連河邊與普光明殿相去三里在菩提場東南明菩提場是阿蘭若得道之處普光明殿是報居之宅此一部之經前後通法界品五度重有爾時佛在者意明居處是法界如來身及宮殿莊嚴總是法界性相根本智不二故五度敘意前會已述從妙悟已滿下至普見三世於中有兩行半經是正歎佛德妙悟已滿明十智徧周自在故二行永絕者有為無為二行盡故達無相法取捨盡故住於佛住者過現未來三世諸佛共住法界大智大悲故又如來及十方三世諸佛住五種徧周一示成

正覺徧周如初會菩提場是也二依報正報莊嚴及名號徧周即第二會普光明殿是也三定體徧周即十定品是也四普賢行教徧周即離世間品是也五法界圓滿無礙不思議智用徧周即法界品是也以此五種諸佛徧周故名住佛所住也是故以此義故於此一部之經安立五度爾時佛在摩竭國唯法界品少異明重重徧周不離一處一菩提體一法界一根本智一時無前後故經文恐失其意五度重敘令後學者不迷其事故明此五徧周總明一際無前後於一剎那際無二念說四十九年中所轉法輪兜率天猶未下母胎猶未出已入涅槃不離佛平等者理事無二故到無障處不可轉法者明佛常處生死不為業遷故又能轉不遷之法也所行無礙者明佛於生死中皆能同事真俗不礙故立不思議者歎佛道滿行終總無功用任運利生以智自在非思想意識可度量故普見三世者智眼圓滿故非三世中見三世眾生事也從與十佛剎微塵數諸菩薩俱已下至過現未來於中可有四行經歎菩薩德與十佛剎微塵數諸菩薩俱者明徒眾圓滿徧法界海故俱者同時而至無去來故莫不皆是一生補處者皆十地菩薩故為十地經等覺位中普賢位熟道滿功終方登佛果故名一生也如纓珞本業經說又從初發心住亦名一生菩薩以初見性現根本智不見有生前後際故名為一生纓珞經云三賢菩薩法流水中任運至佛悉從他方而共來集者言他方共來集簡非舊眾皆是不來而到不去而徧又明前會舉果勸修信他佛果今此第二會明以他佛果解行成其自心信證之道名從他方而共來集為從前信佛果中來皆一生補處者明於初會信解生至於此會信滿入位便成佛故如龍女善財等由是義故為他方來皆是一生之眾此乃即是表入法之言從他方來也迷名他方悟名曰來普善觀察諸眾生界法界世界涅槃界已下此三行經歎所來眾

善觀此三種世界無二性故亦知眾生隨煩惱業亦知菩薩隨位煩惱行業等事故餘如經說。

【經】時諸菩薩作是思惟若世尊見愍我等願隨所樂開示佛刹佛住佛刹莊嚴佛法性佛刹清淨佛所說法佛刹體性佛威德佛刹成就佛大菩提如十方一切世界諸佛世尊為成就一切菩薩故令如來種性不斷故救護一切眾生故令諸眾生永離一切煩惱故了知一切諸行故演說一切諸法故淨除一切襍染故永斷一切疑網故拔除一切希望故滅壞一切愛著處故說諸菩薩十住十行十迴向十藏十地十願十定十通十頂及說如來地如來境界如來神力如來所行如來力如來無畏如來三昧如來神通如來自在如來無礙如來眼如來耳如來鼻如來舌如來身如來意如來辯才如來智慧如來最勝願佛世尊亦為我說。

【論】第二大眾請法分時諸菩薩作是思惟已下十四行半經於中有三十二問義分為二一初有四問問四種佛刹二成就大菩提心引十方諸佛勸說已下有二十八問通問菩薩住地佛眼耳等如是等三十二問直至如來出現品是答如經具明問曰初會中世主所問與此義多相似但廣略不同何故此第二會還復再問如上之問答曰前會是世主問舉佛果勸修信佛所得此會是自信自身自心是佛及入位修行故須再問前位是普賢入定舉果此會即明文殊生起入信之初即明凡夫始信為彰信心羸故不入定說十住已去始明當位菩薩入定始說以是義故前問雖義理少同應緣差別故異前會信他佛得此會自入信修行也古人說前會是請此會是問其義不然前後總是其請當請是問故但為勸修與自入法事少殊如前會舉如來修行道滿及過去諸佛已成道者行滿之果此第二會舉十方諸佛根本之智凡聖共有之果即一切處金色世界一切處不動智佛十智佛等是也明一切諸佛眾生共有此不動智金色是理法性身也為信心

生滅故言色也以十色世界表之即是此會所問四種佛刹中一佛住佛刹即一切諸佛及以一切眾生共所住故為一切凡聖根本之智舉令一切眾生信自心是佛所住智故一切諸佛從此信生一切凡夫亦從此起二莊嚴佛法性佛刹者即如十住十行十迴向十地十一地隨位各有十箇佛號是也因此自心根本智起信進修行隨位隨行諸波羅蜜莊嚴以莊嚴法身智身令成熟故以法身智身用嚴萬行令行無著故名莊嚴佛法性佛刹三清淨佛所說法佛刹者如來示成正覺轉法輪是四體性佛威德佛刹者神通應現隨根出世者是明後二佛刹從前二佛刹起信修行成熟故得以此義故應知十方諸佛共此一道而得出生故應如是知應如是信解即得信解成就一如諸佛所信故得是信者如賢首品說勝以手擎三千大千世界住於空中經過一劫明其難信故亦勝供養十方世界塵數諸佛經由一劫功德不如如是信心如已下二十八問經自具答義隱難明者釋之義顯者如文可知此三十二問中有問十通十頂經中但有十通十忍不見頂名剩其十忍少其十頂願佛世尊亦為我諸菩薩說此兩句結請自此已下如來以神力舉法顯答。

【經】爾時世尊知諸菩薩心之所念各隨其類為現神通現神通已東方過十佛刹微塵數世界有世界名金色佛號不動智彼世界中有菩薩名文殊師利與十佛刹微塵數諸菩薩俱來詣佛所到已作禮即於東方化作蓮華藏師子之座結跏趺坐南方過十佛刹微塵數世界有世界名妙色佛號無礙智彼有菩薩名曰覺首與十佛刹微塵數諸菩薩俱來詣佛所到已作禮即於南方化作蓮華藏師子之座結跏趺坐西方過十佛刹微塵數世界有世界名蓮華色佛號滅闇智彼有菩薩名曰財首與十佛刹微塵數諸菩薩俱來詣佛所到已作禮即於西方化作蓮華藏師子之座結跏趺坐北方過十佛刹微塵數世界有世界名蒼蔔華色

佛號威儀智彼有菩薩名寶首與十佛刹微塵數諸菩薩俱來詣佛所到已作禮即於北方化作蓮華藏師子之座結跏趺坐東北方過十佛刹微塵數世界有世界名優鉢羅華色佛號明相智彼有菩薩名功德首與十佛刹微塵數諸菩薩俱來詣佛所到已作禮即於東北方化作蓮華藏師子之座結跏趺坐東南方過十佛刹微塵數世界有世界名金色佛號究竟智彼有菩薩名目首與十佛刹微塵數諸菩薩俱來詣佛所到已作禮即於東南方化作蓮華藏師子之座結跏趺坐西南方過十佛刹微塵數世界有世界名寶色佛號最勝智彼有菩薩名精進首與十佛刹微塵數諸菩薩俱來詣佛所到已作禮即於西南方化作蓮華藏師子之座結跏趺坐西北方過十佛刹微塵數世界有世界名金剛色佛號自在智彼有菩薩名法首與十佛刹微塵數諸菩薩俱來詣佛所到已作禮即於西北方化作蓮華藏師子之座結跏趺坐下方過十佛刹微塵數世界有世界名頗梨色佛號梵智彼有菩薩名智首與十佛刹微塵數諸菩薩俱來詣佛所到已作禮即於下方化作蓮華藏師子之座結跏趺坐上方過十佛刹微塵數世界有世界名平等色佛號觀察智彼有菩薩名賢首與十佛刹微塵數諸菩薩俱來詣佛所到已作禮即於上方化作蓮華藏師子之座結跏趺坐。

【論】第三爾時世尊知諸菩薩心之所念已下四十一行經明如來神通現法分於此分中義分為二一明隨類現法二明約初信心第一隨類現法中有二一隨五位之中菩薩之類各現十種佛位十住十行十迴向十地十一地中各有隨位佛果名號是二隨一切國刹一切眾生之類各現名號不同如下文殊師利所說佛號者是第二約信心者即此當品及通一部總為信心於此信心總信五位中因果心無滯礙方可以行修行如有教說譬如有人過五百由旬嶮道先知通塞然後行往喻如十信菩薩於信



心之中先知五位進修通塞預以願行防之以信自心分別之性本是一切諸佛不動智體用防邪見外取他境故以隨位妄識散動障真智故以禪波羅蜜防之以隨位第八住第八行第八迴向第八地智增滯寂障真無作大悲故以一百四十大願防之以樂生死障真智故以四念處觀等三十七助菩提分法防之及十四諦觀及十十二緣生觀防之以十波羅蜜利益眾生恐不弘廣故以四攝四無量法防之以求自樂果教化眾生不周廣故起十迴向加以大願大慈大悲不捨一切惡道地獄人天徧生其處以防自樂違菩提心有所得故以是義故十信之心總通五位悉皆成信若自信徹趣求無法不達若也疑心不除豈成信也如此品舉佛果門至賢首品舉佛神通及佛所行行業使初信心者信徹故始名信心今此一部之經頓舉五位因果諸佛果門總成信也從總信已入位修行方始不迷理智如人造食五味一時頓熟方始食之從初食時五味同食乃至食竟其味不離五也明五位因果十信總明時亦不移本末為信三世一際故畢竟佛果不離初信之法如依樣畫像等喻可知於此神通示法門中總有四十一行經長科為十一段第一爾時世尊知諸菩薩已下一行半經明如來知眾所念以神通現法第二東方過十佛刹塵已下三十九行半經總明十方菩薩來集十方自有分劑不煩更科於此十方菩薩來眾之中義分為十一舉佛刹方面二舉佛刹遠近三舉世界名色四舉佛名號五舉上首菩薩之名六明大眾之數七明大眾來已致敬八明隨方化座九明座之名目十明大眾昇座而坐一舉佛方面者在東方東方者為震卦為春生為初明為長男為頭為首為青龍為吉慶為震動明法事作業動用之初故道俗通以用之故先舉東方為首故方者法也但取方法之義動用之始非如世所見執東西南北可得之方一切處東方一切處南方但取其法故餘准准二舉佛刹遠近者過東方十佛刹微塵數世界之

外此有四義一明十為圓數為明遠近無盡二明令信心者知佛境廣大令自心弘博三明佛境徧周如鏡中像互參無礙四明未起信心者以十佛刹塵沉喻處迷十無明未達自障佛境界而不現前故舉塵表迷故如涅槃經云釋迦淨土過西方三十二恒河沙世界之外總是表法之數如會釋已述此云十佛刹微塵世界之外來者明隔十無明十無明中一一無明有無量正使業習主伴相熏煩惱過於世界塵數莫知涯際能障智境故言十佛刹微塵數世界外也來者明從迷入信故號為來言彼世界中有佛號不動智者為明不動智佛是十方凡聖共有根本之智明於此智能起信心故號之為來此不動智佛一切眾生常自有之若取相隨迷即塵障無盡若一念覺迷達相即淨若虛空但為隨迷稱外悟處言來而實佛刹本無遠近內外等障亦無去來無邊佛刹不出毛孔微塵之表令致遠近意令初信心者心廣大故言其從彼世界中來又明從迷入悟故言為來也有佛號不動智者明是信者自根本智故由有此智故一切眾生而能發菩提心故以根本智體能了迷性超信解故超彼迷境稱之曰來如起信論云不思議業相者以依智淨能作一切勝妙境界所謂無量功德之相常無斷絕隨眾生根自然相應種種而見得利益故又云依本覺上而起不覺故又云依於智故生其苦樂如起信論廣明意明一切眾生迷根本智而有世間苦樂法故為智無性故隨緣不覺苦樂業生為智無性故為苦所纏方能自覺根本無性眾緣無性萬法自寂若不覺苦時以無性故總不自知有性無性如人因地而倒因地而起一切眾生因自心根本智而倒因自心根本智而起以是義故如來於此一乘之經頓彰本法為金色世界明法身白淨無染頓彰本智號不動智佛頓彰文殊師利是自心妙擇之慧餘九箇世界九箇智佛九箇菩薩是隨自心信解修行位上進修增勝法身智身隨行異名故從斯自心本不動智佛自覺之上見道

入位起十住十行十迴向十地十一地加行進修法身智身大願  
大慈大悲四攝四無量十波羅蜜三十七助道分法從初發心根  
本法身本不動智體上用資萬行悲願參融互為資熟法身資行  
使令無染行資法身使令純熟五位中各各立十箇佛果十箇菩  
薩明隨位進修中約自行所得處佛果菩薩行果立名故非他佛  
號非他菩薩而立其名隨智佛果隨其行果五位之上因果各有  
五十共為一百通本五位有五箇因果共為一百一十城之法門  
故此答前菩薩問四種佛剎中佛住佛剎莊嚴法性清淨佛剎從  
此二佛剎上得示成正覺佛剎神通自在佛威德佛剎是故前會  
世主所問是他毗盧遮那佛得自在之因果此第二會菩薩所問  
是自修行者佛剎菩薩行之因果從是已後直至如來出現品是  
五位勝進菩薩加行自力一終之位明此品是信心進趣之因果  
至出現品是修行位極之因果已上於自心根本佛智上而生信  
進修行故此不動智是一切諸佛一切眾生之地以此智故而作  
眾生以此智故而成正覺以此智故隨迷作眾生時於六道中隨  
天上人間及惡道中皆有隨眾生依正之果報也隨業麤細不同  
以此智故隨覺悟時成就三乘及法界圓滿一乘佛果依正妙報  
若無此智元是虛空亦非眾生亦非諸佛故問曰一切眾生本有  
不動智何故不自應真常淨何故隨染答曰一切眾生以此智故  
而生三界者為智無性不能自知是智非智善惡苦樂等法為智  
體無性但隨緣現如空谷響應物成音無性之智但應緣分別以  
分別故癡愛隨起因癡愛故即我所病生有所故自他執業便  
起因執取故號曰末那以末那執取故名之為識因識種子生死  
相續以生死故眾苦無量以苦無量方求不苦之道迷不知苦者  
不能發心知苦求真者還是本智會苦緣故方能知苦不會苦緣  
不能知苦知苦緣故方能發心求無上道有種性菩薩以宿世先  
已知苦發心信解種強者雖受人天樂果亦能發心求無上道是

故因智隨迷因智隨悟是故如人因地而倒因地而起正隨迷時名之為識正隨悟時名之為智在纏名識在覺名智識之與智本無自名但隨迷悟而立其名故不可計常計斷名也此智之與識但隨迷悟立名若覓始終如空中求迹如影中求人如身中求我依住所在終不可得故新長短處所之相也如此無明及智無有始終若得菩提時無明不滅何以故為本無故更無有滅若隨無明時不動智亦不滅為本無故亦更無有滅但為隨色聲香所取緣名為無明但為知苦發心緣名之為智但隨緣名之為有故體無本末也如空谷響思之可見。

## 大方廣佛新華嚴經合論卷第二十五

音切

鼻

(毗至切)。

鉢

(北末切)。

壞

(胡怪切)。

悌

(希音)。

類

(力為切)。

補

(博古切)。

蒼

(占音)。

蔔

(蒲北切)。

創

(楚壯切)。

稚

(池志切)。

擎

(巨京切)。

剩

(實正切)。

嶮

(虛檢切)。

# 大方廣佛新華嚴經合論卷第二十六

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

## 佛名號品第七之餘

【論】三舉世界名色者世界名金色為明金體白淨無染舉之況喻法身無性體無垢染故如世間西方金為白色也體白色黃明應真菩薩內契白法外現黃相黃色者是應真之氣許父云五色之中黃色為最人面如黃瓜色內有賢行經云應真菩薩皆真金色又明金色世界者明信心之位雖信自身心是法身智身白淨本來無染為信是生滅有漏心故是色心也舉東方為首者明東方是初明為萬物發生震動之首故取之表法況喻十信之初首也在方無方但舉其法以況其理表其體用故如牛王龍王等況佛德也問曰以東方表法況喻十信初首者如金位在西方何故東方為金色世界以表法身為金色顯根本智為不動智答曰此問甚彰道理如經所說以信心為胎至十住之位名初生佛家今以東方為金色世界者明金正月胞二月胎三月成形四月生於巳五月養於午六月冠帶於未七月相八月王明十信如胎故以東方金胎表之以次南西北方四維上下表十信心進修增勝故以託事況之令易解故如此品文殊師利云世尊昔為菩薩時以種種談論方便及地位等而得成就亦令眾生如是知見而為說法後諸學者以智觀察皆是說此方隅以表法故當知籍網求魚魚非網也若無網者亦不可得魚故以義思之至理方成信也又經云一切處金色世界一切處不動智佛一切處文殊師利

者明法徧一切法一切眾生身心故總不動智佛總文殊師利故應如是知如是信解也明金色世界是信心者所信之理以為世界之名亦是因此信故還當報得所生無染所居無著即如西方蓮華色世界是其義如金色世界此是舉十信初因如南方妙色世界西方蓮華色世界等是十信進修之勝用故此中有十因十果故十果者十智佛是十因者文殊師利覺首等十菩薩是修行之因因中得益即因中之果即不動智等十箇智佛是十箇世界是所修之法門四舉佛名號者佛號不動智佛者此明一切諸佛一切眾生根本智體今先舉之以成初信此明答前佛住佛刹餘九箇智佛總是從此根本不動智上進修之名非是他有十方諸佛皆同此名號之迹而起信進修行經歷五位得示成正覺佛刹及佛威德佛刹威德佛刹者如來神通是也餘意如前已述五舉上首菩薩之名者名文殊師利即是十方諸佛無性之中擇法妙慧一切諸佛皆從此慧簡擇正邪而成正覺故號文殊為十方一切諸佛之師亦云佛母明一切諸佛從此妙慧生故若無此慧設修解脫但得二乘及生淨土菩薩非是乘如來乘而成正覺是故乘此不動智體文殊妙慧法身妙理大智從信心上而經歷五位不離不動智佛文殊妙慧而成正覺故號為乘如來乘不思議乘最勝乘無上乘而成正覺故亦號文殊師利為小男為童子明一切諸佛從此妙慧善知正法而初生佛家故故號為童子菩薩如來去世文殊師利猶在世間後當化緣已畢於香山頂上示入涅槃此是三乘教說此經云一切處文殊師利即明一切處眾生等共有之今於此經信心之首舉其名號明信心者信自心妙擇之慧一同於此不移古跡此是一切諸佛及以眾生根本妙慧凡聖等有更無異性如大王路法則常然今所是諸經但有文殊為問答之首者皆明法身妙慧之門以普賢為問答之首者皆明妙智之萬行體用如是二士是一切諸佛理智妙用萬行之門依其法

門立其名號現身成佛以利眾生故一切眾生發心之者皆悉同修皆悉自有自利利他之行以為常範今於教中推在東北方清涼山文殊師利并一萬菩薩於中住者有三義一令此界一切眾生忻心有趣善根不絕二明菩薩常住世間三明隨方顯法示法易解故前二門可知第三隨方顯法者明東北方者取此閻浮一境東北方此清涼山是也經推在震旦國亦曰支提那國此云思惟以其國人多所思慮多所計度故以立其名即是今漢國也表法明東北是艮卦艮為小男為童蒙丑寅之間是初明故像文殊師利菩薩常以發起凡夫入正信及初見道之童蒙令妙慧明生故又如登山之頂至相盡處故明如初入正信者創信諸法空故能信法空妙慧生故以丑如初信以寅如初證見道故卯辰巳為進修午為中道未申酉戌亥以為同事利生子為師位以坎卦為君為師處愚立範制法利生故是故為北方為君為師尊者所居以明德而治故六明大眾之數者有十佛刹微塵數為明身行徧故一佛刹塵尚自周徧何況十佛刹塵明身行無盡重重之徧故七明大眾來已致敬者明師弟法則敬順之儀八明隨方化座還在東方九明座之名目者名蓮華藏師子之座於此分中義分為三一蓮華是無染義此依法依行之報得也以法身之行性無染世間故能開敷理智之果轉明淨故明因果相資令純熟故明開敷菡萏莊嚴事法有可觀故以此法行之華感招此報蓮華為座二藏者含藏義為明以法身理智處世隨行利生普含眾法饒益一切招多功德名之為藏三名師子者依主得名也為以法性大智無生滅身處世間利人生死無畏又以正智光明辯才無畏乃至無五怖畏等如師子也十明大眾昇座而坐其座以法界為座體明以從凡契法界體故以為信進修行方成信故此是一切十方諸佛果座也明初信心頓信佛果以為自行所行法故方成信也於此段中復分為二一明座廣狹二明菩薩云何安座一明座



廣狹者如法界品云其師子座包含法界等如文具明大意以心性無依無定亂體以為座體故二明菩薩如何安坐者云結跏趺坐以會世間眾緣為一法界名之為結以一法而稱多緣名之為跏又結跏趺坐者是安靜不動威儀之相故此位主檀波羅蜜中十波羅蜜第二南方已下可四行經於此段中義分為十一舉佛刹方面二舉佛刹遠近三舉世界名色四舉佛名號五舉上首菩薩之名六明大眾之數七明大眾來已致敬八明隨方化座九明座之名目十明大眾昇座而坐一舉佛刹方面者如經云南方表法中南為正為日為明為虛無為離中虛故即明為像十信進修了諸法虛無漸增明也是故文殊覺母啟蒙令信即逐根於覺城之東善財入道進修即南巡諸友表其南方為正為日為明為虛無之理是故禮佛皆云南無明南方虛無也但虛無之理是南方之義是一切處南方但創首生信即是一切處東方義也是故四諦東西配苦集南北配滅道然法無方所化蒙生解起信不爾即法性難明如此品下文云世尊為菩薩時以種種談論種種語言乃至種種信解等而得成熟亦令眾生如是知見而為說法具如經說又南無者為明正順為正順虛無之理故號南無某甲佛者即是了虛無之智人故稱南無某甲佛二舉佛刹遠近者云十佛刹微塵數義如前釋迷云外入法云來也三舉世界名色者名妙色為第二信心漸增妙故勝前信心故為達法虛無即法自妙故四佛號無礙智者明以不動智體進修信心增明智即無礙總明自心信位之佛也非他佛故佛心眾生心自心總為一心一性一法界一智慧始成信故五舉上首菩薩名者名為覺首為明以文殊妙慧善簡正邪能自覺故亦於自所覺法能覺他故此位菩薩所覺何法於此位中其覺有三一覺自身心本是法界白淨無染如前金色世界是二覺自身心分別之性本無能所本來是不動智佛三覺自心善簡擇正邪妙慧是文殊師利於信心之初覺此

三法名為覺首即明是信心之中善覺之行名為覺首菩薩總須自認是自所行之法門方成信故信他而有自無其分不名信故六明大眾之數者有十佛刹微塵義如初釋七明大眾來已致敬可知八明隨方化座如前可知九明座之名目名蓮華藏師子之座為明入信成就得於生死之中能無畏故依主得名故餘義如前十明大眾昇座而坐者義如前釋此位主戒波羅蜜為主餘九為伴第三西方過十佛刹微塵數已下可四行經於中十法如前一舉佛刹方面者是西方二舉佛刹遠近義如初釋三舉世界名色者名蓮華色為明十信位中進修漸勝心如蓮華無染故言蓮華色者蓮華有四色明信心於此四色無所染故又明信心菩薩以色心觀空無性道理對治不染故名蓮華色也四舉佛名號者佛號滅暗智為明西方為金為白虎為殺害為昏暗為不祥為苦諦故佛號滅暗智明信位進修智增勝故能破自他暗故五舉菩薩上首名者名曰財首為明信位增勝有法財利物故即第三信中自行利眾生之名也佛號即是自覺之智菩薩即是自智之行總明覺行俱進餘門如初已釋可知此主忍波羅蜜中十波羅蜜第四北方過十佛刹微塵數世界已下可四行經十門如上一舉佛刹方面者是北方二舉佛刹遠近其義如前三舉世界名色者名蒼葡萄華色此華黃色也為明第四信心增勝開敷感果得中和之色也黃色是五色中最上之色黃者中宮之色為福慶之氣明內心白淨外現黃相經云應真菩薩皆真金色明此信心適悅恬和白淨無染福應和氣開敷道果名為世界故世界為蒼葡萄華色四舉佛名號者佛號威儀智為明北方坎為師為君像君有德處黑位而接凡故為師也佛號威儀智者明第四信心增勝以為軌範接引凡愚明威儀智以智庠序為師之貌故五舉上首菩薩名者名為寶首明為師範以法寶利生故故為名也餘義如前此位主精進門中十波羅蜜第五東北方已下可四行經於中分為十

法如前一舉其方面者云東北方為艮卦為小男為童蒙為創明為清朝二舉佛刹遠近義如初釋三舉世界名色者名優鉢羅華色此是青蓮華像此第五信心清潔色香無染開敷感果故如艮位處清朝也四舉佛名號者佛號明相智像此第五信心增勝如艮位處清朝明相現故以所自信上而標佛號非他佛也五舉上首菩薩名者名為功德首前位明寶首即法寶利生此位即自利利生之功德也餘義如前此位主禪門中十波羅蜜以艮為止故第六東南方已下可四行經於中十義如前一舉佛方面者是東南方也是巽卦巽為風為教在事為方在人為說像君子說教利人易有明著君子設教啟蒙順之如草上加風是順義也如觀卦是易曰風行地上可以觀像君子有德設政教眾人信順如草上加風無不順故巽為眾為信順故又四大之中風力為最天地賴之而持人賴之而生日月賴之運行又明風能簡穢擇淨義故故為教也為教能簡非擇是教愚蒙故是故巽卦位在東南爻辰持丑丑為艮位艮為小男為童蒙為明巽為風教化童蒙令發明故如來之法辰巳之間為齋戒故辰巳之間上值角宿角為天門主為僧尼道士是眾善之門明智慧言說是眾善門故故此義無量難為具說且約略而言之也後有智者以法審之詳之思之義唯深細故二舉佛刹遠近義如前說三舉世界名色者世界名金色為明最初第一信心明始信如胎故以東方金胎之位表初信解今以進修至第六信位明信心轉轉增勝故故以金生於巳以像之信心更增明白淨生故此東南方金色世界像四月金生於巳表信心增明白淨轉勝善簡擇眾法能說教故風化行故以此表智慧門也四舉佛名號者佛號究竟智明信心增進善能以教簡擇正邪至究竟智又以巽為風在事成方方猶法也在聖善簡擇成白淨之理在言成說在化成教在凡成愚在智成慧成離之德為赤為文章成兌之德為金初生為白淨兌為金為口為口能說

白淨究竟之理故故佛號為究竟智佛五舉上首菩薩名者名為目首明以第六信心增勝善簡正邪其道明著正見不惑名為目首像其巽卦位在東南爻辰在丑其位是風上值箕宿明箕為風簡擇義也又箕為寅位主初明也明此第六信心主般若波羅蜜以決定智慧善簡正邪令自他勝慧明生故故名目首目者善見簡擇分明義也餘義如上此東南方明吉凶定正邪之際至午萬事畢午為常明法門善財童子南行詢友為法虛無無作常明之道是不為之妙用也是故君臣師弟父子之儀臣南君北正治正明無為無作常然之道為南方離離中虛為虛無為日為明在身為眼目為心也是故周易云離法心故然法無住處法無所得法非眼耳鼻舌身心亦不離也今如來以方隅而顯法令啟蒙者易解故若不如是彰表令生信者啟蒙何託有言之法皆是託事以顯像故唯得意者法像俱真也言嘿皆契此位主慧波羅蜜為主餘九為伴第七西南方已下可四行經於中十法如前一舉佛方面者在西南方申未兩間為坤位坤為土為信順為安靜為負載萬有為生養為圓滿也二舉佛刹遠近義如前釋三舉世界名色者名寶色為明此第七信心是方便波羅蜜成就慈悲門故託此坤位為其母也明常以慈悲心育生如母故以法寶利人世界名寶明法寶利生是自世界為明以法寶利生之業以成自世界來生感果生在中故表業表法總如寶故四舉佛名號者佛號最勝智明此信位慈心增勝處眾治人令信順故佛號最勝智又大悲圓滿如土像故荷負眾生資養萬物如大地故名為最勝智五舉上首菩薩名者名為精進首為明大悲增勝如母處眾利生心無疲倦名精進首也餘如前此位主方便門餘九為伴第八西北方已下可四行經於中十義如前一舉佛方面者在西北方是乾卦乾為金為堅剛為父二舉佛刹遠近義如前釋三舉世界名色者名金剛色明此信位是第八願波羅蜜大堅固力故號金剛色故

寄託此乾位為金為堅剛也又以智增勝故四舉佛名號者佛號自在智明此第八信心信同八住地智增自在故像其乾為天為父明智自在義故五舉上首菩薩名者名法首明此信位智增勝故以法利生故名法首餘義如前此位主願波羅蜜第九下方已下可四行經於中十義如前一舉佛方面者在下方下方最下是風輪際其風甚堅密假設有大力士以金剛輪向下擊之然金剛碎如微塵而風輪無損以堅密故能持世界明此信位是第九力波羅蜜信當九住九地法力成就教化眾生荷負一切而心堅固如風無損二舉佛刹遠近其義如前三舉世界名色者名頗黎色此寶有青黃赤白然舉此下方色者是白如似水精明風能簡穢是白淨義故又取法身妙智為最上故四舉佛名號者佛號梵智明智風是淨義梵者此云淨也明此位進修增勝以白淨大智用利自他故五舉上首菩薩名者名智首明第九力波羅蜜九住九地信心善慧成就以智利生故名為首又下方者是禪定義安靜義謙下義是根本智上方者觀照義如日月處空而照物故餘義如前此位主力波羅蜜是法師位第十上方已下可四行經於中十義如前一舉佛方面者在上方明有日月眾星處虛空而照萬有像其智也處法空而照諸根以此表智波羅蜜二舉刹遠近者義如前釋三舉世界名色者名平等色為上方空界表法空無相平等也為信心者法空之心現前有念法空之情故名之為色四舉佛名號者佛號觀察智為明上方虛空有日月星辰下照萬有明信心者智照自他身心皆無有體性如虛空故如光影像無體質故是故名為觀察智佛五舉菩薩上首名號者名為賢首為明信此十種世界及佛名號菩薩名號總是自心之智所見妙理號之為世界法空之智號之為佛故智所行行號為菩薩總是隨見隨行進修立名有此十法故得是十法名為賢首如上所有世界遠近云十佛刹塵者即明佛刹重重相入如光影像迷之即心障

無邊故舉刹塵為遠悟之即無盡佛刹在自身毛孔中如影重重以迷處便言遠在他土以悟之人法處名之從他方遠刹而來總明迷悟上作遠近之名非佛刹法界中有遠近之事菩薩來眾其數亦云十佛刹塵即言信心能信普賢行智隨根欲菩薩行無盡重重徧諸刹土教化眾生以成其數既信之已決定身能如是行之故以是義故十方菩薩各舉十佛刹微塵者是斯義也明一一菩薩行無盡重重滿諸刹土教化眾生故應如是知如是信解此已上答前莊嚴佛法性佛刹佛住佛刹等。

【經】爾時文殊師利菩薩摩訶薩承佛威力普觀一切菩薩眾會而作是言此諸菩薩甚為希有諸佛子佛國土不可思議佛住佛刹莊嚴佛法性佛刹清淨佛說法佛出現佛刹成就佛阿耨多羅三藐三菩提皆不可思議何以故諸佛子十方世界一切諸佛知諸眾生樂欲不同隨其所應說法調伏如是乃至等法界虛空界諸佛子如來於此娑婆世界諸四天下種種身種種名種種色相種種脩短種種壽量種種處所種種諸根種種生處種種語業種種觀察令諸眾生各別知見諸佛子如來於此四天下中或名一切義成或名圓滿月或名師子吼或名釋迦牟尼或名第七仙或見毗盧遮那或名瞿曇氏或名大沙門或名最勝或名導師如是等其數十千令諸眾生各別知見諸佛子此四天下東次有世界名為善護如來於彼或名金剛或名自在或名有智慧或名難勝或名雲王或名無諍或名能為主或名心歡喜或名無與等或名斷言論如是等其數十千令諸眾生各別知見諸佛子此四天下南次有世界名為難忍如來於彼或名帝釋或名寶稱或名離垢或名實語或名能調伏或名具足喜或名大名稱或名能利益或名無邊或名最勝如是等其數十千令諸眾生各別知見諸佛子此四天下西次有世界名為親慧如來於彼或名水天或名喜見或名最勝王或名調伏天或名真實慧或名到究竟或名歡

喜或名法慧或名所作已辦或名善住如是等其數十千令諸眾生各別知見諸佛子此四天下北次有世界名有師子如來於彼或名大牟尼或名苦行或名世所尊或名最勝田或名一切智或名善意或名清淨或名鑒羅跋那或名最上施或名苦行得如是等其數十千令諸眾生各別知見諸佛子此四天下東北方次有世界名妙觀察如來於彼或名調伏魔或名成就或名息滅或名賢天或名離貪或名勝慧或名心平等或名無能勝或名智慧音或名難出現如是等其數十千令諸眾生各別知見諸佛子此四天下東南方次有世界名為喜樂如來於彼或名極威嚴或名光燄聚或名徧知或名祕密或名解脫或名性安住或名如法行或名淨眼王或名大勇健或名精進力如是等其數十千令諸眾生各別知見諸佛子此四天下西南方次有世界名甚堅牢如來於彼或名安住或名智王或名圓滿或名不動或名妙眼或名頂王或名自在音或名一切施或名持眾仙或名勝須彌如是等其數十千令諸眾生各別知見諸佛子此四天下西北方次有世界名為妙地如來於彼或名普徧或名光燄或名摩尼髻或名可憶念或名無上義或名常喜樂或名性清淨或名圓滿光或名脩臂或名住本如是等其數十千令諸眾生各別知見諸佛子此四天下次下方有世界名為燄慧如來於彼或名集善根或名師子相或名猛利慧或名金色燄或名一切知識或名究竟音或名作利益或名到究竟或名真實天或名普徧勝如是等其數十千令諸眾生各別知見諸佛子此四天下次上方有世界名曰持地如來於彼或名有智慧或名清淨面或名覺慧或名上首或名行莊嚴或名發歡喜或名意成滿或名如盛火或名持戒或名一道如是等其數十千令諸眾生各別知見諸佛子此娑婆世界有百億四天下如來於中有百億萬種種名號令諸眾生各別知見諸佛子此娑婆世界東次有世界名為密訓如來於彼或名平等或名殊勝

或名安慰或名開曉意或名聞慧或名真實語或名得自在或名最勝身或名大勇猛或名無等智如是等百億萬種種名號令諸眾生各別知見諸佛子此娑婆世界南次有世界名曰豐溢如來於彼或名本性或名勤意或名無上尊或名大智炬或名無所依或名光明藏或名智慧藏或名福德藏或名天中天或名大自在如是等百億萬種種名號令諸眾生各別知見諸佛子此娑婆世界西次有世界名為離垢如來於彼或名意成或名知道或名安住本或名能解縛或名通達義或名樂分別或名最勝見或名調伏行或名眾苦行或名具足力如是等百億萬種種名號令諸眾生各別知見諸佛子此娑婆世界北次有世界名曰豐樂如來於彼或名簷蔔華色或名日藏或名善住或名現神通或名性超邁或名慧日或名無礙或名如月現或名迅疾風或名清淨身如是等百億萬種種名號令諸眾生各別知見諸佛子此娑婆世界東北方次有世界名為攝取如來於彼或名永離苦或名普解脫或名大伏藏或名解脫智或名過去藏或名寶光明或名離世間或名無礙地或名淨信藏或名心不動如是等百億萬種種名號令諸眾生各別知見諸佛子此娑婆世界東南方次有世界名為饒益如來於彼或名現光明或名盡智或名美音或名勝根或名莊嚴蓋或名精進根或名到分別彼岸或名勝定或名簡言辭或名智慧海如是等百億萬種種名號令諸眾生各別知見諸佛子此娑婆世界西南方次有世界名為鮮少如來於彼或名牟尼主或名具眾寶或名世解脫或名徧知根或名勝言辭或名明了見或名根自在或名大仙師或名開導業或名金剛師子如是等百億萬種種名號令諸眾生各別知見諸佛子此娑婆世界西北方次有世界名為歡喜如來於彼或名妙華聚或名栴檀蓋或名蓮華藏或名超越諸法或名法寶或名復出生或名淨妙蓋或名廣大眼或名有善法或名專念法或名網藏如是等百億萬種種名號



令諸眾生各別知見諸佛子此娑婆世界次下方有世界名為闍闍如來於彼或名發起燄或名調伏毒或名帝釋弓或名無常所或名覺悟本或名斷增長或名大速疾或名常樂施或名分別道或名摧伏幢如是等百億萬種種名號令諸眾生各別知見諸佛子此娑婆世界次上方有世界名曰振音如來於彼或名勇猛幢或名無量寶或名樂大施或名天光或名吉興或名超境界或名一切主或名不退輪或名離眾惡或名一切智如是等百億萬種種名號令諸眾生各別知見諸佛子如娑婆世界如是東方百千億無數無量無邊無等不可數不可稱不可思不可量不可說盡法界虛空界諸世界中如來名號種種不同南西北方四維上下亦復如是如世尊昔為菩薩時以種種談論種種語言種種音聲種種業種種報種種處種種方便種種根種種信解種種地位而得成熟亦令眾生如是知見而為說法。

【論】第四爾時文殊師利已下至品末已來明舉法演說分於此分中義分為七一文殊師利已下兩行經明文殊觀眾二諸佛子已下可三行經明歎四種佛刹不可思議三何以故已下可兩行半經明諸佛隨根設法調伏四諸佛子已下可三行半經舉佛身業名色相壽命脩短等隨根之法化眾生故五諸佛子已下舉佛名號先舉此處四天下次及三千及周法界名號不同初舉十千次漸增廣乃至無量十千者是初首數之一終為明佛號普遍諸名字故令諸眾生了知一切名字平等清淨無分別好惡故已下直至品末六諸佛子已下可四行經是都結此土他方例然七如是世尊已下三行半經舉世尊往因所行今為眾說此已上答前二十八問中四種佛刹出現及名號徧周已下四聖諦品即明如來說法徧周十方世界所說法門不離四諦義故又此如來名號品非但論名號徧周但是如來身口意業總皆徧周文殊師利菩薩略而都舉如前文中云諸佛子如來於娑婆世界諸四天

下種種身種種名種種色相等如經廣明即明此品總答如來身語意業一切徧周從此品文殊師利舉佛果海身語等一切徧周令大眾自信己身同佛三業入如來性海等如來智發跡進修經過十住十行十迴向十地十一地直至如來出現品是其一終因果此名號品是始初入信名號徧周即一切名總是自佛之果出現品是己身自修行行滿之果故是如來放眉間光灌文殊頂使令問佛出現果法放口中光灌普賢口使令說佛果德始明自行因果徹故明文殊普賢理智妙行此齊體也離世間品法界品雖在其後為文字相排似有前後總是前後相通徹法故總是一圓滿法故如法界品是此一部經之大體為一切凡聖之本源也前初會信佛果即以如來并普賢為首即明已成佛果及已行之果生信今以入自己入信修行門即以文殊師利及如來名號并四諦法門為所信之因果即明以妙慧法門及名言而修學故問曰何故如來不自說其教何用放光令菩薩說答曰如來意令當位菩薩說當位法門令修學者知分劑易解故文殊常與一切諸佛及一切眾生作信心之因成妙慧之本母普賢菩薩常與一切諸佛眾生作修行之因以此二人成就菩提無作智果大悲之海令二人自相對問說如來出現品明是修行者因果始終圓滿前後因果性果智果行果相徹一體故明從此品至出現品文殊普賢二行因果信心者修行位滿體用徹故令後學者易解故如有兩品經如來自說前已述訖明是佛果二愚至佛方明。

## 大方廣佛新華嚴經合論卷第二十六

音切

瞿

(其俱切)。

曇

(潭音)。

導

(盜音)。

鑿

(於奚切)。

臂

(必未切)。

訓

(許運切)。

豐

(風音)。

關

(古還切)。

關

(藥音)。

跋

(蒲鉢切)。

鮮

(先音)。

震

(之刃切)。

藉

(慈夜切)。

範

(犯音)。

標

(補遙切)。

爻

(胡交切)。

箕

(基音)。

# 大方廣佛新華嚴經合論卷第二十七

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

## 四聖諦品第八

【論】於此一品之中義分為三一釋品名目二釋品來意三隨文釋義一釋品名目者諦者實義也明如來說四種實義令諸眾生起信解故問曰何故不說多但云四答曰此四種諦義總攝多故為明一切世間不離苦集一切出世間不離滅道滅盡諸苦名為滅諦滅盡涅槃名為道諦三乘涅槃皆有可得此大涅槃無餘可得名為道諦以二乘趣寂菩薩多生淨土又推淨土在餘他方又云菩薩留惑潤生故若不故留煩惱還應必有涅槃可證或有他方淨土可生是故三乘涅槃皆有可得又閻浮提成正覺佛木樹草座是化佛上方摩醯首羅天紅蓮華上佛是實報皆有忻厭故是故三乘四諦厭苦集忻滅道名四諦法輪此一乘經言四聖諦者是其實義何以故達苦性真無忻厭故無有他方別佛刹別淨土故無有染淨涅槃生死有忻厭所修道故所修道者住如法住修如法道不厭不著不欣不取一如法界無去來性無住處性身塵毛孔心之及境皆稱法性如是信解如是修道以是義故一乘四聖諦三乘四諦各各差別各有信解如來依根方便設教皆非凡夫能立如今修道者但隨自信解力便處即作不可例然如法華經為聲聞人說四諦法為緣覺人說十二因緣為諸菩薩說六波羅蜜亦是如來隨時之說如此經十地品五地菩薩作十種諦觀以四聖諦為體六地菩薩作十種十二緣生觀此是如來

隨位進修之法大要總言此四聖諦十二緣生法門但一切諸聖一切凡夫起信樂佛法心道未滿者皆從初心觀自他苦故發菩提心樂求道法但依大小勝劣不同四諦十二緣各別但一切世間法四諦義無不該通此是如來語業說法徧周故如繆珞經立九乘法門者意明三乘參用四諦十二緣各自得道差別其九乘者一聲聞聲聞乘二聲聞緣覺乘三聲聞菩薩乘如是三乘同觀四諦十二緣法各自得道不同如是三乘中各有三通為九通此法界不思議乘於解脫道中總有十乘皆得究竟無三界苦諸餘道門皆是人天世間生滅之法設得少樂終竟不離苦本三乘雖得出三界其道未真未是佛果乘故二釋品來意者為明前名號品是說如來身業隨方名號不同各別此品說如來隨方語業隨方說法不離四聖諦故此品須來三隨文釋義者於此一品經文於中總有十二段經。

【經】爾時文殊師利菩薩摩訶薩告諸菩薩言諸佛子苦聖諦此娑婆世界中或名罪或名逼迫或名變異或名攀緣或名聚或名刺或名依根或名虛誑或名癰瘡處或名愚夫行諸佛子苦集聖諦此娑婆世界中或名繫縛或名滅壞或名愛著義或名妄覺念或名趣入或名決定或名網或名戲論或名隨行或名顛倒根諸佛子苦滅聖諦此娑婆世界中或名無諍或名離塵或名寂靜或名無相或名無沒或名無自性或名無障礙或名滅或名體真實或名住自性諸佛子苦滅道聖諦此娑婆世界中或名一乘或名趣寂或名導引或名究竟無分別或名平等或名捨擔或名無所趣或名隨聖意或名仙人行或名十藏諸佛子此娑婆世界說四聖諦有如是等四百億十千名隨眾生心悉令調伏諸佛子此娑婆世界所言苦聖諦者彼密訓世界中或名營求根或名不出離或名繫縛本或名作所不應作或名普鬪諍或名分枿悉無力或名作所依或名極苦或名躁動或名形狀物諸佛子所言苦

集聖諦者彼密訓世界中或名順生死或名染著或名燒然或名流轉或名敗壞根或名續諸有或名惡行或名愛著或名病源或名分數諸佛子所言苦滅聖諦者彼密訓世界中或名第一義或名出離或名可讚歎或名安隱或名善入趣或名調伏或名一分或名無罪或名離貪或名決定諸佛子所言苦滅道聖諦者彼密訓世界中或名猛將或名上行或名超出或名有方便或名平等眼或名離邊或名了悟或名攝取或名最勝眼或名觀方諸佛子密訓世界說四聖諦有如是等四百億十千名隨眾生心悉令調伏諸佛子此娑婆世界所言苦聖諦者彼最勝世界中或名恐怖或名分段或名可厭惡或名須承事或名變異或名招引怨或名能欺奪或名難共事或名妄分別或名有勢力諸佛子所言苦集聖諦者彼最勝世界中或名敗壞或名癡根或名大怨或名利刃或名滅味或名仇對或名非己物或名惡導引或名增黑暗或名壞善利諸佛子所言苦滅聖諦者彼最勝世界中或名大義或名饒益或名義中義或名無量或名所應見或名離分別或名最上調伏或名常平等或名可同住或名無為諸佛子所言苦滅道聖諦者彼最勝世界中或名能燒然或名最上品或名決定或名無能破或名深方便或名出離或名不下劣或名通達或名解脫性或名能度脫諸佛子最勝世界說四聖諦有如是等四百億十千名隨眾生心悉令調伏諸佛子此娑婆世界所言苦聖諦者彼離垢世界中或名悔恨或名資待或名展轉或名住城或名一味或名非法或名居宅或名妄著處或名虛妄見或名無有數諸佛子所言苦集聖諦者彼離垢世界中或名無實物或名但有語或名非潔白或名生地或名執取或名鄙賤或名增長或名重擔或名能生或名羸獢諸佛子所言苦滅聖諦者彼離垢世界中或名無等等或名普除盡或名離垢或名最勝根或名稱會或名無資待或名滅惑或名最上或名畢竟或名破印諸佛子所言苦滅道聖

諦者彼離垢世界中或名堅固物或名方便分或名解脫本或名本性實或名不可毀訾或名最清淨或名諸有邊或名受寄全或名作究竟或名淨分別諸佛子離垢世界說四聖諦有如是等四百億十千名隨眾生心悉令調伏諸佛子此娑婆世界所言苦聖諦者彼豐溢世界中或名愛染處或名險害根或名有海分或名積集成或名差別根或名增長或名生滅故名障礙或名刀劍本或名數所成諸佛子所言苦集聖諦者彼豐溢世界中或名可惡或名名字或名無盡或名分數或名不可愛或名能攫噬或名麤鄙物或名愛著或名器或名動諸佛子所言苦滅聖諦者彼豐溢世界中或名相續斷或名開顯或名無文字或名無所修或名無所見或名無所作或名寂滅或名已燒盡或名捨重擔或名已除壞諸佛子所言苦滅道聖諦者彼豐溢世界中或名寂滅行或名出離行或名勤修證或名安隱去或名無量壽或名善了知或名究竟道或名難修習或名至彼岸或名無能勝諸佛子豐溢世界說四聖諦有如是等四百億十千名隨眾生心悉令調伏諸佛子此娑婆世界所言苦聖諦者彼攝取世界中或名能劫奪或名非善友或名多恐怖或名種種戲論或名地獄性或名非實義或名貪欲擔或名深重根或名隨心轉或名根本空諸佛子所言苦集聖諦者彼攝取世界中或名貪著或名惡成辦或名過惡或名速疾或名能執取或名想或名有果或名無可說或名無可取或名流轉諸佛子所言苦滅聖諦者彼攝取世界中或名不退轉或名離言說或名無相狀或名可欣樂或名堅固或名上妙或名離癡或名滅盡或名遠惡或名出離諸佛子所言苦滅道聖諦者彼攝取世界中或名離言或名無諍或名教導或名善迴向或名大善巧或名差別方便或名如虛空或名寂靜行或名勝智或名能了義諸佛子攝取世界說四聖諦有如是等四百億十千名隨眾生心悉令調伏諸佛子此娑婆世界所言苦聖諦者彼饒益世界中



或名重擔或名不堅或名如賊或名老死或名愛所成或名流轉  
或名疲勞或名惡相狀或名生長或名利刃諸佛子所言苦集聖  
諦者彼饒益世界中或名敗壞或名渾濁或名退失或名無力或  
名喪失或名乖違或名不和合或名所作或名取或名意欲諸佛  
子所言苦滅聖諦者彼饒益世界中或名出獄或名真實或名離  
難或名覆護或名離惡或名隨順或名根本或名捨因或名無為  
或名無相續諸佛子所言苦滅道聖諦者彼饒益世界中或名達  
無所有或名一切印或名三昧藏或名得光明或名不退法或名  
能盡有或名廣大路或名能調伏或名有安隱或名不流轉根諸  
佛子饒益世界說四聖諦有如是等四百億十千名隨眾生心悉  
令調伏諸佛子此娑婆世界所言苦聖諦者彼鮮少世界中或名  
險樂欲或名繫縛處或名邪行或名隨受或名無慚恥或名貪欲  
根或名恒河流或名常破壞或名炬火性或名多憂惱諸佛子所  
言苦集聖諦者彼鮮少世界中或名廣地或名能趣或名遠慧或  
名留難或名恐怖或名放逸或名攝取或名著處或名宅主或名  
連縛諸佛子所言苦滅聖諦者彼鮮少世界中或名充滿或名不  
死或名無我或名無自性或名分別盡或名安樂住或名無限量  
或名斷流轉或名絕行處或名不二諸佛子所言苦滅道聖諦者  
彼鮮少世界中或名大光明或名演說海或名簡擇義或名和合  
法或名離取著或名斷相續或名廣大路或名平等因或名淨方  
便或名最勝見諸佛子鮮少世界說四聖諦有如是等四百億十  
千名隨眾生心悉令調伏諸佛子此娑婆世界所言苦聖諦者彼  
歡喜世界中或名流轉或名出生或名失利或名染著或名重擔  
或名差別或名內險或名集會或名惡舍宅或名苦惱性諸佛子  
所言苦集聖諦者彼歡喜世界中或名地或名方便或名非時或  
名非實法或名無底或名攝取或名離戒或名煩惱法或名狹劣  
見或名垢聚諸佛子所言苦滅聖諦者彼歡喜世界中或名破依

止或名不放逸或名真實或名平等或名善淨或名無病或名無曲或名無相或名自在或名無生諸佛子所言苦滅道聖諦者彼歡喜世界中或名入勝界或名斷集或名超等類或名廣大性或名分別盡或名神力道或名眾方便或名正念行或名常寂路或名攝解脫諸佛子歡喜世界說四聖諦有如是等四百億十千名隨眾生心悉令調伏諸佛子此娑婆世界所言苦聖諦者彼關闡世界中或名敗壞相或名如壞器或名我所成或名諸趣身或名數流轉或名眾惡門或名性苦或名可棄捨或名無味或名來去諸佛子所言苦集聖諦者彼關闡世界中或名行或名憤毒或名和合或名受支或名我心或名裸毒或名虛稱或名乖違或名熱惱或名驚駭諸佛子所言苦滅聖諦者彼關闡世界中或名無積集或名不可得或名妙藥或名不可壞或名無著或名無量或名廣大或名覺分或名離染或名無障礙諸佛子所言苦滅道聖諦者彼關闡世界中或名安隱行或名離欲或名究竟實或名入義或名性究竟或名淨現或名攝念或名趣解脫或名救濟或名勝行諸佛子關闡世界說四聖諦有如是等四百億十千名隨眾生心悉令調伏諸佛子此娑婆世界所言苦聖諦者彼振音世界中或名匿疵或名世間或名所依或名傲慢或名染著性或名駛流或名不可樂或名覆藏或名速滅或名難調諸佛子所言苦集聖諦者彼振音世界中或名須制伏或名心趣或名能縛或名隨念起或名至後邊或名共和合或名分別或名門或名飄動或名隱覆諸佛子所言苦滅聖諦者彼振音世界中或名無依處或名不可取或名轉還或名離諍或名小或名大或名善淨或名無盡或名廣博或名無等價諸佛子所言苦滅道聖諦者彼振音世界中或名觀察或名能摧敵或名了知印或名能入性或名難敵對或名無限義或名能入智或名和合道或名恒不動或名殊勝義諸

佛子振音世界說四聖諦有如是等四百億十千名隨眾生心悉令調伏。

【論】從爾時文殊師利已下十一段是通中心并十方正說四聖諦義各別不同。

【經】諸佛子如此娑婆世尊中說四聖諦有四百億十千名如是東方百千億無數無量無邊無等不可數不可稱不可思不可量不可說盡法界虛空界所有世界彼一一世界中說四聖諦亦各有四百億十千名隨眾生心悉令調伏如東方南西北方四維上下亦復如是諸佛子如娑婆世界有如上所說十方世界彼一切世界亦各有如是十方世界一一世界中說苦聖諦有百億萬種名說集聖諦滅聖諦道聖諦亦各有百億萬種名皆隨眾生心之所樂令其調伏。

【論】末後一段是總都說十方世界無盡名目皆是四聖諦為體從此四諦上分作種種法門五蘊十二緣總在其內八萬四千塵勞解脫總在其內如文具說不煩更釋已上佛名號品四聖諦品是自己信進修行中所信之法已下光明覺品現佛境及所行行門徧周如文具明如是已上十信門以根本普光明智為殿體如是進修究竟不離此智也。

## 光明覺品第九

【論】將釋此品約作三門分別一釋品名目二釋品來意三隨文釋義一釋品名目者此品名光明覺品為明因如來放十信中足輪下光照燭十方初云一三千大千以次十三千大千以次增廣至不可說法界虛空界為明無盡令信心者了心境廣大無盡無礙與法界虛空界等明其自己法身智身願行亦等故以光所照覺悟信心令修行故以是因緣名光明覺品修行者一一隨

光觀照十方已能觀之心亦盡即與法身同體入十住初心入信心者一一隨此寶色燈雲光觀內心及方所總令心境無有內外中間方可入方便三昧入十住法門若不作此寶色光明觀不成一切普賢願海神通道力諸佛大用皆悉不成二釋品來意者為此第二會中普光明殿說十信心明成凡夫自心所契佛果信其前之如來名號品舉佛身眼耳鼻舌等及名號徧周四聖諦品明如來口業說法行行徧周總明佛果徧也令此品放如來信位教行之光覺悟一切令信心者自信自心智境界身行徧周即一切處不動智佛一切處文殊師利一切處覺首目首財首等十首菩薩是也即明信心者自己身語意業名號徧周一如佛故此品須來明已上不動智佛等十箇智佛是信心中所信之果是自己之智與佛本同文殊師利即是自心妙理之慧餘九是行十色世界是所見之法三隨文釋義者。

【經】爾時世尊從兩足輪下放百億光明照此三千大千世界百億閻浮提百億弗婆提百億瞿耶尼百億鬱單越百億大海百億輪圍山百億菩薩受生百億菩薩出家百億如來成正覺百億如來轉法輪百億如來入涅槃百億須彌山王百億四天王眾天百億三十三天百億夜摩天百億兜率天百億化樂天百億他化自在天百億梵眾天百億光音天百億徧淨天百億廣果天百億色究竟天其中所有悉皆明現如此處見佛世尊坐蓮華藏師子之座十佛刹微塵數菩薩所共圍遶其百億閻浮提中百億如來亦如是坐悉以佛神力故十方各有一大菩薩一一各與十佛刹微塵數諸菩薩俱來詣佛所其名曰文殊師利菩薩覺首菩薩財首菩薩寶首菩薩功德首菩薩目首菩薩精進首菩薩法首菩薩智首菩薩賢首菩薩是諸菩薩所從來國所謂金色世界妙色世界蓮華色世界蒼蔔華色世界優鉢羅華色世界金色世界寶色世界金剛色世界頗黎色世界平等色世界此諸菩薩各於佛

所淨修梵行所謂不動智佛無礙智佛解脫智佛威儀智佛明相智佛究竟智佛最勝智佛自在智佛梵智佛觀察智佛爾時一切處文殊師利菩薩各於佛所同時發聲說此頌言。

【論】從初爾時世尊已下有二十四行半經於中大意義分為五一舉光出處二舉光所照境界遠近三舉一切處百億眾會菩薩同集四舉一切處佛刹根本智佛五明一切處文殊同聲一時說頌一舉光出處者經云爾時世尊兩足輪下放百億光明此光是初會中如來放眉間光名一切菩薩智光明普照耀十方藏此光是教化十方菩薩安立十信及五位十地法門次第令隨位進修開敷智眼成其無量福智之海是故名之照耀十方藏又藏者有二義一眾生善根堪受此法名之為藏如文殊師利歎善財童子善哉功德藏能來至我所二大願大悲大智法身總名為藏此光明常照耀十方法界善根眾生而能成就大菩提心大願大悲大智饒益眾生藏者故此如來兩足輪所放光明是彼現相品中眉間之光照十方已其光還來入佛足下為欲以十地果光用成十信故是故於此品中還放彼第一會中所入如來足下之光以成十信如今如來兩足輪下放光是現相品中所入之光故明足下放光者是以果成信初始故如十住位中於如來足指端放光即明入聖之始發跡應真之初故是初生諸佛大智家故十行位中足趺上放光十迴向位中膝上放光十地位中眉間放光終而復始還依舊果初以果成因因修果體至功終位極本末不移至位更明今此放兩足輪中之光明以果成信故乃至修行常修果體使慣習成熟故如此從眉間放光足下輪中放光足指端放光足趺上放光膝上放光眉間放光出現品中又於眉間放光名如來出現光明如此六度放光總明成就十信十住十行十迴向十地十一地因果法門進修之行相一終故法界品又眉間放光者明此一部之經菩薩五位進修及如來出現所證本法總法界

為體故明法界一品是過現未來一切諸佛之本末故是恒法故是法常道不思議故是一切眾生本末故是一切法之本體故二舉光照遠近者初照三千大千之境界次照十百千乃至十億及不可說問曰何故不一時普照而有漸次耶答是一時中漸次為法界中無前後故漸次者為十信中修勝進增勝故三舉一切處百億眾會菩薩同集者明自己信行徧周故四舉一切處佛世界及十智如來者明信心者自己智德果徧周故五一切處文殊師利同時說頌者明信心者自己妙慧釋法徧周總明自有非是他法從初自信如是十色世界十智如來十首菩薩總是自己果行法性大智萬行徧周以成信故從此修行經歷五位不離此也是故發心畢竟二不別如是發心先心難自未得度先度他是故我禮初發心初發以為天人師超勝聲聞及緣覺一如涅槃經說此明從凡入信心者難故為凡夫總自認是凡夫不肯認自心是不動智故是故入十信難明十信心成就任運至十住初發心住故乃至究竟佛果故如三乘中修十信心經十千劫此教中為以根本智法界為教體但以才堪見實即得不論劫量如覺城二千之眾善財為首者是路上發心六千比丘之眾亦皆是智慧猛利人類精奇一聞多曉悟謙恕仁慈專求大道以利含生皆是一生信滿發心入位人也若不信自心元是不動智佛者即永劫飄淪何能利人濟物如經所說若自有縛能解彼縛無有是處是故發心有二種一修信解發心但修十信解故即如前十智如來十首菩薩是二信滿發心十住位初名初發心住故即十慧菩薩十箇月佛是其因果也又就此說頌門中義分為二一明文殊師利說十偈頌歎如來十種德令信心者信解增廣二明信心者心地增廣其光漸增其光漸增者明信心漸勝如文可知一一隨光所照之境以心觀之隨方令心無礙盡十方總然十方觀徧唯有能觀心

在復觀能觀之心亦無內外即十方無礙方入十住初心一從文殊說頌中歎如來十種德令信心者漸漸增廣。

【經】

若有見正覺	解脫離諸漏	不著一切世
彼非證道眼	若有知如來	體相無所有
修習得明了	此人疾作佛	能見此世界
其心不搖動	於佛身亦然	當成勝智者
若於佛及法	其心了平等	二念不現前
當踐難思位	若見佛及身	平等而安住
無住無所入	當成難遇者	色受無有數
想行識亦然	若能如是知	當作大牟尼
世及出世見	一切皆超越	而能善知法
當成大光耀	若於一切智	發生迴向心
見心無所生	當獲大名稱	眾生無有生
亦復無有壞	若得如是智	當成無上道
一中解無量	無量中解一	了彼互生起
當成無所畏		

【論】一從初十行頌歎如來法身無體性德。

【經】爾時光明過此世界徧照東方十佛國土南西北方四維上下亦復如是彼一一世界中皆有百億閻浮提乃至百億色究竟天其中所有悉皆明現如此處見佛世尊坐蓮華藏師子之座十佛剎微塵數菩薩所共圍遶彼一一世界中各有百億閻浮提百億如來亦如是坐悉以佛神力故十方各有一大菩薩一一各與十佛剎微塵數諸菩薩俱來詣佛所其大菩薩謂文殊師利等所從來國謂金色世界等本所事佛謂不動智如來等爾時一切處文殊師利菩薩各於佛所同時發聲說此頌言。

眾生無智慧      愛刺所傷毒      為彼求菩提

諸佛法如是	普見於諸法	二邊皆捨離
道成永不退	轉此無等輪	不可思議劫
精進修諸行	為度諸眾生	此是大仙力
導師降眾魔	勇健無能勝	光中演妙義
慈悲故如是	以彼智慧心	破諸煩惱障
一念見一切	此是佛神力	擊于正法鼓
覺悟十方刹	咸令向菩提	自在力能爾
不壞無邊境	而遊諸億刹	於有無所著
彼自在如佛	諸佛如虛空	究竟常清淨
憶念生歡喜	彼諸願具足	一一地獄中
經於無量劫	為度眾生故	而能忍是苦
不惜於身命	常護諸佛法	無我心調柔
能得如來道		

【論】二十行頌歎如來大慈悲德為眾生求菩提心故。

【經】爾時光明過十世界徧照東方百世界南西北方四維上下亦復如是彼諸世界中皆有百億閻浮提乃至百億色究竟天其中所有悉皆明現彼一一閻浮提中悉見如來坐蓮華藏師子之座十佛刹微塵數菩薩所共圍遶悉以佛神力故十方各有一大菩薩一一各與十佛刹微塵數諸菩薩俱來詣佛所其大菩薩謂文殊師利等所從來國謂金色世界等本所事佛謂不動智如來等爾時一切處文殊師利菩薩各於佛所同時發聲說此頌言。

佛了法如幻	通達無障礙	心淨離眾著
調伏諸羣生	或有見初生	妙色如金山
住是最後身	永作人中月	或見經行時
具無量功德	念慧皆善巧	丈夫師子步
或見紺青目	觀察於十方	有時現戲笑



為順眾生故	或見師子吼	殊勝無比身
示現最後生	所說無非實	或有見出家
解脫一切縛	修治諸佛行	常樂觀寂滅
或見坐道場	覺知一切法	到功德彼岸
癡闇煩惱盡	或見勝丈夫	具足大悲心
轉於妙法輪	度無量眾生	或見師子吼
威光最殊特	超一切世間	神通力無等
或見心寂靜	如世燈永滅	種種現神通
十方能如是		

【論】三十行頌歎如來了法如幻德應緣現身故。

【經】爾時光明過百世界徧照東方千世界南西北方四維上下亦復如是彼一一世界中皆有百億閻浮提乃至百億色究竟天其中所有悉皆明現彼一一閻浮提中悉見如來坐蓮華藏師子之座十佛刹微塵數菩薩所共圍遶悉以佛神力故十方各有一大菩薩一一各與十佛刹微塵數諸菩薩俱來詣佛所其大菩薩謂文殊師利等所從來國謂金色世界等本所事佛謂不動智如來等爾時一切處文殊師利菩薩各於佛所同時發聲說此頌言。

佛於甚深法	通達無與等	眾生不能了
次第為開示	我性未曾有	我所亦空寂
云何諸如來	而得有其身	解脫明行者
無數無等倫	世間諸因量	求過不可得
佛非世間蘊	界處生死法	數法不能成
故號人師子	其性本空寂	內外俱解脫
離一切妄念	無等法如是	體性常不動
無我無來去	而能悟世間	無邊悉調伏
常樂觀寂滅	一相無有二	其心不增減

現無量神力	不作諸眾生	業報因緣行
而能了無礙	善逝法如是	種種諸眾生
流轉於十方	如來不分別	度脫無邊類
諸佛真金色	非有徧諸有	隨眾生心樂
為說寂滅法		

【論】四十行頌歎如來以甚深法德為眾開示故。

【經】爾時光明過千世界徧照東方十千世界南西北方四維上下亦復如是彼一一世界中皆有百億閻浮提乃至百億色究竟天其中所有悉皆明現彼一一閻浮提中悉見如來坐蓮華藏師子之座十佛刹微塵數菩薩所共圍遶悉以佛神力故十方各有一大菩薩一一各與十佛刹微塵數諸菩薩俱來詣佛所其大菩薩謂文殊師利等所從來國謂金色世界等本所事佛謂不動智如來等爾時一切處文殊師利菩薩各於佛所同時發聲說此頌言。

發起大悲心	救護諸眾生	永出人天眾
如是業應作	意常信樂佛	其心不退轉
親近諸如來	如是業應作	志樂佛功德
其心永不退	住於清涼慧	如是業應作
一切威儀中	常念佛功德	晝夜無暫斷
如是業應作	觀無邊三世	學彼佛功德
常無厭倦心	如是業應作	觀身如實相
一切皆寂滅	離我無我著	如是業應作
等觀眾生心	不起諸分別	入於真實境
如是業應作	悉舉無邊界	普飲一切海
神通大智力	如是業應作	思惟諸國土
色與非色相	一切悉能知	如是業應作
十方國土塵	一塵為一佛	悉能知其數

如是業應作

【論】五十行頌歎佛救護眾生德勸修心者有十種業應作故。

【經】爾時光明遍十千世界徧照東方百千世界南西北方四維上下亦復如是彼一一世界中皆有百億閻浮提乃至百億色究竟天其中所有悉皆明現彼一一閻浮提中悉見如來坐蓮華藏師子之座十佛刹微塵數菩薩所共圍遶悉以佛神力故十方各有一大菩薩一一各與十佛刹微塵數諸菩薩俱來詣佛所其大菩薩謂文殊師利等所從來國謂金色世界等本所事佛謂不動智如來等爾時一切處文殊師利菩薩各於佛所同時發聲說此頌言。

若以威德色種族	而見人中調御師
是為病眼顛倒見	彼不能知最勝法
如來色形諸相等	一切世間莫能測
億那由劫共思量	色相威德轉無邊
如來非以相為體	但是無相寂滅法
身相威儀悉具足	世間隨樂皆得見
佛法微妙難可量	一切言說莫能及
非是和合非不合	體性寂滅無諸相
佛身無生超戲論	非是蘊聚差別法
得自在力決定見	所行無畏離言道

身心悉平等	內外皆解脫	永劫住正念
無著無所繫	意淨光明者	所行無染著
智眼靡不周	廣大利眾生	一身為無量
無量復為一	了知諸世間	現形徧一切
此身無所從	亦無所積聚	眾生分別故
見佛種種身	心分別世間	是心無所有

如來知此法 如是見佛身

【論】六十五行頌歎如來無相之相德隨其見者皆得見故。

【經】爾時光明過百千世界徧照東方百萬世界南西北方四維上下亦復如是彼一一世界中皆有百億閻浮提乃至百億色究竟天其中所有悉皆明現彼一一閻浮提中悉見如來坐蓮華藏師子之座十佛剎微塵數菩薩所共圍遶悉以佛神力故十方各有一大菩薩一一各與十佛剎微塵數諸菩薩俱來詣佛所其大菩薩謂文殊師利等所從來國謂金色世界等本所事佛謂不動智如來等爾時一切處文殊師利菩薩各於佛所同時發聲說此頌言。

如來最自在	超世無所依	具一切功德
度脫於諸有	無染無所著	無想無依止
體性不可量	見者咸稱歎	光明徧清淨
塵累悉蠲滌	不動離二邊	此是如來智
若有見如來	身心離分別	則於一切法
永出諸疑滯	一切世間中	處處轉法輪
無性無所轉	導師方便說	於法無疑惑
永絕諸戲論	不生分別心	是念佛菩提
了知差別法	不著於言說	無有一與多
是名隨佛教	多中無一性	一亦無有多
如是二俱捨	普入佛功德	眾生及國土
一切皆寂滅	無依無分別	能入佛菩提
眾生及國土	一異不可得	如是善觀察
名知佛法義		

【論】七十行頌歎如來無依自在德具一切功德令信心者修學故。

大方廣佛新華嚴經合論卷第二十七

## 音切

癰

(於龍切)。

瘡

(楚良切)。

諦

(帝音)。

顛

(端年切)。

擔

(都濫切)。

營

(于經切)。

枅

(息音)。

鬪

(都豆切)。

諍

(側迸切)。

躁

(精到切)。

歎

(他幹切)。

敗

(蒲賣切)。

仇

(求音)。

鄙

(彼音)。

賤

(才線切)。

麤

(倉胡切)。

獷

(孤猛切)。

攫

(居博切)。

噬

(常制切)。

續

(似欲切)。

渾

(戶昆切)。

濁

(直角切)。

乖

(古懷切)。

慚

(昨含切)。

恥

(敕里切)。

炬

(其呂切)。

揀

(古眼切)。

駭

(呼解切)。

憤

(符粉切)。

坏

(滂回切)。

匿

(奴力切)。

疵

(疾移切)。

傲

(五到分)慢(莫晏切)。

駛

(疎利切)。

鬱

(紆欵切)。

單

(丹音)。

越

(曰音)。

兜

(當侯切)。

蘊

(於問切)。

紺

(古暗切)。

砦

(咨此切)。

滌

(徒歷切)。



# 大方廣佛新華嚴經合論卷第二十八

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

## 光明覺品第九之餘

【經】爾時光明過百萬世界徧照東方一億世界南西北方四維上下亦復如是彼一一世界中皆有百億閻浮提乃至百億色究竟天其中所有悉皆明現彼一一閻浮提中各見如來坐蓮華藏師子之座十佛刹微塵數菩薩所共圍遶悉以佛神力故十方各有一大菩薩一一各與十佛刹微塵數諸菩薩俱來詣佛所其大菩薩謂文殊師利等所從來國謂金色世界等本所事佛謂不動智如來等爾時一切處文殊師利菩薩各於佛所同時發聲說此頌言。

智慧無等法無邊	超諸有海到彼岸
壽量光明悉無比	此功德者方便力
所有佛法皆明了	常觀三世無厭倦
雖緣境界不分別	此難思者方便力
樂觀眾生無生想	普見諸趣無趣想
恒住禪寂不繫心	此無礙慧方便力
善巧通達一切法	正念勤修涅槃道
樂於解脫離不平	此寂滅人方便力
有能勸向佛菩提	趣如法界一切智
善化眾生入於諦	此住佛心方便力
佛所說法皆隨入	廣大智慧無所礙

一切處行悉已臻	此自在修方便力
恒住涅槃如虛空	隨心化現靡不周
此依無相而為相	到難到者方便力
晝夜日月及年劫	世界始終成壞相
如是憶念悉了知	此時數智方便力
一切眾生有生滅	色與非色想非想
所有名字悉了知	此住難思方便力
過去現在未來世	所有言說皆能了
而知三世悉平等	此無比解方便力

【論】八二十行頌歎如來智慧方便德令信心者樂學修行故。

【經】爾時光明過一億世界徧照東方十億世界南西北方四維上下亦復如是彼一一世界中皆有百億閻浮提乃至百億色究竟天其中所有悉皆明現彼一一閻浮提中悉見如來坐蓮華藏師子之座十佛剎微塵數菩薩所共圍遶悉以佛神力故十方各有一大菩薩一一各與十佛剎微塵數諸菩薩俱來詣佛所其大菩薩謂文殊師利等所從來國謂金色世界等本所事佛謂不動智如來等爾時一切處文殊師利菩薩各於佛所同時發聲說此頌言。

廣大苦行皆修習	日夜精勤無厭怠
已度難度師子吼	普化眾生是其行
眾生流轉愛欲海	無明網覆大憂迫
至仁勇猛悉斷除	誓亦當然是其行
世間放逸著五欲	不實分別受眾苦
奉行佛教常攝心	誓度於斯是其行
眾生著我入生死	求其邊際不可得
普事如來獲妙法	為彼宣說是其行

眾生無怙病所纏	常淪惡趣起三毒
大火猛燄恒燒熱	淨心度彼是其行
眾生迷惑失正道	常行邪徑入闇宅
為彼大然正法燈	永作照明是其行
眾生漂溺諸有海	憂難無涯不可處
為彼興造大法船	皆令得度是其行
眾生無知不見本	迷惑癡狂險難中
佛哀愍彼建法橋	正念令昇是其行
見諸眾生在險道	老病死苦常逼迫
修諸方便無限量	誓當悉度是其行
聞法信解無疑惑	了性空寂不驚怖
隨形六道徧十方	普教羣迷是其行

【論】九二十行頌歎如來廣大苦行精進德令信心者修行故。

【經】爾時光明過十億世界徧照東方百億世界千億世界百千億世界那由他億世界百那由他億世界千那由他億世界百千那由他億世界如是無數無量無邊無等不可數不可稱不可思不可量不可說盡法界虛空界所有世界南西北方四維上下亦復如是彼一一世界中皆有百億閻浮提乃至百億色究竟天其中所有悉皆明現彼一一閻浮提中悉見如來坐蓮華藏師子之座十佛刹微塵數菩薩所共圍遶悉以佛神力故十方各有一大菩薩一一各與十佛刹微塵數諸菩薩俱來詣佛所其大菩薩謂文殊師利等所從來國謂金色世界等本所事佛謂不動智如來等爾時一切處文殊師利菩薩各於佛所同時發聲說此頌言。

一念普觀無量劫	無去無來亦無住
如是了知三世事	超諸方便成十力

十方無比善名稱	永離諸難常歡喜
普詣一切國土中	廣為宣揚如是法
為利眾生供養佛	如其意獲相似果
於一切法悉順知	徧十方中現神力
從初供佛意柔忍	入深禪定觀法性
普勸眾生發道心	以此速成無上果
十方求法情無異	為修功德令滿足
有無二相悉滅除	此人於佛為真見
普往十方諸國土	廣說妙法興義利
住於實際不動搖	此人功德同於佛
如來所轉妙法輪	一切皆是菩提分
若能聞已悟法性	如是之人常見佛
不見十力空如幻	雖見非見如盲覩
分別取相不見佛	畢竟離著乃能見
眾生隨業種種別	十方內外難盡見
佛身無礙徧十方	不可盡見亦如是
譬如空中無量刹	無來無去徧十方
生成滅壞無所依	佛徧虛空亦如是

【論】二十行頌歎如來實性無三世德無二相徧周一切令信心者修學故已上文殊師利說此十頌歎佛十德令起信心者發信進修行故此光明覺品舉佛果法令信心者正自入信信同諸佛果法不移法身不動智菩薩行徧周一體自古及今更無他法凡聖一性同無性味同大願大慈大悲大智文殊妙慧普賢萬行之味總為動寂一體用故如是信修從初發心一時竝進以此十信位內置一百四十大願成大悲行法身慧身智身一時俱進故法身者即十色世界是智身者即十智佛是慧身者即文殊師利是大悲者即一百四十大願成之是如是已上諸法皆是此

光明覺品悉皆信入如問明品即是已入信中問答法則成其信力修行故問曰何故成十信門皆文殊師利說法答曰為明文殊是十方諸佛妙慧善簡擇正邪正邪既定方以行修行即名普賢行也次第合然故明文殊師利是童子菩薩以因創發啟蒙入信之首故因行成名也問曰五位法中菩薩入定方說何故信位不入定說答信是凡夫生滅心信未入證故無定也以五位是入體應真無作之理智非無思而顯不可以有情求之故須入定。

### 菩薩問明品第十

【論】將釋此品約分三門一釋品名目二釋品來意三隨文釋義一釋品名目者為成十種信根長十種信力文殊師利覺首等互為主伴問十種法明故故為問明品二釋品來意者前品如來足下輪中放光開覺所照佛境遠近令信心者一一觀之無礙令心行廣大稱法界故又文殊師利菩薩以十偈頌歎佛十德勸令信心者修行故此問明品即是明十信心者正修行之行及斷疑故有此品來也三隨文釋義者於此品一段文中有十一段經明文殊覺首十菩薩等互為主伴問十種法明各以菩薩之名即表十信所行之行文殊還以名下之行以相諮問十菩薩等各以自行之法以頌答之令信心者依而做學其十問十頌其文如下最下一段都結十方同此。

【經】爾時文殊師利菩薩問覺首菩薩言佛子心性是一云何見有種種差別所謂往善趣惡趣諸根滿缺受生同異端正醜陋苦樂不同業不知心心不知業受不知報報不知受心不知受受不知心因不知緣緣不知因智不知境境不知智時覺首菩薩以頌答曰。

仁今問是義      為曉悟羣蒙      我如其性答

唯仁應諦聽	諸法無作用	亦無有體性
是故彼一切	各各不相知	譬如河中水
湍流競奔逝	各各不相知	諸法亦如是
亦如大火聚	猛燄同時發	各各不相知
諸法亦如是	又如長風起	遇物咸鼓扇
各各不相知	諸法亦如是	又如眾地界
展轉因依住	各各不相知	諸法亦如是
眼耳鼻舌身	心意諸情根	以此常流轉
而無能轉者	法性本無生	示現而有生
是中無能現	亦無所現物	眼耳鼻舌身
心意諸情根	一切空無性	妄心分別有
如理而觀察	一切皆無性	法眼不思議
此見非顛倒	若實若不實	若妄若非妄
世間出世間	但有假言說	

【論】第一爾時文殊師利菩薩已下六行經是文殊菩薩起二十問善惡因果或一字一問或一句一問總有二十問向下十一行頌是覺首菩薩答初一行頌是歎能問之人及勸聽後十行頌是答所問之法文殊善問世間善惡因果不相知業能成就善惡因果覺首菩薩便以法不相知以真理答但為迷真自作業爾知真者但以全業是真末後一行頌明真妄總亡舉喻及法說故如文自具思之可見文順理顯不煩更釋於此十一行頌中義分為三一科頌意二釋菩薩名三配隨位因果一科頌意者此十一行一行是一頌初行歎能問及勸聽次下十行文各自具明初一行頌頌法無作無性次一行舉喻水流不相知准意知之不煩更科二釋菩薩名者為明覺此隨流生死業體本性恒真而無流轉眼耳鼻舌身意恒如法知非流轉生死性故亦無虛妄亦無真實但為無貪瞋癡愛真智慧法名之為真故說如斯法利眾生故名

為自覺覺他大道心眾生者故為以此當體無明諸業因果上自覺覺他令知法界自性真理真妄兩亡名為覺首以信此法初名之為首此明十信初心全信自身眼耳鼻舌身意及以一切眾生全體真妄兩亡唯佛智海故故以不動智佛十智如來為十信位中自己果故金色世界妙色世界蓮華色世界等十色世界是十信之中所信之理文殊師利覺首財首等十菩薩眾是十信之行以行立名得名知行一一菩薩倣行解上而立名故已下菩薩例然世界名妙色即是覺首菩薩所覺之理無礙智佛即是覺首當位所修佛果以此信心明諸業因果真妄兩亡即智用無礙故三配隨位因果者常以自心本不動智佛為本信心之因以進修得此無礙智佛是隨位佛果此乃但依問答及菩薩名號佛名號世界形色取其意趣理自分明勿須疑也。

【經】爾時文殊師利菩薩問財首菩薩言佛子一切眾生非眾生云何如來隨其時隨其命隨其身隨其行隨其解隨其言論隨其心樂隨其方便隨其思惟隨其觀察於如是諸眾生中為現其身教化調伏時財首菩薩以頌答曰。

此是樂寂滅	多聞者境界	我為仁宣說
仁今應聽受	分別觀內身	此中誰是我
若能如是解	彼達我有無	此身假安立
住處無方所	諦了是身者	於中無所著
於身善觀察	一切皆明見	知法皆虛妄
不起心分別	壽命因誰起	復因誰退滅
猶如旋火輪	初後不可知	智者能觀察
一切有無常	諸法空無我	永離一切相
眾報隨業生	如夢不真實	念念常滅壞
如前後亦爾	世間所見法	但以心為主
隨解取眾相	顛倒不如實	世間所言論

一切是分別      未曾有一法      得入於法性  
能緣所緣力      種種法出生      速滅不暫停  
念念悉如是

【論】第二爾時文殊師利菩薩已下五行經是文殊師利問財首菩薩言如來十種方便隨時之法初舉非眾生即約覺首所答業體純真後問如來十種隨時之化何緣而有財首為成信心約實而答隨時是假如下十行頌中具明於此十行頌中義分為三一科其頌意二釋菩薩名三配隨位因果一科頌意者此十行頌中一行一頌初一行頌中初兩句歎所問法非小器所堪是多聞者之境界次兩句今如問當說及勸聽已下九行頌是財首以實而答如文具明二釋菩薩名者為將如下頌中善達真假法財而惠施眾生故名為財首以十信心中法財初始益生之行名之為首世界名蓮華色者明此信中以法聖財饒益眾生令其自他性無染著號曰世界名為蓮華色以法施人破迷成智名為滅暗智佛明當位信中自具法門理行智之因果故財首是當位之行已下例然三配隨位因果者常以自心根本不動智佛文殊師利為信心之因進修得解脫智佛財首菩薩是隨位之行果故佛是智果餘者例然倣此。

【經】爾時文殊師利菩薩問寶首菩薩言佛子一切眾生等有四大無我無我所云何而有受苦受樂端正醜陋內好外好少受多受或受現報或受後報然法界中無美無惡時寶首菩薩以頌答曰。

隨其所行業      如是果報生      作者無所有  
諸佛之所說      譬如淨明鏡      隨其所對質  
現像各不同      業性亦如是      亦如田種子  
各各不相知      自然能出生      業性亦如是  
又如巧幻師      在彼四衢道      示現眾色相



業性亦如是	如機關木人	能出種種聲
彼無我非我	業性亦如是	亦如眾鳥類
從穀而得出	音聲各不同	業性亦如是
譬如胎藏中	諸根悉成就	體相無來處
業性亦如是	又如在地獄	種種諸苦事
彼悉無所從	業性亦如是	譬如轉輪王
成就勝七寶	來處不可得	業性亦如是
又如諸世界	大火所燒然	此火無來處
業性亦如是		

【論】第三爾時已下四行半經是文殊師利問寶首菩薩先總舉眾生同有四大無我無我所云何已下有十問業因果法已下有十行頌是寶首菩薩答前十問故初明舉體無分別二明受業之好醜由行所生具如經說大意達體業亡迷真業起故於此十行頌中義分為三一科頌意二釋菩薩名三配隨位因果一科頌意者初兩句是歎果報由行生次兩句歎業體本真本無所有是諸佛所說已下九行一行一頌舉喻顯法達法無業法業無二由行不同如文可知二釋菩薩名者明此信位達業即法體不復有業名之法寶以此法寶益生為信首故故名寶首明此是北方是師位以威儀軌則以利眾生故佛號威儀智佛世界名蒼蔔華者此華黃色明是利眾生之福德色也黃者福慶之氣內應白淨外現黃相故如來為人天之師衣緇衣像北方坎故內應白淨無染之理外現黃相即明以利生白淨無染之福相以為世界之名以利眾生德行庠序佛號威儀智佛常以法寶利生達業性真名為寶首菩薩總是第四信心自所得法因果理智之號問曰何故北方為師為君答曰像水利潤萬物又水流慕下像為君為師者就愚濟迷使令發明又明北方坎為下位像為君為師者常以謙下之行令眾生所歸益之以道潤之故君子常謙處下位而濟物

發明故故以北方坎為君為師夫大方無隅但取其義表德故餘位如名號品已釋一佛號徧十方故此以隨方表法故如周易泰卦乾下坤上初九拔茅連茹為茅潔白柔弱其根甘甜像君子有德如茅柔弱潔白甘和可以引而接之與仕也然茅非君子以物喻之然此方隅非佛也以法喻之令知法也佛智無依依物名智其方無方以法成方也非東西南北如情所見方故三配隨位因果者常以自心本不動智佛為始信心之因進修得威儀智佛為第四精進波羅蜜中之果也。

【經】爾時文殊師利菩薩問德首菩薩言佛子如來所悟唯是一法云何乃說無量諸法現無量剎化無量眾演無量音示無量身知無量心現無量神通普能震動無量世界示現無量殊勝莊嚴顯示無邊種種境界而法性中此差別相皆不可得時德首菩薩以頌答曰。

佛子所問義	甚深難可了	智者能知此
常樂佛功德	譬如地性一	眾生各別住
地無一異念	諸佛法如是	亦如火性一
能燒一切物	火燄無分別	諸佛法如是
亦如大海一	波濤千萬異	水無種種殊
諸佛法如是	亦如風性一	能吹一切物
風無一異念	諸佛法如是	亦如大雲雷
普雨一切地	雨滴無差別	諸佛法如是
亦如地界一	能生種種芽	非地有殊異
諸佛法如是	如日無雲暄	普照於十方
光明無異性	諸佛法如是	亦如空中月
世間靡不見	非月往其處	諸佛法如是
譬如大梵王	應現滿三千	其身無別異
諸佛法如是		

【論】第四爾時已下六行經是文殊問德首菩薩如來所悟是一法云何已下有十問如文具明已下有十行頌是德首菩薩答於此說頌中義分為三一科頌之意二釋菩薩名三配隨位因果一科頌意者此十行頌中初一行歎所問之義甚深唯智所知次下九行頌一行一頌如文具明大意明不異一法界修行無量法門無量法門祇是一法界性不可滯一不作多不可滯多不是一如十玄義思之以無依住智照之可見二釋菩薩名者名德首者為明此位不離一法界性以消癡愛及一切煩惱而常修習一切諸功德以名為德首世界名青蓮華者明此第五信心是禪波羅蜜故心淨無染無貪愛癡故此是東北方佛號明相智明此位進修之果得法心淨故如艮位寅丑兩間明相現故故佛號明相智用此方隅以表禪定法故以東北方是艮艮為山山表安靜不動義是禪定義故三配隨位因果者常以自心根本不動智佛為所信之因進修得明相智佛為果也。

【經】爾時文殊師利菩薩問目首菩薩言佛子如來福田等一無異云何而見眾生布施果報不同所謂種種色種種形種種家種種根種種財種種主種種眷屬種種官位種種功德種種智慧而佛於彼其心平等無異思惟時目首菩薩以頌答曰。

譬如大地一	隨種各生芽	於彼無怨親
佛福田亦然	又如水一味	因器有差別
佛福田亦然	眾生心故異	亦如巧幻師
能令眾歡喜	佛福田如是	令眾生敬悅
如有才智王	能令大眾喜	佛福田如是
令眾悉安樂	譬如淨明鏡	隨色而現像
佛福田如是	隨心獲眾報	如何揭陀藥
能療一切毒	佛福田如是	滅諸煩惱患
亦如日出時	照耀於世間	佛福田如是

滅除諸黑闇	亦如淨滿月	普照於大地
佛福田亦然	一切處平等	譬如毗藍風
普震於大地	佛福田如是	動三有眾生
譬如大火起	能燒一切物	佛福田如是
燒一切有為		

【論】第五爾時已下五行半經是文殊問目首菩薩如來福田等一無異所謂已下有十問具如經說已下有十行頌是目首所答三門如前一科頌意者此十行頌一行一頌其頌意答前所問佛福田是一云何布施果報不同其義有二不同一明佛自福田不同二明眾生所施福田不同一明佛自福田不同者明如來身目髮紺青身金色丹脣素齒一身之上色各不同華藏世界莊嚴萬異者總明法性理智中具有以法性理智中本具無量功德故有隨行報得莊嚴者如如來身有九十七種大人之相者是法身智體自具故如來有無量隨好功德莊嚴是隨行報得故如外邊依正報中金剛地是法性身報得是正報寶樹莊嚴世界是法性隨行報得是依報宮殿樓閣是法性大智隨大慈悲含育眾生業上報得師子座是法性隨智轉法輪報得蓮華藏世界是法性隨行教化眾生無染性報得香水海是法性隨大悲心謙下饒益行報得香河右漩是隨順法性進修教化眾生報得總不離法性大智隨行報殊一一行中皆有無量行門互為主伴以此莊嚴依報正報一一境界中有無量同異此是觀因知果以此准知總是一性中隨用不同故二眾生布施福田果報不同者此乃由心輕重有智無智謙下高心所求有異總是一心中隨用不同二釋菩薩名者名為目首明此位是東南方辰巳之間像此信心進修智目漸高善知福田因果等報名為目首是故如來常取辰巳以為齋戒之則如前名號品已釋准彼知之三配因果者還以自心本不動智佛為因此位究竟智佛為進修之果。

【經】爾時文殊師利菩薩問勤首菩薩言佛子佛教是一眾生得見云何不即悉斷一切諸煩惱縛而得出離然其色蘊受蘊想蘊行蘊識蘊欲界色界無色界無明貪愛無有差別是則佛教於諸眾生或有利益或無利益時勤首菩薩以頌答曰。

佛子善諦聽	我今如實答	或有速解脫
或有難出離	若欲求除滅	無量諸過惡
當於佛法中	勇猛常精進	譬如微少火
樵濕速令滅	於佛教法中	懈怠者亦然
如鑽燧求火	未出而數息	火勢隨止滅
懈怠者亦然	如人持日珠	不以物承影
火終不可得	懈怠者亦然	譬如赫日照
孩稚閉其目	怪言何不覩	懈怠者亦然
如人無手足	欲以芒艸箭	徧射破大地
懈怠者亦然	如以一毛端	而取大海水
欲令盡乾竭	懈怠者亦然	又如劫火起
欲以少水滅	於佛教法中	懈怠者亦然
如有見虛空	端居不搖動	而言普騰躍
懈怠者亦然		

【論】第六爾時文殊師利已下五行半經是文殊問勤首佛教是一云何得見者有斷煩惱不斷煩惱不同等然其已下十問已下有十行頌是勤首菩薩所答於中三門如前一科頌意者此十行頌初一行勸聽次一行頌勸聞法勤修已下八行責其懈怠如文具明二釋菩薩名者名為勤首為明前目首善示福田因果佛號究竟智此位當須勤而行之故名勤首佛號最勝智為明勤修勝進即得最勝智為果故三配隨位因果者還以本不動智佛為因最勝智佛為進修之果。

【經】爾時文殊師利菩薩問法首菩薩言佛子如佛所說若有眾生受持正法悉能除斷一切煩惱何故復有受持正法而不斷者隨貪瞋癡隨慢隨覆隨忿隨恨隨嫉隨慳隨誑隨諂隨諂勢力所轉無有離心能受持法何故復於心行之內起諸煩惱時法首菩薩以頌答曰。

佛子善諦聽	所問如實義	非但以多聞
能入如來法	如人水所漂	懼溺而渴死
於法不修行	多聞亦如是	如人設美饌
自餓而不食	於法不修行	多聞亦如是
如人善方藥	自疾不能救	於法不修行
多聞亦如是	如人數他寶	自無半錢分
於法不修行	多聞亦如是	如有生王宮
而受餒與寒	於法不修行	多聞亦如是
如聾奏音樂	悅彼不自聞	於法不修行
多聞亦如是	如盲續眾像	示彼不自見
於法不修行	多聞亦如是	譬如海船師
而於海中死	於法不修行	多聞亦如是
如在四衢道	廣說眾好事	內自無實德
不行亦如是		

【論】第七爾時已下六行經是文殊問法首如佛所說若有眾生受持正法悉能除斷一切煩惱何故有受持正法而不斷者於中有十一問如文具明於中有十行頌是法首所答三門義如前一科頌意者此十行頌中初一句勸聽次一句歎能問次兩句責多聞者不修行已下九行頌一行一頌責多聞而心不精專不能斷煩惱如文具明二釋菩薩名者名為法首為明此是西北方戌亥兩間明愚迷長夜中能以正法自利利他專求無懈名為法首世界名金剛者以堅精無怠是自世界託西北方乾卦乾為堅

剛佛號自在智者以自精勤觀照達理業亡名為自在智佛三配隨位因果者還以自心本不動智佛為因進修得自在智佛為果。

【經】爾時文殊師利菩薩問智首菩薩言佛子於佛法中智為上首如來何故或為眾生讚歎布施或讚持戒或讚堪忍或讚精進或讚禪定或讚智慧或復讚歎慈悲喜捨而終無有唯以一法而得出離成阿耨多羅三藐三菩提者時智首菩薩以頌答曰。

佛子甚希有	能知眾生心	如仁所問義
諦聽我今說	過去未來世	現在諸導師
無有說一法	而得於道者	佛知眾生心
性分各不同	隨其所應度	如是而說法
慳者為讚施	毀禁者讚戒	多瞋為讚忍
好懈讚精進	亂意讚禪定	愚癡讚智慧
不仁讚慈愍	怒害讚大悲	憂惑為讚喜
曲心讚歎捨	如是次第修	漸具諸佛法
如先立基堵	而後造宮室	施戒亦復然
菩薩眾行本	譬如建城郭	為護諸人眾
忍進亦如是	防護諸菩薩	譬如大力王
率土咸戴仰	定慧亦如是	菩薩所依賴
亦如轉輪王	能與一切樂	四等亦如是
與諸菩薩樂		

【論】第八爾時已下有五行經是文殊問智首如來唯一法而得出離又於佛法中以智為首何故讚歎布施等總有十問大意明十波羅蜜四無量心畢竟無體何須用為已下有十行頌是智首菩薩答如文具明於中三門如前一科頌意者此十行頌中初一行頌歎能問及勸聽已下九行一行一頌如文具明智首答意明諸助道法隨根遣病若不修學無性菩提不成如頌中分明舉喻況說可知但須依法有病即治之如除堆阜道自無礙自病

已除還與人服故藥藥之與方終無捨離二釋菩薩名者名為智首以明智能知根權施法藥四攝四無量十波羅蜜三十七助菩提分隨病生起增多之處而令服之顯發菩提無作之性漸令依本名為智首此是下方世界明以布施戒忍進定等十波羅蜜門如地能生發一切白淨之法故世界名頗梨此是白色如水精寶色佛號梵智者明心如大地荷負萬有常安淨故梵者淨也三配隨位因果者還以自心本不動智佛為因進修得心智寂靜為果表地體安靜故。

【經】爾時文殊師利菩薩問賢首菩薩言佛子諸佛世尊唯以一道而得出離云何今見一切佛土所有眾事種種不同所謂世界眾生界說法調伏壽量光明神通眾會教儀法住各有差別無有不具一切佛法而成阿耨多羅三藐三菩提者時賢首菩薩以頌答曰。

文殊法常爾	法王唯一法	一切無礙人
一道出生死	一切諸佛身	唯是一法身
一心一智慧	力無畏亦然	如本趣菩提
所有迴向心	得如是刹土	眾會反說法
一切諸佛刹	莊嚴悉圓滿	隨眾生行異
如是見不同	佛刹與佛身	眾會及言說
如是諸佛法	眾生莫能見	其心已清淨
諸願皆具足	如是明達人	於此乃能覩
隨眾生心樂	及以業果力	如是見差別
此佛威神故	佛刹無分別	無憎無有愛
但隨眾生心	如是見有殊	以是於世界
所見各差別	非一切如來	大仙之過咎
一切諸世界	所應受化者	常見人中雄
諸佛法如是		



【論】第九爾時已下是文殊問賢首一切諸佛一道而得出離云何今見種種不同所謂已下有十問下有十行頌是賢首答於中三門如前一科頌意者此十行頌中初兩行歎法王唯一法一身一智已下八行頌於中大意有四一歎差別佛土因本迴向心所成為明迴向之就根益物身土教儀悉皆就根二明諸佛自報之境非是行因方見三明眾差別之事皆由眾生之心行異故隨自心見別非佛之異四明佛神力能就根現法二釋菩薩名者名為賢首為明得此十種信心信佛果德與自心體一善諳疑滯通塞入其賢位故名賢首此是上方位也意明此信位心智及境悉如虛空無所不含皆無妨礙是賢仁之德故名賢首又世界名平等色為明既是上方明身心與空合故世界名平等色佛號觀察智明以其自心空智慧門善能觀察諸法皆空無所染著是故名觀察智佛三配隨位因果者還以自心根本性空無分別不動智佛為因以進修至此法空觀察智佛為果明不動智是體觀察智佛是用至此明體用圓滿因果一性以是義故還說如來一身一心一智慧法門明契果會因始末無二總以一為根本故問曰何故頌初云文殊法常爾答曰為文殊是諸佛之慧不動智是體文殊是用以將此一切諸佛一切眾生根本智之體用門與一切信心者作因果體用故使依本故迄至究竟果滿與因不異無二性故方名初發心畢竟心二種不別明此十信心難發難信難入聞之者皆云我是凡夫何猶可得是佛故說少分信者即贊神通道力是故當知且須如是正信方始以正信正見法力加行如法進修分分無明薄解脫智慧明依自得法淺深漸當神通德用隨自己得信猶未得何索神通說言漸漸者不移一時一法性一智慧無依住無所得中漸漸故以十玄六相義圓之法性理中無有漸頓但為無始無明慣習習熟卒令契理純熟難故而有漸漸其漸漸者畢竟無始終延促長短等量故名為漸漸。

大方廣佛新華嚴經合論卷第二十八

音切

逸

(弋質切)。

覩

(當古切)。

湍

(他喘切)。

奔

(博昆切)。

機

(飢音)。

衢

(仇于切)。

𣪠

(苦角切)。

濤

(徒刀切)。

滴

(都力切)。

噎

(於計切)。

揭

(九謁切)。

療

(力照切)。

藍

(落咸切)。

闇

(暗音)。

髮

(發音)。

樵

(昨焦切)。

濕

(詩入切)。

鑽

(作丸切)。

燧

(徐醉切)。

孩

(戶來切)。

稚

(直利切)。

閉

(博計切)。

射

(神夜切)。

箭

(作殿切)。

騰

(徒登切)。

躡

(尼業切)。

嫉

(疾音)。

瞋

(昌真切)。

忿

(撫吻切)。

渴

(苦葛切)。

饕

(善音)。

餓

(五箇切)。

餒

(奴罪切)。

聾

(盧紅切)。

惑

(倉亦切)。

舡

(火江切)。

讚

(作幹切)。

基

(居之切)。

堵

(當古切)。

礙

(艾音)。

戴

(帶音)。

咎

(臼音)。

毀

(許委切)。

緇

(側其切)。

茹

(人恕切)。

甜

(徒兼切)。

# 大方廣佛新華嚴經合論卷第二十九

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

## 菩薩問明品第十之餘

【經】爾時諸菩薩謂文殊師利菩薩言佛子我等所解各自說已唯願仁者以妙辯才演暢如來所有境界何等是佛境界何等是佛境界因何等是佛境界度何等是佛境界入何等是佛境界智何等是佛境界法何等是佛境界說何等是佛境界知何等是佛境界證何等是佛境界現何等是佛境界廣時文殊師利菩薩以頌答曰。

如來深境界	其量等虛空	一切眾生入
而實無所入	如來深境界	所有勝妙因
億劫常宣說	亦復不能盡	隨其心智慧
誘進咸令益	如是度眾生	諸佛之境界
世間諸國土	一切皆隨入	智身無有色
非彼所能見	諸佛智自在	三世無所礙
如是慧境界	平等如虛空	法界眾生界
究竟無差別	一切悉了知	此是如來境
一切世界中	所有諸音聲	佛智皆隨了
亦無有分別	非識所能識	亦非心境界
其性本清淨	開示諸羣生	非業非煩惱
無物無住處	無照無所行	平等行世間
一切眾生心	普在三世中	如來於一念

### 一切悉明達

【論】第十爾時已下明諸菩薩共問文殊師利十一種佛境界已下十行頌是文殊師利答於中三門如前一科頌意此十行頌一行一頌其頌文答前所問頌文自具不煩更釋二釋菩薩名者名文殊師利此云妙德以妙慧善揀正邪自在故云妙德此是東方卯位也明卯主東方震卦震為轟動啟蟄發生之始明此妙慧是震動發生信心之始是故亦云妙生菩薩為明一切諸佛從此慧生十信解故乃至滿足菩提一切願行海故世界名金色者明因舉果體白淨無染法故又明金胎二月表十信為聖胎故一切處金色世界一切處文殊師利明無性淨慧徧故佛號不動智為無明本空無體可動名不動智故但有應境知法應器知根如響應聲無有處所形體可得名之為智無可取捨故名為不動三配當位因果者妙慧為因不動智為果亦互為因果若以妙慧善揀擇法顯智故即以妙慧為因不動智為果若以慧由智起即不動智為因妙慧文殊以為果故或智之與慧總因總果明體用一真無二法故亦智之與慧總非因非果為體無本末依住所得故是性法界自在知見非如世間因果比對可得故此文殊師利不動智佛初起信心亦從此起乃至信終亦不離之故迄至自行圓滿示成正覺亦不離之故此明以佛智慧示悟眾生欲令眾生入佛知見佛知見者文殊師利妙慧不動智佛是此是凡聖等共有之佛示凡夫使令悟入。

【經】爾時此娑婆世界中一切眾生所有法差別業差別世間差別身差別根差別受生差別持戒果差別犯戒果差別國土果差別以佛神力悉皆明現如是東方百千億那由他無數無量無邊無等不可數不可稱不可思不可量不可說盡法界虛空界一切世界中所有眾生法差別乃至國土果差別悉以佛神力故分明顯現南西北方四維上下亦復如是。

【論】第十一爾時已下有八行經是都舉娑婆九種差別并都舉十方一切差別悉皆以佛神力無不明現如文可知已上但隨文殊師利所問隨位菩薩答依所說頌取其意趣理自分明及以世界佛號菩薩名號即知進修因果總是前莊嚴法性清淨佛刹四種佛刹中金色世界及不動智佛是佛住佛刹餘九世界及九箇智佛是莊嚴法性佛刹及十地已來總是如來出現品是示成正覺佛刹清淨佛刹四諦品是此之一品大意有六一菩薩以名表行二以世界之色表所得之理三以佛名號表所得之智四以方隅表所得之法五成其十信所行之行六明十信進修同異如上已述可知。

### 淨行品第十一

論將釋此品約作四門分別一釋品名目二釋品來意三釋品宗趣四隨文釋義一釋品名目者何故名為淨行品以無始諸見無明貪瞋癡愛今已發菩提心信樂正法頓翻諸見成其大願長大悲門若但以三空無相對治不生大慈大悲不能成就普賢行故欲行長路非足不行欲行大悲入普賢門充法界行者於一切見聞覺知而無過失便成萬行莊嚴皆勤修習此一百四十大願門便於生死海中見聞覺知一切諸行悉皆清淨入普賢行故故名淨行若無此願設斷煩惱即二乘行故設是菩薩即生淨土以此一百四十大願門頓能淨其一切塵勞行門便成普賢法界行故故名淨行以此大願莊嚴一切世間諸行總為法界一切道場故名淨行以此諸見成大善根故名淨行二釋品來意者為明前問明品是成其十信中解故此品成其十信之行故此品須來乃至果行圓滿已來不離此大願故三釋品宗趣者以智首是下方頗梨色世界佛號梵智明是一切諸佛法本自體白淨無染之



智以為能問之人文殊師利菩薩即是一切諸佛善擇妙慧以為說法之主以一切諸佛根本智慧之門善自為問答之主伴說一百四十大願之門以成十信十住十行十迴向十地十一地等普賢法界無盡行海以本淨智問其妙慧說其一百四十淨願之門用淨信等六位中染淨無明七地法執現行十地已來法執習氣佛地二愚一時總淨於此信心之中不令偏執以願防之使令寂用無礙故以此諸佛本淨智妙慧門說一百四十大願以防染淨二障以為宗趣故以六位上通信并十住十行十迴向十地十一地隨位修道上煩惱六位中一位上有二十故六位共有一百二十根本十無明皆因身見邊見二見有二十共隨位進修染淨煩惱總有一百四十為防此障起一百四十願令此進修者從初信心理事圓融使信心者達其願體無虧自心根本淨智妙擇之慧動寂俱真不偏修故是故華藏世界有如須彌山微塵數風輪所持其上一切莊嚴因大願風輪能持萬行以行招果故因以願力堅持報得風輪持剎故又云如是華藏莊嚴皆從普賢願力起為無願故行乃不成即莊嚴不現不感無盡依果報故由是義故信心之上法性悲智妙慧萬行總依佛有而為進修不得別有若離佛別有自法者不成信心不成十種勝解不成修行設苦行精勤是邪精進勤苦累劫生人天中一念貪瞋一時焚盡是故此品下文云住去來今諸佛之道隨眾生住恒不捨離如諸法相悉能通達斷一切惡具足眾善當如普賢色像第一一切行願皆得具足已上明宗趣竟意明迴凡所執心境差別業皆成願海具普賢門四隨文釋義者於此之中義分為二一科其一品經意二隨文解釋一科其一品經意者於此一品文義分為十四段。

【經】爾時智首菩薩問文殊師利菩薩言佛子菩薩云何得無過失身語意業云何得不害身語意業云何得不可毀身語意業云何得不可壞身語意業云何得不退轉身語意業云何得不

可動身語意業云何得殊勝身語意業云何得清淨身語意業云何得無染身語意業云何得智為先導身語意業。

【論】一從爾時智首菩薩已下從云何得無過失身語意業總有十問於十問中總有一百一十問問世間三業等如下可知。

【經】云何得生處具足種族具足家具足色具足相具足念具足慧具足行具足無畏具足覺悟具足。

【論】二從云何生處具足問十具足中初種族具足中有二義一世間即是生族姓家為種族二出世間即是生在佛家具佛種性色相念慧等竝是佛家非世間故。

【經】云何得勝慧第一慧最上慧最勝慧無量慧無數慧不思議慧無與等慧不可量慧不可說慧。

【論】三云何已下問十種慧竝是出世勝慧如文可知。

【經】云何得因力欲力方便力緣力所緣力根力觀察力奢摩他力毗鉢舍那力思惟力。

【論】四云何已下問十種力初因力者所謂生生之中任運能發大菩提力欲力者志樂大菩提心無退失故方便力者以大願善自覺悟不費功力故亦能覺他省功不迂迴故緣力所緣力者能緣所緣不忘失常興大願故根力者大願善根不失故觀察力者能觀力奢摩他力毗鉢舍那力觀共止雙行二皆自在或先觀後止或先止後觀或即止即觀或即觀即止悉皆自在思惟力者不失正理智常現前故。

【經】云何得蘊善巧界善巧處善巧緣起善巧欲界善巧色界善巧無色界善巧過去善巧未來善巧現在善巧。

【論】五云何已下十問問十善巧初蘊善巧者明同世間五蘊而生不著五蘊之過界善巧者同十八界及三界法生而不染三界法處善巧者三界六道為處禪定解脫為非處非處皆不離其中而無所染緣起善巧者不壞世間十二緣生處纏不污欲界

色界無色界善巧者三界同事而無所著過去未來現在善巧者於過去劫在現在未來劫中現在劫在過去劫中三世中互參皆自在故。

【經】云何善修習念覺分擇法覺分精進覺分喜覺分猗覺分定覺分捨覺分空無相無願。

【論】六云何已下十問問七覺三空如文可知。

【經】云何得圓滿檀波羅蜜尸波羅蜜羼提波羅蜜毗梨耶波羅蜜禪那波羅蜜般若波羅蜜及以圓滿慈悲喜捨。

【論】七云何已下十問問六度四無量心如文可知。

【經】云何得處非處智力過未現在業報智力根勝劣智力種種界智力種種解智力一切至處道智力禪解脫三昧染淨智力宿住念智力無障礙天眼智力斷諸習智力。

【論】八云何已下問佛十力如文可知。

【經】云何常得天王龍王夜叉王乾闥婆王阿脩羅王迦樓羅王緊那羅王摩睺羅伽王人王梵王之所守護恭敬供養。

【論】九云何已下十問問十王守護此明願行所及而招致敬。

【經】云何得與一切眾生為依為救為歸為趣為炬為明為照為導為勝導為普導。

【論】十云何已下十問問云何堪為眾生所依師導如文可知。

【經】云何於一切眾生中為第一為大為勝為最勝為妙為極妙為上為無上為無等為無等等。

【論】十一云何已下十問問云何於眾生中最勝最妙如文可知。

【經】爾時文殊師利菩薩告智首菩薩言善哉佛子汝今為欲多所饒益多所安隱哀愍世間利樂天人問如是義佛子若諸

菩薩善用其心則獲一切勝妙功德於諸佛法心無所礙住去來今諸佛之道隨眾生住恒不捨離如諸法相悉能通達斷一切惡具足眾善當如普賢色像第一一切行願皆得具足於一切法無不自在而為眾生第二導師佛子云何用心能獲一切勝妙功德。

【論】十二爾時已下至勝妙功德已來有八行半經明文殊領上一百一十問及歎智首善問。

【經】佛子菩薩在家當願眾生知家性空免其逼迫孝事父母當願眾生善事於佛護養一切妻子集會當願眾生怨親平等永離貪著若得五欲當願眾生拔除欲箭究竟安隱妓樂聚會當願眾生以法自娛了妓非實若在宮室當願眾生入於聖地永除穢欲著纓絡時當願眾生捨諸偽飾到真實處上昇樓閣當願眾生昇正法樓徹見一切若有所施當願眾生一切能捨心無愛著眾會聚集當願眾生捨眾聚法成一切智若在厄難當願眾生隨意自在所行無礙捨居家時當願眾生出家無礙心得解脫入僧伽藍當願眾生演說種種無乖諍法詣大小師當願眾生巧事師長習行善法求請出家當願眾生得不退法心無障礙脫去俗服當願眾生勤修善根捨諸罪軛剃除鬚髮當願眾生永離煩惱究竟寂滅著袈裟衣當願眾生心無所染具大仙道正出家時當願眾生同佛出家救護一切自歸於佛當願眾生紹隆佛種發無上意自歸於法當願眾生深入經藏智慧如海自歸於僧當願眾生統理大眾一切無礙受學戒時當願眾生善學於戒不作眾惡受闍黎教當願眾生具足威儀所行真實受和尚教當願眾生入無生智到無依處受具足戒當願眾生具諸方便得最勝法若入堂宇當願眾生昇無上堂安住不動若敷牀座當願眾生開敷善法見真實相正身端坐當願眾生坐菩提座心無所著結跏趺坐當願眾生善根堅固得不動地修行於定當願眾生以定伏心究竟無餘若修於觀當願眾生見如實理永無乖諍捨跏趺坐當願眾

生觀諸行法悉歸散滅下足住時當願眾生心得解脫安住不動  
若舉於足當願眾生出生死海具眾善法著下裙時當願眾生服  
諸善根具足慚愧整衣束帶當願眾生檢束善根不令散失若著  
上衣當願眾生獲勝善根至法彼岸著僧伽梨當願眾生入第一  
位得不動法手執楊枝當願眾生皆得妙法究竟清淨嚼楊枝時  
當願眾生其心調淨噬諸煩惱大小便時當願眾生棄貪瞋癡蠲  
除罪法事訖就水當願眾生出世法中速疾而往洗滌形穢當願  
眾生清淨調柔畢竟無垢以水盥掌當願眾生得清淨手受持佛  
法以水洗面當願眾生得淨法門永無垢染手執錫杖當願眾生  
設大施會示如實道執時應器當願眾生成就法器受天人供發  
趾向道當願眾生趣佛所行入無依處若在於道當願眾生能行  
佛道向無餘法涉路而去當願眾生履淨法界心無障礙見昇高  
路當願眾生永出三界心無怯弱見趣下路當願眾生其心謙下  
長佛善根見斜曲路當願眾生捨不正道永除惡見若見直路當  
願眾生其心正直無諂無誑見路多塵當願眾生遠離塵坌獲清  
淨法見路無塵當願眾生常行大悲其心潤澤若見險道當願眾  
生住正法界離諸罪難若見眾會當願眾生說甚深法一切和合  
若見大柱當願眾生離我爭心無有忿恨若見叢林當願眾生諸  
天及人所應敬禮若見高山當願眾生善根超出無能至頂見棘  
刺樹當願眾生疾得翦除三毒之刺見樹葉茂當願眾生以定解  
脫而為蔭暎若見華開當願眾生神通等法如華開敷若見樹華  
當願眾生眾相如華具三十二若見果實當願眾生獲最勝法證  
菩提道若見大河當願眾生得預法流入佛智海若見陂澤當願  
眾生疾悟諸佛一味之法若見池沼當願眾生語業滿足巧能演  
說若見汲井當願眾生具足辯才演一切法若見涌泉當願眾生  
方便增長善根無盡若見橋道當願眾生廣度一切猶如橋梁若  
見流水當願眾生得善意欲洗除惑垢見修園圃當願眾生五欲

圃中耘除愛草見無憂林當願眾生永離貪愛不生憂怖若見園苑當願眾生勤修諸行趣佛菩提見嚴飾人當願眾生三十二相以為嚴好見無嚴飾當願眾生捨諸飾好具頭陀行見樂著人當願眾生以法自娛歡愛不捨見無樂著當願眾生有為事中心無所樂見歡樂人當願眾生常得安樂樂供養佛見苦惱人當願眾生獲根本智滅除眾苦見無病人當願眾生入真實慧永無疾惱見疾病人當願眾生知身空寂離乖諍法見端正人當願眾生於佛菩薩常生淨信見醜陋人當願眾生於不善事不生樂著見報恩人當願眾生於佛菩薩能知恩德見背恩人當願眾生於有惡人不加其報若見沙門當願眾生調柔寂靜畢竟第一見婆羅門當願眾生永持梵行離一切惡見苦行人當願眾生依於苦行至究竟處見操行人當願眾生堅持志行不捨佛道見著甲冑當願眾生常服善鎧趣無師法見無鎧仗當願眾生永離一切不善之業見論議人當願眾生於諸異論悉能摧伏見正命人當願眾生得清淨命不矯威儀若見於王當願眾生得為法王恒轉正法若見王子當願眾生從法化生而為佛子若見長者當願眾生善能明斷不行惡法若見大臣當願眾生恒守正念習行眾善若見城郭當願眾生得堅固身心無所屈若見王都當願眾生功德共聚心恒喜樂見處林藪當願眾生應為天人之所歎仰入里乞食當願眾生入深法界心無障礙到人門戶當願眾生入於一切佛法之門入其家已當願眾生得入佛乘三世平等見不捨人當願眾生常不捨離勝功德法見能捨人當願眾生永得捨離三惡道苦若見空鉢當願眾生其心清淨空無煩惱若見滿鉢當願眾生具足成滿一切善法若得恭敬當願眾生恭敬修行一切佛法不得恭敬當願眾生不行一切不善之法見慚恥人當願眾生具慚恥行藏護諸根見無慚恥當願眾生捨離無慚住大慈道若得美食當願眾生滿足其願心無羨欲得不美食當願眾生莫不獲得諸

三昧味得柔輭食當願眾生大悲所薰心意柔輭得羶澀食當願眾生心無染著絕世貪愛若飯食時當願眾生禪悅為食法喜充滿若受味時當願眾生得佛上味甘露滿足飯食已訖當願眾生所作皆辦具諸佛法若說法時當願眾生得無盡辯廣宣法要從舍出時當願眾生深入佛智永出三界若入水時當願眾生入一切智知三世等洗浴身體當願眾生身心無垢內外光潔盛暑炎毒當願眾生捨離眾惱一切皆盡暑退涼初當願眾生證無上法究竟清涼諷誦經時當願眾生順佛所說總持不忘若得見佛當願眾生得無礙眼見一切佛諦觀佛時當願眾生皆如普賢端正嚴好見佛塔時當願眾生尊重如塔受天人供敬心觀塔當願眾生諸天及人所共瞻仰頂禮於塔當願眾生一切天人無能見頂右遶於塔當願眾生所行無逆成一切智遶塔三帀當願眾生勤求佛道心無懈怠讚佛功德當願眾生眾德悉具稱歎無盡讚佛相好當願眾生成就佛身證無相法若洗足時當願眾生具神足力所行無礙以時寢息當願眾生身得安隱心無動亂睡眠始寤當願眾生一切智覺周顧十方。

【論】十三佛子菩薩在家已下有一百四十大願答前所問令十信心菩薩常用其心淨其身口意行如文具明。

【經】佛子若諸菩薩如是用心則獲一切勝妙功德一切世間諸天魔梵沙門婆羅門乾闥婆阿脩羅等及以一切聲聞緣覺所不能動。

【論】十四最下佛子若諸菩薩有三行經明依教而行獲其勝益已上以世間有此一百四十種事法頓翻為一百四十種大願用成十信內修行之心雖是有為之心能成十住已後五位之內理智大悲之海已後入位萬行之海皆由此一百四十大願勝上緣力之所能成故若初發心菩薩無此之願所修解脫皆成聲

聞獨覺之行設是菩薩但生淨土無成佛緣為此教中發心菩薩畢竟達此有為成其理智如也。

### 賢首品第十二之一

【論】將釋此品約作五門分別一釋品名目二釋品來意三明品之宗趣四明信心退住五隨文解義一釋品名目者何故名為賢首為依行立菩薩之名依菩薩所說之法及行立品之名為賢首者以明信解如來因果普賢五位行門心行調柔順和正直深心正念樂集善根常念利生名之為賢創從凡夫頓彰法界諸佛因果理智一時明現名之為首此依法主解行立名此賢首者乃是於佛果海文殊普賢行之賢首為信佛因果理智之首圓滿法界解行無始終之首故為賢首品以佛文殊普賢之果行成信者之初首故二釋品來意者為第二會已來五品經但明十信菩薩所修行法門及一百四十願等法此品明十信中所忻修佛果所行行願功德廣大故故有此品來也三明宗趣者明已生十信心已得福獲益為宗四明信心退住者有二義一三乘二一乘一三乘者如起信論有三種發心一信成就發心經一萬劫善根相續方至不退二者解行發心以佛菩薩教令發心或自有大悲或以正法欲滅護正法發心論云如是信心成就得入正定聚畢竟不退名住如來種中正因已前二種是不退發心三證發心者若有眾生善根微少久遠已來煩惱深厚雖值於佛亦得供養然起人天種子或二乘種子設求大乘者根則不定或進或退大意自己善根微少依他發心者或以二乘或教令發心者為解行不實皆有得有證有捨有取總住退位又如起信論云若人修行一切善法自然歸順真如法故略說方便有四種一者行根本方便謂觀一切法自性無生離於妄見不住生死觀一切法因緣和合業



果不失起於大悲修福德攝化眾生不住涅槃以順法性無生故二者能止方便謂慚愧悔過能止一切惡法不令增長隨順法性離諸過故三者發起善根增長方便謂勤供養禮拜三寶讚歎隨喜勸請諸佛以愛敬心淳厚心故信得增長乃能志求無上之道又因佛法僧力所護故能消業障善根不退以隨順法性離癡障故四者大願平等方便所謂願盡於未來化度一切眾生使無有餘皆令究竟無餘涅槃以順法性廣大徧一切眾生平等無二不念彼此究竟寂滅故菩薩發如是心故則得少分見於法身以見法身故隨其願力能現八相成道利益眾生然是菩薩未名法身以其過去無量世來有漏之業未能決斷隨其所生與微苦相應廣如彼論說計其少分得見法身即是信滿入十住位菩薩已上是三乘發十信滿心入十住初心初發心住上以願力故成佛二一乘發心者如此經十信發心初發心時以初會中如來始成正覺之果普賢菩薩法界微塵毛孔重重無盡隨根本智行果而起信心信他諸佛所得之果以第二會中普光明殿如來報滿之果及行果而自信入修行金色等十色世界即明自覺之理不動智佛等十智如來即明是自心所信自心佛智文殊師利即明自心智上分別妙慧與古今三世諸佛同一體用分毫不差方名為信發心從此信心以佛名號品即明所信十方示成正覺佛果之號徧周四聖諦品即明三世諸佛所說法門徧眾生界隨界名別光明覺品即明如來智慧光明境界徧照法界無有盡極令發信心者以觀觀之令心廣博如佛境故菩薩問明品明十信心菩薩十種所行之法是自己所修之行淨行品一百四十大願即是十信心位所發大願成大悲門具普賢行此賢首品明十信心所忻佛果功德無有盡極明初發十信心誦持此品功德勝過供養十佛剎微塵數佛經於一劫何況隨其解行而以修治如此經十住初心纔發心時法爾身徧十方示成正覺在十住位發心功德品中

至位方明文繁不引其事所因大意明此經發十信心但以法界不思議乘一切智乘而發其心不依佛不依佛法不依菩薩法不依聲聞法獨覺法不依世間法不依出世間法而發其心但無所依發菩提心但以一切智發菩提心不如三乘依倚物故發菩提心不依三祇劫後有佛果故發菩提心不依現在三世有佛果故發菩提心以是義故入此信者皆無有退故設習氣未淳熟者暫時念退信及住位一往不退為正信自己身心總是法界佛無自他性故以十方諸佛無依住智幻住莊嚴門等法界虛空界法性恒徧十方如影對現色身同自身故本不二故體無差別故十方諸佛智身如影所言如響如是信解當得成佛我今信者亦如是知如是信解云何有退全身全心一切境界總是法界一真法身體用理智住在何所退至何處若也身心有所依住放却依處即有退失自了身心本無依住本無所得一切語言分別如空中響應無作緣任物成聲本無依住了如斯法而生信解即無退轉有所依法而發心者放却所得所依著處即有退轉是故起信論云證發心者多住退位為有所得可證故是故乘此不思議乘一切智無依住乘發菩提心一往不退若有退者只為信心不成故於佛教法及如來所乘有所得故有取捨故未成信故不入信流又此經云設有菩薩經無量百千那由他劫行六波羅蜜具六神通由未聞此大方廣佛華嚴經猶名假名菩薩不真菩薩設復聞時不信不入具如經說如此品頌云一切世界諸羣生少有欲求聲聞乘求獨覺者轉復少趣大乘者甚難遇趣大乘者猶為易能信此法倍更難又如下頌云有以手擎十佛刹盡於一劫空中住彼之所作未為難能信此法倍更難過此難信而能信真信決定不退故又如此經普賢菩薩云但聞如來名號及所說法門聞而不信亦能成金剛智種作如人食少金剛喻若以遠因總不退若以現成佛因即是未信之人五隨文解義者於此一品經義分為二

一長科當品二隨文解義一長科當品經意於此一品中長科為十四段。

【經】爾時文殊師利菩薩說無濁亂清淨行大功德已欲顯示菩提心功德故以偈問賢首菩薩曰。

我今已為諸菩薩      說佛往修清淨行  
仁亦當於此會中      演暢修行勝功德

【論】一爾時文殊師利已下兩行經兩行頌是文殊師利請說發菩提心功德分。

【經】爾時賢首菩薩以偈答曰。

【論】二爾時賢首菩薩以偈答曰已下有七百一十六行頌是賢首菩薩答末後三行半經明說頌感諸佛許可分。

【經】

善哉仁者應諦聽      彼諸功德不可量  
我今隨力說少分      猶如大海一滴水  
若有菩薩初發心      誓求當證佛菩提  
彼之功德無邊際      不可稱量無與等  
何況無量無邊劫      具修地度諸功德  
十方一切諸如來      悉共稱揚不能盡  
如是無邊大功德      我今於中說少分  
譬如鳥足所履空      亦如大地一微塵

【論】三從初善哉仁者應諦聽已下八行頌明發心功德廣大難量隨力少說分為明菩提心不可以邊際量故功德還當如是。

【經】

菩薩發意求菩提      非是無因無有緣  
於佛法僧生淨信      以是而生廣大心  
不求五欲及王位      富饒自樂大名稱

但為永滅眾生苦	利益世間而發心
常欲利樂諸眾生	莊嚴國土供養佛
受持正法修諸智	證菩提故而發心

【論】四菩薩發意求菩提已下六行頌明初發心所因分。

【經】

深心信解常清淨	恭敬尊重一切佛
於法及僧亦如是	志誠供養而發心
深信於佛及佛法	亦信佛子所行道
及信無上大菩提	菩薩以是初發心
信為道元功德母	長養一切諸善法
斷除疑網出愛流	開示涅槃無上道
信無垢濁心清淨	滅除憍慢恭敬本
亦為法藏第一財	為清淨手受眾行
信能慧施心無悵	信能歡喜入佛法
信能增長智功德	信能必到如來地
信令諸根淨明利	信力堅固無能壞
信能永滅煩惱本	信能專向佛功德
信於境界無所著	遠離諸難得無難
信能超出眾魔路	示現無上解脫道
信為功德不壞種	信能生長菩提樹
信能增益最勝智	信能示現一切佛
是故依行次第說	信樂最勝甚難得
譬如一切世間中	而有隨意妙寶珠

【論】五深心信解常清淨已下十八行頌明信三寶增益分。

大方廣佛新華嚴經合論卷第二十九

音切

奢

(式車切)。

猗

(於宜切)。

羸

(初限切)。

輓

(厄音)。

統

(他孔切)。

束

(王玉切)。

嚼

(在爵切)。

裙

(羣音)。

噬

(時制切)。

盥

(貫音)。

掌

(之兩切)。

錫

(昔音)。

趾

(之市切)。

怯

(去業切)。

弱

(若音)。

謙

(苦兼切)。

全

(蒲悶切)。

棘

(紀力切)。

陂

(彼為切)。

翦

(即淺切)。

沼

(之遶切)。

圃

(布音)。

耘

(于君切)。

苑

(於遠切)。

操

(倉到切)。

胄

(除救切)。

鎧

(苦改切)。

仗

(丈音)。

矯

(居夭切)。

藪

(蘇口切)。

澀

(色立切)。

羨

(似面切)。

寤

(吾故切)。

睡

(是為切)。

寢

(七稔切)。

誘

(與久切)。

塾

(直立切)。

翻

(孚元切)。

虧

(去危切)。

娛

(遇俱切)。

迄

(呼乙切)。



# 大方廣佛新華嚴經合論卷第三十

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

## 賢首品第十二之二

### 【經】

若常信奉於諸佛	則能持戒修學處
若常持戒修學處	則能具足諸功德
戒能開發菩提本	學是勤修功德地
於戒及學常順行	一切如來所稱美
若常信奉於諸佛	則能興集大供養
若能興集大供養	彼人信佛不思議
若常信奉於尊法	則聞佛法無厭足
若聞佛法無厭足	彼人信法不思議
若常信奉清淨僧	則得信心不退轉
若得信心不退轉	彼人信力無能動
若得信力無能動	則得諸根淨明利
若得諸根淨明利	則能遠離惡知識
若能遠離惡知識	則得親近善知識
若得親近善知識	則能修習廣大善
若能修習廣大善	彼人成就大因力
若人成就大因力	則得殊勝決定解
若得殊勝決定解	則為諸佛所護念
若為諸佛所護念	則能發起菩提心

若得發起菩提心	則能勤修佛功德
若能勤修佛功德	則得生在如來家
若得生在如來家	則善修行巧方便
若善修行巧方便	則得信樂心清淨
若得信樂心清淨	則得增上最勝心
若得增上最勝心	則常修習波羅蜜
若常修習波羅蜜	則能具足摩訶衍
若能具足摩訶衍	則能如法供養佛
若能如法供養佛	則能念佛心不動
若能念佛心不動	則常覩見無量佛
若常覩見無量佛	則見如來體常住
若見如來體常住	則能知法永不滅
若能知法永不滅	則得辯才無障礙
若能辯才無障礙	則能開演無邊法
若能開演無邊法	則能慈愍度眾生
若能慈愍度眾生	則得堅固大悲心
若能堅固大悲心	則能愛樂甚深法
若能愛樂甚深法	則能捨離有為過
若能捨離有為過	則離憍慢及放逸
若離憍慢及放逸	則能兼利一切眾
若能兼利一切眾	則處生死無疲厭
若處生死無疲厭	則能勇健無能勝
若能勇健無能勝	則能發起大神通
若能發起大神通	則知一切眾生行
若知一切眾生行	則能成就諸羣生
若能成就諸羣生	則得善攝眾生智
若得善攝眾生智	則能成就四攝法

若能成就四攝法	則與眾生無限利
若與眾生無限利	則具最勝智方便
若具最勝智方便	則住勇猛無上道
若住勇猛無上道	則能摧殄諸魔力
若能摧殄諸魔力	則能超出四魔境
若能超出四魔境	則得至於不退地
若得至於不退地	則得無生深法忍
若得無生深法忍	則為諸佛所授記
若為諸佛所授記	則一切佛現其前
若一切佛現其前	則了神通深密用
若了神通深密用	則為諸佛所憶念
若為諸佛所憶念	則以佛德自莊嚴
若以佛德自莊嚴	則獲妙福端嚴身
若獲妙福端嚴身	則身晃耀如金山
若身晃耀如金山	則相莊嚴三十二
若相莊嚴三十二	則具隨好為嚴飾
若具隨好為嚴飾	則身光明無限量
若身光明無限量	則不思議光莊嚴
若不思議光莊嚴	其光則出諸蓮華
其光若出諸蓮華	則無量佛坐華上
示現十方靡不徧	悉能調伏諸眾生
若能如是調眾生	則現無量神通力
若現無量神通力	則住不可思議土
演說不可思議法	令不思議眾歡喜
若說不可思議法	令不思議眾歡喜
則以智慧辯才力	隨眾生心而化誘
若以智慧辯才力	隨眾生心而化誘

則以智慧為先導	身語意業恒無失
若以智慧為先導	身語意業恒無失
則其願力得自在	普隨諸趣而現身
若其願力得自在	普隨諸趣而現身
則能為眾說法時	音聲隨類難思議
若能為眾說法時	音聲隨類難思議
則於一切眾生心	一念悉知無有餘
若於一切眾生心	一念悉知無有餘
則知煩惱無所起	永不沒溺於生死
若知煩惱無所起	永不沒溺於生死
則獲功德法性身	以法威力現世間
若獲功德法性身	以法威力現世間
則獲十地十自在	修行諸度勝解脫
若得十地十自在	修行諸度勝解脫
則獲灌頂大神通	住於最勝諸三昧
若獲灌頂大神通	住於最勝諸三昧
則於十方諸佛所	應受灌頂而昇位
若於十方諸佛所	應受灌頂而昇位
則蒙十方一切佛	手以甘露灌其頂
若蒙十方一切佛	手以甘露灌其頂
則身充徧如虛空	安住不動滿十方
若身充徧如虛空	安住不動滿十方
則彼所行無與等	諸天世人莫能知

【論】六若常信奉於諸佛已下九十五行頌明增進修行獲果分。

【經】

菩薩勤修大悲行	願度一切無不果
---------	---------

見聞聽受若供養  
彼諸大士威神力  
十善妙行等諸道  
譬如大海金剛聚  
無減無增亦無盡  
或有剎土無有佛  
或有國土不知法  
無有分別無功用  
如月光影靡不周  
於彼十方世界中  
轉正法輪入寂滅  
或現聲聞獨覺道  
如是開闡三乘教  
或現童男童女形  
乃至摩睺羅伽等  
眾生形相各不同  
如是一切皆能現  
嚴淨不可思議剎  
放大光明無有邊  
智慧自在不思議  
施戒忍進及禪定  
如是一切皆自在  
一微塵中入三昧  
而彼微塵亦不增  
彼一塵內眾多剎  
或有襍染或清淨  
或復有成或有壞

靡不皆令獲安樂  
法眼常全無缺減  
無上勝寶皆令現  
以彼威力生眾寶  
菩薩功德聚亦然  
於彼示現成正覺  
於彼為說妙法藏  
於一念頃徧十方  
無量方便化羣生  
念念示現成佛道  
乃至舍利廣分布  
或現成佛普莊嚴  
廣度眾生無量劫  
天龍及以阿脩羅  
隨其所樂悉令見  
行業音聲亦無量  
海印三昧威神力  
供養一切諸如來  
度脫眾生亦無限  
說法言辭無有礙  
智慧方便神通等  
以佛華嚴三昧力  
成就一切微塵定  
於一普現難思剎  
或有有佛或無佛  
或有廣大或狹小  
或有正住或傍住

或如曠野熱時焰  
如一塵中所示現  
此大名稱諸聖人  
若欲供養一切佛  
能以一手徧三千  
十方所有勝妙華  
如是皆從手中出  
無價寶衣襪妙香  
真金為華寶為帳  
十方所有諸妙物  
掌中悉雨無不備  
十方一切諸妓樂  
悉奏和雅妙音聲  
十方所有諸讚頌  
如是種種妙言辭  
菩薩右手放淨光  
普灑十方諸佛土  
又放光明妙莊嚴  
其華色相皆殊妙  
又放光明華莊嚴  
普散十方諸國土  
又放光明香莊嚴  
普散十方諸國土  
又放光明秣香嚴  
普散十方諸國土  
又放光明衣莊嚴  
普散十方諸國土

或如天上因陀網  
一切微塵悉亦然  
三昧解脫神通力  
入于三昧起神變  
普供一切諸如來  
塗香秣香無價寶  
供養道樹諸最勝  
寶幢幡蓋皆嚴好  
莫不皆從掌中雨  
應可奉獻無上尊  
菩提樹前持供佛  
鐘鼓琴瑟非一類  
靡不從於掌中出  
稱歎如來實功德  
皆從掌內而開演  
光中香水從空雨  
供養一切照世燈  
出生無量寶蓮華  
以此供養於諸佛  
種種妙華集為帳  
供養一切大德尊  
種種妙香集為帳  
供養一切大德尊  
種種秣香聚為帳  
供養一切大德尊  
種種名衣集為帳  
供養一切大德尊

又放光明寶莊嚴  
普散十方諸國土  
又放光明蓮莊嚴  
普散十方諸國土  
又放光明纓莊嚴  
普散十方諸國土  
又放光明幢莊嚴  
種種無量皆殊好  
種種襍寶莊嚴蓋  
摩尼寶鐸演佛音  
手出供具難思議  
一切佛所皆如是  
菩薩住在三昧中  
悉以所行功德法  
或以供養如來門  
或以頭陀持戒門  
或以苦行精進門  
或以決了智慧門  
或以梵住神通門  
或以福智莊嚴門  
或以根力正道門  
或以獨覺清淨門  
或以無常眾苦門  
或以不淨離欲門  
隨諸眾生病不同  
隨諸眾生心所樂  
隨諸眾生行差別

種種妙寶集為帳  
供養一切大德尊  
種種蓮華集為帳  
供養一切大德尊  
種種妙纓集為帳  
供養一切大德尊  
其幢絢煥備眾色  
以此莊嚴諸佛土  
眾妙繒幡共垂飾  
執持供養諸如來  
如是供養一導師  
大士三昧神通力  
種種自在攝眾生  
無量方便而開誘  
或以難思布施門  
或以不動堪忍門  
或以寂靜禪定門  
或以所行方便門  
或以四攝利益門  
或以因緣解脫門  
或以聲聞解脫門  
或以大乘自在門  
或以無我壽者門  
或以滅盡三昧門  
悉以法藥而對治  
悉以方便而滿足  
悉以善巧而成就

如是三昧神通相  
有妙三昧名隨樂  
隨宜示現度眾生  
劫中飢饉災難時  
隨其所欲皆令滿  
或以飲食上好味  
乃至王位皆能捨  
或以相好莊嚴身  
華鬘為飾香塗體  
一切世間所好尚  
隨應普現愜其心  
迦陵頻伽美妙音  
種種梵音皆具足  
八萬四千諸法門  
彼亦如其差別法  
眾生苦樂利衰等  
悉能應現同其事  
一切世間眾苦患  
與彼同事悉能忍  
若有不識出離法  
菩薩為現捨國財  
家是貪愛繫縛所  
故示出家得解脫  
菩薩示行十種行  
諸仙行等悉無餘  
若有眾生壽無量  
菩薩於中得自在

一切天人莫能測  
菩薩住此普觀察  
悉使歡心從法化  
悉與世間諸樂具  
普為眾生作饒益  
寶衣嚴具眾妙物  
令好施者悉從化  
上妙衣服寶纓絡  
威儀具足度眾生  
色相顏容及衣服  
俾樂色者皆從道  
俱枳羅等妙音聲  
隨其心樂為說法  
諸佛以此度眾生  
隨世所宜而化度  
一切世間所作法  
以此普度諸眾生  
深廣無涯如大海  
令其利益得安樂  
不求解脫離誼憤  
常樂出家心寂靜  
欲使眾生悉免離  
於諸欲樂無所愛  
亦行一切大人法  
為欲利益眾生故  
煩惱微細樂具足  
示受老病死眾患



或有貪欲瞋恚癡  
菩薩為現老病死  
如來十力無所畏  
所有無量諸功德  
記心教誡及神足  
彼諸大士皆示現  
菩薩種種方便門  
譬如蓮華不著水  
雅思淵才文中王  
一切世間眾技術  
或為長者邑中主  
或為國王及大臣  
或於曠野作大樹  
或作寶衣隨所求  
若見世界始成立  
是時菩薩為工匠  
不作逼惱眾生物  
呪術藥艸等眾論  
一切仙人殊勝行  
如是難行苦行法  
或作外道出家人  
或露形體無衣服  
或現邪命種種行  
或現梵志諸威儀  
或受五熱隨日轉  
或著壞衣奉事火  
或有示謁諸天廟

煩惱猛火常熾然  
令彼眾生悉調伏  
及以十八不共法  
悉以示現度眾生  
悉是如來自在用  
能使眾生盡調伏  
隨順世法度眾生  
如是在世令深信  
歌舞談說眾所欣  
譬如幻師無不現  
或為賈客商人導  
或作良醫善眾論  
或為良藥眾寶藏  
或以正道示眾生  
眾生未有資身具  
為之示現種種業  
但說利益世間事  
如是所有皆能說  
人天等類同信仰  
菩薩隨應悉能作  
或在山林自勤苦  
而於彼眾作師長  
習行非法以為勝  
於彼眾中為上首  
或持牛狗及鹿戒  
為化是等作導師  
或復示入恒河水

食根果等悉示行	於彼常思已勝法
或現蹲踞或翹足	或臥艸棘及灰上
或復臥杵求出離	而於彼眾作師首
如是等類諸外道	觀其意解與同事
所示苦行世靡堪	令彼見已皆調伏
眾生迷惑稟邪教	住於惡見受眾苦
為其方便說妙法	悉令得解真實諦
或邊呪語說四諦	或善密語說四諦
或人直語說四諦	或天密語說四諦
分別文字說四諦	決定義理說四諦
善破於他說四諦	非外所動說四諦
或八部語說四諦	或一切語說四諦
隨彼所解語言音	為說四諦令解脫
所有一切諸佛法	皆如是說無不盡
知語境界不思議	是名說法三昧力

【論】七菩薩勤修大悲行已下一百五十一行頌明菩薩得果行悲教化眾生及興供自在分。

【經】

有勝三昧名安樂	能普救度諸羣生
放大光明不思議	令其見者悉調伏
所放光明名善現	若有眾生遇此光
必令獲益不唐捐	因是得成無上智
彼先示現於諸佛	示法示僧示正道
亦示佛塔及形像	是故得成此光明
又放光明名照耀	暎蔽一切諸天光
所有暗障靡不除	普為眾生作饒益
此光覺悟一切眾	令執燈明供養佛

以燈供養諸佛故  
然諸油燈及蘇燈  
眾香妙藥上寶燭  
又放光明名濟度  
令其普發大誓心  
若能普發大誓心  
則能越渡四瀑流  
於諸行路大水處  
毀眚有為讚寂靜  
又放光明名滅愛  
令其捨離於五欲  
若能捨離於五欲  
則能以佛甘露雨  
惠施池井及泉流  
毀眚五欲讚禪定  
又放光明名歡喜  
令其愛慕佛菩提  
造立如來大悲像  
恒歎最勝諸功德  
又放光明名愛樂  
令其心樂於諸佛  
若常心樂於諸佛  
則在如來眾會中  
開悟眾生無有量  
及示發心功德行  
又放光明名福聚  
令行種種無量施

得成世中無上燈  
亦然種種諸明炬  
以是供佛獲此光  
此光能覺一切眾  
度脫欲海諸羣生  
度脫欲海諸羣生  
示道無憂解脫城  
造立橋梁及船筏  
是故得成此光明  
此光能覺一切眾  
專思解脫妙法味  
專思解脫妙法味  
普滅世間諸渴愛  
專求無上菩提道  
是故得成此光明  
此光能覺一切眾  
發心願證無師道  
眾相莊嚴坐華座  
是故得成此光明  
此光能覺一切眾  
及以樂法樂眾僧  
及以樂法樂眾僧  
逮成無上深法忍  
普使念佛法僧寶  
是故得成此光明  
此光能覺一切眾  
以此願求無上道

設大施會無遮限  
不令其心有所乏  
又放光明名具智  
令於一法一念中  
為諸眾生分別法  
善說法義無虧減  
又放光明名慧燈  
令知眾生性空寂  
演說諸法空無主  
乃至猶如夢影像  
又放光名法自在  
令得無盡陀羅尼  
恭敬供養持法者  
以種種法施眾生  
又放光明名能捨  
令知財寶悉非常  
慳心難調而能調  
增長慧施清淨心  
又放光明名除熱  
普使受持清淨戒  
勸引眾生受持戒  
又令發向菩提心  
又放光明名忍嚴  
令彼除瞋離我慢  
眾生暴惡難可忍  
常樂稱揚忍功德  
又放光明名勇猛

有來求者皆滿足  
是故得成此光明  
此光能覺一切眾  
悉解無量諸法門  
及以決了真實義  
是故得成此光明  
此光能覺一切眾  
一切諸法無所有  
如幻如燄水中月  
是故得成此光明  
此光能覺一切眾  
悉持一切諸佛法  
給侍守護諸賢聖  
是故得成此光明  
此光覺悟慳眾生  
恒樂惠施心無著  
解財如夢如浮雲  
是故得成此光明  
此光能覺毀禁者  
發心願證無師道  
十善業道悉清淨  
是故得成此光明  
此光覺悟瞋恚者  
常樂忍辱柔和法  
為菩提故心不動  
是故得成此光明  
此光覺悟懶墮者

令彼常於三寶中  
若彼常於三寶中  
則能超出四魔境  
勸化眾生令進策  
法欲滅時專守護  
又放光明名寂靜  
令其遠離貪恚癡  
捨離一切惡知識  
讚歎禪定阿蘭若  
又放光明名慧嚴  
令其證諦解緣起  
若能證諦解緣起  
則得日燈三昧法  
國財及己皆能捨  
聞已專勤為眾說  
又放光明名佛慧  
令見無量無邊佛  
讚佛威德及解脫  
顯示佛力及神通  
又放光明名無畏  
非人所持諸毒害  
能於眾生施無畏  
拯濟厄難孤窮者  
又放光明名安隱  
令除一切諸苦痛  
施以良藥救眾患  
酥油乳蜜充飲食

恭敬供養無疲厭  
恭敬供養無疲厭  
速成無上佛菩提  
常勤供養於三寶  
是故得成此光明  
此法能覺亂意者  
心不動搖而正定  
無義談說襍染行  
是故得成此光明  
此光覺悟愚迷者  
諸根智慧悉通達  
諸根智慧悉通達  
智慧光明成佛果  
為菩提故求正法  
是故得成此光明  
此光覺悟諸含識  
各各坐寶蓮華上  
說佛自在無有量  
是故得成此光明  
此光照觸恐怖者  
一切皆令疾除滅  
遇有惱害皆勸止  
以是得成此光明  
此光能照疾病者  
悉得正定三昧樂  
妙寶延命香塗體  
以是得成此光明

又放光明名見佛  
令隨憶念見如來  
見有臨終勸念佛  
俾於佛所深歸仰  
又放光明名樂法  
令於正法常欣樂  
法欲盡時能演說  
於法愛樂勤修行  
又放光明名妙音  
能令三界所有聲  
以大音聲稱讚佛  
普使世間聞佛音  
又放光名施甘露  
令捨一切放逸行  
說有為法非安隱  
恒樂稱揚寂滅樂  
又放光明名最勝  
令於佛所普聽聞  
常樂稱揚一切佛  
如是為求無上道  
又放光明名寶嚴  
令得寶藏無窮盡  
以諸種種上妙寶  
亦以慧施諸貧乏  
又放光明名香嚴  
令其聞者悅可意  
人天妙香以塗地

此光覺悟將歿者  
命終得生其淨國  
又示尊像令瞻敬  
是故得成此光明  
此光能覺一切眾  
聽聞演說及書寫  
令求法者意充滿  
是故得成此光明  
此光開悟諸菩薩  
聞者皆是如來音  
及施鈴鐸諸音樂  
是故得成此光明  
此光開悟一切眾  
具足修習諸功德  
無量苦惱悉充徧  
是故得成此光明  
此光開悟一切眾  
戒定智慧增上法  
勝戒勝定殊勝慧  
是故得成此光明  
此光能覺一切眾  
以此供養諸如來  
奉施於佛及佛塔  
是故得成此光明  
此光能覺一切眾  
決定當成佛功德  
供養一切最勝王

亦以造塔及佛像  
又放光名禰莊嚴  
焚香散華奏眾樂  
本以微妙妓樂音  
種種莊嚴供養佛  
又放光明名嚴潔  
莊嚴佛塔及其處  
又放光明名大雲  
以水灑塔及庭院  
又放光明名嚴具  
嚴身妙物而為施  
又放光明名上味  
種種珍饌而為施  
又放光明名大財  
以無盡物施三寶  
又放光名眼清淨  
以燈施佛及佛塔  
又放光明耳清淨  
鼓樂娛佛及佛塔  
又放光明鼻清淨  
以香施佛及佛塔  
又放光名舌清淨  
永除麤惡不善語  
又放光名身清淨  
以身禮佛及佛塔  
又放光名意清淨  
修行三昧悉自在

是故得成此光明  
寶幢幡蓋無央數  
城邑內外皆充滿  
眾香妙華幢蓋等  
是故得成此光明  
令地平坦猶如掌  
是故得成此光明  
能起香雲雨香水  
是故得成此光明  
令裸形者得上服  
是故得成此光明  
能令飢者獲美食  
是故得成此光明  
令貧乏者獲寶藏  
是故得成此光明  
能令盲者見眾色  
是故得成此光明  
能令聾者悉善聽  
是故得成此光明  
昔未聞香皆得聞  
是故得成此光明  
能以美音稱讚佛  
是故得成此光明  
諸根缺者令具足  
是故得成此光明  
令失心者得正念  
是故得成此光明

又放光名色清淨	令見難思諸佛色
以眾妙色莊嚴塔	是故得成此光明
又放光名聲清淨	令知聲性本空寂
觀聲緣起如谷響	是故得成此光明
又放光名香清淨	令諸臭穢悉香潔
香水洗塔菩提樹	是故得成此光明
又放光名味清淨	能除一切味中毒
恒供佛僧及父母	是故得成此光明
又放光名觸清淨	能令惡觸皆柔輭
戈鋌劒戟從空雨	皆令變作妙華鬘
以昔曾於道路中	塗香散華布衣服
迎送如來令蹈上	是故今獲光如是
又放光名法清淨	能令一切諸毛孔
悉演妙法不思議	眾生聽者咸欣悟
因緣所生無有生	諸佛法身非是身
法性常住如虛空	以說其義光如是

【論】八從有勝三昧名安樂已下有一百六十行頌明放光明因果分。

【經】

如是等比光明門	如恒河沙無限數
悉從大仙毛孔出	一一作業各差別
如一毛孔所放光	無量無數如恒沙
一切毛孔悉亦然	此是大仙三昧力
如其本行所得光	隨彼宿緣同行者
今放光明故如是	此是大仙智自在
往昔同修於福業	及有愛樂能隨喜
見其所作亦復然	彼於此光咸得見



若有自修眾福業	供養諸佛無央數
於佛功德常願求	是此光明所開覺
譬如生盲不見日	非為無日出世間
諸有目者悉明見	各隨所務修其業
大士光明亦如是	有智慧者皆悉見
凡夫邪信劣解人	於此光明莫能覩
摩尼宮殿及輦乘	妙寶靈香以塗瑩
有福德者自然備	非無福者所能處
大士光明亦如是	有深智者咸照觸
邪信劣解凡愚人	無有能見此光明
若有聞此光差別	能生清淨深信解
永斷一切諸疑網	速成無上功德幢

【論】九如是等比光明門已下二十行頌明光出處及光差別分。

【經】

有勝三昧能出現	眷屬莊嚴皆自在
一切十方諸國土	佛子眾會無倫匹
有妙蓮華光莊嚴	量等三千大千界
其身端坐悉充滿	是此三昧神通力
復有十刹微塵數	妙好蓮華所圍遶
諸佛子眾於中坐	住此三昧威神力
宿世成就善因緣	具足修行佛功德
此等眾生遶菩薩	悉共合掌觀無厭
譬如明月在星中	菩薩處眾亦復然
大士所行法如是	入此三昧威神力
如於一方所示現	諸佛子眾共圍遶
一切方中悉如是	住此三昧威神力

有勝三昧名方網  
一切方中普現身  
或於東方入正定  
或於西方入正定  
或於餘方入正定  
如是入出遍十方  
盡於東方諸國土  
悉現其前普親近  
而於西方諸世界  
皆現從於三昧起  
盡於西方諸國土  
悉現其前普親近  
而於東方諸世界  
皆現從於三昧起  
如是十方諸世界  
或現三昧寂不動  
於眼根中入正定  
示現色性不思議  
於色塵中入正定  
說眼無生無有起  
於耳根中入正定  
分別一切語言音  
於聲塵中入正定  
說耳無生無有起  
於鼻根中入正定  
普得一切上妙香  
於香塵中入正定

菩薩住此廣開示  
或現入定或從出  
而於西方從定出  
而於東方從定出  
而於餘方從定出  
是名菩薩三昧力  
所有如來無數量  
住於三昧寂不動  
一切諸佛如來所  
廣修無量諸供養  
所有如來無數量  
住於三昧寂不動  
一切諸佛如來所  
廣修無量諸供養  
菩薩悉入無有餘  
或現恭敬供養佛  
於色塵中從定出  
一切人天莫能知  
於眼起定心不亂  
性空寂滅無所作  
於聲塵中從定出  
諸天世人莫能知  
於耳起定心不亂  
性空寂滅無所作  
於香塵中從定出  
諸天世人莫能知  
於鼻起定心不亂

說鼻無生無有起  
於舌根中入正定  
普得一切諸上味  
於味塵中入正定  
說舌無生無有起  
於身根中入正定  
善能分別一切觸  
於觸塵中入正定  
說身無生無有起  
於意根中入正定  
分別一切諸法相  
於法塵中入正定  
說意無生無有起  
童子身中入正定  
壯年身中入正定  
老年身中入正定  
善女身中入正定  
善男身中入正定  
比丘尼身入正定  
比丘身中入正定  
學無學身入正定  
辟支佛身入正定  
於如來身入正定  
諸天身中入正定  
大龍身中入正定  
夜叉身中入正定  
鬼神身中入正定

性空寂滅無所作  
於味塵中從定出  
諸天世人莫能知  
於舌起定心不亂  
性空寂滅無所作  
於觸塵中從定出  
諸天世人莫能知  
於身起定心不亂  
性空寂滅無所作  
於法塵中從定出  
諸天世人莫能知  
從意起定心不亂  
性空寂滅無所作  
壯年身中從定出  
老年身中從定出  
善女身中從定出  
善男身中從定出  
比丘尼身從定出  
比丘身中從定出  
學無學身從定出  
辟支佛身從定出  
現如來身從定出  
諸天身中從定出  
大龍身中從定出  
夜叉身中從定出  
鬼神身中從定出  
一毛孔中從定出

一毛孔中入正定	一切毛孔從定出
一切毛孔入正定	一毛端頭從定出
一毛端頭入正定	一微塵中從定出
一微塵中入正定	一切塵中從定出
一切塵中入正定	金剛地中從定出
金剛地中入正定	摩尼樹上從定出
摩尼樹上入正定	佛光明中從定出
佛光明中入正定	於河海中從定出
於河海中入正定	於火大中從定出
於火大中入正定	於風起定心不亂
於風大中入正定	於地大中從定出
於地大中入正定	於天宮殿從定出
於天宮殿入正定	於空起定心不亂
是名無量功德者	三昧自在難思議
十方一切諸如來	於無量劫說不盡

【論】十從有勝三昧能出現已下八十一行頌明三昧自在分如此同異無礙自在大方網三昧門入出隱現同時自在者隨眾生業異所見差別諸佛得道自在故隨眾生業自在故然如來心無作性故智隨影應無去來性而可取捨如響應聲喻如水潛流隨諸卉木各滋生喻如春陽生艸木喻如水養魚龍喻如地所生草木喻如火成食喻如風發生所益眾生長短壽生喻以喻思之以智照之執計情亡任真之智本合如是為執計故設得一分出世道果亦不能為大自在故。

### 大方廣佛新華嚴經合論卷第三十

音切

衍

(演音)。

殄

(徒典切)。

晃

(胡廣切)。

減

(古湛切)。

曠

(苦謗切)。

琴

(渠吟切)。

瑟

(所吉切)。

絢

(許縣切)。

煥

(呼貫切)。

饅

(渠吝切)。

枳

(居紙切)。

誼

(虛元切)。

憤

(公對切)。

蹲

(存音)。

踞

(居御切)。

瀑

(蒲報切)。

筏

(浮月切)。

𦵏

(資爾切)。

嬾

(落旱切)。

墮

(徒果切)。

拯

(整音)。

慢

(莫半切)。

𠂔

(力果切)。

鋌

(市連切)。

戟

(几極切)。

愜

(牽協切)。

賈

(公戶切)。

蹈

(導音)。

# 大方廣佛新華嚴經合論卷第三十一

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

## 賢首品第十二之三

### 【經】

一切如來咸共說	眾生業報難思議
諸龍變化佛自在	菩薩神力亦難思
欲以譬喻而顯示	終無有喻能喻此
然諸智慧聰達人	因於譬故解其義
聲聞心住八解脫	所有變現皆自在
能以一身現多身	復以多身為一身
於虛空中入火定	行住坐臥悉在空
身上出水身下火	身上出火身下水
如是皆於一念中	種種自在無邊量
彼不具足大慈悲	不為眾生求佛道
尚能現此難思事	況大饒益自在力
譬如日月遊虛空	影像普徧於十方
泉池陂澤器中水	眾寶河海靡不現
菩薩色像亦復然	十方普現不思議
此皆三昧自在法	唯有如來能證了
如淨水中四兵像	各各別異無文襍
劒戟弧矢類甚多	鎧冑車輿非一種
隨其所有相差別	莫不皆於水中現



而水本自無分別  
海中有神名善音  
所有語言皆辯了  
彼神具有貪恚癡  
況復總持自在力  
有一婦人名辯才  
若有離惡樂真實  
彼有貪欲瞋恚癡  
何況菩薩具智慧  
譬如幻師知幻法  
須臾示作日月歲  
幻師具有貪恚癡  
況復禪定解脫力  
天阿脩羅鬪戰時  
兵仗車輦及徒旅  
彼有貪欲瞋恚癡  
況住神通無畏法  
釋提桓因有象王  
自化作頭三十二  
一一牙上七池水  
一一清淨池水中  
彼諸嚴飾蓮華上  
悉善妓執奏眾樂  
彼象或復捨本形  
威儀進止悉齊等  
彼有貪欲瞋恚癡  
何況具足方便智

菩薩三昧亦如是  
其音普順海眾生  
令彼一切悉歡悅  
猶能善解一切音  
而不能令眾歡喜  
父母求天而得生  
入彼身中生妙辯  
猶能隨行與辯才  
而不能與眾生益  
能現種種無量事  
城邑豐饒大安樂  
猶能幻力悅世間  
而不能令眾歡喜  
脩羅敗衄而退走  
一時竄匿莫得見  
尚能變化不思議  
云何不能現自在  
彼知天主欲行時  
一一六牙皆具足  
清淨香潔湛然滿  
各七蓮華妙嚴飾  
各各有七天玉女  
而與帝釋相娛樂  
自化其身同諸天  
有此變現神通力  
尚能現此諸神通  
而於諸定不自在

如阿脩羅變化身  
海水至深僅其半  
彼有貪欲瞋恚癡  
沉伏魔怨照世燈  
天阿脩羅共戰時  
隨阿脩羅軍眾數  
諸阿脩羅發是念  
必取我身五種縛  
帝釋現身有千眼  
被甲持仗極威嚴  
彼以微小福德力  
何況救度一切者  
忉利天中有天鼓  
知諸天眾放逸時  
一切五欲悉無常  
諸有如夢如陽燄  
放逸為怨為苦惱  
若有作諸放逸行  
世間所有眾苦本  
五欲功德滅壞性  
三十三天聞此音  
帝釋為說微妙法  
彼音無形不可見  
況隨心樂現色身  
天阿脩羅共鬪時  
天鼓出音告其眾  
諸天聞此所告音

蹈金剛際海中立  
首共須彌正齊等  
尚能現此大神通  
而無自在威神力  
帝釋神力難思議  
現身等彼而與敵  
釋提桓因來向我  
由是彼眾悉憂悴  
手持金剛出火燄  
脩羅望見咸退伏  
猶能摧破大怨敵  
具足功德不自在  
從天業報而生得  
空中自然出此音  
如水聚沫性虛偽  
亦如浮雲水中月  
非甘露道生死徑  
入於死滅大魚口  
一切聖人皆厭患  
汝應愛樂真實法  
悉共來昇善法堂  
咸令順寂除貪愛  
猶能利益諸天眾  
而不濟度諸羣生  
諸天福德殊勝力  
汝等宜應勿憂怖  
悉除憂畏增益力

時阿脩羅心震懼  
甘露妙定如天鼓  
大悲哀愍救一切  
帝釋普應諸天女  
令彼各各心自謂  
如天女中身普應  
能於一念現神通  
帝釋具有貪恚癡  
況大方便神通力  
他化自在六天王  
以業惑苦為骨網  
彼有貪欲瞋恚癡  
況具十種自在力  
三千世界大梵王  
悉能現身於彼坐  
彼住世間梵道中  
況出世間無有上  
摩醯首羅智自在  
悉能分別數其滴  
無量億劫勤修學  
云何不於一念中  
眾生業報不思議  
巨海諸山天宮殿  
亦能興雲降大雨  
亦能成熟一切穀  
風不能學波羅蜜  
猶成不可思議事

所將兵眾咸退走  
恒出降魔寂靜音  
普使眾生滅煩惱  
九十有二那由他  
天王獨與我娛樂  
善法堂內亦如是  
悉至其前為說法  
能令眷屬悉歡喜  
而不能令一切悅  
於欲界中得自在  
繫縛一切諸凡夫  
猶於眾生得自在  
而不能令眾同行  
一切梵天所住處  
演暢微妙梵音聲  
禪定神通尚如意  
於禪解脫不自在  
大海龍王降雨時  
於一念中皆辯了  
得是無上菩提智  
普知一切眾生心  
以大風力起世間  
眾寶光明萬物種  
亦能散滅諸雲氣  
亦能安樂諸羣生  
亦不學佛諸功德  
何況具足諸願者

男子女人種種聲  
大海川流轟震聲  
沉復知聲性如響  
普應眾生而說法  
海有希奇殊特法  
眾生寶物及川流  
無盡禪定解脫者  
福德智慧諸妙行  
大海龍王遊戲時  
興雲充徧四天下  
第六他化自在天  
化樂天上赤珠色  
夜摩天上琉璃色  
四王天上頗梨色  
緊那羅中妙香色  
夜叉住處白鵝色  
鬱單越處金燄色  
餘二天下裸莊嚴  
又復他化自在天  
化樂天上如月光  
夜摩天上珂雪色  
四王天上眾寶色  
緊那羅界琉璃色  
夜叉所住頗梨色  
鬱單越境火珠色  
餘二天下裸莊嚴  
他化轟震如梵音

一切鳥獸諸音聲  
皆能稱悅眾生意  
逮得無礙妙辯才  
而不能令世間喜  
能為一切平等印  
普悉包容無所拒  
為平等印亦如是  
一切普修無厭足  
普於諸處得自在  
其雲種種莊嚴色  
於彼雲色如真金  
兜率陀天霜雪色  
三十三天瑪瑙色  
大海水上金剛色  
諸龍住處蓮華色  
阿脩羅中山石色  
閻浮提中青寶色  
隨眾所樂而應之  
雲中電耀如日光  
兜率天上閻浮金  
三十三天金燄色  
大海之中赤珠色  
龍王住處寶藏色  
阿脩羅中瑪瑙色  
閻浮提中帝青色  
如雲色相電亦然  
化樂天中天鼓音

兜率天上歌唱音  
於彼三十三天上  
護世四王諸天所  
海中兩山相擊聲  
諸龍城中頻伽聲  
阿脩羅中天鼓聲  
他化自在雨妙香  
化樂天雨多羅華  
兜率天上雨摩尼  
髻中寶珠如月光  
夜摩中雨幢幡蓋  
赤真珠色上妙衣  
三十三天如意珠  
鬱金雞羅多摩等  
護世城中雨美饍  
亦雨難思眾妙寶  
又復於彼大海中  
復雨無盡大寶藏  
緊那羅界雨纓絡  
婆利師迦末利香  
諸龍城中雨赤珠  
阿脩羅中雨兵仗  
鬱單越中雨纓絡  
弗婆瞿耶二天下  
閻浮提雨清淨水  
長養眾華及果藥  
如是無量妙莊嚴

夜摩天上天女音  
如緊那羅種種音  
如乾闥婆所出音  
緊那羅中簫笛聲  
夜叉住處龍女聲  
於人道中海潮聲  
種種裸華為莊嚴  
曼陀羅華及澤香  
具足種種寶莊嚴  
上妙衣服真金色  
華鬘塗香妙嚴具  
及以種種眾妓樂  
堅黑沈水栴檀香  
妙華香水相裸雨  
色香味具增長力  
悉是龍王之所作  
淫雨不斷如車軸  
亦雨種種莊嚴寶  
眾色蓮華衣及寶  
種種樂音皆具足  
夜叉城內光摩尼  
摧伏一切諸怨敵  
亦雨無量上妙華  
悉雨種種莊嚴具  
微細悅澤常應時  
成熟一切諸苗稼  
種種雲電及靄雨

龍王自在悉能作	而身不動無分別
彼於世界海中住	尚能現此難思力
沉入法海具功德	而不能為大神變
彼諸菩薩解脫門	一切譬喻無能顯
我今以此諸譬喻	略說於其自在力

【論】十一從如來咸共說已下有一百五十八行頌明舉一喻況說分。

【經】

第一智慧廣大慧	真實智慧無邊慧
勝慧及以殊勝慧	如是法門今已說
此法希有甚奇特	若人聞已能忍可
能信能受能讚說	如是所作甚為難
世間一切諸凡夫	信是法者甚難得
若有勤修清淨福	以昔因力乃能信
一切世界諸羣生	少有欲求聲聞乘
求獨覺者轉復少	趣大乘者甚難遇
趣大乘者猶為易	能信此法倍更難
況復持誦為人說	如法修行真實解
有以三千大千界	頂戴一劫身不動
彼之所作未為難	信是法者乃為難
有以手擎十佛刹	盡於一劫空中住
彼之所作未為難	能信此法乃為難

【論】十二從第一智慧廣大慧已下有十四行頌明信佛智慧自欲同知難信分。

【經】

十刹塵數眾生所	悉施樂具經一劫
彼之福德未為勝	信此法者為最勝

十刹塵數如來所 悉皆承事盡一劫  
若於此品能誦持 其福最勝過於彼

【論】十三從十刹塵數眾生所已下有四行頌明信樂受持得福分。

【經】時賢首菩薩說此偈已十方世界六反震動魔宮隱蔽惡道休息十方諸佛普現其前各以右手而摩其頂同聲讚言善哉善哉快說此法我等一切悉皆隨喜。

【論】十四時賢首菩薩已下三行半經明賢首菩薩所說法門威感十方諸佛摩頂許可分二隨文釋義者文自具明不煩更釋幽隱難知者方可解之已前總明以果成信竟入真實證如下昇帝釋天宮說十住法門是此一會昇須彌山品是序分餘五品經是正說分至明三品末後動地雨華是流通分。

### 昇須彌山頂品第十三

【論】此十住位中有六品經一昇須彌頂品二頂上偈讚品三十住品四梵行品五發心功德品六明法品如是六品共成十住法門將釋此品義分為三一釋品來意二以處表法三隨文釋義一釋品來意者明前於普光明殿人間地上成十信之心已終此妙峯之頂明從十信入十住入位之昇進故此品須來二以處表法者明此山於七重金輪圍山七重大海之內出水高八萬四千由旬縱廣亦爾四寶所成東面黃金西白銀南吠琉璃北瑪瑙上有四埵埵有八輔天眾四八三十二中心名妙高頂天帝釋在其上居寶宮殿通為帝釋天三十三天總以帝釋為主帝釋有四名一名天帝釋二名憍尸迦三名釋提桓四名因陀羅大意名能主為能為諸天作主故此妙峯山四寶合成諸天寶宮殿在上莊嚴故為妙峯山此山之外七重金山及七重大海廣量金翅鳥兩

翼相去三百三十六萬里迅疾能飛一鼓翼萬萬九千里七日七夜方至其頂其山在大海之中形如腰鼓崢嶸高聳非以手足攀攬之所能登為表此十住法門創生如來智慧之家為真佛子不可以有生滅尋思觀察及多聞心想攀攬所得故以將妙峯山用況表之令後人做學山者高勝義故像此十住住佛所住法身妙智慧海故是出世高勝義故妙峯山者不動義諸天所居妙樂義莊嚴義像此位菩薩以方便三昧寂然不動無思無心不收不攝任性而定稱平等理與法身合忽然妙慧從此定生無始無明總無所得住佛妙慧都無所依得法妙樂智慧莊嚴出過情見諸佛所說解脫微妙經典無不解了為生在如來智慧家故三界無明一時頓盡唯有習氣煩惱漸漸以法治之如下十住品云佛子菩薩住處廣大與法界虛空等佛子菩薩住三世諸佛家故又如初發心功德品云應知此人即與三世諸佛同等即與三世諸佛如來境界平等即與三世諸佛如來功德平等得如來一身無量身究竟平等真實智慧纔發心時即為十方一切諸佛所共稱歎乃至震動一切世界及一切世界中示現成佛等如文廣明不可同於三乘方便教說地前三賢菩薩得折伏現行無明地上見道為此經法教門依一切諸佛根本不動智而發心故以乘如來一切智乘而發心故於此十住位中能與如來同智慧故不同三乘但將三空觀且折伏現行於此經中發心之者從佛不動智而發菩提心設有餘習還以無依住智治之還是根本智不伏不斷為本寂用自在故無體可斷故無可伏故設修三昧任性淨故亦無收攝亦不伏捺故任自淨故設行分別任性智慧隨事用為亦無取捨故如是任法調治習氣使稱理智令慣習增明如佛願行而隨事世間成長大悲不出不沒故以心境一真無出沒故是故經中以阿脩羅王等表之處大海而不出不沒等喻問曰何故不昇四天王宮而超至帝釋宮答曰為四天王在妙峯山半傍住非是可



表昇法頂處至相盡現智慧莊嚴住不退故善財童子於妙峯山得憶念諸佛智慧光明門同此位故准例可知以超情塵之跡以山表之非要登山也已入如來智慧於眾中堪為主導故非要為帝釋也第三隨文釋義中義分為三一總科一品二明如來身行徧周等印如下經云十方一切諸世界中悉亦如是明十方一切妙峯山總見如來昇妙峯山頂三隨文釋義。

【經】爾時如來威神力故十方一切世界一一四天下閻浮提中悉見如來坐於樹下各有菩薩承佛神力而演說法靡不自謂恒對於佛爾時世尊不離一切菩提樹下而上昇須彌向帝釋殿時天帝釋在妙勝殿前遙見佛來即以神力莊嚴此殿置普光明藏師子之座其座悉以妙寶所成十千層級迴極莊嚴十千金網彌覆其上十千種帳十千種蓋周迴間列十千繒綺以為垂帶十千珠纓周徧交絡十千衣服敷布座上十千天子十千梵王前後圍遶十千光明而為照耀爾時帝釋奉為如來敷置座已曲躬合掌恭敬向佛而作是言善來世尊善來善逝善來如來應正等覺唯願哀愍處此宮殿爾時世尊即受其請入妙勝殿十方一切諸世界中悉亦如是爾時帝釋以佛神力諸宮殿中所有樂音自然止息即自憶念過去佛所種諸善根而說頌言。

迦葉如來具大悲	諸吉祥中最無上
彼佛曾來入此殿	是故此處最吉祥
拘那牟尼見無礙	諸吉祥中最無上
彼佛曾來入此殿	是故此處最吉祥
迦羅鳩駄如金山	諸吉祥中最無上
彼佛曾來入此殿	是故此處最吉祥
毗舍浮佛無三垢	諸吉祥中最無上
彼佛曾來入此殿	是故此處最吉祥
尸棄如來離分別	諸吉祥中最無上

彼佛曾來入此殿	是故此處最吉祥
毗婆尸佛如滿月	諸吉祥中最無上
彼佛曾來入此殿	是故此處最吉祥
弗沙明達第一義	諸吉祥中最無上
彼佛曾來入此殿	是故此處最吉祥
提舍如來辯無礙	諸吉祥中最無上
彼佛曾來入此殿	是故此處最吉祥
波頭摩佛淨無垢	諸吉祥中最無上
彼佛曾來入此殿	是故此處最吉祥
然燈如來大光明	諸吉祥中最無上
彼佛曾來入此殿	是故此處最吉祥

如此世界中忉利天王以如來神力故偈讚十佛所有功德十方世界諸釋天王悉亦如是讚佛功德爾時世尊入妙勝殿結跏趺坐此殿忽然廣博寬容如其天眾諸所住處十方世界悉亦如是。

【論】一長科一品者於此品中長科為十段第一從爾時已下三行經明佛神力普現十方二爾時已下一行半經明佛不離菩提樹下而上昇須彌向帝釋殿三時天帝釋已下可七行經明帝釋遙見佛來嚴殿敷座四曲躬合掌已下可兩行經明帝釋請佛入殿五爾時世尊已下三句經是如來十方一時受請入殿六十方一切世界已下三句經是結十方普會同此七爾時帝釋已下可一行半經明佛神力樂音自息八即自憶念已下四句明帝釋自念過去善根說頌歎佛來此九如此世界中已下兩行半經都結此處以偈歎佛十方同然十爾時已下可兩行經明如來處座而坐殿廣博寬容并結十方同此三隨文釋義者云不離菩提樹者明菩提體無去來遠近處所可離可到故又如來智身無表裏體徧周故又法界非大小毫剎相容故又心境無二相無中邊

方所故又諸法無自性一多恒圓滿故帝釋遙見佛來者有二義一事二表法一事者為如來於無去來性示去來之相故言遙見二表法者明帝釋示同未悟不見如來智身徧周與心一體故言遙見佛來又信解為遙見自心入位為佛來帝釋即以神力莊嚴此殿者亦有二義一事二表法其事可知二表法者自加行也安置普光明師子之座者亦有二義一約位置座二約帝釋自德根堪一約位置座者約此十住位中法位也為十住中得一切諸佛智慧光明之藏於一切法自在無畏故置此座故如十行位中於夜摩宮中化作寶蓮華師子之座此約行位在一切生死具大悲行萬行以理智體得無染故以是義故以蓮華為座體在此十住位中以得一切諸佛智慧光明普照萬法故安置普光明藏師子之座此十住中安置其座十千層級十行中化作百萬層級師子之座為十住位中初始入位明須彌之上猶連地居明心有所得從信創會見法之報以此義故師子座須有安置又方便三昧是安置故十行位中約十住位中理智妙慧功成即十行位中以妙用而化其座又約行從空而立還約位在夜摩空居之天云座十千層級又百萬層級及帝釋天宮夜摩天總明隨位昇進行相若也正入法智慧流不出毫塵徧諸刹海其座乃至十迴向十地高下嚴飾各各隨位不同准例知之其座上莊嚴皆十千者明萬行報得故如十千金網者約能以教行之網漉眾生之果報故十千種帳者明養育義以於一切處為佛為天為大力士之神擁護養育眾生行之果報所得故十千種蓋者是大悲義以大悲心覆養一切眾生之果報所得故十千繒綺者以一行中行無盡差別行一言音中具差別教皆明白可觀之果也十千珠璣者明萬行普周莊嚴智境化利眾生無休息之果所得故如一一塵中皆有無盡普賢身者是也十千衣服是於一切生死海柔和善忍覆養含生之果故十千天子者明能行萬行之人十千梵王者明於行中

智慧自在故十千光明照耀者明智慧照耀能破自他迷闇長夜令大明故已上皆是舉此位之果德用成莊嚴令發心入位菩薩識果行因無疑惑故從曲躬已下明帝釋於如來致敬請佛入宮明行謙行也如來受請明從信入住如文可知二約帝釋自德最下明帝釋得宿念力於過去佛所種善根說頌歎佛者明以三昧力自見身心體性同古今佛智慧善根故已下十佛是當位之功用合古也於說頌中有二十行頌兩行一頌初兩行頌歎迦葉佛具云迦葉波此云飲光此是其姓亦以身光殊特能飲諸天及日月等光皆悉不現故次兩行歎拘那牟尼佛正云迦那牟尼言拘那者此云金也牟尼者佛也以金色為號次兩行歎迦羅鳩駄具云迦羅鳩村駄佛此云所應斷已斷次兩行歎毗舍浮佛此云徧一切自在次兩行歎尸棄佛正云式棄那此云持髻或曰有髮次兩行歎毗婆尸佛此云淨觀或曰勝觀或曰種種觀次兩行歎弗沙佛正云勃沙此云增盛次兩行歎提舍佛正云底沙此云說法度人次兩行歎波頭摩華佛正云鉢特忙此赤蓮華也次兩行歎然燈如來前之二佛是此今賢劫中佛後之七佛是前劫中佛以明創入十住之門古今法則相會明古佛今佛法不異故入此位者會同不別故言吉祥者歎此山頂是福善之處故明昇進者以三昧力身心不動如山王總會古今諸佛同智慧故第九如此世界中忉利天已下有四行經於中義分為四一舉此世界歎佛功德二總舉十方同然三爾時已下明如來入殿昇座而坐四明其殿忽然廣博普容諸天住處此明約如來無自他之德合然令大眾得見以明令大眾入位同此已上釋昇須彌品竟大約此明以三昧力正入定時身心蕩然稱法界性無表裏光明朗徹是忽然廣博義亦是普光明藏師子之座義智慧現前是佛來義一一如是會理修行不可但逐名言也。

## 須彌頂上偈讚品第十四

【論】將釋此品約作四門分別一釋品名目二釋品來意三都會此十住六品之經意四隨文釋義一釋品名目者以法慧等十箇菩薩各以自己當位隨位進修之法還自以偈讚讚之令信終菩薩倣之悟入故此品名為偈讚品明古今諸佛同會此智殿悲宮俱會古今之佛自身是未來之佛與古佛道合故二釋品來意者明前已創昇須彌帝釋以偈歎佛此品明十住位當位菩薩將當位法門以偈讚之令信心者得入位故故有此品須來初歎過去佛次歎今現在佛未來佛者即入此位者是也是故經中不云未來十佛是過去佛盧舍那是現在佛修行始入位者是未來佛三都會十住之內須彌之上說六品經意者一昇須彌品明信終昇進二須彌頂上偈讚品明偈讚當位之法勸修昇進之理三說十住品明當位所行之行四說梵行品明總十住之中所持無相之性戒五發心功德品明於十住之中發心所得功德之量六明法品即明當位之法昇進向十行之因此六品明當位之修行因果及向十行之因四隨文釋義中復分為二一長科一品經意二隨文釋義一長科一品經意者義分為十一段。

【經】爾時佛神力故十方各有一大菩薩一一各與佛剎微塵數菩薩俱從百佛剎微塵數國土外諸世界中而來集會其名曰法慧菩薩一切慧菩薩勝慧菩薩功德慧菩薩精進慧菩薩善慧菩薩智慧菩薩真實慧菩薩無上慧菩薩堅固慧菩薩所從來土所謂因陀羅華世界波頭摩華世界寶華世界優鉢羅華世界金剛華世界妙香華世界悅意華世界阿盧那華世界那羅陀華世界虛空華世界各於佛所淨修梵行所謂殊特月佛無盡月佛不動月佛風月佛水月佛解脫月佛無上月佛星宿月佛清淨月佛明了月佛是諸菩薩至佛所已頂禮佛足隨所來方各化作毗

盧遮那藏師子之座於其座上結跏趺坐如此世界中須彌頂上菩薩來集一切世界悉亦如是彼諸菩薩所有名字世界佛號悉等無別爾時世界從兩足指放百千億妙色光明普照十方一切世界須彌頂上帝釋宮中佛及大眾靡不皆現爾時法慧菩薩承佛威神普觀十方而說頌言。

【論】一從爾時佛神力故已下有十九行半經明佛以神力令眾來集分於此分中十九行半經復分為七段一從爾時佛神力故五行半經明菩薩來集二所從來土已下三行半經明菩薩世界之名三各於佛所淨修梵行已下三行經明本所事佛四是諸菩薩至佛所已下兩行經明菩薩來已化座而坐五如此世界中已下兩行經明都結十方世界菩薩同然六爾時世尊已下兩行半經明佛足指端放光普照一切處帝釋宮殿十信足輪下放光此十住中足指端放光明位勝進十行足趺十迴向膝上十地眉間毫中放光此光表法位昇進故還是第一會中現相品所放眉間之光以果成信入位之光足指光者明照入此住位者身心智慧宮殿表入聖之初故足指端放光也七爾時已下一行經明法慧菩薩說頌歎佛餘義隨文可知約科文之意即悉其意如初菩薩來集共世界名并本所事佛總都會配當位法及法門因果始可得見其意況從法慧菩薩是此位中所修之行人約所得如來智慧立名世界名因陀羅華世界是所修之法殊特月佛是初發心住位中約法所修之果云因陀羅者此云能主也華者是開敷感果義為此十住中初發心菩薩即能十方一切世界中示現成佛故世界名能主以能示現主導一切眾生故以其行華能開敷自他智慧果故經云一一各與佛刹微塵數同名法慧菩薩俱者明智慧解行了悟徧知是境界故以達自心一切總爾故一迷一切迷一悟一切悟此明唯應度者自迷解故智慧徧故云從百佛刹微塵數國土外諸世界中來者明迷云國土之外迷解云來

但以迷無明暗障廣多以比之世界塵數悟之解行廣多故亦比之如世界之塵智慧與無明相似但只隔迷悟故是故此經下文云有三千大千世界量等經卷內小眾生身中是其義也佛號殊特月者殊者勝也特者奇也月者清涼也明入此位菩薩生住如來智慧家時無始無明煩惱炎熱惡道熾然一時頓滅唯有如來智慧朗然清涼如月故明此短菩薩創始入真以能破煩惱惑熱處立自己佛果之名以次十行十迴向隨位昇進菩薩名佛世界名各各隨位差別十行中佛果名號下名悉同名之為眼為知根利眾生處立名十迴向中佛果名號上名悉同名之為妙為於生死中利眾生之妙用自在故至位方明又云十方諸來法慧等十菩薩眾各於佛所淨修梵行者明各於自心法身智慧能淨煩惱清涼如月處立名為各於佛所淨修梵行梵者淨也以明此位菩薩妙慧現前諸行體自淨故為法性智慧任法運為體無生滅故明以體無生滅處以標自心佛果故是故有發心之士應當如是以方便無作無思任性之定而自顯發自心無性佛智慧門即能於煩惱無所染汙便即名之殊特月佛隨所來方各化作毗盧遮那藏師子之座者此法慧菩薩是東方之位明入位之首破暗之初如日初出東方能破暗故以世間之名名為殊特以智慧明能破自他無始長夜之迷暗故是故佛果名之殊特月佛以初發心已為天人師以是世界名能主華其化所作之座名毗盧遮那藏師子之座者是佛果座也明毗盧者光也遮那者徧也明徧座無始一切無明煩惱以化作一切大智慧光明藏徧照一切心境化成法界自在解脫之門師子者得無畏也已上總依主釋結跏趺坐者會妄想而為真智慧故故為結跏趺坐此十住位中十箇菩薩同於善財童子於妙峯山頂上初入信之後入十住之初德雲比丘下至慈行童女法門相似文殊師利菩薩以明初發信心以此經中圓會教行使令後學者令易解故但說其教不著行行之

人難解了故以是義故初會舉佛果神天示入法而勸修以明一一皆同佛知見第二會勸生信解以不動智佛以成信門次說入位進修之教則十信十行十迴向十地十一地法門法界品中舉善財童子是能行五位行者以教行具彰令易解故若不如是雖見教法在行猶迷是故於此一部之經因果理智教行仁士一一具彰也令修道者做學不謬故此十住入真見道之初心與後十行十迴向十地十一地為正覺之果故如人百歲以初生為長故人生十子初生為長。

### 大方廣佛新華嚴經合論卷第三十一

音切

弧

(戶吾切)。

矢

(式視切)。

鎧

(苦亥切)。

輿

(以諸切)。

臾

(予音)。

敗

(薄賣切)。

衄

(女育切)。

輦

(以諸切)。



竄

(七亂切)。

匿

(女力切)。

僅

(渠吝切)。

沫

(末音)。

悴

(子對切)。

胃

(古兗切)。

鷺

(五何切)。

電

(殿音)。

珂

(苦何切)。

吠

(符廢切)。

埤

(丁果切)。

攬

(盧敢切)。

湛

(直檻切)。

快

(苦怪切)。

層

(自登切)。

級

(居邑切)。

繒

(疾陵切)。

綺

(虛彼切)。

鳩

(居求切)。

馱

(唐佐切)。

涼

(呂張切)。

絡

(盧各切)。

捺

(奴曷切)。

漉

(盧谷切)。

膝

(息七切)。

謬

(靡幼切)。

徹

(尹列切)。

寬

(苦丸切)。

崒

(昨沒切)。

# 大方廣佛新華嚴經合論卷第三十二

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

## 須彌頂上偈讚品第十四之餘

【論】第二一切慧菩薩世界名波頭摩華佛號無盡月於此義中義分為五一釋菩薩名二釋世界名三釋隨位進修佛果之號四釋其座體五定其所來方面第一釋菩薩名者所以名一切慧以隨位進修中達一切法無體無性非迷執故此當第二治地住修戒波羅蜜中十波羅蜜以一切法無體性非染淨以為戒體故如此十住位梵行品是其戒體二釋世界名者所以世界名波頭摩華此云赤蓮華也為表戒相無染處世赫弈開敷莊嚴萬行感果可觀義也三釋隨位進修佛果之號者佛號無盡月為菩薩名一切慧佛果還號無盡月明因果相似故即明一切慧是修行得一切佛智慧之人世界是所修行之法佛果是治地住中所得之果明能清涼一切煩惱故四座體如前已釋五定其所來方面者是南方之眾也為表南方是離位是虛無義是文章義是赤色赫弈義如日正南照萬象而圓明義是故菩薩名一切慧世界名赤蓮華佛號無盡月此是善財童子見海雲比丘見佛說普眼經以義思之自當明矣第三勝慧菩薩義分為四一明菩薩名二明所居國土三明隨位佛果之號四明從所來方一明菩薩名者所以名勝慧為明隨位進修更明淨故不移一法勝前位故二明世界名者所以名寶華世界此明忍波羅蜜已得一切諸佛之智慧以道體而能行忍行華者行也明以忍行莊嚴智慧法身三明佛

果之號所以佛號不動月者以得理成行達心境而無可動故明能堪忍也月者清涼義四明從所來方者是西方之眾以西方為秋為殺為苦諦以慈悲位在中如十迴向中善財見觀音在金剛山之西為明金為殺位以表眾苦之處以修其慈忍以是義故菩薩名勝慧世界名寶華佛號不動月總明得法成忍之力用勝故此是寶華義此是修行住對治法也此是善財見善住比丘得無礙法門以能忍故第四菩薩名功德慧於此義中分之為四一明菩薩名二明世界名三明佛果之號四明從所來方一明菩薩名者云何名功德慧此位修精進波羅蜜勤行利物廣益眾生故招多功德以立其名二明世界名者所以名優鉢羅華此云青蓮華諸色蓮華此華最勝為明諸行之中精進最勝故以此華為所居法體故一切萬行以此為功三明佛果之號所以名為風月佛為明精進波羅蜜離慢無懈一念成佛速疾如風又明精勤觀照定慧如風能消染淨無明塵垢香臭悉吹如風能清涼故四明所從來方者是此方之眾北方者是坎位是黑是愚是世間嶮盜之義又為師為君之位以是義故以精進波羅蜜勤修利益之行破迷離暗速令成佛是故菩薩號功德慧世界名青蓮華佛果號之為風月佛也以風能淨諸垢故此已上是生貴住中對治法門故此當善財第四善知識彌伽長者說輪字法門了俗諦法而令愚黑者得出世樂故第五菩薩名精進慧者於此義中四義如前一所以名精進慧明此位是具足方便住精勤修習方便定門以彰深智慧故以立其名又一行之中具無量行故於定位起精進之名精進之上起功德之名以明諸行參用一行具無量行故二世界名金剛華者以法性為禪體起妙慧揀擇正邪不壞是金剛義故華者行也以明定慧能揀擇之妙用故三佛果名水月者為定體能淨能清涼能現萬像如水故四明所從來方者是東北方之眾東北者是艮位也為山為石為門闕為童蒙為初明為高顯為寂

靜為止以明定體徧與諸位諸行修進啟蒙發明清涼惑熱進修  
始終之本末故為艮為歲始年終之本末故為初明為止故菩薩  
名精進慧世界名金剛華佛號為水月此是善財第五善知識解  
脫長者主禪門於其身中現十佛刹塵佛國土總在身中十方各  
十佛刹微塵之數佛國土總在身中明禪體周徧故第六善慧菩  
薩四義如前一明菩薩名者明此正心住修般若波羅蜜智慧門  
故菩薩名善慧二妙香華世界者以明妙用智慧之香華開敷自  
他佛果明智慧說教見香華義故三佛號解脫月者明妙慧分明  
心境解脫故四明所從來方者此是東南方之眾東南方是巽位  
巽為風教為言說以像此位以智慧善說妙法教化眾生令解脫  
故是故菩薩名善慧世界名妙香華佛果號解脫月此當善財第  
六海幢比丘位身心寂然離出入息身出化身徧法界故明寂用  
自在得寂滅神通第七菩薩名智慧四義如前一明菩薩名智慧  
者明此不退住是第七成大慈悲門以智慧成滿方能隨俗善入  
生死以此為名二世界名悅意華者以有智慧在於生死隨順六  
道同事利生知根悅俗皆令得入法悅無憂故名悅意華三佛號  
無上月者明諸行之中慈悲為首為濟利眾生為最勝故故號之  
名無上月四所從來方者西南方也是坤位為信順為母為地為  
眾明方便波羅蜜以大悲為母入於一切眾生生死之地同一切  
眾生之行而教化之令信順入正法故是故菩薩名智慧世界名  
悅意華佛號為無上月此當善財第七善知識休捨優婆夷此云  
滿願以大慈悲行滿眾生願故像此方西南為母義表悲位故第  
八真實慧菩薩四義如前一明菩薩名者以此第八童真住中行  
願波羅蜜以真實智慧不謬誤眾生故二明世界名者世界名阿  
盧那華此云紅蓮華此華赤白分明是其紅色為此位是第八住  
智增位明以大智隨願行悲令智悲圓滿如紅蓮華赤白分明白  
表智赤表悲故世界名紅蓮華表隨真智處生死而無染如蓮華

處水赤白開敷而可觀故三明佛號星宿月者為此位真智朗明知根器而了差別故佛號為星宿月表了眾生差別根性分明也四所來方者是西北方為乾為父為堅剛為天為團圓白淨能現眾色咸處其中以是義故菩薩名真實慧世界名紅蓮華佛號星宿月總明大智圓明能現眾生根器差別如天現象品物分明此當善財第八善知識仙人毗目瞿沙此云出聲可畏明真智圓明出語眾邪可畏仙人者為表此位智增無染故又表得智同邪化邪見故第九無上慧菩薩四義如前一明菩薩名者以此位是力波羅蜜法王子住善說法故名無上慧二世界名者所以世界名那羅陀華者那羅者此云人也陀云為持為此華香潔殊妙人持帶佩表此位菩薩以善說妙法殊妙聞之者得戒定慧解脫知見五分法身之香人皆持誦帶佩故世界名那羅陀華三明何故佛號清淨月此位菩薩善說法故為大法師能淨自他煩惱故佛號清淨月四從所來方者是下方之眾明下方是金剛是水是風輪能持世間故表此位菩薩善說妙法能持世間軌度法則令人做學是故菩薩名無上慧世界名那羅陀華佛號清淨月此位同善財見勝熱婆羅門昇刀山入火聚隨諸人天所來見者皆得道而去此明菩薩智滿同邪攝諸異道令入正見故第十堅固慧菩薩四義如前一明所以菩薩名堅固慧者以此位是灌頂住行智波羅蜜能堅固利益一切眾生以為其名二世界名虛空華者以智慧日照明世間及出世間總無依住以此為名三明所以佛號明了月者以此位大智圓明普照世間無不明了以此為名四所來方者是上方之眾上方者為虛空為日月星辰表大智無依不依空有明鑒萬象如日月星辰是故菩薩名堅固慧世界名虛空華佛號明了月此位是善財童子見師子幢王女名慈行童女師子幢王女者明智悲圓滿以此十住一終已生在佛家會融十法悲智一終圓滿也以從初住創生佛家修智行悲即王女慈行十地

修悲已滿於十一地初以悲行智即佛母摩耶幻生諸佛佛是大智母是大悲廣意至文方明如下十段頌文隨文可知一依如前科文釋過已上菩薩名世界名十箇佛果總是此十住之中隨位進修因果之號約隨方而表法約入法而成名如上所配之可知。

【經】

佛放淨光明	普見世導師	須彌山王頂
妙勝殿中住	一切釋天王	請佛入宮殿
悉以十妙頌	稱讚諸如來	彼諸大會中
所有菩薩眾	皆從十方至	化座而安坐
彼會諸菩薩	皆同我等名	所從諸世界
名字亦如是	本國諸世尊	名號悉亦同
各於其佛所	淨修無上行	佛子汝應觀
如來自在力	一切閻浮提	皆言佛在中
我等今見佛	住於須彌頂	十方悉亦然
如來自在力	一一世界中	發心求佛道
依於如是願	修習菩提行	佛以種種身
遊行徧世間	法界無所礙	無能測量者
慧光恒普照	世間悉除滅	一切無等倫
云何可測知		

【論】二從法慧菩薩承威說頌已下十行頌是明法慧菩薩歎佛放光集眾分。

【經】爾時一切慧菩薩承佛威力普觀十方而說頌言。

假使百千劫	常見於如來	不依真實義
而觀救世者	是人取諸相	增長癡惑網
繫縛生死獄	盲冥不見佛	觀察於諸法
自性無所有	如其生滅相	但是假名說
一切法無生	一切法無滅	若能如是解



諸佛常現前	法性本空寂	無取亦無見
性空即是佛	不可得思量	若知一切法
體性皆如是	斯人則不為	煩惱所染著
凡夫見諸法	但隨於相轉	不了法無相
以是不見佛	牟尼離三世	諸相悉具足
住於無所住	普徧而不動	我觀一切法
皆悉得明了	今見於如來	決定無有疑
法慧先已說	如來真實性	我從彼了知
菩提難思議		

【論】三爾時已下明一切慧承威說十行頌明歎無相法為真實。

【經】爾時勝慧菩薩承佛威力普觀十方而說頌言。

如來大智慧	希有無等倫	一切諸世間
思惟莫能及	凡夫妄觀察	取相不如理
佛離一切相	非彼所能見	迷惑無知者
妄取五蘊相	不了彼真性	是不見佛
了知一切法	自性無所有	如是解法性
則見盧舍那	因前五蘊故	後蘊相續起
於此性了知	見佛難思議	譬如闇中寶
無燈不可見	佛法無人說	雖慧莫能了
亦如目有瞽	不見淨妙色	如是不淨心
不見諸佛法	又如明淨日	瞽者莫能見
無有智慧心	終不見諸佛	若能除眼翳
捨離於色想	不見於諸法	則得見如來
一切慧先說	諸佛菩提法	我從於彼聞
得見盧舍那		

【論】四爾時已下明勝慧菩薩說十行頌歎凡夫迷五蘊之真性由人說之方了。

【經】爾時功德慧菩薩承佛威力普觀十方而說頌言。

諸法無真實	妄取真實相	是故諸凡夫
輪迴生死獄	言詞所說法	小智妄分別
是故生障礙	不了於自心	不能了自心
云何知正道	彼由顛倒慧	增長一切惡
不見諸法空	恒受生死苦	斯人未能有
清淨法眼故	我昔受眾苦	由我不見佛
故當淨法眼	觀其所應見	若得見於佛
其心無所取	此人則能見	如佛所知法
若見佛真法	則名大智者	斯人有淨眼
能觀察世間	無見即是見	能見一切法
於法若有見	此則無所見	一切諸法性
無生亦無滅	奇哉大導師	自覺能覺他
勝慧先已說	如來所悟法	我等從彼聞
能知佛真性		

【論】五爾時功德慧說十行頌明妄取諸法真實之相。

【經】爾時精進慧菩薩承佛威力觀察十方而說頌言。

若住於分別	則壞清淨眼	愚癡邪見增
永不見諸佛	若能了邪法	如實不顛倒
知妄本自真	見佛則清淨	有見則為垢
此則未為見	遠離於諸見	如是乃見佛
世間言語法	眾生妄分別	知世皆無生
乃是見世間	若見見世間	見則世間相
如實等無異	此名真見者	若見等無異
於物不分別	是見離諸惑	無漏得自在

諸佛所開示	一切分別法	是悉不可得
彼性清淨故	法性本清淨	如空無有相
一切無能說	智者如是觀	遠離於法想
不樂一切法	此亦無所修	能見大牟尼
如德慧所說	此名見佛者	所有一切行
體性皆寂滅		

【論】六爾時精進慧說十行頌歎諸法自體無見妄見迷真。

【經】爾時善慧菩薩承佛威力普觀十方而說頌言。

希有大勇健	無量諸如來	離垢心解脫
自度能度彼	我見世間燈	如實不顛倒
如於無量劫	積智者所見	一切凡夫行
莫不速歸盡	其性如虛空	故說無有盡
智者說無盡	此亦無所說	自性無盡故
得有難思盡	所說無盡中	無眾生可得
知眾生性爾	則見大名稱	無見說為見
無生說眾生	若見若眾生	了知無體性
能見及所見	見者悉除遣	不壞於真法
此人了解佛	若人了知佛	及佛所說法
則能照世間	如佛盧舍那	正覺善開示
一法清淨道	精進慧大士	演說無量法
若有若無有	彼想皆除滅	如是能見佛
安住於實際		

【論】七爾時善慧菩薩說十行頌歎無眾生可盡法非有無二見。

【經】爾時智慧菩薩承佛威力普觀十方而說頌言。

我聞最勝教	即生智慧光	普照十方界
悉見一切佛	此中無少物	但有假名字

若計有我人	則為入險道	諸取著凡夫
計身為實有	如來非所取	彼終不得見
此人無慧眼	不能得見佛	於無量劫中
流轉生死海	有諍說生死	無諍即涅槃
生死及涅槃	二俱不可得	若逐倒名字
取著此二法	此人不如實	不知聖妙道
若生如是想	此佛此最勝	顛倒非實義
不能見正覺	能知此實體	寂滅真如相
則見正覺尊	超出語言道	言語說諸法
不能顯實相	平等乃能見	如法佛亦然
正覺過去世	未來及現在	永斷分別根
是故說名佛		

【論】八爾時智慧菩薩說十行頌歎言說不能及真。

【經】爾時真實慧菩薩承佛威力普觀十方而說頌言。

寧受地獄苦	得聞諸佛名	不受無量樂
而不聞佛名	所以於往昔	無數劫受苦
流轉生死中	不聞佛名故	於法不顛倒
如實而現證	離諸和合相	是名無上覺
現在非和合	去來亦復然	一切法無相
是則佛真體	若能如是觀	諸法甚深義
則見一切佛	法身真實相	於實見真實
非實見不實	如是究竟解	是故名為佛
佛法不可覺	了此名覺法	諸佛如是修
一法不可得	知以一故眾	知以眾故一
諸法無所依	但從和合起	無能作所作
唯從業想生	云何知如是	異此無有故
一切法無住	定處不可得	諸佛住於此

究竟不動搖

【論】九爾時真實慧菩薩說十行頌歎諸法無合散性。

【經】爾時無上慧菩薩承佛威力普觀十方而說頌言。

無上摩訶薩	遠離眾生想	無有能過者
故號為無上	諸佛所得處	無作無分別
羸者無所有	微細亦復然	諸佛所行境
於中無有數	正覺遠離數	此是佛真法
如來光普照	滅除眾闇冥	是光非有照
亦復非無照	於法無所著	無念亦無染
無住無處所	不壞於法性	此中無有二
亦復無有一	大智善見者	如理巧安住
無中無有二	無二亦復無	三界一切空
是則諸佛見	凡夫無覺解	佛令住正法
諸法無所住	悟此見自身	非身而說身
非起而現起	無身亦無見	是佛無上身
如是實慧說	諸佛妙法性	若聞此法者
當得清淨眼		

【論】十爾時無上慧說十行頌歎佛所得法體無分別不屬名數。

【經】爾時堅固慧菩薩承佛威力普觀十方而說頌言。

偉哉大光明	勇健無上士	為利羣迷故
而興於世間	佛以大悲心	普觀諸眾生
見在三有中	轉迴受眾苦	唯除正等覺
具德尊導師	一切諸天人	無能救護者
若佛菩薩等	不出於世間	無有一眾生
而能得安樂	如來等正覺	及諸賢聖眾
出現於世間	能與眾生樂	若見如來者

為得大善利	聞佛名生信	則是世間塔
我等見世尊	為得大利益	聞如是妙法
悉當成佛道	諸菩薩過去	以佛威神力
得清淨慧眼	了諸佛境界	今見盧舍那
重增清淨信	佛智無邊際	演說不可盡
勝慧等菩薩	及我堅固慧	無數億劫中
說亦不能盡		

【論】十一爾時堅固慧說十行頌歎佛大悲出興利益已上十菩薩各說十行頌和會入位法令身心諸計皆無所依離於偏執住佛所住。

## 十住品第十五

【論】將釋此品約作五門分別一釋品名目二釋品來意三明品之宗趣四都會斷惑次第五隨文釋義一釋品名目此品說十種住門名為十住品二明品來意者為前品是偈讚勸修之門此品明正舉修行十住之行是故此品須來十住者生諸佛大智慧中住入此位永不退還故名之為住三明品宗趣者明此品說十種住二十種進修因果為正宗又住佛所住以為正宗明此十住位中各有兩種因果各各當位之中初舉十法是忻趣增上之緣後舉十法是當位之內修學之果如文具明四會當十住位中斷惑次第者如初發心住治地住修行住此三種住中明總修出世間心破諸世間煩惱纏縛其世間煩惱如善財所說頌根本煩惱有十隨煩惱總有六其十種根本煩惱者一欲二色三無色此是三界根本所縛處四憍慢五諸趣六愛七愚癡八貪九恚十心魔王是為十又隨煩惱總有六者一諂二誑三疑惑四慳五嫉六嬌盈善財頌曰三有為城郭憍慢為垣墻諸趣為門戶愛水為池

墮愚癡為闇覆貪恚火熾然魔王作君主童蒙依止住貪愛為微纏諂誑為轡勒疑惑蔽其眼趣入諸邪見慳嫉憍盈故入於三惡道此約內心所起不約身見邊見見取戒取邪見內心成智諸見自是解脫以此一乘教體但約悟無明而成大智用諸見而作自在以此不論五見如十信位文殊師利問法首菩薩有十一種煩惱云何為十一一貪二瞋三愚癡四慢五覆六忿七恨八嫉九慳十誑十一諂如般若經中五蘊十二緣等如上煩惱以十住中初發心住治地住修行住此三住一時頓成根本智慧即如善財於妙峯山上見德雲比丘得諸佛智慧光明門即除已上世間諸煩惱障以成佛智慧光明故如善財妙峯山上信眼明淨智光照耀普觀境界離一切障此是初發心住第二海門國見海雲比丘除心境迷真作十二緣生觀令無障故即見海中有佛出現說普眼經明見自他十二緣生成大智海是佛義故心境總是經故明前得佛智慧觀十二緣生成大智海心境普周自在徧故此是治地住以十二緣生治令成如來智地故第三海岸國見善住比丘除心境不明淨障得菩薩無礙解脫門能見一切眾生根器業行死此生彼悉皆明見此是修行住於此三種住中明得出纏心自在故總以十信心自信一切三界分別無明是根本不動智佛於初發心住中以自在決定解力信眼清淨智光照耀普觀境界離一切障契會悟入十住初心以隨位進修中安立五十箇佛果次第法門方便皆不動智以為根本已上初發心住治地住修行住明得十住中出纏心勝七故善財初二三善知識皆是比丘明離纏解脫表此三住位中行相故第四生貴住明對治世間法則及生死煩惱不自在障令自在故即如善財於市肆之上見彌伽長者說輪字經即表生死市鄽鬧處常寂於一一字猶如車輪一多圓滿互體相成又如帝釋寶網互為緣起映徹重重一字之中有無盡字句為世間名句文身引諸未學以成教軌即俗士彌伽以成

其行為令得出世心後須明世間靜亂緣起生死之性萬法無生無滅及世間名字義理一切眾生語言互相成就如古者伏羲之類是也第五具足方便住對治真俗身邊二見令大智境界得自在破不自在障故如善財見解脫長者即入三昧名普攝一切佛刹無邊陀羅尼十方各現十佛刹微塵數佛國土海清淨莊嚴總在身中即明一切眾生身總含無邊佛刹體相無礙為明真俗色相皆如光影互相容故無中邊故欲令六十二見無邊諸見性解脫故第六正心住對治智慧寂用不自在障即如善財見海幢比丘於經行地側結跏趺坐離出入息無別思覺於其身上各隨身分皆出化身如雲廣覆周徧十方隨應所見此明寂用無礙故此已上總明世間出世間和會皆解脫故如是已後四波羅蜜入俗行悲令自在故第七不退住對治大慈大悲同行攝生不圓滿自在障令圓滿故即如善財於普莊嚴園見休捨優婆夷謂善財言我有八萬四千那由他同行眷屬常居此園明大悲位中行方便波羅蜜同於八萬四千不可說一切眾生煩惱總共同事教化利益經云其餘眾生住此園者亦皆普得不退轉位明能行悲智行者悉同此也第八童真住對治處纏同事世間餘習智不清淨障令清淨故即如善財見毗目瞿沙仙人表大智清淨無所染故休捨優婆夷與仙人住處同名俱是海潮處者明此悲智一體無染而不汙若隨悲修智猶有習氣染境之心即此第七第八兩位和會一終是也若也隨智行慈無有染習即師子幢王女慈行童女是可以思之得見其意第九法王子住對治說法不自在障令自在故即如善財見勝熱婆羅門以登刀山入於火聚行苦行時隨天龍神人及非人來者無不獲益而已十灌頂住對治悲智不自在清淨障令得清淨即如善財見師子幢王女慈行童女王者智自在故女者表隨悲同事無染習故明智滿從悲處世間故即同事而無習氣故已上十種對治皆一念心上初發心時一行之中



一時之內無前後際對治此十種障法成一法一心一智慧一行之中十十無盡法門皆以自心不動智佛為體以法事之中合具此十種無盡法門同別一多自在故以此十種對治一時令慣習自在故不同三乘權教約劣解眾生存世間三世之性說佛果在三僧祇之外以自心根本無明分別之種便成不動智佛以法界體用以為信進悟入之門從信及入位進修乃至經十住十行十迴向十地十一地總不離本不動智佛不離一時一念一法一行上而有無邊無量不可說不可說法界虛空界微塵數法門何以故為從法界及根本不動智上為信進悟入故法合如然故如龍女剎那成佛善財一生以取佛果法界無性無生為一生非延促生故為法界體無情量延促長短去來今故諸有信者應如是知如今成佛與過去未來一切諸佛一時成佛以法界智體無別時故如一滴之水入大海中便同大海無新舊水故故去情方見非識心知如三乘中十住菩薩猶受三界分段生死分學生空觀對治闡提不信障十行菩薩分作法空觀修自利利他行對治聲聞自利障十迴向菩薩作法空觀成起大悲願力垂形六道教化眾生對治獨覺自度障此明三乘中三十心菩薩對治地前三種障但除正使未除習氣十地菩薩斷其餘習如初地菩薩見自身真如佛性故名見道位從二地至七地是修道位猶有功用而修其行從八地至十地名究竟位不假功用任運至佛果故又如三乘中十二住地一種性住十解門是二解行住十迴向是也三歡喜住初地是四增上戒住二地是五增上慧住三地是六道品相應增上慧住四地是七諦相應增上慧住五地是八緣起相應增上慧住六地是九有行有開發無相住七地是十無行無開發無相住八地是十一無礙住九地是十二最上菩提住十地是又如三乘中地前三賢菩薩得伏忍十地與佛地得寂滅忍又望勝鬘經羅漢辟支佛淨土菩薩總是伏忍以空觀伏現行十使不起為不

識無明住地煩惱故猶不識云何名斷煩惱但伏現行不起得三種意生身受三界外變易生死如是菩薩為行六波羅蜜得六神通福德神通竝勝人天唯非修佛果法界門故是門外三車艸庵仍聲聞辟支佛三乘菩薩不同其德出三界行六神通名則相似行六波羅蜜功德果報不同故如是三乘六通菩薩等於大方廣佛華嚴經不聞不信如此經云設有菩薩經無量那由他劫修六波羅蜜得六神通猶不聞此華嚴經典猶名假名菩薩不真菩薩設復聞時不信不入如法華亦然如三乘中三種意生身者初一二三地名三摩跋提樂法意生身二四五六地名覺法自性意生身三七八九十地名種類俱生無行作意生身欲廣引云云自有三乘教自明約會對治如是如此一乘教都無如上三乘之趣以為根本無明住地煩惱便為一切諸佛不動智一切眾生皆自有之只為智體無性無依不能自了會緣方了云何為會緣會緣有三種一會苦緣遇苦方能發心二會樂緣久處人天內心明慧達世樂果生死無常方始求真三見佛及一乘菩薩而能發心求佛種智以會三緣近正善知友而能自覺無明本是佛智三乘同然為意樂淺深各別以因本智上而生信心約本智而為悟入以不離本智故於初發心住即五位齊周雖列十住十行十迴向十地十一地行法位門進修軌度如王寶印一印無差以一心大智之印印無始三世總在一時無邊諸法智印咸徧以智等諸佛故以智等眾生心故以智等諸法故以智無中邊表裏三世長短近遠故為智過虛空量故如世虛空無所了知如無分別智虛空一念而能分別過虛空等法門是故經言一切虛空猶可量諸佛說法不可量以是義故以自心根本無明體用而見不動智與一切諸佛及以一切眾生同一體性同一境界同一智海以是發心之初住佛種智家故纔發心時即於十方現身成佛如初發心功德品自明以是義故於此十住位中入初發心住者住一切諸佛智慧

大悲海境界中住即五位通修以初住及十地不離一佛智慧境界故但明生熟慣習勝劣安立住地之名為智體之中非三世情攝故一如龍女一剎那之際已具三生普賢行滿佛果亦就如文殊師利菩薩頌云一念普觀無量劫無去無來亦無住如是了知三世事超諸方便成十力明知三乘三祇出世成佛是權方便教此教約實法不說以願力成佛等事設以願力成行還以約實成佛不說以願力暫成故是故當知從十住中初入位菩薩即五位通修為十住行相通有十行十迴向十地等法門故如十住中七八兩住還修悲智九住中是法師位十住中悲智圓滿如是五行相相似故如善財十住中善知識一一智慧境界皆悉無極但為約法身大智大悲之上法具無盡須當安立五位行門總是一心一智一時智等徧滿所行之道是故起信進修行者於大智境界莫作三世近遠延促之見違智境界故失本大智之境逐情識故隨相轉故此會第四斷惑次第竟如此五位斷惑次第如空無時如圓鏡頓照如摩尼寶能同眾色如一滴之水入大海中等同無二以大智慧之圓鏡普印諸作莫不皆成無作用之大用故無三世之一時故。

## 大方廣佛新華嚴經合論卷第三十二

音切

翳

(於計切)。

瞽

(古音)。

羸

(倉胡切)。

偉

(于鬼切)。

漸

(七念切)。

徽

(許歸切)。

纏

(莫北切)。

轡

(兵媚切)。

闐

(胡對切)。

鄺

(直連切)。

鬧

(奴教切)。

闕

(去月切)。

# 大方廣佛新華嚴經合論卷第三十三

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

## 十住品第十五之餘

【論】第五隨文釋義者長科為六段。

【經】爾時法慧菩薩承佛威力入菩薩無量方便三昧以三昧力十方各千佛剎微塵數世界之外有千佛剎微塵數諸佛皆同一號名曰法慧普現其前告法慧菩薩言善哉善哉善男子汝能入是菩薩無量方便三昧善男子十方各千佛剎微塵數諸佛悉以神力共加於汝又是毗盧遮那如來往昔願力威神之力及汝所修善根力故入此三昧令汝說法為增長佛智故深入法界故善了眾生界故所入無礙故所行無障故得無等方便故入一切智性故覺一切法故知一切根故能持說一切法故所謂發起諸菩薩十種住善男子汝當承佛威神之力而演此法是時諸佛即與法慧菩薩無礙智無著智無斷智無癡智無異智無失智無量智無勝智無懈智無奪智何以故此三昧力法如是故是時諸佛各伸右手摩法慧菩薩頂法慧菩薩即從定起告諸菩薩言佛子菩薩住處廣大與法界虛空等佛子菩薩住三世諸佛家彼菩薩住我今當說。

【論】第一從爾時法慧菩薩已下至菩薩住我今當說此一段有十九行半經明法慧菩薩入定諸佛加持分於中大意有十一釋菩薩名二明入三昧之意三明三昧之力四明十方佛來現其前與法慧同號五明十方佛與力共根六明毗盧遮那如來往

昔願力使然七明法慧菩薩自善根力能入三昧八明入定因緣九明十方諸佛與十智十明法慧出定演說十種住門一釋菩薩名者如十信位中菩薩下名悉同名之為首為明信心以信為首此十住位中已生諸佛智慧家故下名悉同名之為慧為明入聖法流中得佛智慧同佛知見善簡正邪契會正法名之法慧若也自己不能同諸佛智慧知見者自邪未明焉能簡邪見也是故此位能同一切諸佛知見故得一切同名法慧佛而現其前以為印信定其詮表也以與十方諸佛智慧同故二明入三昧之意者如十信位中且以生滅心信自心所有無始無明能分別心便即信為自心根本不動智佛未有方便三昧合其體用故是故十信位中十箇世界皆名為色為十信未入法性之流以生滅心而信解故故十箇世界名之為色如此十住位中以方便三昧無沉掉心能現自體無生滅智慧故是故一切修道者初以聞解信入次以無思契同依本無作用之本智慧故故須入三昧以淨攀緣染習力故無作真智方明現故以是義故須入三昧三者云正昧者云定總言正定正定者無沉掉也無思所緣境也亦無攝持伏滅心也無忻無厭任性無思任理不作智自明矣是名方便是名無量以淨無量妄想故不可以情量思度所知故故名無量方便三昧三者正也昧之云定明情識昧正智自明如色界無色界三昧皆以息想慮而得之聲聞緣覺三昧修厭患觀而對治樂觀空而滅悲智以寂滅為樂權教菩薩樂觀空而行六度離苦本而生淨國設有住此界者言留惑而化眾生皆非法爾合然無出沒故以此義故此方便三昧者為一切眾生迷法界體用五欲情生以不造作心現本智故便將根本定體淨所妄情名為方便非是別於真外別有假安立之定名為方便譬如以水清寶能清濁水為珠淨緣現本淨水非是珠能作得淨水方便三昧亦復如是為以萬法無作本自淨緣現得本自無作智慧力故故名方便但天人外道

三乘所有因果皆有所作以此所生皆有處所皆有果報廣狹淨穢差別等事於此佛華嚴一乘法門以無住無作任性法門所有其生任無依智無依止心智幻生身稱真法界於一切眾生前對現色身然其體相無來去然亦不作神通變化之事雖然普現三世一切業果在剎那之中然亦不住三世遠近及剎那之見於此經所作三昧智慧一切願行總是任理智之運為非有作有修忻厭之法也三明三昧之力者其力有五一定體淨欲徧周力二定能顯智慧同佛力三定能同佛身相名號現前力四定能契佛所知見得諸佛共所加持力五定能生在如來家為真佛子住佛智慧力一定體而能淨欲徧周力者為以此無作定體而能淨諸欲妄心身同於虛空無表裏徧周虛空法界故二定能顯智慧同佛力者為無作用定能現無作用自然慧故為一切眾皆具足如來自然智慧為迷境情起緣五欲心障故以修無作定為方便佛智自然智便現故三定能同佛身相名號現前力者為以無作定顯得自法身智身無作白淨無垢與一切諸佛法身智慧合故是故十方各千佛剎微塵數諸佛同名法慧而現其前以智慧契會同佛知見故是故皆佛號與自己同名名為法慧云十方各千佛剎微塵為數量者為明隨位進修智慧徧周昇降之數十行之中云萬佛剎微塵十迴向位中云百萬佛剎微塵以彰智慧昇進為對迷時即不可說剎塵煩惱為對悟時即不可說剎塵佛國及佛智慧也四定能契佛所知見得諸佛加持力者諸佛加持有七一同名號加持令不疑故二言讚加持令入位者心安隱故三毗盧遮那師弟加持彰本願故四神力加持與本師會同本神力智慧故五自善根力加持以自修方便定顯本智慧故六得十方同號佛皆與十種智力加持以說法同諸如來辯無礙故七得十方同號諸佛手摩其頂加持明至佛知見之頂許可不謬故有是七種

加持也五定能生在如來家為真佛子住佛智慧力者為以無作定體顯本智慧同諸如來解脫智慧故。

【經】諸佛子菩薩住有十種過去未來現在諸佛已說當說今說何者為十所謂初發心住治地住修行住生貴住具足方便住正心住不退住童真住法王子住灌頂住是名菩薩十住去來現在諸佛所說。

【論】第二從出定後明正說十種住名目分如文可見。

【經】佛子云何為菩薩發心住此菩薩見佛世尊形貌端嚴色相圓滿人所樂見難可值遇有大威力或見神足或聞記別或聽教誡或見眾生受諸劇苦或聞如來廣大佛法發菩提心求一切智。

【論】第三有十法明正說發心之因分即是見佛身色端嚴或聞教誡等是。

【經】此菩薩緣十種難得法而發於心何者為十所謂是處非處智善惡業報智諸根勝劣智種種解差別智種種界差別智一切至處道智諸禪解脫三昧智宿命無礙智天眼無礙智三世漏盡智是為十佛子此菩薩應勸學十法何者為十所謂勤供養佛樂住生死主導世間令除惡業以勝妙法常行教誨歎無上法學佛功德生諸佛前恒蒙攝受方便演說寂靜三昧讚歎遠離生死輪迴為苦眾生作歸依處何以故欲令菩薩於佛法中心轉增廣有所聞法即自開解不由他教故佛子云何為菩薩治地住此菩薩於諸眾生發十種心何者為十所謂利益心大悲心安樂心安住心憐愍心攝受心守護心同己心師心導師心是為十佛子此菩薩應勸學十法何者為十所謂誦習多聞虛閑寂靜近善知識發言和悅語必知時心無怯怖了達於義如法修行遠離愚迷安住不動何以故欲令菩薩於諸眾生增長大悲有所聞法即自開解不由他教故佛子云何為菩薩修行住此菩薩以十種行



觀一切法何等為十所謂觀一切法無常一切法苦一切法空一切法無我一切法無作一切法無味一切法不如名一切法無處所一切法離分別一切法無堅實是為十佛子此菩薩應勸學十法何者為十所謂觀察眾生界法界世界觀察地界水界火界風界觀察欲界色界無色界何以故欲令菩薩智慧明了有所聞法即自開解不由他教故佛子云何為菩薩生貴住此菩薩從聖教中生成就十法何者為十所謂永不退轉於諸佛所深生淨信善觀察法了知眾生國土世界業行果報生死涅槃是為十佛子此菩薩應勸學十法何者為十所謂了知過去未來現在一切佛法修習過去未來現在一切佛法圓滿過去未來現在一切佛法了知一切諸佛平等何以故欲令增進於三世中心得平等有所聞法即自開解不由他教故佛子云何為菩薩具足方便住此菩薩所修善根皆為救護一切眾生饒益一切眾生安樂一切眾生哀愍一切眾生度脫一切眾生令一切眾生離諸災難令一切眾生出生死苦令一切眾生發生淨信令一切眾生悉得調伏令一切眾生咸證涅槃佛子此菩薩應勸學十法何者為十所謂知眾生無邊知眾生無量知眾生無數知眾生不思議知眾生無量色知眾生不可量知眾生空知眾生無所作知眾生無所有知眾生無自性何以故欲令其心轉復增勝無所染著有所聞法即自開解不由他教故佛子云何為菩薩正心住此菩薩聞十種法心定不動何者為十所謂聞讚佛毀佛於佛法中心定不動聞讚法毀法於佛法中心定不動聞讚菩薩毀菩薩於佛法中心定不動聞讚菩薩毀菩薩所行法於佛法中心定不動聞說眾生有量無量於佛法中心定不動聞說眾生有垢無垢於佛法中心定不動聞說眾生易度難度於佛法中心定不動聞說法界有量無量於佛法中心定不動聞說法界有成有壞於佛法中心定不動聞說法界若有若無於佛法中心定不動是為十佛子此菩薩應歡學十法

何者為十所謂一切法無相一切法無體一切法不可修一切法無所有一切法無真實一切法空一切法無性一切法如幻一切法如夢一切法無分別何以故欲令其心轉復增進得不退轉無生法忍有所聞法即自開解不由他教故佛子云何為菩薩不退住此菩薩聞十種法堅固不退何者為十所謂聞有佛無佛於佛法中心不退轉聞有法無法於佛法中心不退轉聞有菩薩無菩薩於佛法中心不退轉聞有菩薩行無菩薩行於佛法中心不退轉聞有菩薩修行出離修行不出離於佛法中心不退轉聞過去有佛過去無佛於佛法中心不退轉聞未來有佛未來無佛於佛法中心不退轉聞現在有佛現在無佛於佛法中心不退轉聞佛智有盡佛智無盡於佛法中心不退轉聞三世一相三世非一相於佛法中心不退轉是為十佛子此菩薩應勸學十種廣大法何者為十所謂說一即多說多即一文隨於義義隨於文非有即有有即非有無相即相相即無相無性即性性即無性何以故欲令增進於一切法善能出離有所聞法即自開解不由他教故佛子云何為菩薩童真住此菩薩住十種業何者為十所謂身行無失語行無失意行無失隨意受生知眾生種種欲知眾生種種解知眾生種種界知眾生種種業知世界成壞神足自在所行無礙是為十佛子此菩薩應勸學十種法何者為十所謂知一切佛剎動一切佛剎持一切佛剎觀一切佛剎詣一切佛剎遊行無數世界領受無數佛法現變化自在身出廣大徧滿音一剎那中承事供養無數諸佛何以故欲令增進於一切法能得善巧有所聞法即自開解不由他教故佛子云何為菩薩法王子住此菩薩善知十種法何者為十所謂善知諸眾生受生善知諸煩惱現起善知習氣相續善知所行方便善知無量法善解諸威儀善知世界差別善知前際後際事善知演說世諦善知演說第一義諦是為十佛子此菩薩應勸學十種法何者為十所謂法王處善巧法王處軌

度法王處宮殿法王處趣入法王處觀察法王灌頂法王力持法王無畏法王宴寢法王讚歎何以故欲令增進心無障礙有所聞法即自開解不由他教故佛子云何為菩薩灌頂住此菩薩得成就十種智何者為十所謂震動無數世界照耀無數世界住持無數世界往詣無數世界嚴淨無數世界開示無數眾生觀察無數眾生知無數眾生根令無數眾生趣入令無數眾生調伏是為十佛子此菩薩身及身業神通變現過去智未來智現在智成就佛土心境界智境界皆不可知乃至法王子菩薩亦不能知佛子此菩薩應勸學諸佛十種智何者為十所謂三世智佛法智法界無礙智法界無邊智充滿一切世界智普照一切世界智住持一切世界智知一切眾生智知一切法智知無邊諸佛智何以故欲令增長一切種智有所聞法即自開解不由他教故。

【論】第四有十法明初發心住所緣如來十種勝智并取此位十法至下十住之終總有二百箇法門共成十住之位一一住內皆有二十箇法門十法以成當位之門十法以為昇進之行經文自具不煩更釋約知分劑以行行之。

【經】爾時佛神力故十方各一萬佛刹微塵數世界六種震動所謂動徧動等徧動起徧起等徧起踊徧踊等徧踊震徧震等徧震吼徧吼等徧吼擊徧擊等徧擊雨天妙華天末香天華鬘天裸香天寶衣天寶雲天莊嚴具天諸音樂不鼓自鳴放天光明及妙音聲如此四天下須彌山頂帝釋殿上說十住法現諸神變十方所有一切世界悉亦如是又以佛神力故十方各過一萬佛刹微塵數世界有十佛刹微塵數菩薩來詣於此充滿十方作如是言善哉善哉佛子善說此法我等諸人同名法慧所從來國同名法雲彼土如來皆名妙法我等佛所亦說十住眾會眷屬文句義理悉亦如是無有增減佛子我等承佛神力來入此會為汝作證

如於此會十方所有一切世界悉亦如是爾時法慧菩薩承佛威力觀察十方暨于法界而說頌曰。

【論】第五明說教威感大地震動從此段中科為六段一明大地六種十八相動二明天雨十種供養三明總結十方同說四明十方威感遠近五明十方同號菩薩咸來作證六明十方佛果名妙法此明從妙慧而說此法。

【經】

見最勝智微妙身	相好端嚴皆具足
如是尊重甚難遇	菩薩勇猛初發心
見無等比大神通	聞說記心及教誡
諸趣眾生無量苦	菩薩以此初發心
聞諸如來普勝尊	一切功德皆成就
譬如虛空不分別	菩薩以此初發心
三世因果名為處	我等自性為非處
欲悉了知真實義	菩薩以此初發心
過去未來現在世	所有一切善惡業
欲悉了知無不盡	菩薩以此初發心
諸禪解脫及三昧	襍染清淨無量種
欲悉了知入住出	菩薩以此初發心
隨諸眾生根利鈍	如是種種精進力
欲悉了達分別知	菩薩以此初發心
一切眾生種種解	心所好樂各差別
如是無量欲悉知	菩薩以此初發心
眾生諸界各差別	一切世間無有量
欲悉了知其體性	菩薩以此初發心
一切有為諸行道	一一皆有所至處
悉欲了知其真實性	菩薩以此初發心

一切世界諸眾生  
欲得天眼皆明見  
過去世中曾所有  
欲悉了知其宿住  
一切眾生諸結惑  
欲悉了知究竟盡  
隨諸眾生所安立  
如其世諦悉欲知  
一切諸法離言說  
欲悉明達此真義  
欲悉震動十方國  
具足諸佛大神通  
欲一毛孔放光明  
一一光中覺一切  
欲以難思諸佛刹  
了知一切如幻化  
欲以無量刹眾生  
悉知無人無有我  
欲以一毛滴海水  
而悉分別知其數  
不可思議諸國土  
欲悉分別如其數  
過去未來無量劫  
欲悉了達窮其際  
三世所有諸如來  
欲知其法盡無餘  
無量無邊諸世界

隨業漂流無暫息  
菩薩以此初發心  
如是體性如是相  
菩薩以此初發心  
相續現起及習氣  
菩薩以此初發心  
種種談論語言道  
菩薩以此初發心  
性空寂滅無所作  
菩薩以此初發心  
傾覆一切諸大海  
菩薩以此初發心  
普照十方無量土  
菩薩以此初發心  
悉置掌中而不動  
菩薩以此初發心  
置一毛端不迫隘  
菩薩以此初發心  
一切大海悉令竭  
菩薩以此初發心  
盡抹為塵無遺者  
菩薩以此初發心  
一切世間成壞相  
菩薩以此初發心  
一切獨覺及聲聞  
菩薩以此初發心  
欲以一毛悉稱舉

如其體相悉了知  
無量無數輪圍山  
如其大小皆得知  
欲以寂靜一妙音  
如是皆令淨明了  
一切眾生語言法  
悉欲了知其自性  
世間言音靡不作  
欲得如是妙舌根  
欲使十方諸世界  
而悉知從分別生  
一切十方諸世界  
欲悉了知彼佛法  
種種變化無量身  
欲悉了達從心起  
過去未來現在世  
欲於一念悉了知  
欲具演說一句法  
而令文義各不同  
十方一切諸眾生  
欲於一念皆明達  
欲以身語及意業  
了知三世皆空寂  
菩薩如是發心已  
恭敬供養諸如來  
菩薩勇猛求佛道  
為彼稱歎使順行

菩薩以此初發心  
欲令悉入毛孔中  
菩薩以此初發心  
普悉十方隨類演  
菩薩以此初發心  
一言演說無不盡  
菩薩以此初發心  
悉令其解證寂滅  
菩薩以此初發心  
有成壞相皆得見  
菩薩以此初發心  
無量如來悉充滿  
菩薩以此初發心  
一切世界微塵等  
菩薩以此初發心  
無量無數諸如來  
菩薩以此初發心  
阿僧祇劫無有盡  
菩薩以此初發心  
隨其流轉生滅相  
菩薩以此初發心  
普詣十方無所礙  
菩薩以此初發心  
應令往詣十方國  
以此使其無退轉  
住於生死不疲厭  
如是令其無退轉

十方世界無量刹  
為諸菩薩如是說  
最勝最上最第一  
勸諸菩薩說與人  
一切世間無與等  
為彼菩薩常稱讚  
佛是世間大力主  
令諸菩薩住是中  
無量無邊諸佛所  
常為諸佛所攝受  
所有寂靜諸三昧  
為彼菩薩如是說  
摧滅諸有生死輪  
一切世間無所著  
一切眾生墮惡道  
與作救護歸依處  
此是菩薩發心住  
如我所說教誨法  
第二治地住菩薩  
十方一切諸眾生  
利益大悲安樂心  
守護眾生同己心  
已住如是勝妙心  
常樂寂靜正思惟  
發言和悅離羸獷  
了達於義如法行  
此是初學菩提行

悉在其中作尊主  
以此令其不退轉  
甚深微妙清淨法  
如是教令離煩惱  
不可傾動摧伏處  
如是教令不退轉  
具足一切諸功德  
以此教為勝丈夫  
悉得往詣而親近  
如是教令不退轉  
悉皆演暢無有餘  
以此令其不退轉  
轉於清淨妙法輪  
為諸菩薩如是說  
無量重苦所纏迫  
為諸菩薩如是說  
一向志求無上道  
一切諸佛亦如是  
應當發起如是心  
願使悉順如來教  
安住憐愍攝受心  
師心及以導師心  
次令誦習求多聞  
親近一切善知識  
言必知時無所畏  
遠離愚迷心不動  
能行此行真佛子

我今說彼所應行  
第三菩薩修行住  
諸法無常苦及空  
一切諸法不可樂  
無所分別無真實  
次令觀察眾生界  
世界差別盡無餘  
十方世界及虛空  
欲界色界無色界  
觀察彼界各差別  
得如是教勤修行  
第四生貴住菩薩  
了達諸有無所有  
信佛堅固不可壞  
隨諸眾生悉了知  
世間剎土業及報  
佛子於法如是觀  
過去未來現在世  
了知積集及圓滿  
三世一切諸如來  
種種差別不可得  
如我稱揚讚歎者  
若能依法勤修行  
從此第五諸菩薩  
深入無量巧方便  
菩薩所修眾福德  
專心利益與安樂

如是佛子應勤學  
當依佛教勤觀察  
無有我人無動作  
無如名字無處所  
如是觀者名菩薩  
及以勸觀於法界  
於彼咸應勸觀察  
所有地水與火風  
悉勸觀察咸令盡  
及其體性咸究竟  
此則名為真佛子  
從諸聖教而出生  
超過彼法生法界  
觀法寂滅心安住  
體性虛妄無真實  
生死涅槃悉如是  
從佛親生名佛子  
其中所有諸佛法  
如是修學令究竟  
能隨觀察悉平等  
如是觀者達三世  
此是四住諸功德  
速成無上佛菩提  
說名具足方便住  
發生究竟功德業  
皆為救護諸羣生  
一向哀愍令度脫



為一切世除眾難  
一一調伏無所遺  
一切眾生無有邊  
及以不可稱量等  
此第五住真佛子  
一切功德大智尊  
第六正心圓滿住  
正念思惟離分別  
聞讚毀佛與佛法  
眾生有量若無量  
法界大小及成壞  
過去未來今現在  
一切諸法皆無相  
如幻如夢離分別  
第七不退轉菩薩  
若有若無出不出  
過去未來現在世  
佛智有盡或無盡  
一即是多多即一  
如是一切展轉成  
若法有相及無相  
種種差別互相屬  
第八菩薩童真住  
一切清淨無諸失  
知諸眾生心所樂  
及其所有一切法  
逮得速疾妙神通

引出諸有令歡喜  
皆令具德向涅槃  
無量無數不思議  
聽受如來如是法  
成就方便度眾生  
以如是法而開示  
於法自性無迷惑  
一切天人莫能動  
菩薩及以所行行  
有垢無垢難易度  
若有若無心不動  
諦念思惟恒決定  
無體無性空無實  
常樂聽聞如是義  
於佛及法菩薩行  
雖聞是說無退動  
一切諸佛有以無  
三世一相種種相  
文隨於義義隨文  
此不退人應為說  
若法有性及無性  
此人聞已得究竟  
身語意行皆具足  
隨意受生得自在  
種種意解各差別  
十方國土成壞相  
一切處中隨念往

於諸佛所聽聞法  
了知一切諸佛國  
超過佛土不可量  
阿僧祇法悉諮問  
言音善巧靡不充  
第九菩薩王子住  
煩惱現習靡不知  
諸法各異威儀別  
如其世俗第一義  
法王善巧安立處  
法王宮殿若趣入  
法王所有灌頂法  
宴寢宮室及歎譽  
如是為說靡不盡  
於此了知修正念  
第十灌頂真佛子  
十方無數諸世界  
住持往詣亦無餘  
開示眾生無有數  
發心調伏亦無邊  
一切法界咸觀察  
其中身及身所作  
三世佛土諸境界  
一切見者三世智  
法界無礙無邊智  
照耀世界住持智  
及知正覺無邊智

讚歎修行無懈怠  
震動加持亦觀察  
遊行世界無邊數  
所欲受身皆自在  
諸佛無數咸承事  
能見眾生受生別  
所行方便皆善了  
世界不同前欲際  
悉善了知無有餘  
隨其處所所有法  
及以於中所觀見  
神力加持無怯畏  
以此教詔法王子  
而令其心無所著  
一切諸佛現其前  
成滿最上第一法  
悉能震動光普照  
清淨莊嚴皆具足  
觀察知根悉能盡  
咸令趣向大菩提  
十方國土皆往詣  
神通變現難可測  
乃至王子無能了  
於諸佛法明了智  
充滿一切世界智  
了知眾生諸法智  
如來為說咸令盡

如是十住諸菩薩	皆從如來法化生
隨其所有功德行	一切天人莫能測
過去未來現在世	發心求佛無有邊
十方國土皆充滿	莫不當成一切智
一切國土無邊際	世界眾生法亦然
惑業心樂各差別	依彼而發菩提意
始求佛道一念心	世間眾生及二乘
斯等尚亦不能知	何況所餘功德行
十方所有諸世界	能以一毛悉稱舉
彼人能知此佛子	趣向如來智慧行
十方所有諸大海	悉以毛端滴令盡
彼人能知此佛子	一念所修功德行
一切世界抹為塵	悉能分別知其數
如是之人乃能見	此諸菩薩所行道
去來現在十方佛	一切獨覺及聲聞
悉以種種妙辯才	開示初發菩提心
發心功德不可量	充滿一切眾生界
眾智共說無能盡	何況所餘諸妙行

【論】第六明法慧承威說頌歎法分於此段中總有二百行頌以歎十住位中二百箇法門文自具足不煩釋也如灌頂住者如將淨水從頂而灌徧身而下如此位菩薩以法界智無中邊體等虛空界以對現一切眾生宜應現身一時等雨法雨無不灌注故故名灌頂住亦為登此位時十方諸佛手灌其頂亦名灌頂住。

大方廣佛新華嚴經合論卷第三十三

音切

奪

(徒活切)。

懈

(戒音)。

誠

(戒音)。

值

(直至切)。

劇

(渠力切)。

憐

(力延切)。

迫

(百音)。

隘

(鳥介切)。

暨

(其既切)。

纏

(直連切)。

誨

(呼績切)。

諮

(子思切)。

寢

(七稔切)。

獷

(古猛切)。

忻

(許斤切)。

愍

(敏音)。

掉

(徒弔切)。

貌

(兒同)劑(在細切)。

狹

(胡甲切)。

# 大方廣佛新華嚴經合論卷第三十四

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

## 梵行品第十六

【論】將釋此品約作三門分別一釋品名目二釋品來意三隨文釋義第一釋品名目者何故云梵行品梵者此云淨也云以其淨行利眾生故常居世間行一切行法化利眾生無行可得則無行不淨是故名為梵行也又約能問之主名曰正念無念之念名為正念隨行無念名為正念行念總無以斯益物名第一義天以天有慈名為天子又約能說之人名為法慧隨行無念名之為法以法簡情名之為慧起情乖理名無法慧達理情亡名為法慧今約能問之主所說法人及所說法總名淨行品品者均分理教義第二釋品來意者前品明住佛無所住之門故還行無行之行是故此品須來無住之住名為佛住無行之行利益無眾生之眾生名為淨行是故此品須來第三隨文釋義者科此一品經約作七門分別。

【經】爾時正念天子白法慧菩薩言佛子一切世界諸菩薩眾依如來教染衣出家云何而得梵行清淨從菩薩位逮於無上菩提之道。

【論】第一爾時已下三行經是正念天子所請分。

【經】法慧菩薩言佛子菩薩摩訶薩修梵行時應以十法而為所緣作意觀察所謂身身業語語業意意業佛法僧戒。

【論】第二法慧菩薩已下至佛法僧戒可兩行半經正舉十法以為所觀之緣分。

【經】應如是觀為身是梵行耶乃至戒是梵行耶若身是梵行者當知梵行則為非善則為非法則為渾濁則為臭惡則為不淨則為可厭則為違逆則為襍染則為死屍則為蟲聚若身業是梵行者梵行則是行住坐臥左右顧視屈伸俯仰若語是梵行者梵行則是音聲風息唇舌喉吻吐納抑縱高低清濁若語業是梵行者梵行則是起居問訊略說廣說喻說直說讚說毀說安立說隨俗說顯了說若意是梵行者梵行則應是覺是觀是分別是種種分別是憶念是種種憶念是思惟是種種思惟是幻術是眠夢若意業是梵行者當知梵行則是思想寒熱飢渴苦樂憂喜若佛是梵行者為色是佛耶受是佛耶想是佛耶行是佛耶識是佛耶為相是佛耶好是佛耶神通是佛耶業行是佛耶果報是佛耶若法是梵行者為寂滅是法耶涅槃是法耶不生是法耶不起是法耶不可說是法耶無分別是法耶無所行是法耶不合集是法耶不隨順是法耶無所得是法耶若僧是梵行者為預流向是僧耶預流果是僧耶一來向是僧耶一來果是僧耶不還向是僧耶不還果是僧耶阿羅漢向是僧耶阿羅漢果是僧耶三明是僧耶六通是僧耶若戒是梵行者為壇場是戒耶問清淨是戒耶教威儀是戒耶三說羯磨是戒耶和尚是戒耶阿闍梨是戒耶剃髮是戒耶著袈裟衣是戒耶乞食是戒耶正命是戒耶如是觀已。

【論】第三應如是觀已下至如是觀已有二十六行半經是正行觀法分。

【經】於身無所取於修無所著於法無所住過去已滅未來未至現在空寂無作者無受報者此世不移動彼世不改變此中何法名為梵行梵行從何處來誰之所有體為是誰由誰而作為是有為是無為是色為非色為是受為非受為是想為非想為

是行為非行為是識為非識如是觀察梵行法不可得故三世法皆空寂故意無取著故心無障礙故所行無二故方便自在故受無相法故觀無相法故知佛法平等故具一切佛法故如是名為清淨梵行。

【論】第四從於身無所取已下至名為清淨梵行於中可有十行經通觀三世及身受想行識佛法悉平等具足一切佛法分。

【經】復應修習十種法何者為十所謂處非處智過現未來業報智諸禪解脫三昧智諸根勝劣智種種解智種種界智一切至處道智天眼無礙智宿命無礙智永斷習氣智。

【論】第五復應修習十種法已下至永斷習氣智於中可三行半經正舉如來十種智力令修習分。

【經】於如來十力一一觀察一一力中有無量義悉應諮問聞已應起大慈悲心觀察眾生而不捨離思惟諸法無有休息行無上業不求果報。

【論】第六於如來十力已下至不求果報於中可三行經勸修十力有迷諮問并起大悲分。

【經】了知境界如幻如夢如影如響亦如變化若諸菩薩能與如是觀行相應於諸法中不生二解一切佛法疾得現前初發心時即得阿耨多羅三藐三菩提知一切法即心自性成就慧身不由他悟。

論第七了知境界已下可四行半經明了法如幻觀終獲益成佛分如是依如上觀行令身口意業佛法僧戒色受想行識身邊二見三世遠近總無又無能觀所觀心不沈不掉不生不滅任理無思如來十種智力因斯而現夫佛智非深只為迷心逐相情虧也智隱一體也智現非遙智現執障都亡十方廓然自在處塵不為小周空不為大窮其跡也十方無纖毫之縱興其用則不出剎那之夫身行徧周等虛空而無盡若存其有即一切剎海現色



像重重若置其無萬境不可窺其體以不思不惟而知眾法將不造不作而辦大功非生死知其志非苦樂移其性若非神之稱理者不可以情想知不可以滅心得以此如來設淨行之教觀法盡也始正法當興諸見亡也佛智方起是知見亡智應名初發心時便成正覺具足慧身不由他悟是故後學之士應法修行不可以逐境沈淪迷流永劫更欲解其上義慮將言豐障理以亂後學之心但如上所說之經多少自然恰中如一百四十願名淨行者是十信位中以願成世間知見萬法以為淨行此十住位中以行體無為無性名為淨行以此淨行用成智用自在此淨行品成十住中初發心之佛果亦為已後十行十迴向十地等作佛果故從此無性之行行清淨故一切諸行皆清淨故諸行淨則智慧淨智慧淨則其心淨其心淨則諸法淨諸法淨名法界淨法界淨即眾生淨眾生淨則佛國土淨行此法平等者名為淨行也。

### 初發心功德品第十七

【論】夫以初發心之士功德難量舉等虛空無以比其類磨盡剎塵無以酬其匹虛空但明無相之大一切剎塵但明形礙之廣焉能對其菩提心福智之境其智也於剎那之際滿十方現身如雲狀因陀羅網妙像相入光影重重各各以一言音普周法界說等眾生教門如雨灑眾生心得清涼樂爾其福也妙相莊嚴與華藏而同其體為初發心之際與十方諸佛等住無盡劫海在剎那之中延促相似如一小流入大海中與大海等以水體不別故如初發心菩薩纔入諸佛大智慧流中等佛功德故為初入與究竟時無延促又智慧一故為誓度眾生悉令成佛志願等故又如十方世界盡抹為塵一一塵中有無量佛剎無量眾生如菩提心大智慧身於一剎那際等一切剎塵供養諸佛教化眾生一時等

徧但以智慧力故法如是故智徧周故亦不作神通變化之想初發心菩薩志樂廣大與佛界眾生界等無限量故故今此品所歎初發菩提心以十種功德廣大難量無比不可喻於此佛果根本不動大智不思議法界乘而發心者如輪王太子初生之時具足王相如師子王之子威勢與父相似體不異故如初發菩提心菩薩初生如來智慧種性家時智慧所知不異佛故三世時劫無延促見不異佛故志樂廣大教化眾生不異佛故從初發心乘如來一切智乘不出剎那際成等正覺教化眾生不異佛故設於三乘順世情教說三祇劫而成佛者畢竟迴心入此一切智境界乘方得成佛如法華經即是所迴三乘入一切智境界之教如龍女一剎那際一生成佛者是也一切眾生總須悟如此法方得成佛不可取如來三乘中順世方便之言以法如是故如此品下文云初發心菩薩纔發心時即為十方一切諸佛所共稱歎即能說法教化調伏一切世界所有眾生乃至示現成佛等廣如此品下文所說此品之內長行總有四十段經意也頌有二百四十二行以歎初發心菩薩之功德其文如下將釋此品約作三門分別一釋品名目二釋品來意三隨文釋義第一釋品名目者此品名初發心功德品者創始發心見無古今名之為初無心智應名之為發身邊見盡名之為心不為而成大果名之為功但化利一切不忤來報自獲無邊妙相莊嚴故名之為德又福智徧周名之為功事無不達名之為德品脉均分教義第二釋品來意者前品既有淨行之功此品所明淨行之中無邊功德是故此品須來第三隨文釋義者復分二門第一長科經意第二隨文解脫第一長科經意者從初爾時已下至品末已來長科為四十段。

【經】爾時天帝釋白法慧菩薩言佛子菩薩初發菩提之心所得功德其量幾何。

【論】一爾時已下至其量幾何有一行半經是天帝請證發心功德分。

【經】法慧菩薩言此義甚深難說難知難分別難信解難證難行難通達難思惟難度量難趣入雖然我當承佛威神之力而為汝說。

【論】二法慧菩薩言已下至而為汝說可三行半經明初發心功德甚深十種難知許說分。

【經】佛子假使有人以一切樂具供養東方阿僧祇世界所有眾生經於一劫然後教令淨持五戒南西北方四維上下亦復如是佛子於汝意云何此人功德寧為多不天帝言佛子此人功德唯佛能知其餘一切無能量者。

【論】三佛子已下至無能量者可五行經明一人所供十方各一阿僧祇世界眾生并令淨持五戒且舉功德廣大難量分。

【經】法慧菩薩言佛子此人功德比菩薩初發心功德百分不及一千分不及一百千分不及一如是億分百億分千億分百千億分那由他億分百那由他億分千那由他億分百千那由他億分數分歌羅分算分喻分優波尼沙陀分亦不及一。

【論】四法慧菩薩已下至亦不及一有五行半經明將前所有廣多供養功德不可比對初發心功德無比近喻分正明將人所供養不可校量如歌羅分者是將多比少不如喻如折人身上毛作百分將前人所作功德不如初發心菩薩百分毛中一分毛許功德又云優波尼沙陀分者謂少許相近類之無限善根不可將有限比對餘如文自明。

【經】佛子且置此喻假使有人以一切樂具供養十方十阿僧祇世界所有眾生經於百劫然後教令修十善道如是供養經於千劫教住四禪經於百千劫教住四無量心經於億劫教住四無色定經於百億劫教住須陀洹果經於千億劫教住斯陀含果

經於百千億劫教住阿那含果經於那由他億劫教住阿羅漢果  
經於百千那由他億劫教住辟支佛道佛子於意云何是人功德  
寧為多不天帝言佛子此人功德唯佛能知。

【論】五佛子已下至唯佛能知有十行經明且舉如上功德  
廣大分云教住十善道者身三口四意三是欲界生天善上者出  
世善云四禪色界業也初禪滅憂二禪滅苦三禪滅喜四禪唯寂  
靜云教住四無量心此是有為中慈悲喜捨云教住四無色定此  
是無色界定已上是三界中善業云教住須陀洹果謂初斷見惑  
捨異生性初獲聖性入聖行流故故名入流云教住斯陀含果此  
云一來謂此聖者雖斷欲界六品惑然為有餘三品未斷令此聖  
者一度來欲界生故名一來果云教住阿那含果此云不還謂斷  
欲界九品惑盡從此生色界更不來欲界受生故名不來此十使  
中見道疑未能明了不入羅漢果如十使煩惱一身見二邊見三  
見取四戒取五邪見已前五為利使已後五鈍使見諦斷六貪七  
瞋八癡九慢十疑此五鈍使能迷隨行之事此之十使前五利使  
須陀洹見諦之後伏之不起後五鈍使薄貪瞋癡斯陀含斷欲界  
六種惑非無色界貪於瞋癡慢三種微而且薄現行不生非種無  
故為上二界報且無瞋為修定伏而現行不起為須斯二果有厭  
患而不令增長常求出世之心以此不成三界沈淪種子阿那含  
厭令永息唯有見道疑以見道不分明不能頓超三界業果阿羅  
漢為見道無疑三界業果一時盡故望前三果設斷九種煩惱唯  
有疑在不得名為斷煩惱為見諦無明未明總名厭伏不得名斷  
又羅漢辟支佛但忻出世淨土菩薩及空觀菩薩為但忻出世行  
六波羅蜜總是折伏現行無明不得名為永斷煩惱為且以空觀  
折伏無明不了無明從本已來是不動智佛為不了根本以空折  
伏使令不起乃至十地但得意生身等不名如來一切種智生以  
作十真如等觀斷十種羳重不了無明本是如來根本智故大用

恒寂故一乘佛果教中依佛果發心初發心時達根本無明是根本無分別智成差別智大用法門初心之上圓滿一切諸佛共所乘門名乘一切智乘若智悲願行毫釐不似佛信心亦不成何況住佛所住生在如來一切種智家生為佛真子具諸佛事以智不異願行平等大悲不異無限境界不異過去未來劫差別與一念不異應如是定慧照之可見此是名依佛菩薩正善知識依根本智發心如下文纔發心菩薩能十方示身成佛者為初發心時乘如來不思議一切智乘得佛種智生如來法界之家乘佛一分之智慧大慈悲勢分即能如是示身成佛如下頌云菩薩於佛十力中雖未證得亦無疑菩薩於一毛孔中普現十方無量刹如是總明初發心菩薩之德為得如來一分智力勢分如是如輪王太子權統王政亦得自在一分與父王相似。

【經】法慧菩薩言佛子此人功德比菩薩初發心功德百分不及一千分不及一百千分不及一乃至優波尼沙陀分亦不及一。

【論】六法慧菩薩言已下至亦不及一可兩行半經明前功德不可比對初發心功德喻分。

【經】何以故佛子一切諸佛初發心時不但為以一切樂具供養十方十阿僧祇世界所有眾生經於百劫乃至百千那由他億劫故發菩提心不但為教爾所眾生令修五戒十善業道教住四禪四無量心四無色定教得須陀洹果斯陀含果阿那含果阿羅漢果辟支佛道故發菩提心為令如來種性不斷故為充徧一切世界故為度脫一切世界眾生故為悉知一切世界成壞故為悉知一切世界中眾生垢淨故為悉知一切世界自性清淨故為悉知一切眾生心樂煩惱習氣故為悉知一切眾生死此生彼故為悉知一切眾生諸根方便故為悉知一切眾生心行故為悉知

一切眾生三世智故為悉知一切佛境界平等故發於無上菩提之心。

【論】七何以故已下至無上菩提之心有十四行半經明初發心菩薩為起無限心教化一切眾生不斷佛種性分。

【經】佛子復置此喻假使有人於一念頃能過東方阿僧祇世界念念如是盡阿僧祇劫此諸世界無有能得知其邊際有第二人於一念頃能過前人阿僧祇劫所過世界如是亦盡阿僧祇劫次第展轉乃至第十南西北方四維上下亦復如是佛子此十方中凡有百人一一如是過諸世界是諸世界可知邊際。

【論】八佛子復置此喻已下至可知邊際有七行經明且舉速行邊際廣大可知喻分。

【經】菩薩初發阿耨多羅三藐三菩提心所有善根無有能得知其際者何以故佛子菩薩不齊限但為往爾所世界得了知故發菩提心為了知十方世界故發菩提心所謂欲了知妙世界即是麤世界麤世界即是妙世界仰世界即是覆世界覆世界即是仰世界小世界即是大世界大世界即是小世界廣世界即是狹世界狹世界即是廣世界一世界即是不可說世界不可說世界即是一世界不可說世界入一世界一世界入不可說世界穢世界即是淨世界淨世界即是穢世界欲知一毛端中一切世界差別性一切世界中一毛端一體性欲知一世界中出生一切世界欲知一切世界無體性欲以一念心盡知一切廣大世界而無障礙故發阿耨多羅三藐三菩提心。

【論】九菩薩初發心已下至三藐三菩提心可十五行經明初發心菩薩所知世界境界無限難知分。

【經】佛子復置此喻假使有人於一念頃能知東方阿僧祇世界成壞劫數念念如是盡阿僧祇劫此諸劫數無有能得知其邊際有第二人於一念頃能知前人阿僧祇劫所知劫數如是廣

說乃至第十南西北方四維上下亦復如是佛子此十方阿僧祇世界成壞劫數可知邊際。

【論】十佛子復置此喻已下至可知邊際可六行半經明且舉速知劫數成壞廣多可知分。

【經】菩薩初發阿耨多羅三藐三菩提心功德善根無有能得知其際者何以故菩薩不齊限但為知爾所世界成壞劫數故發阿耨多羅三藐三菩提心為悉知一切世界成壞劫盡無餘故發阿耨多羅三藐三菩提心所謂知長劫與短劫平等短劫與長劫平等一劫與無數劫平等無數劫與一劫平等有佛劫與無佛劫平等無佛劫與有佛劫平等一佛劫中有不可說佛不可說佛劫中有一佛有量劫與無量劫平等無量劫與有量劫平等有盡劫與無盡劫平等無盡劫與有盡劫平等不可說劫與一念平等一念與不可說劫平等一切劫入非劫非劫入一切劫欲於一念中盡知前際後際及現在一切世界成壞劫故發阿耨多羅三藐三菩提心是名初發心大誓莊嚴了知一切劫神通智。

【論】十一菩薩初發心已下至了知一切劫神通智可十六行經明初發心菩薩了劫成壞難知分。

【經】佛子復置此喻假使有人於一念頃能知東方阿僧祇世界所有眾生種種差別解念念如是盡阿僧祇劫有第二人於一念頃能知前人阿僧祇劫所知眾生諸解差別如是亦盡阿僧祇劫次第展轉乃至第十南西北方四維上下亦復如是佛子此十方眾生種種差別解可知邊際。

【論】十二復置此喻已下至可知邊際可六行經明且舉所解廣大猶可能知分。

【經】菩薩初發阿耨多羅三藐三菩提心功德善根無有能得知其際者何以故佛子菩薩不齊限但為知爾所眾生解故發阿耨多羅三藐三菩提心為盡知一切世界所有眾生種種差別

解故發阿耨多羅三藐三菩提心所謂欲知一切差別解無邊故一眾生解無數眾生解平等故欲得不可說差別解方便智光明故欲悉知眾生海各各差別解盡無餘故欲悉知過現未來善不善種種無量解故欲悉知相似解不相似解故欲悉知一切解即是一解一解即是一切解故欲得如來解力故欲悉知有上解無上解有餘解無餘解等解不等解差別故欲悉知有依解無依解共解不共解有邊解無邊解差別解無差別解善解不善解世間解出世間解差別故欲於一切妙解大解無量解正位解中得如來解脫無障礙智故欲以無量方便悉知十方一切眾生界一一眾生淨解染解廣解略解細解麤解盡無餘故欲悉知深密解方便解分別解自然解隨因所起解隨緣所起解一切解網悉無餘故發阿耨多羅三藐三菩提心。

【論】十三菩薩初發心已下至三藐三菩提心可二十行半經明初發心菩薩知解廣大難知分。

【經】佛子復置此喻假使有人於一念頃能知東方無數世界一切眾生諸根差別念念如是經阿僧祇劫有第二人於一念頃能知前人阿僧祇劫念念所知諸根差別如是廣說乃至第十南西北方四維上下亦復如是佛子此十方世界所有眾生諸根差別可知邊際。

【論】十四佛子復置此喻已下至可知邊際可六行經明且舉知眾生根廣多猶能可知分。

【經】菩薩初發阿耨多羅三藐三菩提心功德善根無有能得知其際者何以故菩薩不齊限但為知爾所世界眾生根故發阿耨多羅三藐三菩提心為盡知一切世界中一切眾生根種種差別廣說乃至欲盡知一切諸根網故發阿耨多羅三藐三菩提心。



【論】十五菩薩初發心已下至三藐三菩提心可五行半經明初發心菩薩善知眾生根性廣大難量分。

【經】佛子復置此喻假使有人於一念頃能知東方無數世界所有眾生種種欲樂念念如是盡阿僧祇劫次第廣說乃至第十南西北方四維上下亦復如是此十方眾生所有欲樂可知邊際。

【論】十六佛子復置此喻已下至可知邊際可四行經明且舉所欲樂廣大猶可知分。

【經】菩薩初發阿耨多羅三藐三菩提心功德善根無有能得知其際者何以故佛子菩薩不齊限但為知爾所眾生欲樂故發阿耨多羅三藐三菩提心為盡知一切世界所有眾生種種欲樂廣說乃至欲盡知一切欲樂網故發阿耨多羅三藐三菩提心。

【論】十七菩薩初發心已下至三藐三菩提心可六行經明初心菩薩所知一切眾生欲樂廣大難知分。

【經】佛子復置此喻假使有人於一念頃能知東方無數世界所有眾生種種方便如是廣說乃至第十南西北方四維上下亦復如是此十方眾生種種方便可知邊際。

【論】十八佛子復置此喻已下至可知邊際可四行經明且舉所知眾生方便廣大猶可知分。

【經】菩薩初發阿耨多羅三藐三菩提心功德善根無有能得知其際者何以故佛子菩薩不齊限但為知爾所世界眾生種種方便故發阿耨多羅三藐三菩提心為盡知一切世界所有眾生種種方便廣說乃至欲盡知一切方便網故發阿耨多羅三藐三菩提心。

【論】十九菩薩初發心已下至三菩提心可六行經明初心菩薩善知一切眾生種種方便廣大難知分。

【經】佛子復置此喻假使有人於一念頃能知東方無數世界所有眾生種種差別心廣說乃至此十方世界所有眾生種種差別心可知邊際。

【論】二十佛子復置此喻已下至可知邊際可三行經且舉所有一切眾生心廣大猶可知分。

【經】菩薩初發阿耨多羅三藐三菩提心功德善根無有能得知其際者何以故佛子菩薩不齊限但為知爾所眾生心故發阿耨多羅三藐三菩提心為悉知盡法界虛空界無邊眾生種種心乃至欲盡知一切心網故發阿耨多羅三藐三菩提心。

【論】二十一菩薩初發心已下至三菩提心可五行半經明初發心菩薩知一切眾生差別心廣大難知分。

【經】佛子復置此喻假使有人於一念頃能知東方無數世界所有眾生種種差別業廣說乃至此十方眾生種種差別業可知邊際菩薩初發阿耨多羅三藐三菩提心善根邊際不可得知。

【論】二十二佛子復置此喻已下至不可得知有四行經明且舉所有眾生業廣大猶可知分。

【經】何以故佛子菩薩不齊限但為知爾所眾生業故發阿耨多羅三藐三菩提心欲悉知三世一切眾生業乃至欲悉知一切業網故發阿耨多羅三藐三菩提心。

【論】二十三何以故已下至三菩提心可三行半經明初心菩薩知眾生差別業廣大難知分。

【經】佛子復置此喻假使有人於一念頃能知東方無數世界所有眾生種種煩惱念念如是盡阿僧祇劫此諸煩惱種種差別無有能得知其邊際有第二人於一念頃能知前人阿僧祇劫所知眾生煩惱差別如是復盡阿僧祇劫次第廣說乃至第十南西北方四維上下亦復如是佛子此十方眾生煩惱差別可知邊際。

【論】二十四佛子復置此喻已下至可知邊際有七行經且舉如眾生煩惱廣大猶可能知分。

【經】菩薩初發阿耨多羅三藐三菩提心善根邊際不可得知何以故佛子菩薩不齊限但為知爾所世界眾生煩惱故發阿耨多羅三藐三菩提心為盡知一切世界所有眾生煩惱差別故發阿耨多羅三藐三菩提心所謂欲盡知輕煩惱重煩惱眠煩惱起煩惱一一眾生無量煩惱種種差別種種覺觀淨治一切諸襍染故欲盡知依無明煩惱愛相應煩惱斷一切諸有趣煩惱結故欲盡知貪分煩惱瞋分煩惱癡分煩惱等分煩惱斷一切煩惱根本故欲悉知我煩惱我所煩惱我慢煩惱覺悟一切煩惱盡無餘故欲悉知從顛倒分別生根本煩惱隨煩惱因身見生六十二見調伏一切煩惱故欲悉知蓋煩惱障煩惱發大悲救護心斷一切煩惱網令一切智性清淨故發阿耨多羅三藐三菩提心。

【論】二十五菩薩初發心已下至三藐三菩提心有十六行經明初心菩薩所知一切眾生煩惱廣大難知分。

【經】佛子復置此喻假使有人於一念頃以諸種種上味飲食香華衣服幢幡傘蓋及僧伽藍上妙宮殿寶帳網幔種種莊嚴師子之座及眾妙寶供養東方無數諸佛及無數世界所有眾生恭敬尊重禮拜讚歎曲躬瞻仰相續不絕經無數劫又歡彼眾生悉令如是供養於佛至佛滅後各為起塔其塔高廣無數世界眾寶所成種種莊嚴一一塔中各有無數如來形像光明徧照無量世界經無數劫南西北方四維上下亦復如是。

【論】二十六佛子復置此喻已下至亦復如是可九行半經且明供養廣大難知猶可知分。

【經】佛子於汝意云何此人功德寧為多不天帝言是人功德唯佛乃知餘無能測佛子此人功德比菩薩初發心功德百分

不及一千分不及一百千分不及一乃至優波尼沙陀分亦不及一。

【論】二十七佛子於汝意云何已下至亦不及一可四行半經明初發心供養廣大難知分。

【經】佛子復置此喻假使復有第二人於一念中能作前人及無數世界所有眾生無數劫中供養之事念念如是以無量種供養之具供養無量諸佛如來及無量世界所有眾生經無量劫其第三人乃至第十人皆亦如是於一念中能作前人所有供養念念如是以無邊無等不可數不可稱不可思不可量不可說不可說不可說供養之具供養無邊乃至不可說不可說諸佛及爾許世界所有眾生經無邊乃至不可說不可說劫至佛滅後各為起塔其塔高廣乃至住劫亦復如是。

【論】二十八佛子復置是喻至亦復如是有十行半經明且舉供養及起塔廣多猶可知分。

【經】佛子此前功德比菩薩初發心功德百分不及一千分不及一百千分不及一乃至優波尼沙陀分亦不及一何以故佛子菩薩摩訶薩不齊限但為供養爾所佛故發阿耨多羅三藐三菩提心為供養盡法界虛空界不可說不可說十方無量去來現在所有諸佛故發阿耨多羅三藐三菩提心發是心已。

【論】二十九佛子此前功德已下至發是心已有七行經明初心菩薩供養功德廣大難知分次直就法說分。

【經】能知前際一切諸佛始成正覺及般涅槃能信後際一切諸佛所有善根能知現在一切諸佛所有智慧彼諸佛所有功德此菩薩能信能受能修能得能知能證能成就能與諸佛平等一性。

【論】三十能知前際一切諸佛已下至能與諸佛平等一性可四行經是初發心已能知三世諸佛成佛及涅槃智慧平等分攝佛功德分。

【經】何以故此菩薩為不斷一切如來種性故發心為充徧一切世界故發心為度脫一切世界眾生故發心為悉知一切世界成壞故發心為悉知一切眾生垢淨故發心為悉知一切世界三有清淨故發心為悉知一切眾生心樂煩惱習氣故發心為悉知一切眾生死此生彼故發心為悉知一切眾生諸根方便故發心為悉知一切眾生心行故發心為悉知一切眾生三世智故發心。

【論】三十一何以故已下至三世智故發心可九行經明菩薩初發心志意所求甚深深廣分。

【經】以發心故常為三世一切諸佛之所憶念當得三世一切諸佛無上菩提即為三世一切諸佛與其妙法即與三世一切諸佛體性平等已修三世一切諸佛助道之法成就三世一切諸佛力無所畏莊嚴三世一切諸佛不共佛法悉得法界一切諸佛說法智慧。

【論】三十二以發心故已下至說法智慧有六行經明菩薩發心已得三世一切諸佛憶念與法及自力昇進分得果佛因佛分。

【經】何以故以是發心當得佛故應如此人即與三世諸佛同等即與三世諸佛如來境界平等即與三世諸佛如來功德平等得如來一身無量身究竟平等真實智慧纔發心時即為十方一切諸佛所共稱歎即能說法教化調伏一切世界所有眾生即能震動一切世界即能光照一切世界即能息滅一切世界諸惡道苦即能嚴淨一切國土即能於一切世界中示現成佛即能令

一切眾生皆得歡喜即能入一切法界性即能持一切佛種性即能得一切佛智慧光明。

【論】三十三何以故已下至智慧光明有十行半經明纔初發心菩薩成佛利生同三世諸佛分化用分無著分。

【經】此初發心菩薩不於三世少有所得所謂若諸佛若諸佛法若菩薩若菩薩法若獨覺若獨覺法若聲聞若聲聞法若世間若世間法若出世間若出世間法若眾生若眾生法唯求一切智於諸法界心無所著。

【論】三十四此初發心菩薩已下至心無所著有四行半經明初發心菩薩志樂所知世間出世間無限分瑞分。

#### 大方廣佛新華嚴經合論卷第三十四

音切

屍

(式之切)。

蟲

(直弓切)。

視

(是音)。

顧

(古悟切)。

矢

(式視切)。

喉

(侯音)。

吻

(武粉切)。

抑

(於力切)。

訊

(信音)。

預

(羊洳切)。

羯

(揭音)。

剃

(他計切)。

髮

(發音)。

傘

(蘇早切)。

纚

(才音)。

頃

(去頸切)。

窺

(去隨切)。

釐

(里之切)。

恰

(苦洽切)。

廓

(苦郭切)。

匹

(疋音)。



# 大方廣佛新華嚴經合論卷第三十五

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

## 初發心功德品第十七之餘

【經】爾時佛神力故十方各一萬佛刹微塵數世界六種震動所謂動徧動等徧動起徧起等徧起踊徧踊等徧踊震徧震等徧震吼徧吼等徧吼擊徧擊等徧擊。

【論】三十五爾時佛神力已下至等徧擊有三行半經明大地震動分。

【經】兩眾天華天香天末香天華鬘天衣天寶天莊嚴具作天妓樂放天光明及天音聲。

【論】三十六天雨眾華已下至及天音聲有兩行經明諸天興供分證成分如動地興供明法威力亦明大眾法悅心悅地動明心境體無二故境由心現故。

【經】是時十方各過十佛刹微塵數世界外有萬佛刹微塵數佛同名法慧各現其身法慧菩薩前作如是言善哉善哉法慧汝於今者能說此法我等十方各萬佛刹微塵數佛亦說是法一切諸佛悉如是說。

【論】三十七是時十方已下至悉如是說有四行半經明十方同號佛來現其前歎譽許可法同分如十方各過萬佛刹微塵數佛同名法慧來現其前者為明與十方諸佛智慧合故萬佛刹塵者明昇進修行啟迷悟法之量十信十住百十行千總是明昇進見諦解迷悟法之名。

【經】汝說此法時有萬佛刹微塵數菩薩發菩提心我等今者悉授其記於當來世過千不可說無邊劫同一劫中而得作佛出興於世皆號清淨心如來所住世界各各差別我等悉當護持此法令未來世一切菩薩未曾聞者皆悉得聞。

【論】三十八汝說此法時已下至皆悉得聞有五行經明說此法時十方各過萬佛刹塵菩薩發心授記分如萬佛刹微塵數菩薩發心授過千不可說劫成佛之記皆同號之為清淨心者亦明達如是千不可說劫量法門總清淨故故佛號清淨心非是實有如情所見長遠之劫也總明當位隨迷悟法之名不是存其劫量之說如妄情所見也自此已下直至品末如文自具如文稱歎。

【經】如此娑婆世界四天下須彌頂上說如是法令諸眾生聞已受化如是十方百千億那由他無數無量無邊無等不可數不可稱不可思不可量不可說盡法界虛空界諸世界中亦說此法教化眾生其說法者同名法慧悉以佛神力故世尊本願力故為欲顯示佛法故為以智光普照故為欲開闡實義故為令證得法性故為令眾會悉歡喜故為欲開示佛法因故為得一切佛平等故為了法界無有二故說如是法。

【論】三十九如此娑婆世界已下至說如是法有九行半經明十方所說法人及法門一時同說分。

【經】爾時法慧菩薩普觀盡虛空界十方國土一切眾會欲悉成就諸眾生故欲悉淨治諸業果報故欲悉開顯清淨法界故欲悉拔除襍染根本故欲悉增長廣大信解故欲悉令知無量眾生根故欲悉令知三世法平等故欲悉令觀察涅槃界故欲增長自清淨善根故承佛威力即說頌言。

【論】四十爾時法慧已下至說頌有六行半經明法慧菩薩觀欲所緣之法說頌稱歎分已下頌文有二百四十二行四行一頌其頌有六十段頌都計有二百四十行末後兩行頌總結頌意

歎勸發心初一百六十八行是總都歎佛果已來五位及信等諸法明初發心者志樂智德總含一切諸佛智德體用始成一念初發心菩薩位也方明初發心境與心不二若志樂毫釐不似如來所修法身悲智願行者不名初發心菩薩故。

【經】

為利世間發大心	其心普徧於十方
眾生國土三世法	佛及菩薩最勝海
究竟虛空等法界	所有一切諸世間
如諸佛法皆往詣	如是發心無退轉
慈念眾生無暫捨	離諸惱害普饒益
光明照世為所歸	十方護念難思議
十方國土悉趣入	一切色形皆示現
如佛福智廣無邊	隨順修因無所著
有剎仰住或傍覆	麤妙廣大無量種
菩薩一發最上心	悉能往詣皆無礙
菩薩勝行不可說	皆勤修習無所住
見一切佛常欣樂	普入於其深法海
哀愍五趣諸羣生	令除垢穢普清淨
紹隆佛種不斷絕	摧滅魔宮無有餘
已住如來平等性	善修微妙方便道
於佛境界起信心	得佛灌頂心無著
兩足尊所念報恩	心如金剛不可沮
於佛所行能照了	自然修習菩提行
諸趣差別想無量	業果及心亦非一
乃至根性種種殊	一發大心悉明見
其心廣大等法界	無依無變如虛空
趣向佛智無所取	諦了實際離分別

知眾生心無生想  
雖普分別無分別  
無量諸佛妙法藏  
眾生根行靡不知  
清淨大願恒相應  
人天見者無厭足  
其心清淨無所依  
如是思惟無量劫  
其心堅固難制沮  
志求妙道除蒙惑  
知語言法皆寂滅  
諸佛境界悉順觀  
菩薩始發廣大心  
法門無量不可說  
大悲廣度最無比  
而於眾生不分別  
十方眾生悉慰安  
恒以淨心不異語  
過去所有皆憶念  
十方世界普入中  
菩薩具足妙智光  
一切迷惑皆除斷  
魔王宮殿悉摧破  
離諸分別心不動  
三世疑網悉已除  
以信得成不動智  
為令眾生得出離

了達諸法無法想  
億那由刹皆往詣  
隨順觀察悉能入  
到如是處如世尊  
樂供如來不退轉  
常為諸佛所護念  
雖觀深法而不取  
於三世中無所著  
趣佛菩提無障礙  
周行法界不告勞  
但入真如絕異解  
達於三世心無礙  
即能徧往十方刹  
智光普照皆明了  
慈心普徧等虛空  
如是清淨遊於世  
一切所作皆真實  
常為諸佛共加護  
未來一切悉分別  
為度眾生令出離  
善了因緣無有疑  
如是而遊於法界  
眾生翳膜咸除滅  
善了如來之境界  
於如來所起淨信  
智清淨故解真實  
盡於後際普饒益

長時勤苦心無厭  
福智無量皆具足  
及諸業行無不見  
了知一切空無我  
以一大悲微妙音  
放大光明種種色  
光中菩薩坐蓮華  
於一毛端現眾剎  
眾會智慧各不同  
十方世界不可說  
利益眾生供養佛  
於諸如來作父想  
智慧善巧通法藏  
隨順思惟說法界  
智雖善入無處所  
三世諸佛家中生  
普為羣生現眾色  
或現始修殊勝行  
或現樹下成菩提  
菩薩所住希有法  
身語意想皆已除  
菩薩所得諸佛法  
智入實際心無礙  
此於世間無與等  
雖未具足一切智  
已住究竟一乘道  
善知眾生時非時

乃至地獄亦安受  
眾生根欲悉了知  
如其所樂為說法  
慈念眾生恒不捨  
普入世間而演說  
普照眾生除黑闇  
為眾闡揚清淨法  
諸大菩薩皆充滿  
悉能明了眾生心  
一念周行無不盡  
於諸佛所問深義  
為利眾生修覺行  
入深智處無所著  
經無量劫不可盡  
無有疲厭無所著  
證得如來妙法身  
譬如幻師無不作  
或現初生及出家  
或為眾生示涅槃  
唯佛境界非二乘  
種種隨宜悉能現  
眾生思惟發狂亂  
普現如來自在力  
何況復增殊勝行  
已獲如來自在力  
深入微妙最上法  
為利益故現神通

分身徧滿一切刹  
譬如龍王起大雲  
觀察眾生如幻夢  
大悲哀愍咸救拔  
佛力無量此亦然  
為令眾生得解脫  
種種思惟妙功德  
於諸勝行恒不捨  
一身示現無量身  
其心清淨無分別  
於諸世間不分別  
雖觀諸法而不取  
一切世間唯是想  
知想境界險且深  
譬如幻師自在力  
身徧法界及虛空  
能所分別二俱離  
若縛若解智悉忘  
一切世間唯想力  
思惟諸法亦復然  
能入過去畢前際  
能入現在一切處  
隨順涅槃寂滅法  
心如實際無與等  
修諸勝行無退怯  
佛及菩薩與世間  
欲得最勝第一道

放淨光明除世闇  
普雨妙雨悉充洽  
以業力故常流轉  
為說無為淨法性  
譬如虛空無有邊  
億劫勤修而不倦  
善修無上第一業  
專念生成一切智  
一切世界悉周徧  
一念難思力如是  
於一切法無妄想  
恒救眾生無所度  
於中種種各差別  
為現神通而救脫  
菩薩神變亦如是  
隨眾生心靡不見  
襍染清淨無所取  
但願普與眾生樂  
以智而入心無畏  
三世推求不可得  
能入未來畢後際  
常勤觀察無所有  
住於無諍無所依  
專向菩提永不退  
安住菩提不動搖  
盡於法界皆明了  
為一切智解脫王

應當速發菩提心  
趣向菩提心清淨  
為利眾生故稱述  
無量世界盡為塵  
其中諸佛皆無量  
善知眾生無生想  
於諸世界心無礙  
其心廣大如虛空  
一切疑惑皆除滅  
十方無量諸國土  
了達世間眾苦法  
無量難思諸佛所  
常為上首問如來  
心常憶念十方佛  
恒勸眾生種善根  
一切趣生三有處  
所有習性諸根解  
眾生心樂悉了知  
於諸染淨皆通達  
無量無數諸三昧  
於中想智及所緣  
菩薩獲此廣大智  
為欲利益諸羣生  
善知世間長短劫  
國土各別性平等  
普詣十方諸世界  
嚴淨國土悉無餘

永盡諸漏利羣生  
功德廣大不可說  
汝等諸賢應善聽  
一一塵中無量刹  
悉能明見無所取  
善知言語無語想  
悉善了知無所著  
於三世事悉明達  
正觀佛法無所取  
一念往詣心無著  
悉住無生真實際  
悉往彼會而覲謁  
菩薩所修諸願行  
而無所依無所取  
莊嚴國土令清淨  
以無礙眼咸觀察  
無量無邊悉明見  
如是隨宜為說法  
令彼修治入於道  
菩薩一念皆能入  
悉善了知得自在  
疾向菩提無所礙  
處處宣揚大人法  
一月半月及晝夜  
常勤觀察不放逸  
而於方處無所取  
亦不曾生淨分別

眾生是處若非處  
隨順思惟入佛力  
一切世間種種性  
利根及與中下根  
淨與不淨種種解  
一切眾生至處行  
禪定解脫諸三昧  
及以先世苦樂殊  
眾生業惑續諸趣  
種種漏法永不生  
如來煩惱皆除盡  
菩薩於佛十力中  
菩薩於一毛孔中  
或有裸染或清淨  
一微塵中無量剎  
諸剎各別無裸亂  
於一毛孔見十方  
無有一處空無佛  
於毛孔中見佛剎  
三世六趣各不同  
如是大智諸菩薩  
於佛所住順思惟  
菩薩分身無量億  
神通變現勝無比  
無量佛所皆讚仰  
見佛聞法勤修行  
已獲如來勝三昧

及以諸業感報別  
於此一切悉了知  
種種所行住三有  
如是一切咸觀察  
勝劣及中悉明見  
三有相續皆能說  
染淨因起各不同  
淨修佛力咸能見  
斷此諸趣得寂滅  
并其習種悉了知  
大智光明照於世  
雖未證得亦無疑  
普現十方無量剎  
種種業作皆能了  
無量諸佛及佛子  
如一一切悉明見  
盡虛空界諸世間  
如是佛剎悉清淨  
復見一切諸眾生  
晝夜月時有縛解  
專心趣向法王位  
而獲無邊大歡喜  
供養一切諸如來  
佛所行處皆能住  
所有法藏悉耽味  
如飲甘露心歡喜  
善入諸法智增長



信心不動如須彌	普作羣生功德藏
慈心廣大徧眾生	悉願疾成一切智
而恒無著無依處	離諸煩惱得自在
哀愍眾生廣大智	普攝一切同於己
知空無相無真實	而行其心不懈退
菩薩發心功德量	億劫稱揚不可盡
以出一切諸如來	獨覺聲聞安樂故
十方國土諸眾生	皆悉施安無量劫
勸持五戒及十善	四禪四等諸定處
復於多劫施安樂	令斷諸惑成羅漢
彼諸福聚雖無量	不與發心功德比

【論】以此初頌有一百六十八行且總歎信等六位因果及如來智德總歎令初發心者法之相似。

【經】

又教億眾成緣覺	獲無諍行微妙道
以彼而校菩提心	算數譬喻無能及
一念能過塵數刹	如是經於無量劫
此諸刹數尚可量	發心功德不可知
過去未來及現在	所有劫數無邊量
此諸劫數猶可知	發心功德無能測
以菩提心徧十方	所有分別靡不知
一念三世悉明達	利益無量眾生故
十方世界諸眾生	欲解方便意所行
及以虛空際可測	發心功德難知量
菩薩志願等十方	慈心普洽諸羣生
悉使修成佛功德	是故其力無邊際
眾生欲解心所樂	諸根方便行各別

於一念中悉了知  
一切眾生諸惑業  
此諸邊際尚可知  
發心能離業煩惱  
業惑既離相續斷  
一念供養無邊佛  
悉以香華及妙鬘  
美食珍座經行處  
毗盧遮那妙寶珠  
念念如是持供養  
其人福聚雖復多  
所說種種眾譬喻  
以諸三世人中尊  
發心無礙無齊限  
一切智智誓必成  
發心廣大等虛空  
所行普徧如無異  
一切法門無不入  
一切智境咸通達  
一切能捨恒相續  
具足無上大功德  
入深禪定恒思惟  
此是菩薩最勝地  
三世一切諸如來  
悉以三昧陀羅尼  
十方眾生無有量  
發心無量過於彼

一切智智心同等  
三有相續無暫斷  
發心功德難思議  
供養一切諸如來  
普於三世得解脫  
亦供無數諸眾生  
寶幢幡蓋上衣服  
種種宮殿悉嚴好  
如意摩尼發光曜  
經無量劫不可說  
不及發心功德大  
無有能及菩提心  
皆從發心而得生  
欲求其量不可得  
所有眾生皆永度  
生諸功德同法界  
永離眾著佛平等  
一切國土悉能往  
一切功德皆成就  
淨諸戒品無所著  
常勤精進不退轉  
廣大智慧共相應  
出生一切普賢道  
靡不護念初發心  
神通變化共莊嚴  
世界虛空亦如是  
是故能生一切佛

菩提心是十力本  
十八不共亦復然  
諸佛色相莊嚴身  
智慧無著所應供  
一切獨覺聲聞乘  
及無色界諸三昧  
一切人天自在樂  
進定根力等眾樂  
以因發起廣大心  
勸諸眾生行正行  
住佛無礙實義智  
能令無量諸眾生  
智慧光明如淨日  
功德常盈譬巨海  
普發無邊功德願  
盡未來際依願行  
無量大願難思議  
空無相願無依處  
了法自性如虛空  
法門無數不可說  
十方世界諸如來  
此心無量德所嚴  
如眾生數爾許劫  
以住如來廣大家  
欲知一切諸佛法  
此心功德中最勝  
眾生心行可數知

亦為四辯無畏本  
莫不皆從發心得  
及以平等妙法身  
悉以發心而得有  
色界諸禪三昧樂  
悉以發心作其本  
及以諸趣種種樂  
靡不皆由初發心  
則能修行六種度  
於三界中受安樂  
所有妙業咸開闡  
悉斷惑業向涅槃  
眾行具足猶滿月  
無垢無礙同虛空  
悉與一切眾生樂  
常勤修習度眾生  
願令眾生悉清淨  
以願力故皆明顯  
一切寂滅悉平等  
為眾生說無所著  
悉共讚歎初發心  
能到彼岸同於佛  
說其功德不可盡  
三界諸法無能喻  
宜應速發菩提心  
必得如來無礙智  
國土微塵亦復然

虛空邊際乍可量	發心功德無能測
出生三世一切佛	成就世間一切樂
增長一切勝功德	永斷一切諸疑惑
開示一切妙境界	盡除一切諸障礙
成就一切清淨刹	出生一切如來智
欲見十方一切佛	欲施無盡功德藏
欲滅眾生諸苦惱	宜應速發菩提心

【論】然後七十四行頌始重頌前四十段中校量發心功德廣大之量如文具明隨文稱歎四行一頌准例知之如是校量初發心功德設使以等虛空無限境以一切樂具總供養無限眾生皆令得人天勝樂又教令得四沙門果及辟支佛及三乘出世菩提如是虛空境界及所度眾生雖等然未令所化眾生得成佛亦不可比於此教中初發心乘如來大智等佛所行普化眾生皆成佛故發菩提心以是義故雖然所舉境界廣狹雖等所化眾生成佛不成佛不等故不可為比故是故此品下文云初發心菩薩不於三世少有所得所謂若諸佛若諸佛法若菩薩若菩薩法若獨覺若獨覺法若聲聞若聲聞法乃至廣說如經但為唯求一切智於諸法界心無所著發菩提心略說菩提其法有四一聲聞菩提二緣覺菩提三權教菩薩菩提四一乘菩薩佛果菩提前三並是出世菩提佛果菩提是法身大智大悲真俗萬行法界圓滿菩提無出入故三乘菩提雖觀四諦十二緣而亦未知四諦十二緣之實體非獨二乘不知三種意生身菩薩位登十地猶未能悉知唯一乘菩薩以智方知至十地品具明但且略而總言三乘中觀苦集滅道及十二緣生及行六波羅蜜菩薩厭苦忻真但求出世大悲菩薩方云留惑潤生一乘菩薩以智觀四諦十二緣生無明即智苦諦即聖諦於生死涅槃無解縛性是故此經名苦聖諦集聖諦如是十聖諦十二因緣總是法界自性無縛無解自在之緣

不名無明不名苦諦如是總觀萬法如是名為一乘法界緣起智悲自在任性緣生一切眼耳鼻舌身莫不皆是法界緣起自在法門一切諸佛知見神通道力以此而有但以禪定觀照諸波羅蜜而顯發之是故學者應如是修如是悟入已下頌文四行一頌如文自具不煩更釋有智之士隨文稱歎令眾發心。

## 明法品第十八

【論】將釋此品約作三門分別一釋品名目二釋品來意三隨文釋義第一釋品名目者此品為明前之昇須彌頂品偈讚品十住品梵行品初發心功德品五品法門已發菩提之心得廣大功德此精進慧所問之法有二義一令前五品之法其心更明二令後所行之法轉勝明白故云明法品明昇進前後法故是精進慧菩薩啟請法慧菩薩言所有大願悉使滿足獲諸菩薩廣大之藏此明前所得法使令更明後之昇進使令明白是修十行之向長養本位十住之法第二釋品來意及名目如前第三隨文釋義分之為二一長科經意二隨文解釋第一長科經意者約科為三段第一初爾時已下長行有三十三行半經通偈頌有五十五行半明精進慧菩薩請法分第二爾時法慧菩薩已下有六行經明法慧菩薩許說分第三佛子菩薩摩訶薩已下直至品末通偈頌總明正說法分從初第一請法分中義分為二一科此一段經之文意第二隨文解義第一科此一段經文意者約科為三段。

【經】爾時精進慧菩薩白法慧菩薩言佛子菩薩摩訶薩初發求一切智心成就如是無量功德具大莊嚴昇一切智乘入菩薩正位捨諸世間法得佛出世法去來現在諸佛攝受決定至於無上菩提究竟之處彼諸菩薩於佛教中云何修習令諸如來皆生歡喜入諸菩薩所住之處一切大行皆得清淨所有大願悉使

滿足獲諸菩薩廣大之藏隨所應化常為說法而恒不捨波羅蜜行所念眾生咸令得度紹三寶種使不斷絕善根方便皆悉不虛佛子彼諸菩薩以何方便能令此法當得圓滿願垂哀愍為我宣說此諸大會靡不樂聞。

【論】第一爾時已下至靡不樂聞有十二行經明精進慧菩薩初起請法門分第二隨文解釋者從初爾時者爾猶此云說此法時也精進慧菩薩者約位加行成名此通十箇慧之通稱為令欲成此位之昇進必藉精進之功慧者照燭義精進者無思義以無思之慧照燭有作之功有作本自無者萬法本來自淨萬法自淨名之為精無巧智應知根利生名之為進此約成位進修之稱也菩薩者如常說也白法慧菩薩者白者明也明著名言申其所明也云昇一切智乘者明入此位也以此位菩薩乘一切智乘生如來家入佛種智為佛之子恒蒙諸佛之所攝受故明智相應堪與益故故云攝受云獲諸菩薩廣大之藏者如十迴向中智藏悲藏等十藏是也云以何方便已下正說中十法門是。

【經】復次如諸菩薩摩訶薩常勤修習滅除一切無明黑闇降伏魔怨制諸外道永滌一切煩惱心垢悉能成就一切善根永出一切惡趣諸難淨治一切大智境界成就一切菩薩諸地諸波羅蜜總持三昧六通三明四無所畏清淨功德莊嚴一切諸佛國土及諸相好身語心行成就滿足善知一切諸佛如來力無所畏不共佛法一切智智所行境界為欲成熟一切眾生隨其心樂而取佛土隨根隨時如應說法種種無量廣大佛事及餘無量諸功德法諸行諸道及諸境界皆悉圓滿疾與如來功德平等於諸如來應正等覺百千阿僧祇劫修菩薩行時所集法藏悉能守護開示演說諸魔外道無能沮壞攝持正法無有窮盡於一切世界演說法時天王龍王夜叉王乾闥婆王阿脩羅王迦樓羅王緊那羅王摩睺羅伽王人王梵王如來法王皆悉守護一切世間恭敬供

養同灌其頂常為諸佛之所護念一切菩薩亦皆愛敬得善根力增長白法開演如來甚深法藏攝持正法以自莊嚴一切菩薩所行次第願皆演說。

【論】第二復次如諸已下至菩薩所行次第願皆演說有二十一行經明精進慧菩薩并舉當位應所修行之行及獲益重勸說守護法分云六通者身通天耳通天眼通宿命通他心通漏盡通身通者於一剎那際身隨智用周徧十方對現色身隨根普應天耳通者耳根常聞十方一切諸聲天眼通者眼根常見十方一切麤細等色宿命通者智隨三世一切眾生死此生彼所作業行因果悉能知之他心通者一念能知三世一切眾生心念所欲漏盡通者隨智徧知一切諸法而無情欲順癡愛心此經又有十種通如十通品說三明者一宿命二天眼三漏盡是名三明四無畏者一一切智無畏二漏盡無畏三說障道無畏四說盡苦道無畏相好者此經十身相海也力無所畏者十力也一是處非處力二業力三定力四根力五欲力六性力七一切至處道力八宿命力九天眼力十漏盡力是為十三世業果名為處了達非有名非處善知眾生業因果心定不動如山王眾生根品上中下欲樂種種各差別種種世間諸性分一切道法各不同宿命徧知三世業天眼十方無礙了隨諸分別滿十方心無襍染常無垢如是十種得自在是名如來無畏力十八不共者一佛身無過失二口無過失三念無過失四想無過失五心無不定常在三昧六無不知已捨七者欲無減八者精進無失九念無減十慧無減十一解脫無減十二解脫知見無減十三身業隨智慧行十四口業隨智慧行十五意業隨智慧行十六智慧知過去無礙事十七智慧知未來無礙事十八智慧知現在無礙事所言無過失者妙善相應所言無減者所作善法常無忘失云一切智智者云種種智無盡智此明

差別智無盡故如守護分中有二義一明初發心菩薩守護一切諸佛法藏而能為人演說二得天王夜叉王如來法王等守護。

【經】爾時精進慧菩薩欲重宣其義而說頌言。

【論】第三爾時已下可一行經明精進慧以偈說重請法分。

【經】

大名稱者善能演	菩薩所成功德法
深入無邊廣大行	具足清淨無師智
若有菩薩初發心	成就福德智慧乘
入離生位超世間	普獲正等菩提法
彼復云何佛教中	堅固勤修轉增勝
令諸如來悉歡喜	佛所住地速當入
所行清淨願皆滿	及得廣大智慧藏
常能說法度眾生	而心無依無所著
菩薩一切波羅蜜	悉善修行無缺減
所念眾生咸救度	常持佛種使不絕
所作堅固不唐捐	一切功成得出離
如諸勝者所修行	彼清淨道願宣說
永破一切無明闇	降伏眾魔及外道
所有垢穢悉滌除	得近如來大智慧
永離惡趣諸險難	淨治大智殊勝境
獲妙道力鄰上尊	一切功德皆成就
證得如來最勝智	住於無量諸國土
隨眾生心而說法	及作廣大諸佛事
云何而得諸妙道	開演如來正法藏
常能受持諸佛法	無能超勝無與等
云何無畏如師子	所行清淨如滿月
云何修習佛功德	猶如蓮華不著水



【論】如以偈重請分中有二十二行頌初二行頌歎能說法主已下二十行兩行一頌初兩行歎初發心菩薩智慧福德超世獲益次兩行頌勸說昇進之行次兩行頌明大智度眾生無著次兩行頌明眾行無缺利生令佛種不絕次兩行頌明堅固功成出離法勝重勸請說次兩行頌明破暗降魔之道亦願請說次兩行頌明如來所得之法亦勸請說次兩行頌明云何演說如來法末後兩行頌明云何令初發心無畏如師子無著如蓮華。

【經】爾時法慧菩薩告精進慧菩薩言善哉佛子汝今為欲多所饒益多所安樂多所惠利哀愍世間諸天及人問於如是菩薩所修清淨之行佛子汝住實法發大精進增長不退已得解脫能作是問同於如來諦聽諦聽善思念之我今承佛威神之力為汝於中說其少分。

【論】第二爾時法慧菩薩已下有六行經明法慧菩薩許說分於此分中所歎能問之人如文可知第三正說分中復分為二第一長科經意第二隨文釋義第一長科經意者從佛子菩薩已發一切智心已下至品末長科為二十段。

【經】佛子菩薩摩訶薩已發一切智心應離癡闇精勤守護無令放逸佛子菩薩摩訶薩住十種法名不放逸何者為十一者護持眾戒二者遠離愚癡淨菩提心三者心樂質直離諸諂誑四者勤修善根無有退轉五者恒善思惟自所發心六者不樂親近在家出家一切凡夫七者修諸善業而不願求世間果報八者永離二乘行菩薩道九者樂修眾善令不斷絕十者恒善觀察自相續力佛子若諸菩薩行此十法是則名為住不放逸。

【論】第一從初佛子已下至住不放逸有十行經明住十種不放逸法分。

【經】佛子菩薩摩訶薩住不放逸得十種清淨何者為十一者如說而行二者念智成就三者住於深定不沈不舉四者樂求

佛法無有懈怠五者隨所聞法如理觀察具足出生巧妙智慧六者入深禪定得佛神通七者其心平等無有高下八者於諸眾生上中下類心無障礙猶如大地等作利益九者若見眾生乃至一發菩提之心尊重承事猶如和尚十者於授戒和尚及阿闍梨一切菩薩諸善知識法師之所常生尊重承事供養佛子是名菩薩住不放逸十種清淨。

【論】第二佛子已下至十種清淨有十行半經明住不放逸得十清淨法分第二隨文解釋者從正說分中菩薩摩訶薩二十段文中但隨經文義隱言幽方可解之經文自顯處如文自具不煩更釋如文中深入禪定不沈不舉者不沈離聲聞滅盡定亦離上二界息慮禪如色界初禪滅下欲界愁憂不生得一分輕安寂靜無欲界愛有寂靜愛水災便至楞伽經云津潤妄想能生內外水界以愛為津潤故水大至如色界第二禪能滅欲界憂苦不生得一分輕安寂靜為有覺有觀能緣靜境猶在火災便至如第三禪無覺無觀有禪悅樂心有喜動風災便至如第四禪身心寂滅離出入息喜動亦無三災不至唯妙色身如白銀清淨光潔衣如金色四禪身長二十里衣長四十里已下三禪倍倍減半如初會中已釋如是四禪皆是息心令靜以為勢分乃至空處識處無所有處非想非非想定皆是破除昇進令念不生住寂定故如是破色界靜色令成無色界空識又破見空之識亦空名識處定又破識空之見亦無名無所有定又破無所有心此無想無想之想亦無名非想非非想定如是上界修禪皆是作意存情伏心不起不是任性無為無沈無掉稱真理智寂用自在不作而為之定也如欲界定攀緣五欲名掉色無色界定名沈又聲聞緣覺定名沈空觀菩薩行六波羅蜜生於淨土名掉舉如是三乘之定皆有沈掉為垢淨未亡見道不真有忻厭故二乘之定雖無三界現行之惑皆是厭患對治伏滅無為無能起惑我生不起悲智亦亡住滅定

者頭上擊鼓亦不聞知化火燒父母分段身者入變易生死如是二乘斷惑不分別法意勢相似或有聲聞以十二緣生法得道如是三乘觀行緣覺聲聞淨土菩薩所得道者皆是出世三乘互用通為九乘大體以約勝鬘經得伏三界煩惱不起得意生身無分段生死得變易生死非是應真任智自在無出入體任智應眾生利樂不息廣如勝鬘之意以是義故色界無色界及三乘禪有沈有掉如大乘中留惑潤生菩薩道前安立三十心菩薩習種性性種性道種性方入聖種性四攝四無量心三十七助道品觀十波羅蜜名目相似若以攝化境界及見佛數量意生身智生身成佛因果總皆不同以是義故如是留惑潤生菩薩所修定亦沈亦掉為但得三種意生身未得如來智生身故乃至七八九十地得種類俱生無行作意生身菩薩但得三界煩惱中空觀折伏現行不起於意生中自在故非是生如來一切種智家故非是於如來一切種智中起慣習故所云成佛定滿三祇所見佛境初地菩薩但云供養及攝化百佛世界但得百法明門如此華嚴經者初發心菩薩初發如來一切種智之心名為菩提心如初發心住創生一切諸佛一切種智大智慧家生初發心時便成正覺為會諸佛一切種智與自智一故成佛不出剎那之際以智境界非延促故攝化境界徧百佛剎微塵又多百佛明智境德用無盡無限重重故此猶約隨位進修之言計體一即一切無限也如十地中初地菩薩供養多百佛多百千佛雖數不離百數然多百即無限與單百即無比是故四念四攝四無量心十波羅蜜一一法悉皆無限是故此十住菩薩所修定業不屬世間出世間沈掉之定也已釋住於深定不沈不舉竟如云深入禪定得佛神通者如上色界無色界天及三乘神通色無色界神通息心想淨報得神通二乘神通依定前所念淨土菩薩神通得清淨意樂通如三種意生身是如此經中入深禪定得佛神通者以心稱理元無出入體無靜亂體

無造作性任理自真不生不伏理真智應性自徧周三世十方一時普應對現色身隨以智應而化羣品而無來往亦不變化名佛神通智無依止無形色體無來去性性自徧周非三世攝而能普應三世之法名曰神通是故經云智入三世而無來往為三世是眾生情所妄安井實有故為智體無形色不造作而應羣品名之為神圓滿十方無法不知無根不識名之為通。

### 大方廣佛新華嚴經合論卷第三十五

音切

瞢

(莫音)。

饒

(如招切)。

覲

(渠吝切)。

謁

(於揭切)。

鑽

(則官切)。

沮

(慈呂切)。

耽

(丁含切)。

晝

(之又切)。

缺

(苦穴切)。

著

(智呂切)。

藉

(慈易慈夜二切)。

# 大方廣佛新華嚴經合論卷第三十六

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

## 明法品第十八之餘

【經】佛子菩薩摩訶薩住不放逸發大精進起於正念生勝欲樂所行不息於一切法心無依處於甚深法能勤修習入無諍門增廣大心佛法無邊能順了知令諸如來皆悉歡喜佛子菩薩摩訶薩復有十法能令一切諸佛歡喜何等為十一者精進不退二者不惜身命三者於諸利養無所希求四者知一切法皆如虛空五者善能觀察普入法界六者知諸法印心無倚著七者常發大願八者成就清淨忍智光明九者觀自善法心無增減十者依無作門修諸淨行佛子是為菩薩住十種法能令一切如來歡喜。

【論】第三佛子已下至能令一切如來歡喜有十一行半經明行十種法諸佛歡喜分經云依無作門修諸淨行者以此無作門修法界虛空界行海徧周清淨故智無所為名之為修知根同事名之為行行無不利非作非生名為無作門也常處十方一切三界受生利俗而無染淨名之為淨行故。

【經】佛子復有十法能令一切諸佛歡喜何者為十所謂安住不放逸安住無生忍安住大慈安住大悲安住滿足諸波羅蜜安住諸行安住大願安住巧方便安住勇猛力安住智慧觀一切法皆無所住猶如虛空佛子若諸菩薩住此十法能令一切諸佛歡喜。

【論】第四佛子已下至諸佛歡喜有六行經明安住十法分已上佛歡喜分。

【經】佛子有十種法令諸菩薩速入諸地何等為十一者善巧圓滿福智二行二者能大莊嚴波羅蜜道三者智慧明達不隨他語四者承事善友恒不捨離五者常行精進無有懈怠六者善能安住如來神力七者修諸善根不生疲倦八者深心利智以大乘法而自莊嚴九者於地地法門心無所住十者與三世佛善根方便同一體性佛子此十種法令諸菩薩速入諸地。

【論】第五佛子已下至令諸菩薩速入諸地有八行經明行此十法速入諸地分經云有十種法令諸菩薩速入諸地者明雖於初發心住位而徧知諸住諸行諸迴向諸地法門為一即一切故一切即一故即因即果故即如善財童子見彌勒菩薩已彌勒還令却見文殊師利明因果不異不離故此亦如是從初發心位佛果地位一念齊進而亦不出一念中修成正覺佛因果及菩薩行悉圓滿故如善財一生龍女不出一剎那際三生成佛總相似故云一生成佛者明今生是父母分段身是信心及見道修行生捨分段身入變易生名為一生亦不出剎那際無古今性無分段性無變易性萬相如幻故如化故非生滅故無三世故以此初住徧脩諸位諸地故貫通諸法總一時一法多少延促自在無礙不出一剎那際故法如是故去情以智觀之可見經云與三世諸佛同一體性者為法身智慧同也三世廣大劫一念同三世諸佛普賢其行大智大悲圓滿同故。

【經】復次佛子諸菩薩初住地時應善觀察隨其所有一切法門隨其所有甚深智慧隨所修因隨所得果隨其境界隨其力用隨其示現隨其分別隨其所得悉善觀察知一切法皆是自心而無所著如是知己入菩薩地能善安住佛子彼諸菩薩作是思惟我等宜應速入諸地何以故我等若於地地中住成就如是廣

大功德具功德已漸入佛地住佛地已能作無邊廣大佛事是故宜應常勤修習無有休息無有疲厭以大功德而自莊嚴入菩薩地。

【論】第六復次佛子已下至而自莊嚴入菩薩地有十行經明入地勝進分。

【經】佛子有十種法令諸菩薩所行清淨何等為十一者悉捨資財滿眾生意二者持戒清淨無所毀犯三者柔和忍辱無有窮盡四者勤修諸行永不退轉五者以正念力心無迷亂六者分別了知無量諸法七者修一切行而無所著八者其心不動猶如山王九者廣度眾生猶如橋梁十者知一切眾生與諸如來同一體性佛子是為十法令諸菩薩所行清淨。

【論】第七佛子有十種法已下至所行清淨有八行經明淨行分經云知一切眾生與諸如來同一體性者三乘菩薩知一切眾生同有如來佛性理性此經知一切眾生同有如來一切種智之性如經下文有經卷如三千大千世界內在小眾生身中有人成佛破此微塵出此經卷言微塵許大眾生皆有佛一切種智故菩薩成佛化之總得如來一切種智故達理之智名一切智差別智名一切種智。

【經】菩薩既得行清淨已復獲十種增勝法何等為十一者他方諸佛皆悉護念二者善根增勝超諸等列三者善能領受佛加持力四者常得善人為所依怙五者安住精進恒不放逸六者知一切法平等無異七者心恒安住無上大悲八者如實觀法出生妙慧九者能善修行巧妙方便十者能知如來方便之力佛子是為菩薩十增勝法。

【論】第八菩薩既得行清淨已下至十增勝法有八行經明昇進轉增分。



【經】佛子菩薩有十種清淨願何等為十一願成熟眾生無有疲倦二願具行眾善淨諸世界三願承事如來常生尊重四願護持正法不惜軀命五願以智觀察入諸佛土六願與諸菩薩同一體性七願入如來門了一切法八願見者生信無不獲益九願神力住世盡未來劫十願具普賢行淨治一切種智之門佛子是為菩薩十種清淨願。

【論】第九佛子已下至是為菩薩十種清淨願有七行半經明大願成行利生分。

【經】佛子菩薩住十種法令諸大願皆得圓滿何等為十一者心無疲厭二者具大莊嚴三者念諸菩薩殊勝願力四者聞諸佛土悉願往生五者深心長久盡未來劫六者願悉成就一切眾生七者住一切劫不以為勞八者受一切苦不生厭離九者於一切樂心無貪著十者常勤守護無上法門。

【論】第十佛子已下至守護無上法門有七行經明行十法令大願圓滿分經云聞諸佛土悉願往生者不出塵中智徧現應供養十方一切諸佛而無來去。

【經】佛子菩薩滿足如是願時即得十種無盡藏何等為十所謂普見諸佛無盡藏總持不忘無盡藏決了諸法無盡藏大悲救護無盡藏種種三昧無盡藏滿眾生心廣大福德無盡藏演一切法甚深智慧無盡藏報得神通無盡藏住無量劫無盡藏入無邊世界無盡藏佛子是為菩薩十無盡藏菩薩得是十種藏已福德具足智慧清淨於諸眾生隨其所應而為說法佛子菩薩云何於諸眾生隨其所應而為說法。

【論】第十一佛子菩薩滿足如是願已下至如應說法有九行經明十種無盡藏分。

【經】所謂知其所作知其因緣知其心行知其欲樂貪欲多者為說不淨瞋恚多者為說大慈愚癡多者教勤觀察三毒等者

為說成就勝智法門樂生死者為說三苦若著處所說處空寂心懈怠者說大精進懷我慢者說法平等多諂誑者為說菩薩其心質直樂寂靜者廣為說法令其成就菩薩如是隨其所應而為說法為說法時文相連屬義無舛謬觀法先後以智分別是非審定不違法印次第建立無邊行門令諸眾生斷一切疑善知諸根入如來教證真實際知法平等斷諸法愛除一切執常念諸佛心無暫捨了知音聲體性平等於諸言說心無所著巧說譬喻無相違反悉令得悟一切諸佛隨應普現平等智身菩薩如是為諸眾生而演說法則自修習增長義利不捨諸度具足莊嚴波羅蜜道。

【論】第十二所謂知其所作已下至具足莊嚴波羅蜜道有十六行經明菩薩知根利益分。

【經】是時菩薩為令眾生心滿足故內外悉捨而無所著是則能淨檀波羅蜜具持眾戒而無所著永離我慢是則能淨尸波羅蜜悉能忍受一切諸惡於諸眾生其心平等無有動搖譬如大地能持一切是則能淨忍波羅蜜普發眾業常修靡懈諸有所作恒不退轉勇猛勢力無能制伏於諸功德不取不捨而能滿足一切智門是則能淨精進波羅蜜於五欲境無所貪著諸次第定悉能成就常正思惟不住不出而能銷滅一切煩惱出生無量諸三昧門成就無邊大神通力逆順次第入諸三昧於一三昧門入無邊三昧門悉知一切三昧境界與一切三昧三摩鉢底智印不相違背能速入於一切智地是則能淨禪波羅蜜於諸佛所聞法受持近善知識承事不倦常樂聞法心無厭足隨所聽受如理思惟入真三昧離諸僻見善觀諸法得實相印了知如來無功用道乘普門慧入於一切智智之門永得休息是則能淨般若波羅蜜示現一切世間作業教化眾生而不厭倦隨其心樂而為現身一切所行皆無染著或現凡夫或現聖人所行之行或現生死或現涅槃善能觀察一切所作示現一切諸莊嚴事而不貪著徧入諸趣

度脫眾主是則能淨方便波羅蜜盡成就一切眾生盡莊嚴一切世界盡供養一切諸佛盡通達無障礙法盡修行徧法界行身恒住盡未來劫智盡知一切心念盡覺悟流轉還滅盡示現一切國土盡證得如來智慧是則能淨願波羅蜜具深心力無有褻染故具深信力無能摧伏故具大悲力不生疲厭故具大慈力所行平等故具總持力能以方便持一切義故具辯才力令一切眾生歡喜滿足故具波羅蜜力莊嚴大乘故具大願力永不斷絕故具神通力出生無量故具加持力令信解領受故是則能淨力波羅蜜知貪欲行者知瞋恚行者知愚癡行者知等分行者知修學地行者一念中知無邊眾生行知無邊眾生心知一切法真實知一切如來力普覺悟法界門是則能淨智波羅蜜佛子菩薩如是清淨諸波羅蜜時圓滿諸波羅蜜時不捨諸波羅蜜時住大莊嚴菩薩乘中隨其所念一切眾生皆為說法令增淨業而得度脫墮惡道者教使發心在難中者令勤精進多貪眾生示無貪法多瞋眾生令行平等著見眾生為說緣起欲界眾生教離欲恚惡不善法色界眾生為其宣說毗鉢舍那無色界眾生為其宣說微妙智慧二乘之人教寂靜行樂大乘者為說十力廣大莊嚴如其往昔初發心時見無量眾生墮諸惡道大師子吼作如是言我當以種種法門隨其所應而度脫之菩薩具足如是智慧廣能度脫一切眾生佛子菩薩具足如是智慧令三寶種永不斷絕。

【論】第十三時已下至令三寶種永不斷絕有五十二行半經明行十波羅蜜利益眾生諸對治分經云諸次第定者色界四禪菩薩次第能入於無色界四禪菩薩悉能順入或超間入出如涅槃經闍維分說從初禪入三禪出空處入無所有出非想處入識處出如是超間如是次第如此經方網三昧一方入定十方起十方入定一方起等具如十信位中說三摩鉢底智印者明寂用同起印諸萬法無不明了如大海水而現萬像淨智普印一切

萬法皆能了知而無能所亦無作者經云入真三昧者無三界及三乘染淨沈掉是也離諸僻見者有無二見是內見外見身見邊見戒取見取等總是乃至六十二見是六十二見者於一切法上計有四見一常二無常三亦常亦無常四非常非無常於五陰上各有四見四五二十三世五陰上合為六十本二見共為六十二見一切僻見不離此也經云善觀諸法得實相印者以無作無依無相大智印印諸萬法起唯法起無有無明三世計著名實相印普門慧者徧知眾生諸根及法智一切智智種種差別智也色界眾生為住定故教令起觀修無相觀者教微妙智慧為相不當情智慧利故。

【經】所以者何菩薩摩訶薩教諸眾生發菩提心是故能令佛種不斷常為眾生開闡法藏是故能令法種不斷善持教法無所乖違是故能令僧種不斷復次悉能稱讚一切大願是故能令佛種不斷分別演說因緣之門是故能令法種不斷常勤修習六和敬法是故能令僧種不斷復次於眾生田中下佛種子是故能令佛種不斷護持正法不惜身命是故能令法種不斷統理大眾無有疲倦是故能令僧種不斷復次於去來今佛所說之法所制之戒皆悉奉持心不捨離是故能令佛法僧種永不斷絕菩薩如是紹隆三寶一切所行無有過失隨有所作皆以迴向一切智門是故三業皆無瑕玷無瑕玷故所作眾善所行諸行教化眾生隨應說法乃至一念無有錯謬皆與方便智慧相應悉以向於一切智智無空過者菩薩如是修習善法念念具足十種莊嚴。

【論】第十四所以者何已下至念念具足十種莊嚴可有十八行經明令三寶種永不斷絕分六和敬法者一身二口三意四戒五施六見名為六和敬法於眾生田中下佛種子者示一切眾生菩提理智故及微少善根為勝緣故。

【經】何者為十所謂身莊嚴隨諸眾生所應調伏而為示現故語莊嚴斷一切疑皆令歡喜故心莊嚴於一念中入諸三昧故佛刹莊嚴一切清淨離諸煩惱故光明莊嚴放無邊光普照眾生故眾會莊嚴普攝眾會皆令歡喜故神通莊嚴隨眾生心自在示現故正教莊嚴能攝一切聰慧人故涅槃地莊嚴於一處成道周徧十方悉無餘故巧說莊嚴隨處隨時隨其根器為說法故菩薩成就如是莊嚴於念念中身語意業皆無空過悉以迴向一切智門若有眾生見此菩薩當知亦復無空過者以必當成阿耨多羅三藐三菩提故若聞名若供養若同住若憶念若隨出家若聞說法若隨喜善根若遙生欽敬乃至稱揚讚歎名字皆當得阿耨多羅三藐三菩提佛子譬如有藥名為善見眾生見者眾毒悉除菩薩如是成就此法眾生若見諸煩惱毒皆得除滅善法增長佛子菩薩摩訶薩住此法中勤加修習以智慧明滅諸癡闇以慈悲力摧伏魔軍以大智慧及福德力制諸外道以金剛定滅除一切心垢煩惱以精進力集諸善根以淨佛土諸善根力遠離一切惡道諸難以無所著力淨智境界以方便智慧力出生一切菩薩諸地諸波羅蜜及諸三昧六通三明四無所畏悉令清淨以一切善法力盛滿一切諸佛淨土無邊相好身語及心具足莊嚴以智自在觀察力知一切如來力無所畏不共佛法悉皆平等以廣大智慧力了知一切智智境界以往昔誓願力隨所應化現佛國土轉大法輪度脫無量無邊眾生。

【論】第十五何者為十已下至度脫無量無邊眾生有三十行經明以十種莊嚴令見者發心無空過分六通前已釋訖如十通品說十通如經具明。

【經】佛子菩薩摩訶薩勤修此法次第成就諸菩薩行乃至得與諸佛平等於無邊世界中為大法師護持正法一切諸佛之所護念守護受持廣大法藏獲無礙辯深入法門於無邊世界大

眾之中隨類不同普現其身色相具足最勝無比以無礙辯巧說深法其音圓滿善巧分布故能令聞者入於無盡智慧之門知諸眾生心行煩惱而為說法所出言音具足清淨故一音演暢能令一切皆生歡喜其身端正有大威力故處於眾會無能過者善知眾心故能普現身善巧說法故音聲無礙得心自在故巧說大法無能沮壞得無所畏故心無怯弱於法自在故無能過者於智自在故無能勝者般若波羅蜜自在故所說法相不相違背辯才自在故隨樂說法相續不斷陀羅尼自在故決定開示諸法實相辯才自在故隨所演說能開種種譬喻之門大悲自在故勤誨眾生心無懈怠大慈自在故放光明細悅可眾心菩薩如是處於高廣師子之座演說大法唯除如來及勝願智諸大菩薩其餘眾生無能勝者無見頂者無映奪者欲以難問令其退屈無有是處佛子菩薩摩訶薩得如是自在力已。

【論】第十六佛子已下至如是自在力已有二十三行經明菩薩初發心得與佛平等法堪為大法師分。

【經】假使有不可說世界量廣大道場滿中眾生一一眾生威德色相皆如三千大千世界主菩薩於此纔現其身悉能映蔽如是大眾以大慈悲安其怯弱以深智慧察其欲樂以無畏辯為其說法能令一切皆生歡喜何以故佛子菩薩摩訶薩成就無量智慧輪故成就無量巧分別故成就廣大正念力故成就無盡善巧慧故成就決了諸法實相陀羅尼故成就無邊際菩提心故成就無錯謬妙辯才故成就得一切佛加持深信解故成就普入三世諸佛眾會道場智慧力故成就知三世諸佛同一體性清淨心故成就三世一切如來智一切菩薩大願智能作大法師開闡諸佛正法藏及護持故。

【論】第十七假使有不可說世界廣大道場已下至及護持法故有十三行半經明處眾無畏說法自在身無映蔽分。

【經】爾時法慧菩薩欲重宣其義承佛神力而說頌言。

【論】第十八爾時已下可一行經明法慧以頌歎法分。

【經】

心住菩提集眾福	常不放逸植堅慧
正念其意恒不忘	十方諸佛皆歡喜
念欲堅固自勤勵	於世無依無退怯
以無諍行入深法	十方諸佛皆歡喜
佛歡喜已堅精進	修行福智助道法
入於諸地淨眾行	滿足如來所說願
如是而修獲妙法	既得法已施羣生
隨其心樂及根性	悉順其宜為開演
菩薩為他演說法	不捨自己諸度行
波羅蜜道既已成	常於有海濟羣生
晝夜勤修無懈怠	令三寶種不斷絕
所行一切白淨法	悉以迴向如來地
菩薩所修眾善行	普為成就諸羣生
令其破闇滅煩惱	降伏魔軍成正覺
如是修行得佛智	深入如來正法藏
為大法師演妙法	譬如甘露悉霑灑
慈悲哀愍徧一切	眾生心行靡不知
如其所樂為開闡	無量無邊諸佛法
進止安徐如象王	勇猛無畏猶師子
不動如山智如海	亦如大雨除眾熱

【論】第十九如此以頌歎法中有二十行頌兩行一頌如文其義自具隨文稱歎。

【經】時法慧菩薩說此頌已如來歡喜大眾奉行。

【論】第二十最下一行經明大眾聞法歡喜奉行分第四會夜摩天說十行法門此之一會昇夜摩天是序分從偈讚品已下是正說分動地興供是流通分。

### 昇夜摩天宮品第十九

【論】將釋此品約作三門分別一釋品名目二釋品來意三隨文解釋一釋品名目者何故名夜摩天宮明以處表法此天名為時分天為此天無日月晦明以蓮華開為晝合為夜故名時分天故為表十行法門知時而應物化不可不知時故故以時分天以表知根而對經不可一向為也知是人天種二乘三乘一乘種知可以何善根而接引之故以時分天以表所行之行須以知時故須彌山以表十住之法門明以從信昇進離凡夫地故又表十住之位初登法頂至相盡處故又表須彌處大海中高八萬四千由旬非手足所攀緣而昇上故明初十住之位非以有心想求觀行攀緣所及以無思不為蕩然智應萬法無依方可昇也此十行位處夜摩之中明依空而住不與人連十行亦然依法空而行行知時而益俗也故處此天而表之也於兜率天說十迴向為明其處居欲界天之處中又明此天樂知足也以表十迴向以迴正智處俗利生處大悲門饒益一切於諸境界無所貪求故處此天以為所表昇他化天說十地法門者超過化樂明至欲界際表十地自在超昇化樂至欲界之頂化心魔王至欲盡際故昇第三禪說佛華法門明普賢行滿表以行法悅悅無盡眾生故又彰第四禪是佛位故此約進修昇降表法且如是安立然其理智一一徧周無去來也以此皆云不離菩提道場普光明殿而昇忉利夜摩兜率等如第三禪超初禪二禪者明位倍勝故此一會未有來文是繆絡本業經如來領聲聞菩薩眾向菩提樹下說往昔於此菩



提樹下初成正覺時說法界經一一排次至第三禪故是故於此夜摩天以表十行第二釋品來意者前明十住昇進以昇須彌之頂此明十行之昇進以至夜摩以次此品須來第三隨文釋義者於中大意義分為二一長科經意二隨文解釋。

【經】爾時如來威神力故十方一切世界一一四天下南閻浮提及須彌頂上皆見如來處於眾會彼諸菩薩悉以佛神力故而演說法莫不自謂恒對於佛爾時世尊不離一切菩提樹下及須彌山頂而向於彼夜摩天王宮寶莊嚴殿時夜摩天王遙見佛來即以神力於其殿內化作寶蓮華藏師子之座百萬層級以為莊嚴百萬金網以為交絡百萬華帳百萬鬘帳百萬香帳百萬寶帳彌覆其上華蓋鬘蓋香蓋寶蓋各亦百萬周迴布列百萬光明而為照耀百萬夜摩天王恭敬頂禮百萬梵王踊躍歡喜百萬菩薩稱揚讚歎百萬天樂各奏百萬種法音相續不斷百萬種華雲百萬種鬘雲百萬種莊嚴具雲百萬種衣雲周帀彌覆百萬種摩尼雲光明照耀從百萬種善根所生百萬諸佛之所護持百萬種福德之所增長百萬種深心百萬種誓願之所嚴淨百萬種行之所生起百萬種法之所建立百萬種神通之所變現恒出百萬種言音顯示諸法時彼天王敷置座已向佛世尊曲躬合掌恭敬尊重而白佛言善來世尊善來善逝善來如來應正等覺唯願哀愍處此宮殿時佛受請即昇寶殿一切十方悉亦如是爾時天王即自憶念過去佛所所種善根承佛威力而說頌言。

名稱如來聞十方	諸吉祥中最無上
彼曾入此摩尼殿	是故此處最吉祥
寶王如來世間燈	諸吉祥中最無上
彼曾入此清淨殿	是故此處最吉祥
喜目如來見無礙	諸吉祥中最無上
彼曾入此莊嚴殿	是故此處最吉祥

然燈如來照世間	諸吉祥中最無上
彼曾入此殊勝殿	是故此處最吉祥
饒益如來利世間	諸吉祥中最無上
彼曾入此無垢殿	是故此處最吉祥
善覺如來無有師	諸吉祥中最無上
彼曾入此寶香殿	是故此處最吉祥
勝天如來世中燈	諸吉祥中最無上
彼曾入此妙香殿	是故此處最吉祥
無去如來論中雄	諸吉祥中最無上
彼曾入此普眼殿	是故此處最吉祥
無勝如來具眾德	諸吉祥中最無上
彼曾入此善嚴殿	是故此處最吉祥
苦行如來利世間	諸吉祥中最無上
彼曾入此普嚴殿	是故此處最吉祥

如此世界中夜摩天王承佛神力憶念往昔諸佛功德稱揚讚歎十方世界夜摩天王悉亦如是歎佛功德爾時世尊入摩尼莊嚴殿於寶蓮華藏師子座上結跏趺坐此殿忽然廣博寬容如其天眾諸所住處十方世界悉亦如是。

【論】第一長科經意者此一品四十九行經中約作十段長科一爾時如來威神力故已下至恒對於佛有三行半經明十方同見如來不離其處分二爾時已下至寶莊嚴殿可有兩行經明不離十方一切菩提場普光明殿而昇夜摩天分三時夜摩天王已下至時彼天王敷置座已有十四行半經明時分天王遙見佛來化座莊嚴及恭敬分四向佛世尊已下至處此宮殿可兩行半經明時分天王請佛入殿昇座分五時佛受請已下至悉亦如是可有一行經明如來受請都結十方同然分六爾時天王已下有一行半經明天王憶昔往因說頌歎佛分七說頌之中有二十行

頌歎十如來曾來入此天宮分八如此世界已下至歎佛功德有兩行半經明十方同此一時歎佛分九爾時世尊已下至諸所住處可兩行半經明如來受請入殿廣博寬容分十十方世界悉亦如是此總結十方同此分第二隨文解義者初爾時已下至恒對於佛明十方一切處恒徧滿無增減故言不離菩提樹須彌頂而昇夜摩天者明智徧一切處而示其身非去來故云遙見佛來者明從十住向十行位故即以神力化座者明行位依空智而所成無能所之建立故以座表行號曰蓮華明無作行成無所染著故藏者含容義明無行之行含藏眾善故師子者明無畏也以無為之理智處生死而無畏故此依主為座名百萬層級者明十住十千十行百萬明隨位昇進階級故百萬金網以為交絡者明此位中以行網教網化眾生故此為報得依果故十住十千十行百萬明昇進也華鬘香寶及四種帳明以四攝法方便行含攝眾生故又四種蓋明以四無量心慈悲喜捨覆蔭眾生故百萬光明而為照耀者明以智眼觀根而攝化故天王者行自在也恭敬頂禮者行行無慢也梵王踊躍者淨行利生見求乞者歡喜無厭也百萬菩薩稱揚者明以行濟物眾聖歡喜稱歎也天樂奏音者明善能說法所招果也四種雲以行慈覆俗前云蓋後云四種雲明約器大小覆育故摩尼雲亦然隨根大小照燭與益故百萬善根所生明已上莊嚴皆約行中善根所生故為行能利物積善即得諸佛覆護眾福所嚴已下如文可解云善來善逝者善滅眾惡苦灾逝者度眾生之離縛時佛受請昇座者明昇進正入十行位故已上望佛自德十方恒自徧周今作昇降者總約眾生進修昇降故二十行頌中歎十佛昔曾入此殿明今所入十行理智與古無殊此十如來還是約行昇進所成之號前十住位昇須彌頂十如來名號亦是隨位會古之號明所入之法不異古今諸佛故如十住位中須彌頂上帝釋宮中遙見佛來即於殿中安置普光明藏師子

之座為明初入如來智慧中生即以方便三昧之門名安置普光明藏即明智慧照耀法界藏故令此十行位時分天王遙見佛來化作寶蓮華師子之座者明以行華設其教網漉諸眾生令入如來智之境界藏故蓮華表行無著義故化座者明行體以依十住智慧虛無法身安立也所作如化也以茲所表末後五行經都結十方同時歎佛如來入殿其殿包容如天所住者明入位昇進自智寬容方知佛境故。

### 大方廣佛新華嚴經合論卷第三十六

音切

疲

(皮音)。

倦

(渠卷切)。

軀

(丘于切)。

舛

(昌輓切)。

審

(式稔切)。

退

(他內切)。

勵

(力制切)。

瑕

(胡加切)。

玷

(丁念切)。

隆

(力中切)。

怙

(戶音)。

錯

(七各切)。

# 大方廣佛新華嚴經合論卷第三十七

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

## 夜摩天宮偈讚品第二十

【論】將釋此品約作三門分別一釋品名目二釋品來意三隨文釋義第一釋品名目者明昇夜摩天宮以說十行之法此品以功德林等十菩薩眾各各以當位之行以偈都讚當位之法故名偈讚品第二釋品來意者明欲說十行之法先須偈都讚十行之中因果法門故此品須來若不先舉所行之因果十行有何依成第三隨文釋義者於此一品之中約作二門分別一長科經意二隨文解釋第一長科經意者約作五段長科。

【經】爾時佛神力故十方各有一大菩薩一一各與佛刹微塵數菩薩俱從十萬佛刹微塵數國土外諸世界中而來集會其名曰功德林菩薩慧林菩薩勝林菩薩無畏林菩薩慚愧林菩薩精進林菩薩力林菩薩行林菩薩覺林菩薩智林菩薩此諸菩薩所從來國所謂親慧世界幢慧世界寶慧世界勝慧世界燈慧世界金剛慧世界安樂慧世界日慧世界淨慧世界梵慧世界此諸菩薩各於佛所淨修梵行所謂常住眼佛無勝眼佛無住眼佛不動眼佛天眼佛解脫眼佛審諦眼佛明相眼佛最上眼佛紺青眼佛是諸菩薩至佛所已頂禮佛足隨所來方各化作摩尼藏師子之座於其座上結跏趺坐。

【論】第一爾時佛神力故已下至結跏趺坐有十三行半經明隨位菩薩功德林等十菩薩并陳自行佛因果來集分第二隨

文釋義者於此分中義分為三一釋菩薩名及配隨位進修之因果二釋刹土遠近之意三釋菩薩各各同號徧周第一釋菩薩名及配隨位進修之因果者約有十種因果第一功德林菩薩者如十住位中初生佛智慧家故菩薩名法慧及財慧等此位明從慧行行福智二報廣多故以林為名也又林者廣多義覆蔭義莊嚴義身榦枝條華葉果實相資義明行位菩薩以無性智慧莊嚴萬行枝條大悲為葉覆蔭攝化一切眾生皆令自他菩提華果悉開發故如川澤有林眾鳥歸若人有行多人依是故十行菩薩目之名林此當歡喜行主檀波羅蜜門如善財十行之初善知識名為善見在林中經行亦如此也國名三眼者如此位佛果號為眼也國名親慧世界者明此十行親從佛慧所生為因亦常與一切眾生以為親近佛果號為常住眼佛為親從佛智慧生故所有知根利俗直令得其常住之智眼故明自得如來智慧之眼所有利生亦令他得智眼故明以如來智慧觀根利生之智即是當位佛果也功德林是表所行行之人親慧世界是當位所修行智慧之因常住眼佛是當位知根見解之果也與根本智相應名常住眼佛第二慧林菩薩者明智慧如林廣多義故此是饒益行以智慧饒益一切眾生令不迷故行戒波羅蜜此位以智慧為戒體故如善財童子十行中善知識釋天童子行戒波羅蜜以算法相法印法即安置村營城邑吉凶之地是智慧故十住之中以法身為戒體此十行之中以智慧為戒體故幢慧世界是所修行因以慧為戒體於生死中不傾動故無勝眼佛是所行之果以慧眼知根餘無勝故第三勝林菩薩者此是無違逆行主忍波羅蜜諸行之中忍行最在初無忍不成行也故號勝林菩薩如善財童子於此位中善知識是優婆夷名為具足為忍波羅蜜總攝眾行慈悲喜捨總在其中明優婆夷者表慈悲行也素服被髮是戒忍之相處其一室室開四門表慈育眾生四攝法也十千侍女萬行具也以一小

器濟慧無窮者表離慢自高四攝無限故明一一波羅蜜互含用故勝林菩薩是行行之人寶慧世界是所修行之法明以忍為眾行之寶可貴重故無住眼佛即是忍中之佛果也明雖行忍行而不念所行也第四無畏林菩薩者明常行精進即於生死利人天之無畏也主無屈撓行為以智慧知時知法知根利物不撓其事不滯其功故如善財善知識明智居士是此位中善知識也為以明智利眾生即行無屈撓故住大興城是精進義故於市肆衢道者明饒益廣多無限利益故須臾繫念作意方便故仰視虛空隨所須物惠利眾生皆從空下者明智如空應智念故空為智本智不異空故是故觀空物隨智現也是故空者眾法之本以此觀之明一切功德總從空智而有無畏林菩薩者是此位行行之人勝慧世界是修行之法不動眼佛是此位中之佛果故明精進之位不隨物變故佛號不動眼故於境不動名為精進第五慚愧林菩薩是無癡亂行主禪波羅蜜為具慚愧而行禪為禪定發慧即行無癡亂故如善財知識寶髻長者是此位中善知識也在於市中明行中禪體闇而恒寂執善財手將詣所居之宅明引接也明於生死市中引接將詣所居智果故明觀果知因其宅寶嚴十層八門院有八門閣有十層八門明八正道十層之閣約十波羅蜜之報一如十度之行從下向上排之自具法則至文方明此約禪體總收萬行慚愧林菩薩是此位所修行之人燈慧世界是所修行之法為定能起慧明照物故世界名燈也天眼佛者是此位佛果也為定能淨諸根故號天眼佛第六精進林菩薩此是善現行主般若波羅蜜門為以般若善現眾行以益含生故號精進林如善財此位中善知識號普眼長者明初救身命次施飲食後與說法一一隨根明智慧成就故精進林是修行之人金剛慧世界是修行之法明智慧破煩惱名金剛故解脫眼佛是此位之佛果第七力林菩薩是無著行主方便波羅蜜明以方便處俗利生同其行流



處世無著成大悲行是為力林也以真入俗處纏不汙是故名為力林如善財此位善知識號無厭足王為行大悲自化現身作諸不善還自化其身追捉治罰或斷命根苦當治之令實眾生懼而斷惡救護眾生愛而不捨名無厭足力林菩薩是能行行之人安樂慧世界是所修之法審諦眼佛是此位果也為此位是成大慈悲門故名安樂世界約安樂眾生得名佛號審諦眼者審知眾生應何法化故方始調伏第八行林菩薩是難得行主願波羅蜜難得能得名為行林此智位難可昇故名難得能得如善財童子此位善知識王名大光是第八智隨大願滿眾生意行大饒益普施眾生世間樂具一切智寶悉皆施之行林菩薩是能行行之人日慧世界是所修之法此位智體增明世界名日慧明相眼佛是此位之果為此位智體增明佛果號明相眼佛第九覺林菩薩是善法行主力波羅蜜如善財此位善知識號不動優婆夷是第九法師位何故為女身為明處法師位時貞潔慈悲柔輒以女表之此女發心已經閻浮提微塵劫自發心來心無一念五欲之想明貞潔慈悲柔輒是法師之德也是故此菩薩號曰覺林主力波羅蜜覺林菩薩是行行之人淨慧世界是修行之法最上眼佛是所修行之果為智慧淨故佛號最上眼第十智林菩薩是真實慧行故主智波羅蜜在此名位相似可知如善財此位知識號出家外道名為徧行明得智自在能同邪見攝諸邪見云三千之境九十六種外道我皆為之智林菩薩是能修行之人梵慧世界是所修之法紺青眼佛是此位之果紺青是十行之智一終之滿明淨照燭之極故第二釋刹土遠近之意經云十方一一各與佛刹微塵數菩薩俱從十方十萬佛刹微塵數國土之外諸世界中而來集會者十住云百佛刹微塵此位云十萬者明進昇智慧之增廣迷心及諸境為塵之量迷執所居名之為國心隨境轉名之為諸國土之外執亡智契名之為來明智徧周境無不達故號菩薩一一菩

薩例然總明達迷智徧第三釋各各同號菩薩徧周者明心迷諸境塵表無明廣多故心悟智通遐周剎海一切種智無不同其見故即各各名號徧周明迷時無境不惑悟已無境不智是諸菩薩已下頂禮佛足明致敬昇座化座摩尼藏表十行處生死而化眾生行常無垢故摩尼座者離垢寶也藏者含藏義師子者無畏也此明凡行有染聖行無垢也師子依主立名故總明修行者智德所行之法。

【經】如此世界中夜摩天上菩薩來集一切世界悉亦如是其諸菩薩世界如來所有名號悉等無別。

【論】第二如此世界已下至悉等無別可兩行經都舉十方世界菩薩來集此分。

【經】爾時世尊從兩足上放百千億妙色光明普照十方一切世界夜摩宮中佛及大眾靡不皆現。

【論】第三爾時世尊已下至靡不皆現可兩行經明放光所在分爾時世尊從兩足趺上放百千億光明者十信足下輪中放光十住足指端放光此十行之中足趺上明次第隨位昇進表法光從十千百千百億千億妙色光明總明隨位昇進也凡足下足指端足趺上總不離所行之行。

【經】爾時功德林菩薩承佛威力普觀十方而說頌言。

【論】第四爾時功德林菩薩一行經明觀法說頌分自此長行已下有十段頌文是十林菩薩各各自頌當位所修行之法以此十法共成一行如是一一行中皆具十行各各隨自行位中名目下義即是所讚之法如文具明。

【經】

佛放大光明	普照於十方	悉見天人尊
通達無障礙	佛坐夜摩宮	普徧十方界
此事甚奇特	世間所希有	須夜摩天王

偈讚十如來	如此會所見	一切處咸爾
彼諸菩薩眾	皆同我等名	十方一切處
演說無上法	所從諸世界	名號亦無別
各於其佛所	淨修於梵行	彼諸如來等
名號悉亦同	國土皆豐樂	神力悉自在
十方一切處	皆謂佛在此	或見在人間
或見住天宮	如來普安住	一切諸國土
我等今見佛	處此天宮殿	昔發菩提願
普及十方界	是故佛威力	充徧難思議
遠離世所貪	具足無邊德	故獲神通力
眾生靡不見	遊行十方界	如空無所礙
一身無量身	其相不可得	佛功德無邊
云何可測知	無住亦無去	普入於法界

爾時慧林菩薩承佛威力普觀十方而說頌言。

世間大導師	離垢無上尊	不可思議劫
難可得值遇	佛放大光明	世間靡不見
為眾廣開演	饒益諸羣生	如來出世間
為世除癡冥	如是世間燈	希有難可見
已修施戒忍	精進及禪定	般若波羅蜜
以此照世間	如來無與等	求比不可得
不了法真實	無有能得見	佛身及神通
自在難思議	無去亦無來	說法度眾生
若有得見聞	清淨天人師	永出諸惡趣
捨離一切苦	無量無數劫	修習菩提行
不能知此義	不可得成佛	不可思議劫
供養無量佛	若能知此義	功德超於彼
無量剎珍寶	滿中施於佛	不能知此義

終不成菩提

爾時勝林菩薩承佛威力普觀十方而說頌言。

譬如孟夏月	空淨無雲暄	赫日揚光輝
十方靡不充	其光無限量	無有能測知
有目斯尚然	何況盲冥者	諸佛亦如是
功德無邊際	不可思議劫	莫能分別知
諸法無來處	亦無能作者	無有所從生
不可得分別	一切法無來	是故無有生
以生無有故	滅亦不可得	一切法無生
亦復無有滅	若能如是解	斯人見如來
諸法無生故	自性無所有	如是分別知
此人達深義	以法無性故	無有能了知
如是解於法	究竟無所解	所說有生者
以現諸國土	能知國土性	其心不迷惑
世間國土性	觀察悉如實	若能於此知
善說一切義		

爾時無畏林菩薩承佛威力普觀十方而說頌言。

如來廣大身	究竟於法界	不離於此座
而徧一切處	若聞如是法	恭敬信樂者
永離三惡道	一切諸苦難	設往諸世界
無量不可數	專心欲聽聞	如來自在力
如是諸佛法	是無上菩提	假使欲暫聞
無有能得者	若有於過去	信如是佛法
已成兩足尊	而作世間燈	若有當得聞
如來自在力	聞已能生信	彼亦當成佛
若有於現在	能信此佛法	亦當成正覺
說法無所畏	無量無數劫	此法甚難值

若有得聞者	當知本願力	若有能受持
如是諸佛法	持已廣宣說	此人當成佛
況復勤精進	堅固心不捨	當知如是人
決定成菩提		

爾時慚愧林菩薩承佛威力普觀十方而說頌言。

若人得聞是	希有自在法	能生歡喜心
疾除疑惑網	一切知見人	自說如是言
如來無不知	是故難思議	無有從無智
而生於智慧	世間常闇冥	是故無能生
如色及非色	此二不為一	智無智亦然
其體各殊異	如相與無相	生死及涅槃
分別各不同	智無智如是	世界始成立
無有敗壞相	智無智亦然	二相非一時
如菩薩初心	不與後心俱	智無智亦然
二心不同時	譬如諸識身	各各無和合
智無智如是	究竟無和合	如阿伽陀藥
能滅一切毒	有智亦如是	能滅於無智
如來無有上	亦無與等者	一切無能比
是故難值遇		

爾時精進林菩薩承佛威力普觀十方而說頌言。

諸法無差別	無有能知者	唯佛與佛知
智慧究竟故	如金與金色	其性無差別
法非法亦然	體性無有異	眾生非眾生
二俱無真實	如是諸法性	實義俱非有
譬如未來世	無有過去相	諸法亦如是
無有一切相	譬如生滅相	種種皆非實
諸法亦復然	自性無所有	涅槃不可取

說時有二種	諸法亦復然	分別有殊異
如依所數物	而有於能數	彼性無所有
如是了知法	譬如算數法	增一至無量
數法無體性	智慧故差別	譬如諸世間
劫燒有終盡	虛空無損壞	佛智亦如是
如十方眾生	各取虛空相	諸法亦如是
世間妄分別		

爾時力林菩薩承佛威力普觀十方而說頌言。

一切眾生界	皆在三世中	三世諸眾生
悉住五蘊中	諸蘊業為本	諸業心為本
心法猶如幻	世間亦如是	世間非自作
亦復非他作	而其得有成	亦復得有壞
世間雖有成	世間雖有壞	了達世間者
此二不應說	云何為世間	云何非世間
世間非世間	但是名差別	三世五蘊法
說名為世間	彼滅非世間	如是但假名
云何說諸蘊	諸蘊有何性	蘊性不可滅
是故說無生	分別此諸蘊	其性本空寂
空故不可滅	此是無生義	眾生既如是
諸佛亦復然	佛及諸佛法	自性無所有
能知此諸法	如實不顛倒	一切知見人
常見在其前		

爾時行林菩薩承佛威力普觀十方而說頌言。

譬如十方界	一切諸地種	自性無所有
無處不周徧	佛身亦如是	普徧諸世界
種種諸色相	無住無來處	但以諸業故
說名為眾生	亦不離眾生	而有業可得

業性本空寂	眾生所依止	普作眾色相
亦復無來處	如是諸色相	業力難思議
了達其根本	於中無所見	佛身亦如是
不可得思議	種種諸色相	普現十方刹
身亦非是佛	佛亦非是身	但以法為身
通達一切法	若能見佛身	清淨如法性
此人於佛法	一切無疑惑	若見一切法
本性如涅槃	是則見如來	究竟無所住
若修習正念	明了見正覺	無相無分別
是名法王子		

爾時覺林菩薩承佛威力徧觀十方而說頌言。

譬如工畫師	分布諸彩色	虛妄取異相
大種無差別	大種中無色	色中無大種
亦不離大種	而有色可得	心中無彩畫
彩畫中無心	然不離於心	有彩畫可得
彼心恒不住	無量難思議	示現一切色
各各不相知	譬如工畫師	不能知自心
而由心故畫	諸法性如是	心如工畫師
能畫諸世間	五蘊悉從生	無法而不造
如心佛亦爾	如佛眾生然	應知佛與心
體性皆無盡	若人知心行	普造諸世間
是人則見佛	了佛真實性	心不住於身
身亦不住心	而能作佛事	自在未曾有
若人欲了知	三世一切佛	應觀法界性
一切唯心造		

爾時智林菩薩承佛威力普觀十方而說頌言。

所取不可取	所見不可見	所聞不可聞
-------	-------	-------

一心不思議	有量及無量	二俱不可取
若有人欲取	畢竟無所得	不應說而說
是為自欺誑	已事不成就	不令眾歡喜
有欲讚如來	無邊妙色身	盡於無數劫
無能盡稱述	譬如隨意珠	能現一切色
無色而現色	諸佛亦如是	又如淨虛空
非色不可見	雖現一切色	無能見空者
諸佛亦如是	普現無量色	非心所行處
一切莫能覩	雖聞如來聲	音聲非如來
亦不離於聲	能知正等覺	菩提無來去
離一切分別	云何於是中	自言能得見
諸佛無有法	佛於何有說	但隨其自心
謂說如是法		

【論】第五從初頌已下有十段經明十行之中各申自行法門因果分已下如名之義各歎當位所行之法達名知法可知。

## 十行品第二十一

【論】將釋此品約作三門分別一釋品名目二釋品來意三隨文釋義第一釋品名目者此品正說十種行門名為十行品第二釋品來意者此夜摩天宮本意說十行品為表此天蓮華開為晝合為夜為此天光自相照及無有日月但看蓮華開合而辨晝夜名為時分天夜摩者梵語也如此位菩薩知眾生心欲開發時應時引接未應度者與作得度因緣以此處而表之故於此處說十種行門前之兩品且明至此天處而稱歎之此一品正說十行門故此品須來明前之十住猶依須彌之頂此之十行依空所行表行無著也第三隨文解釋中約分為二一長科經意二隨文解



說第一長科經意者此之一品經網作十四段長科第一爾時已下至是為十有二十五行經明同號功德林佛共加持功德林菩薩正說十行第二佛子已下至第一歡喜行有四十三行經明正說初歡喜行之法門第三佛子已下至第二饒益行有四十二行經明饒益行如是上下總一品通偈頌有十四段經末後兩段長行初一段動地興供分次一段功德林觀眾說頌分次二百二行頌說頌歎法分一品上下總通為十四段如經自有分劑不煩科文。

【經】爾時功德林菩薩承佛神力入菩薩善思惟三昧入是三昧已十方各過萬佛刹微塵數世界外有萬佛刹微塵數諸佛皆號功德林而現其前告功德林菩薩言善哉佛子乃能入此善思惟三昧善男子此是十方各萬佛刹微塵數同名諸佛共加於汝亦是毗盧遮那如來往昔願力威神之力及諸菩薩眾善根力令汝入是三昧而演說法為增長佛智故深入法界故了知眾生界故所入無礙故所行無障故得無量方便故攝取一切智性故覺悟一切諸法故知一切諸根故能持說一切法故所謂發起諸菩薩十種行善男子汝當承佛威神之力而演此法是時諸佛即與功德林菩薩無礙智無著智無斷智無師智無癡智無異智無失智無量智無勝智無懈智無奪智何以故此三昧力法如是故爾時諸佛各伸右手摩功德林菩薩頂時功德林菩薩即從定起告諸菩薩言佛子菩薩行不可思議與法界虛空界等何以故菩薩摩訶薩學三世諸佛而修行故佛子何等是菩薩摩訶薩行佛子菩薩摩訶薩有十種行三世諸佛之所宣說何等為十一者歡喜行二者饒益行三者無違逆行四者無屈撓行五者無癡亂行六者善現行七者無著行八者難得行九者善法行十者真實行是為十。

【論】第一爾時已下至是為十有二十五行經明同號功德林佛共加持功德林菩薩正說十行分於此分中約作四門分別一明三昧名二明同號佛數三明諸佛所以共入定菩薩同號四明同號諸佛來加第一明三昧名者何以名善思惟三昧三昧者云離沈掉定之異名且約禪定中有四種禪一愚夫所行禪二觀察義禪三念真如禪四如來禪今云善思惟三昧者是觀察義禪為審定其法善須觀察正念思惟安立法門為後學者而作法則故第二明同號佛數者舉萬佛刹微塵數佛皆號功德林明若迷其心境無明與無限刹塵不殊若了達心源智慧功德等十方而無盡第三明所以與入定菩薩而同號者以自一心洞曉與法界福智無差今此菩薩入此定門以與一切諸佛契同福慧遂得同號佛來加持明與十方諸佛智慧解行同故福德功德同故第四明同號佛來加者有六種加一言歎加以言歎譽故二毗盧遮那願力加乘往願故三毗盧遮那神力加契佛神力故四諸菩薩眾善根加同善根故五諸佛與智加得十種無礙智故六諸佛以手摩頂加安慰許說法故已下明功德林菩薩即從定起正說十種行門如下十種行中以十波羅蜜為體。

【經】佛子何等為菩薩摩訶薩歡喜行佛子此菩薩為大施主凡所有物悉能慧施其心平等無有悔悵不望果報不求名稱不貪利養但為救護一切眾生攝受一切眾生饒益一切眾生為學習諸佛本所修行憶念諸佛本所修行愛樂諸佛本所修行清淨諸佛本所修行增長諸佛本所修行住持諸佛本所修行顯現諸佛本所修行演說諸佛本所修行令諸眾生離苦得樂佛子菩薩摩訶薩修此行時令一切眾生歡喜愛樂隨諸方土有貧乏處以願力故往生於彼豪貴大富財寶無盡假使於念念中有無量無數眾生詣菩薩所白言仁者我等貧乏靡所資贍飢羸困苦命將不全唯願慈哀施我身肉令我得食以活其命爾時菩薩即便

施之令其歡喜心得滿足如是無量百千眾生而來乞求菩薩於彼曾無退怯但更增長慈悲之心以是眾生咸來乞求菩薩見之倍復歡喜作如是念我得善利此等眾生是我福田是我善友不求不請而來教我入佛法中我今應當如是修學不違一切眾生之心又作是念願我已作現作當作所有善根令我未來於一切世界一切眾生中受廣大身以是身肉充足一切飢苦眾生乃至若有一小眾生未得飽足願不捨命所割身肉亦無有盡以此善根願得阿耨多羅三藐三菩提證大涅槃願諸眾生食我肉者亦得阿耨多羅三藐三菩提獲平等智具諸佛法廣作佛事乃至入於無餘涅槃若一眾生心不滿足我終不證阿耨多羅三藐三菩提菩薩如是利益眾生而無我想眾生想有想命想種種想補特伽羅想人想摩納婆想作者想受者想但觀法界眾生界無邊際法空法無所有法無相法無體法無處法無依法無作法作是觀時不見自身不見施物不見受者不見福田不見業不見報不見果不見大果不見小果爾時菩薩觀去來今一切眾生所受之身尋即壞滅便作是念奇哉眾生愚癡無智於生死內受無數身危脆不停速歸壞滅若已壞滅若今壞滅若當壞滅而不能以不堅固身求堅固身我當盡學諸佛所學證一切智知一切法為諸眾生說三世平等隨順寂靜不壞法性令其永得安隱快樂佛子是名菩薩摩訶薩第一歡喜行。

【論】第一歡喜行中檀波羅蜜為體有四十三行經分為五段一佛子何等為歡喜行已下至令一切眾生歡喜愛樂有九行半經明行檀波羅蜜學佛所修行分二隨諸方土有貧乏處已下至不違一切眾生之心有十行半經明此位菩薩見貧乏之處誓願生彼富貴家悉捨資財及以身命饒益分三又作如是念已下至三藐三菩提有八行半經明菩薩於飢餓劫中作廣大身捨之濟乏四菩薩如是已下至不見大果不見小果有六行半經明知

真無想分補特伽羅想此曰數數取趣摩納婆想者此曰少年亦曰儒童意云不分別善惡老少悉皆施與五從爾時菩薩觀去來今已下至第一歡喜行有七行半經明觀眾生不堅自求堅固身令永安隱分。

【經】佛子何等為菩薩摩訶薩饒益行此菩薩護持淨戒於色聲香味觸心無所著亦為眾生如是宣說不求威勢不求種族不求富饒不求色相不求王位如是一切皆無所著但堅持淨戒作如是念我持淨戒必當捨離一切纏縛貪求熱惱諸難逼迫毀謗亂濁得佛所讚平等正法佛子菩薩如是持淨戒時於一日中假使無數百千億那由他諸大惡魔詣菩薩所一一各將無量無數百千億那由他天女皆於五欲善行方便端正姝麗傾惑人心執持種種珍翫之具欲來惑亂菩薩道意爾時菩薩作如是念此五欲者是障道法乃至障礙無上菩提是故不生一念欲想心淨如佛唯除方便教化眾生而不捨於一切智心佛子菩薩不以欲因緣故惱一眾生寧捨身命而終不作惱眾生事菩薩自得見佛已來未曾心生一念欲想何況從事若或從事無有是處爾時菩薩但作是念一切眾生於長夜中想念五欲趣向五欲貪著五欲其心決定耽染沈溺隨其流轉不得自在我今應當令此諸魔及諸天女一切眾生住無上戒住淨戒已於一切智心無退轉得阿耨多羅三藐三菩提乃至入於無餘涅槃何以故此是我等所應作業應隨諸佛如是修學作是學已離諸惡行計我無知以智入於一切佛法為眾生說令除顛倒然知不離眾生有顛倒不離顛倒有眾生不於顛倒內有眾生不於眾生內有顛倒亦非顛倒是眾生亦非眾生是顛倒顛倒非內法顛倒非外法眾生非內法眾生非外法一切諸法虛妄不實速起速滅無有堅固如夢如影如幻如化誑惑愚夫如是解者即能覺了一切諸行通達生死及與涅槃證佛菩提自得度令他得度自解脫令他解脫自調伏令他

調伏自寂靜令他寂靜自安隱令他安隱自離垢令他離垢自清淨令他清淨自涅槃令他涅槃自快樂令他快樂佛子此菩薩復作是念我當隨順一切如來離一切世間行具一切諸佛法住無上平等處等觀眾生明達境界離諸過失斷諸分別捨諸執著善巧出離心恒安住無上無說無依無動無量無邊無盡無色甚深智慧佛子是名菩薩摩訶薩第二饒益行。

【論】第二饒益行中以戒波羅蜜為體有四十二行經分為五段一佛子何等為菩薩饒益行已下至得佛所讚平等正法有六行半經明於五塵境界不著分二佛子菩薩如是持淨戒時已下至一切智心有八行經明魔將天女不能惑亂分三佛子已下至無餘涅槃有八行半經明菩薩不以五欲惱眾生分四何以故已下至令他快樂有十三行半經明善自調伏方能說法令他得樂分五佛子已下至饒益行有六行經明得離世間行入甚深智慧分。

【經】佛子何等為菩薩摩訶薩無違逆行此菩薩常修忍法謙下恭敬不自害不他害不兩害不自取不他取不兩取不自著不他著不兩著亦不貪求名聞利養但作是念我當常為眾生說法令離一切惡斷貪瞋癡憍慢覆藏慳嫉諂誑令恒安住忍辱柔和佛子菩薩成就如是忍法假使有百千億那由他阿僧祇眾生來至其所一一眾生化作百千億那由他阿僧祇口一一口出百千億那由他阿僧祇語所謂不可喜語非善法語不悅意語不可愛語非仁賢語非聖智語非聖相應語非聖親近語深可厭惡語不堪聽聞語以是言辭毀辱菩薩又此眾生一一各有百千億那由他阿僧祇手一一手各執百千億那由他阿僧祇器仗逼害菩薩如是經於阿僧祇劫曾無休息菩薩遭此極大楚毒身毛皆豎命將欲斷作是念言我因是苦心若動亂則自不調伏自不守護自不明了自不修習自不正定自不寂靜自不愛惜自生執著何

能令他心得清淨菩薩爾時復作是念我從無始劫住於生死受諸苦惱如是思惟重自勸勵令心清淨而得歡喜善自調攝自能安住於佛法中亦令眾生同得此法復更思惟此身空寂無我我所無有真實性空無二若苦若樂皆無所有諸法空故我當解了廣為人說令諸眾生滅除此見是故我今雖遭苦毒應當忍受為慈念眾生故饒益眾生故安樂眾生故憐愍眾生故攝受眾生故不捨眾生故自得覺悟故令他覺悟故心不退轉故趣向佛道故是名菩薩摩訶薩第三無違逆行。

【論】第三無違逆行以忍波羅蜜為體有三十行經分為三段一佛子已下至忍辱柔和有五行半經明不害自他忍辱柔和分二佛子已下至令他心得清淨有十三行半經明菩薩身語加害堪忍分三菩薩爾時已下至無違逆行有十行半經明菩薩觀空成忍分。

【經】佛子何等為菩薩摩訶薩無屈撓行此菩薩修諸精進所謂第一精進大精進勝精進殊勝精進最勝精進最妙精進上精進無上精進無等精進普徧精進性無三毒性無憍慢性不覆藏性不慳嫉性無諂誑性自慚愧終不為惱一眾生故而行精進但為斷一切煩惱故而行精進但為拔一切惑本故而行精進但為除一切習氣故而行精進但為知一切眾生界故而行精進但為知一切眾生死此生彼故而行精進但為知一切眾生煩惱故而行精進但為知一切眾生心樂故而行精進但為知一切眾生境界故而行精進但為知一切眾生諸根勝劣故而行精進但為知一切眾生心行故而行精進但為知一切法界故而行精進但為知一切佛法根本性故而行精進但為知一切佛法平等性故而行精進但為知三世平等性故而行精進但為得一切佛法智光明故而行精進但為證一切佛法智故而行精進但為知一切佛法一實相故而行精進但為知一切佛法無邊際故而行精進

但為得一切佛法廣大決定善巧智故而行精進但為得分別演說一切佛法句義智故而行精進佛子菩薩摩訶薩成就如是精進行已設有人言汝頗能為無數世界所有眾生以一眾生故於阿鼻地獄經無數劫備受眾苦令彼眾生一一得值無數諸佛出興於世以見佛故具受眾樂乃至入於無餘涅槃汝乃當成阿耨多羅三藐三菩提能爾不耶答言我能設復有人作如是言有無量阿僧祇大海汝當以一毛端滴之令盡有無量阿僧祇世界盡末為塵彼滴及塵一一數之悉知其數為眾生故經爾許劫於念念中受苦不斷菩薩行不以聞此語故而生一念悔恨之心但更增上歡喜踊躍深自慶幸得大善利以我力故令彼眾生永脫諸苦菩薩以此所行方便於一切世界中令一切眾生乃至究竟無餘涅槃是名菩薩摩訶薩第四無屈撓行。

【論】第四無屈撓行以精進波羅蜜為體有三十七行半經分為三段一佛子已下至一切佛法句義故而行精進有二十二行半經明菩薩不求世利為求佛一切智故行精進分二佛子菩薩摩訶薩已下至答言我能有六行經明菩薩為眾生入地獄受苦無辭勞分三設復有人已下至無屈撓行有八行半經明菩薩為饒益眾生故多劫受苦不辭勞分。

【經】佛子何等為菩薩摩訶薩離癡亂行此菩薩成就正念心無散亂堅固不動最上清淨廣大無量無有迷惑以是正念故善解世間一切語言能持出世諸法言說所謂能持色法非色法言說能持建立色自性言說乃至能持建立受想行識自性言說心無癡亂於世間中死此生彼心無癡亂入胎出胎心無癡亂發菩提意心無癡亂事善知識心無癡亂勤修佛法心無癡亂覺知魔事心無癡亂離諸魔業心無癡亂於不可說劫修菩薩行心無癡亂此菩薩成就如是無量正念於無量阿僧祇劫中從諸佛菩薩善知識所聽聞正法所謂甚深法廣大法莊嚴法種種莊嚴法

演說種種名句文身法菩薩莊嚴法佛神力光明無上法正希望決定解清淨法不著一切世間法分別一切世間法甚廣大法離癡翳照了一切眾生法一切世間共法不共法菩薩智無上法一切智自在法菩薩聽聞如是法已經阿僧祇劫不忘不失心常憶念無有間斷何以故菩薩摩訶薩於無量劫修諸行時終不惱亂一眾生令失正念不壞正法不斷善根心常增長廣大智故復次此菩薩摩訶薩種種音聲不能惑亂所謂高大聲羸濁聲極令人恐怖聲悅意聲不悅意聲誼亂耳識聲沮壞六根聲此菩薩聞如是等無量無數好惡音聲假使充滿阿僧祇世界未曾一念心有散亂所謂正念不亂境界不亂三昧不亂入甚深法不亂行菩提行不亂發菩提心不亂憶念諸佛不亂觀真實法不亂化眾生智不亂淨眾生智不亂決了甚深義不亂不作惡業故無惡業障不起煩惱故無煩惱障不輕慢法故無有慢法障不誹謗正法故無有報障佛子如上所說如是等聲一一充滿阿僧祇世界於無量無數劫未曾斷絕悉能壞亂眾生身心一切諸根而不能壞此菩薩心菩薩入三昧中住於聖法思惟觀察一切音聲善知音聲生住滅相善知音聲生住滅性如是聞已不生於貪不起於瞋不失於念善取其相而不染著知一切聲皆無所有實不可得無有作者亦無本際與法界等無有差別菩薩如是成就寂靜身語意行至一切智永不退轉善入一切諸禪定門知諸三昧同一體性了一切法無有邊際得一切法真實智慧得離音聲甚深三昧得阿僧祇諸三昧門增長無量廣大悲心是時菩薩於一念中得無數百千三昧聞如是聲心不惑亂令其三昧漸更增廣作如是念我當令一切眾生安住無上清淨念中於一切智得不退轉究竟成就無餘涅槃是名菩薩摩訶薩第五離癡亂行。

【論】第五離癡亂行以禪波羅蜜為體有四十九行經分為六段一佛子已下至修菩薩行心無癡亂有十行經明以正念隨



於生死中利生無亂分二此菩薩已下至心常憶念無有間斷有  
九行經明菩薩聞持正念不亂分三何以故已下至未曾一念心  
有散亂有七行半經明以正念於好惡音聲無散亂分四所謂正  
念不亂已下至而不能壞此菩薩心有八行半經明聞法及利生  
無餘障分五菩薩入三昧中已下至等無差別有五行經明觀聲  
無體堪忍分六菩薩如是成就寂靜身語意行已下至離癡亂行  
有九行經明身口意淨堪入諸法不離一性分。

### 大方廣佛新華嚴經合論卷第三十七

音切

紺

(古暗切)。

撓

(奴巧切)。

贍

(時艷切)。

羸

(力為切)。

脆

(取藏切)。

謗

(北浪切)。

姝

(昌朱切)。

欺

(去其切)。

乏

(伐音)。

遭

(祖勞切)。

豎

(臣庾切)。

堪

(苦含切)。

嫉

(疾音)。

誹

(方尾切)。

穩

(烏本切)。

翫

(五貫切)。

豪

(乎刀切)。

畫

(胡卦切)。

彩

(七宰切)。

榦

(古案切)。

罰

(伐音)。

奐

(而兗切)。

瞠

(於計切)。

忤

(良刃切)。

儒

(如音)。

# 大方廣佛新華嚴經合論卷第三十八

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

## 十行品第二十一之餘

【經】佛子何等為菩薩摩訶薩善現行此菩薩身業清淨語業清淨意業清淨住無所得示無所得身語意業能知三業皆無所有無虛妄故無有繫縛凡所示現無性無依住如實心知無量心自性知一切法自性無得無相甚深難入住於正位真如法性方便出生而無業報不生不滅住涅槃界住寂靜性住於真實無性之性言語道斷超諸世間無有所依入離分別無縛著法入最勝智真實之法入非諸世間所能了知出世間法此是菩薩善巧方便示現生相佛子此菩薩作如是念一切眾生無性為性一切諸法無為為性一切國土無相為相一切三世唯是言說一切言說於諸法中無有依處一切諸法於言說中亦無依處菩薩如是解一切法皆悉甚深一切世間皆悉寂靜一切佛法無所增益佛法不異世間法世間法不異佛法佛法世間法無有雜亂亦無差別了知法界體性平等普入三世永不捨離大菩提心恒不退轉化眾生心轉更增長大慈悲心與一切眾生作所依處菩薩爾時復作是念我不成熟眾生誰當成熟我不調伏眾生誰當調伏我不教化眾生誰當教化我不覺悟眾生誰當覺悟我不清淨眾生誰當清淨此我所宜我所應作復作是念若我自解此甚深法唯我一人於阿耨多羅三藐三菩提獨得解脫而諸眾生盲冥無目入大險道為諸煩惱之所纏縛如重病人恒受苦痛處貪愛獄不

能自出不離地獄餓鬼畜生閻羅王界不能滅苦不捨惡業常處癡闇不見真實輪迴生死無得出離住於八難眾垢所著種種煩惱覆障其心邪見所迷不行正道菩薩如是觀諸眾生作是念言若此眾生未成熟未調伏捨而取證得阿耨多羅三藐三菩提是所不應我當先化眾生於不可說不可說劫行菩薩行未成熟者先令成熟未調伏者先令調伏是菩薩住此行時諸天魔梵沙門婆羅門一切世間乾闥婆阿脩羅等若有得見暫同住止恭敬尊重承事供養及暫耳聞一經心者如是所作悉不唐捐必定當成阿耨多羅三藐三菩提是名菩薩摩訶薩第六善現行。

【論】第六善現行以般若波羅蜜為體有四十行半經分為四段一佛子已下至方便現生相有十行半經明知生之無性示現方便現生分二佛子已下至與一切眾生作所依處有十行經明菩薩達心境一切法無性無依而教化眾生與作依處分三菩薩爾時已下至不行正道有十一行經明念度眾生分四菩薩如是觀諸眾生已下至善現行有九行經明度眾生未盡不取自證涅槃分。

【經】佛子何等為菩薩摩訶薩無著行佛子此菩薩以無著心於念念中能入阿僧祇世界嚴淨阿僧祇世界於諸世界心無所著往詣阿僧祇諸如來所恭敬禮拜承事供養以阿僧祇華阿僧祇香阿僧祇鬘阿僧祇塗香栴檀香衣服珍寶幢幡妙蓋諸莊嚴具各阿僧祇以用供養如是供養為究竟無作法故為住不思議法故於念念中見無數佛於諸佛所心無所著於諸佛剎亦無所著於佛相好亦無所著見佛光明聽佛說法亦無所著於十方世界及佛菩薩所有眾會亦無所著聽佛法已心生歡喜志力廣大能攝能行諸菩薩行然於佛法亦無所著此菩薩於不可說劫見不可說佛出興於世一一佛所承事供養皆悉盡於不可說劫心無厭足見佛聞法及見菩薩眾會莊嚴皆無所著見不淨世界亦

無憎惡何以故此菩薩如諸佛法而觀察故諸佛法中無垢無淨  
無闇無明無異無一無實無妄無安隱無險難無正道無邪道菩  
薩如是深入法界教化眾生而於眾生不生執著受持諸法而於  
諸法不生執著發菩提心住於佛住而於佛住不生執著雖有言  
說而於言說心無所著入眾生趣於眾生趣心無所著了知三昧  
能入能住而於三昧心無所著往詣無量諸佛國土若入若見若  
於中住而於佛土心無所著捨去之時亦無顧戀菩薩摩訶薩以  
能如是無所著故於佛法中心無障礙了佛菩提證法毗尼住佛  
正教修菩薩行住菩薩心思惟菩薩解脫之法於菩薩住處心無  
所染於菩薩所行亦無所著淨菩薩道受菩薩記得受記已作如  
是念凡夫愚癡無知無見無信無解無聰敏行頑嚚貪著流轉生  
死不求見佛不隨明導不信調御迷誤失錯入於險道不敬十力  
王不知菩薩恩戀著住處聞諸法空心大驚怖遠離正法住於邪  
法捨夷坦道入險難道棄背佛意隨逐魔意於諸有中堅執不捨  
菩薩如是觀諸眾生增長大悲生諸善根而無所著菩薩爾時復  
作是念我當為一眾生於十方世界一一國土經不可說不可說  
劫教化成熟如為一眾生為一切眾生皆亦如是終不以此而生  
疲厭捨而餘去又以毛端徧量法界於一毛端處盡不可說不可  
說劫教化調伏一切眾生如一毛端處一一毛端處皆亦如是乃  
至不於一彈指頃執著於我起我我所想於一一毛端處盡未來  
劫修菩薩行不著身不著法不著念不著願不著三昧不著觀察  
不著寂定不著境界不著教化調伏眾生亦復不著入於法界何  
以故菩薩作是念我應觀一切法界如幻諸佛如影菩薩行如夢  
佛說法如響一切世間如化業報所持故差別身如幻行力所起  
故一切眾生如心種種雜染故一切法如實際不可變異故又作  
是念我當盡虛空徧法界於十方國土中行菩薩行念念明達一  
切佛法正念現前無所取著菩薩如是觀身無我見佛無礙為化

眾生演說諸法令於佛法發生無量歡喜淨信救護一切心無疲厭無疲厭故於一切世界若有眾生未成就未調伏處悉詣於彼方便化度其中眾生種種音聲種種諸業種種取著種種施設種種和合種種流轉種種所作種種境界種種生種種歿以大誓願安住其中而教化之不令其心有動有退亦不一念生染著想何以故得無所著無所依故自利利他清淨滿足是名菩薩摩訶薩第七無著行。

【論】第七無著行以方便波羅蜜為體有六十五行經分為六段一佛子已下至然於佛法亦無所著有十二行半經明菩薩嚴淨佛刹供養諸佛心無所著分二此菩薩已下至能如是無所著故有十五行經明菩薩供佛無厭處事法而常行中無所著分三於佛法中心無障礙已下至諸善根而無所著有十一行經明觀眾生苦長自大悲分四菩薩爾時已下至何以故有十行半經明菩薩常住生死教化眾生無著分五菩薩作是念已下至心無疲厭有九行經明教化眾生觀法如幻分六無疲厭故已下至無著行有七行半經明菩薩見未調伏眾生而往彼生分。

【經】佛子何等為菩薩摩訶薩難得行此菩薩成就難得善根難伏善根最勝善根不可壞善根無能過善根不思議善根無盡善根自在力善根大威德善根與一切佛同一性善根此菩薩修諸行時於佛法中得最勝解於佛菩提得廣大解於菩薩願未曾休息盡一切劫心無疲倦於一切苦不生厭離一切眾魔所不能動一切諸佛之所護念具行一切菩薩苦行修菩薩行精勤匪懈於大乘願恒不退轉是菩薩安住此難得行已於念念中能轉阿僧祇劫生死而不捨菩薩大願若有眾生承事供養乃至見聞皆於阿耨多羅三藐三菩提得不退轉此菩薩雖了眾生非有而不捨一切眾生界譬如船師不住此岸不住彼岸不住中流而能運渡此岸眾生至於彼岸以往返無休息故菩薩摩訶薩亦復如

是不住生死不住涅槃亦復不住生死中流而能運渡此岸眾生  
置於彼岸安隱無畏無憂惱處亦不於眾生數而有所著不捨一  
眾生著多眾生不捨多眾生著一眾生不增眾生界不減眾生界  
不生眾生界不滅眾生界不盡眾生界不長眾生界不分別眾生  
界不二眾生界何以故菩薩深入眾生界如法界眾生界法界無  
有二無二法中無增無減無生無滅無有無無無取無依無著無  
二何以故菩薩了一切法法界無二故菩薩如是以善方便入深  
法界住於無相以清淨相莊嚴其身了法無性而能分別一切法  
相不取眾生而能了知眾生之數不著世界而現身佛剎不分別  
法而善入佛法深達義理而廣演言教了一切法離欲真際而不  
斷菩薩道不退菩薩行常勤修習無盡之行自在入於清淨法界  
譬如鑽木以出於火火事無量而火不滅菩薩如是化眾生事無  
有窮盡而在世間常住不滅非究竟非不究竟非取非不取非依  
非無依非世法非佛法非凡夫非得果菩薩成就如是難得心修  
菩薩行時不說二乘法不說佛法不說世間不說世間法不說眾  
生不說無眾生不說垢不說淨何以故菩薩知一切法無染無取  
不轉不退故菩薩於如是寂滅微妙甚深最勝法中修行時亦不  
生念我現修此行已修此行當修此行不著蘊界處內世間外世  
間內外世間所起大願諸波羅蜜及一切法皆無所著何以故法  
界中無有法名向聲聞乘向獨覺乘無有法名向菩薩乘向阿耨  
多羅三藐三菩提無有法名向凡夫界無有法名向染向淨向生  
死向涅槃何以故諸法無二無不二故譬如虛空於十方中若去  
來今求不可得然非無虛空菩薩如是觀一切法皆不可得然非  
無一切法如實無異不失所作普示修行菩薩諸行不捨大願調  
伏眾生轉正法輪不壞因果亦不違於平等妙法普與三世諸如  
來等不斷佛種不壞實相深入於法辯才無盡聞法不著至法淵  
底善能開演心無所畏不捨佛住不違世法普現世間而不著世



間菩薩如是成就難得智慧心修習諸行於三惡趣拔出眾生教化調伏安置三世諸佛道中令不動搖復作是念世間眾生不知恩報更相讎對邪見執著迷惑顛倒愚癡無智無有信心隨逐惡友起諸惡慧貪愛無明種種煩惱皆悉充滿是我所修菩薩行處設有知恩聰明慧解及善知識充滿世間我不於中修菩薩行何以故我於眾生無所適莫無所冀望乃至不求一縷一毫及以一字讚美之言盡未來劫修菩薩行未曾一念自為於己但欲度脫一切眾生令其清淨永得出離何以故於眾生中為明導者法應如是不取不求但為眾生修菩薩道令其得至安隱彼岸成阿耨多羅三藐三菩提是名菩薩摩訶薩第八難得行。

【論】第八難得行以願波羅蜜為體有七十行經分為六段一佛子已下至一性善根有四行經明此位中十善根分二此菩薩已下至得不退轉有八行半經明處苦無疲厭分三此菩薩了眾生非有已下至何以故有十行經明不捨不著眾生界分四菩薩深入眾生界已下至非得果有十三行半經明菩薩入眾生界不著而亦不廢常在世間現身度眾生分五菩薩成就如是已下至不著世間有十九行半經明不說而說法自在分六菩薩如是已下至第八難得行有十四行半經明行菩薩行不求果報分。

【經】佛子何等為菩薩摩訶薩善法行此菩薩為一切世間天人魔梵沙門婆羅門乾闥婆等作清涼法池攝持正法不斷佛種得清淨光明陀羅尼故說法授記辯才無盡得具足義陀羅尼故義辯無盡得覺悟實法陀羅尼故法辯無盡得訓釋言詞陀羅尼故詞辯無盡得無邊文句無盡義無礙門陀羅尼故無礙辯無盡得佛灌頂陀羅尼灌其頂故歡喜辯無盡得不由他悟陀羅尼門故光明辯無盡得同辯陀羅尼門故同辯無盡得種種義身句身文身中訓釋陀羅尼門故訓釋辯無盡得無邊旋陀羅尼故無邊辯無盡此菩薩大悲堅固普攝眾生於三千大千世界變身金

色施作佛事隨諸眾生根性欲樂以廣長舌於一音中現無量音  
應時說法皆令歡喜假使有不可說種種業報無數眾共會一  
處其會廣大充滿不可說世界菩薩於彼眾會中坐是中眾生一  
一皆有不可說阿僧祇口一一口能出百千億那由他音同時發  
聲各別言詞各別所問菩薩於一念中悉能領受皆為訓對令除  
疑惑如一眾會中於不可說眾會中悉亦如是復次假使一毛端  
處念念出不可說不可說道場眾會一切毛端處皆亦如是盡未  
來劫彼劫可盡眾會無盡是諸眾會於念念中以各別言辭各別  
所問菩薩於一念中悉能領受無怖無怯無疑無謬而作是念設  
一切眾生以如是語業俱來問我我為說法無斷無盡皆令歡喜  
住於善道復令善解一切言辭能為眾生說種種法而於言語無  
所分別假使不可說不可說種種言辭而來問難一念悉領一音  
咸答普使開悟無有遺餘以得一切智灌頂故以得無礙藏故以  
得一切法圓滿光明故具足一切智智故佛子此菩薩摩訶薩安  
住善法行已能自清淨亦能以無所著方便而普饒益一切眾生  
不見有眾生得出離者如於此三千大千世界如是乃至於不可  
說三千大千世界變身金色妙音具足於一切法無所障礙而作  
佛事佛子此菩薩摩訶薩成就十種身所謂入無邊法界非趣身  
滅一切世間故入無邊法界諸趣身生一切世間故不生身住無  
生平等法故不滅身一切滅言說不可得故不實身得如實故不  
妄身隨應現故不遷身離死此生彼故不壞身法界性無壞故一  
相身三世語言道斷故無相身善能觀察法相故菩薩成就如是  
十種身為一切眾生舍長養一切善根故為一切眾生救令其得  
大安隱故為一切眾生歸與其作大依處故為一切眾生導令得  
無上出離故為一切眾生師令入真實法中故為一切眾生燈令  
其明見業報故為一切眾生光令照甚深妙法故為一切三世炬  
令其曉悟實法故為一切世間照令入光明地中故為一切諸趣

明示現如來自在故佛子是名菩薩摩訶薩第九善法行菩薩安住此行為一切眾生作清涼法池能盡一切佛法源故。

【論】第九善法行以力波羅蜜為體於此段中分為五段一佛子已下至旋陀羅尼辯無盡有十二行經明十無盡辯分二此菩薩已下至悉亦如是有九行半經明大千界現身成佛辯才無礙分三復次已下至而作佛事有十六行半經明於一毛端處道場無盡一切毛端處及不可說三千界示身成佛分四佛子此菩薩已下至善能觀察法相故有六行半經明十種自在身分五菩薩成就如是十種身已下至一切佛法源故有十行半經明與一切眾生所為依處分。

【經】佛子何等為菩薩摩訶薩真實行此菩薩成就第一誠諦之語如說能行如行能說此菩薩學三世諸佛真實語入三世諸佛種性與三世諸佛善根同等得三世諸佛無二語隨如來學智慧成就此菩薩成就知眾生是處非處智去來現在業報智諸根利鈍智種種界智種種解智一切至處道智諸禪解脫三昧垢淨起時非時智一切世界宿住隨念智天眼智漏盡智而不捨一切菩薩行何以故欲教化一切眾生悉令清淨故此菩薩復生如是增上心若我不令一切眾生住無上解脫道而我先成阿耨多羅三藐三菩提者則違我本願是所不應是故要當先令一切眾生得無上菩提無餘涅槃然後成佛何以故非眾生請我發心我自為眾生作不請之友欲先令一切眾生滿足善根成一切智是故我為最勝不著一切世間故我為最上住無上調御地故我為離翳解眾生無際故我為已辦本願成就故我為善變化菩薩功德莊嚴故我為善依怙三世諸佛攝受故此菩薩摩訶薩不捨本願故得入無上智慧莊嚴利益眾生悉令滿足隨本誓願皆得究竟於一切法中智慧自在令一切眾生普得清淨念念徧遊十方世界念念普詣不可說不可說諸佛國土念念悉見不可說不可

說諸佛及佛莊嚴清淨國土示現如來自在神力普徧法界虛空界此菩薩現無量身普入世間而無所依於其身中現一切刹一切眾生一切諸法一切諸佛此菩薩知眾生種種想種種欲種種解種種業報種種善根隨其所應為現其身而調伏之觀諸菩薩如幻一切法如化佛出世如影一切世間如夢得義身文身無盡藏正念自在決定了知一切諸法智慧最勝入一切三昧真實相住一性無二地菩薩摩訶薩以諸眾生皆著於二安住大悲修行如是寂滅之法得佛十力入因陀羅網法界成就如來無礙解脫人中雄猛大師子吼得無所畏能轉無礙清淨法輪得智慧解脫了知一切世間境界絕生死迴流入智慧大海為一切眾生護持三世諸佛正法到一切佛法海實相源底菩薩住此真實行已一切世間天人魔梵沙門婆羅門乾闥婆阿脩羅等有親近者皆令開悟歡喜清淨是名菩薩摩訶薩第十真實行。

【論】第十真實行以智波羅蜜為體於此段中分為三段一佛子已下至悉令清淨故有十行經明此位菩薩學三世諸佛誠實身語智得佛十種智分二此菩薩復生如是增上心已下至法界虛空界有十六行半經明以願力教化眾生不取菩提分三此菩薩已下至第十真實行可十七行經明身含眾刹知根利生自在分。

【經】爾時佛神力故十方各有佛刹微塵數世界六種震動所謂動徧動等徧動起徧起等徧起踴徧踴等徧踴震徧震等徧震吼徧吼等徧吼擊徧擊等徧擊雨天妙華天香天末香天鬘天衣天寶天莊嚴具奏天樂音放天光明演暢諸天微妙音聲如此世界夜摩天宮說十行法所現神變十方世界悉亦如是復以佛神力故十方各過十萬佛刹微塵數世界外有十萬佛刹微塵數菩薩俱來詣此土充滿十方語功德林菩薩言佛子善哉善哉善能演說諸菩薩行我等一切同名功德林所住世界皆名功德幢

彼土如來同名普功德我等佛所亦說此法眾會眷屬言辭義理  
悉亦如是無有增減佛子我等皆承佛神力來入此會為汝作證  
十方世界悉亦如是。

【論】已下動地興供分中有十五行經義分為三段一爾時  
已下至天微妙音聲有五行半經明動地興供分二如此世界已  
下至悉亦如是有一行半經明都結十方同然分三復以佛神力  
故已下至十方世界悉亦如是有八行經明十方功德林菩薩來  
集作證分如十方十萬佛刹微塵數世界外有十萬佛刹微塵數  
菩薩皆名功德林者為明十行徧周故佛號普功德者為明此十  
行徧周即功德徧周即是此位之中所得之果以行徧周所招功  
德故佛號普功德舉十方各過十萬佛刹微塵為數者明智所達  
法亦明行門之量廣大即佛果功德廣大已上十行約十波羅蜜  
為昇進經自具分明不煩更釋如是十行總是一時一念無前後  
之行門莫作前後延促之見皆須約法界智體用成進修之門。

【經】爾時功德林菩薩承佛神力普觀十方一切眾會暨于  
法界欲令佛種性不斷故欲令菩薩種性清淨故欲令願種性不  
退轉故欲令行種性常相續故欲令三世種性悉平等故欲攝三  
世一切佛種性故欲開演所種諸善根故欲觀察一切諸根故欲  
解煩惱習氣心行所作故欲照了一切佛菩提故而說頌言。

【論】如說頌歎法中有七行經明十種種性不斷故以頌重  
申如暨于法界者暨者及也云及于法界也。

【經】

一心敬禮十力尊	離垢清淨無礙見
境界深遠無倫匹	住如虛空道中者
過去人中諸最勝	功德無量無所著
勇猛第一無等倫	彼離塵者行斯道
現在十方諸國土	善能開演第一義

離諸過惡最清淨  
未來所有人師子  
已發諸佛大悲心  
三世所有無比尊  
於一切法皆平等  
普見無量無邊界  
見已其心不分別  
法界所有皆明了  
永破瞋慢及愚癡  
於諸眾生善分別  
自然覺悟不由他  
盡空所有諸國土  
所說清淨無能壞  
具足堅固不退轉  
願力無盡到彼岸  
無量無邊一切地  
悉能知見靡有遺  
一切句義皆明了  
於法決定無所疑  
遠離世間諸過患  
能為無等大導師  
恒以無畏施眾生  
其心清淨離染濁  
意業清淨極調善  
威光圓滿眾所欽  
入真實義到彼岸  
諸佛護念恒不忘

彼無依者行斯道  
周徧遊行於法界  
彼饒益者行斯道  
自然除滅愚癡闇  
彼大力人行此道  
一切諸有及諸趣  
彼無動者行斯道  
於第一義最清淨  
彼功德者行斯道  
悉入法界真實性  
彼等空者行斯道  
悉往說法廣開喻  
彼勝牟尼行此道  
成就尊重最勝法  
彼善修者所行道  
廣大甚深妙境界  
彼論師子所行道  
所有異論悉摧伏  
彼大牟尼行此道  
普與眾生安隱樂  
彼勝德者行斯道  
普令一切皆欣慶  
彼無等者行斯道  
離諸戲論無口過  
彼最勝者行斯道  
住功德處心永寂  
彼滅有者行斯道

遠離於我無惱害  
十方國土靡不周  
檀波羅蜜已成滿  
眾生見者皆欣悅  
智地甚深難可入  
其心究竟不動搖  
法界所有悉能入  
神通自在靡不該  
諸無等等大牟尼  
心常在定樂寂靜  
微細廣大諸國土  
如其境界悉了知  
意常明潔離諸垢  
護持眾戒到彼岸  
智慧無邊不可說  
善能修學住其中  
三世一切佛境界  
未嘗暫起疲厭心  
善能分別十力法  
身業無礙得自在  
十方無量無邊界  
我皆救護而不捨  
於諸佛法勤修習  
淨治一切諸世間  
了知眾生根不同  
種種諸界皆明達  
十方世界無量刹

恒以大音宣正法  
彼絕譬者行斯道  
百福相好所莊嚴  
彼最勝慧行斯道  
能以妙慧善安住  
彼堅固行行斯道  
隨所入處咸究竟  
彼法光明行此道  
勤修三昧無二相  
彼普見者行斯道  
更相涉入各差別  
彼智山王行此道  
於三界中無所著  
此淨心者行斯道  
普徧法界虛空界  
彼金剛慧行斯道  
智慧善入悉周徧  
彼最勝者行斯道  
了知一切至處道  
彼功德身行此道  
所有一切諸眾生  
彼無畏者行斯道  
心常精進不懈倦  
彼大龍王行此道  
欲解無量各差別  
此普入者行斯道  
悉往受生無有數

未曾一念生疲厭  
普放無量光別網  
其光所照入法性  
震動十方諸國土  
不令眾生有驚怖  
善解一切語言法  
聰哲辯慧靡不知  
善解覆仰諸國土  
悉使住於無盡地  
功德無量那由他  
於其一切到彼岸  
超出世間大論師  
普使羣生到彼岸  
諸佛灌頂第一法  
心恒安住正法門  
一切眾生無量別  
決定護持佛法藏  
能於一一語言中  
令彼眾生隨類解  
一切文字語言法  
住於真實境界中  
安住甚深大法海  
了法無相真實門  
一一佛土皆往詣  
觀察思惟靡暫停  
無量無數諸如來  
於一毛端悉明見

彼歡喜者行斯道  
照耀一切諸世間  
此善慧者行斯道  
無量億數那由他  
此利世者所行道  
問難酬對悉究竟  
此無畏者所行道  
分別思惟得究竟  
此勝慧者所行道  
為求佛道皆修習  
此無盡行所行道  
辯才第一師子吼  
此淨心者所行道  
已得此法灌其頂  
彼廣大心行此道  
了達其心悉周徧  
彼如須彌行此道  
普為示現無量音  
此無礙見行斯道  
智皆善入不分別  
此見性者所行道  
善能印定一切法  
此見實者所行道  
盡於無量無邊劫  
此匪懈者所行道  
種種名號各不同  
此淨福者所行道



一毛端處見諸佛  
一切法界悉亦然  
無量無邊無數劫  
知其脩促無定相  
能令見者無空過  
而於所作心無著  
那由他劫常遇佛  
其心歡喜轉更增  
盡於無量無邊劫  
未曾見有一眾生  
修習無邊福智藏  
利益一切諸羣生  
法界所有諸品類  
了彼皆依言說住  
能於一一三昧中  
悉至法門幽奧處  
忍力勤修到彼岸  
其心平等不動搖  
於一世界一坐處  
而於一切普現身  
無量無邊諸國土  
普得包容無障礙  
了達是處及非處  
成就如來最上力  
過去未來現在世  
恒以智慧悉了知  
了達世間時非時

其數無量不可說  
彼諸佛子行斯道  
於一念中悉明見  
此解脫行所行道  
皆於佛法種因緣  
彼諸最勝所行道  
終不一念生疲厭  
此不空見所行道  
觀察一切眾生界  
此堅固土所行道  
普作清涼功德池  
彼第一人行此道  
普徧虛空無數量  
此師子吼所行道  
普入無數諸三昧  
此月輪者行斯道  
能忍最勝寂滅法  
此無邊智所行道  
其身不動恒寂然  
彼無邊身行此道  
悉令共入一塵中  
彼無邊思行此道  
於諸力處普能入  
彼第一力所行道  
無量無邊諸業報  
此達解者所行道  
如應調伏諸眾生

悉順其宜而不失  
善守身語及意業  
離諸取著降眾魔  
於諸法中得善巧  
辯才宣說無有窮  
陀羅尼門已圓滿  
於諸法界悉通達  
三世所有一切佛  
一性一相無有殊  
已抉一切愚癡膜  
普施眾生清淨眼  
已具一切諸導師  
獲於如來自在力  
徧遊一切諸世間  
悉令於義得決了  
能於佛智及解脫  
以信而生智慧根  
能於一念悉了知  
了彼眾生心自性  
法界一切諸國土  
其身最妙絕等倫  
佛刹無邊無有數  
菩薩於彼悉現前  
菩薩能以獨一身  
令見其身無有數  
菩薩所住最深妙  
其心清淨常悅樂

此善了者所行道  
恒令依法而修行  
此智心者所行道  
能入真如平等處  
此佛行者所行道  
善能安住無礙藏  
此深入者所行道  
悉與等心同智慧  
此無礙種所行道  
深入廣大智慧海  
此有目者所行道  
平等神通無二行  
此善修者所行道  
普雨無邊妙法雨  
此法雲者所行道  
深生淨信永不退  
此善學者所行道  
一切眾生無有餘  
達無性者所行道  
悉能化往無有數  
此無比行所行道  
無量諸佛在其中  
親近供養生尊重  
入於三昧而寂定  
一一皆從三昧起  
所行所作超戲論  
能令眾生悉歡喜

諸根方便各差別  
而了諸根無所依  
能以方便巧分別  
十方世界各不同  
諸根微妙行亦然  
誰其聞者不欣慶  
智眼清淨無與等  
如是智慧巧分別  
所有無盡廣大福  
令諸眾生悉清淨  
普勸修成助道法  
度脫眾生無有數  
一切機緣悉觀察  
普示眾生安隱處  
成就最上第一智  
於諸四眾無所畏  
一切世界及諸法  
亦入一切眾會中  
十方一切國土中  
為法施主最無上  
一身結跏而正坐  
而令其身不迫隘  
能於一義一文中  
而其邊際不可得  
於佛解脫善修學  
成就無畏為世雄  
了知十方世界海

能以智慧悉明見  
調難調者所行道  
於一切法得自在  
悉在其中作佛事  
能為眾生廣說法  
此等虛空所行道  
於一切法悉明見  
此無等者所行道  
一切修行使究竟  
此無比者所行道  
悉令得住方便地  
未曾暫起眾生想  
先護彼意令無諍  
此方便者所行道  
具足無量無邊智  
此方便智所行道  
悉能徧入得自在  
度脫羣生無有數  
擊大法鼓悟羣生  
此不滅者所行道  
充滿十方無量刹  
此法身者所行道  
演說無量無邊法  
此無邊智所行道  
得佛智慧無障礙  
此方便者所行道  
亦知一切佛刹海

智海法海悉了知  
或現入胎及初生  
如是皆令世間見  
無量億數國土中  
實不捨願歸寂滅  
堅固微密一妙身  
隨諸眾生各異見  
法界平等無差別  
樂觀一相心不移  
於諸眾生及佛法  
所有持力同於佛  
神足無礙猶如佛  
耳根無礙善聽聞  
所有神通皆具足  
善知一切靡所僂  
其心正定不搖動  
所有境界皆明達  
已到一切功德岸  
其心畢竟無厭足  
三世所有諸佛法  
從於如來種性生  
隨順言辭已成就  
常能趣向佛菩提  
一光照燭無涯限  
普使世間得大明  
隨其應現應供養  
教化眾生百千億

眾生見者咸欣慶  
或現道場成正覺  
此無邊者所行道  
示現其身入涅槃  
此雄論者所行道  
與佛平等無差別  
一實身者所行道  
具足無量無邊義  
三世智者所行道  
建立加持悉究竟  
最上持者行斯道  
天眼無礙最清淨  
此無礙意所行道  
隨其智慧悉成就  
此賢智者所行道  
其智廣大無邊際  
一切見者所行道  
能隨次第度眾生  
此常勤者所行道  
於此一切咸知見  
彼諸佛子行斯道  
乖違談論善摧伏  
無邊慧者所行道  
十方國土悉充徧  
此破闇者所行道  
為現如來清淨身  
莊嚴佛刹亦如是

為令眾生出世間	一切妙行皆修習
此行廣大無邊際	云何而有能知者
假使分身不可說	而與法界虛空等
悉共稱揚彼功德	百千萬劫無能盡
菩薩功德無有邊	一切修行皆具足
假使無量無邊佛	於無量劫說不盡
何況世間天及人	一切聲聞及緣覺
能於無量無邊劫	讚歎稱揚得究竟

【論】如下說頌分中有二百二行頌兩行一頌如文具明。

### 大方廣佛新華嚴經合論卷第三十八

音切

憎

(會音)。

顧

(古故切)。

戀

(良願切)。

頑

(五還切)。

囀

(魚巾切)。

聰

(倉紅切)。

敏

(眉允切)。

誤

(牛故切)。

彈

(徒干切)。

匪

(方尾切)。

懈

(戒音)。

縷

(力語切)。

冀

(居利切)。

變

(補面切)。

辭

(詳慈切)。

鈍

(直定切)。

踴

(勇音)。

讎

(市流切)。

適

(丁力切)。

雄

(胡弓切)。

哲

(之列切)。

欽

(佉今切)。

靡

(亡悲切)。

淵

(烏玄切)。

抉

(於決切)。

儔

(直由切)。

廢

(方吠切)。

# 大方廣佛新華嚴經合論卷第三十九

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

## 十無盡藏品第二十二

【論】將釋此品三門如前一釋品名目者為此說十種藏依法立名可知第二釋品來意者此位已說十種行以此十無盡藏成前十行之法使令無盡成後十迴向之法使令進向令使行門不滯是故此品須來第三長科經意者分為二門一長科經意二隨文釋義一長科經意者於此一品經中大段隨十藏名目總有十一段經其文如下。

【經】爾時功德林菩薩復告諸菩薩言佛子菩薩摩訶薩有十種藏過去未來現在諸佛已說當說今說何等為十所謂信藏戒藏慚藏愧藏聞藏施藏慧藏念藏持藏辯藏是為十佛子何等為菩薩摩訶薩信藏此菩薩信一切法空信一切法無相信一切法無願信一切法無作信一切法無分別信一切法無所依信一切法不可量信一切法無有上信一切法難超越信一切法無生若菩薩能如是隨順一切法生淨信已聞諸佛法不可思議心不怯弱聞一切佛不可思議心不怯弱聞眾生界不可思議心不怯弱聞法界不可思議心不怯弱聞虛空界不可思議心不怯弱聞涅槃界不可思議心不怯弱聞過去世不可思議心不怯弱聞未來世不可思議心不怯弱聞現在世不可思議心不怯弱聞入一切劫不可思議心不怯弱何以故此菩薩於諸佛所一向堅信知佛智慧無邊無盡十方無量諸世界中一一各有無量諸佛於阿



耨多羅三藐三菩提已得今得當得已出世今出世當出世已入涅槃今入涅槃當入涅槃彼諸佛智慧不增不減不生不滅不進不退不近不遠無知無捨此菩薩入佛智慧成就無邊無盡信得此信已心不退轉心不褻亂不可破壞無所染著常有根本隨順聖人住如來家護持一切諸佛種性增長一切菩薩信解隨順一切如來善根出生一切諸佛方便是名菩薩摩訶薩信藏菩薩住此信藏則能聞持一切佛法為眾生說皆令開悟。

【論】第一從初爾時功德林菩薩已下至為眾生說皆令開悟有二十八行半經明正舉十無盡藏名并陳十種信法分於此分中復分為六一爾時功德林已下至是為十有四行經明正說十藏之名分二佛子已下至生淨信已有五行半經明初舉十種信法分三聞諸佛法不可思議已下至何以故有七行半經明聞法生信已於法不怯分四此菩薩已下至無知無捨有五行半經明知一切諸佛出世入涅槃無遠近取捨分五此菩薩入佛智慧已下至一切諸佛方便有四行半經明入此信藏生在佛家順諸佛善根方便分六是名菩薩已下一行半經明總結信成能演法分此信是十行之中位內之信文殊師利覺首等是十信位中信心故。

【經】佛子何等為菩薩摩訶薩戒藏此菩薩成就普饒益戒不受戒不住戒無悔恨戒無違諍戒不損惱戒無雜穢戒無貪求戒無過失戒無毀犯戒云何為普饒益戒此菩薩受持淨戒本為利益一切眾生云何為不受戒此菩薩不受行外道諸所有戒但性自精進奉持三世諸佛如來平等淨戒云何為不住戒此菩薩受持戒時心不住欲界不住色界不住無色界何以故不求生彼而持戒故云何為無悔恨戒此菩薩恒得安住無悔恨心何以故不作重罪不行諂詐不破淨戒故云何為無違諍戒此菩薩不非先制不更造立心常隨順向涅槃戒具足受持無所毀犯不以持

戒惱他眾生令其生苦但願一切心常歡喜而持於戒云何為不惱害戒此菩薩不因於戒學諸呪術造作方藥惱害眾生但為救護一切眾生而持於戒云何為不雜戒此菩薩不著邊見不持雜戒但觀緣起持出離戒云何為無貪求戒此菩薩不現異相彰已有德但為滿足出離法故而持於戒云何為無過失戒此菩薩不自貢高言我持戒見破戒人亦不輕毀令他媿恥但一其心而持於戒云何為無毀犯戒此菩薩永斷煞盜邪婬妄語兩舌惡口及無義語貪瞋邪見具足受持十種善業菩薩持此無犯戒時作是念言一切眾生毀犯淨戒皆由顛倒唯佛世尊能知眾生以何因緣而生顛倒毀犯淨戒我當成就無上菩提廣為眾生說真實法令離顛倒是名菩薩摩訶薩第二戒藏。

【論】第二佛子何等為菩薩戒藏已下至是名菩薩第二戒藏於中有二十八行半經於此段中復分為三一佛子已下至無毀犯戒有三行半經明正舉十種戒名號分二云何已下至十種善業有二十一行經明正說十種戒之持犯分三菩薩持此至第二戒藏有四行半經明此十行菩薩持戒無毀犯分。

【經】佛子何等為菩薩摩訶薩慚藏此菩薩憶念過去所作諸惡而生於慚謂彼菩薩心自念言我無始世來與諸眾生皆悉互作父母兄弟姊妹男女具貪瞋癡憍慢諂誑及餘一切諸煩惱故更相惱害遞相凌奪姦婬傷殺無惡不造一切眾生悉亦如是以諸煩惱備造眾惡是故各各不相恭敬不相尊重不相承順不相謙下不相啟導不相護惜更相煞害互為怨讎自惟我身及諸眾生去來現在行無漸法三世諸佛無不知見今若不斷此無慚行三世諸佛亦當見我我當云何猶行不止甚為不可是故我應專心斷除證阿耨多羅三藐三菩提廣為眾生說真實法是名菩薩摩訶薩第三慚藏。

【論】第三佛子已下至第三慚藏有十三行半經於此段中復分為二一佛子已下至應專心斷除有十二行經明斷無慚行具於慚行分二有一行半經明具足於慚善為眾生說法分。

【經】佛子何等為菩薩摩訶薩愧藏此菩薩自愧昔來於五欲中種種貪求無有厭足因此增長貪恚癡等一切煩惱我今不應復行是事又作是念眾生無智起諸煩惱具行惡法不相恭敬不相尊重乃至展轉互為怨讎如是等惡無不備造造已歡喜追求稱歎盲無慧眼無所知見於母人腹中入胎受生成垢穢身畢竟至於髮白面皺有智慧者觀此但是從婬欲生不淨之法三世諸佛皆悉知見若我於今猶行是事則為欺誑三世諸佛是故我當修行於愧速成阿耨多羅三藐三菩提廣為眾生說真實法是名菩薩摩訶薩第四愧藏。

【論】第四佛子已下至是名菩薩愧藏於中有十二行經於中大意復分為三一佛子已下至復行是事有三行經明自念於五欲境無始長貪求分二又作是念已下至我當修行於愧有七行經明念眾生愚癡為於五欲互為怨讎菩薩知之應自斷分三速成菩提已下一行半經善為眾生說真實法分。

【經】佛子何等為菩薩摩訶薩聞藏此菩薩知是事有故是事有是事無故是事無是事起故是事起是事滅故是事滅是世間法是有世間法是有為法是有為法是有記法是有記法何等為是事有故是事有謂無明有故行有何等為是事無故是事無謂識無故名色無何等為是事起故是事起謂愛起故苦起何等為是事滅故是事滅謂有滅故生滅何等為世間法所謂色受想行識何等為出世間法所謂戒定慧解脫解脫知見何等為有為法所謂欲界色界無色界眾生界何等為無為法所謂虛空涅槃數緣滅非數緣滅緣起法性住何等為有記法謂四聖諦四沙門果四辯四無所畏四念處四正勤四神足五根五力七覺分八聖

道分何等為無記法謂世間有邊世間無邊世間亦有邊亦無邊  
世間非有邊非無邊世間有常世間無常世間亦有常亦無常世  
間非有常非無常如來滅後有如來滅後無如來滅後亦有亦無  
如來滅後非有非無我及眾生有我及眾生無我及眾生亦有亦  
無我及眾生非有非無過去有幾如來般涅槃幾聲聞辟支佛般  
涅槃未來有幾如來幾聲聞辟支佛幾眾生現在有幾佛住幾聲  
聞辟支佛住幾眾生住何等如來最先出何等聲聞辟支佛最先  
出何等眾生最先出何等如來最後出何等聲聞辟支佛最後出  
何等眾生最後出何法最在初何法最在後世間從何處來去至  
何所有幾世界成有幾世界壞世界從何處來去至何所何者為  
生死最初際何者為生死最後際是名無記法菩薩摩訶薩作如  
是念一切眾生於生死中無有多聞不能了知此一切法我當發  
意持多聞藏證阿耨多羅三藐三菩提為諸眾生說真實法是名  
菩薩摩訶薩第五多聞藏。

【論】第五佛子已下至多聞藏有三十四行半經明聞藏於  
此段中復分為三一佛子已下至無記法有四行經明舉十事有  
無分二何等為是事有已下至是名無記法有二十六行半經明  
正說十種事有無分初從十二緣說無明有故行有識無故名色  
無愛起故苦起有滅故生滅此上四事識之與愛皆從無明妄計  
諸有從生今達有本無即十二緣滅十二緣滅非智有生非智有  
滅但除其病其智無依無形無為而靈通萬有無思而現無作而  
成學之者以止觀兩門功終方會此之一辦後之十法總終聖教  
具陳識相對治異解已下如文具明三菩薩已下四行經明菩薩  
念諸眾生無多聞慧我求多聞藏廣為說法分。

【經】佛子何等為菩薩摩訶薩施藏此菩薩行十種施所謂  
分減施竭盡施內施外施內外施一切施過去施未來施現在施  
究竟施佛子云何為菩薩分減施此菩薩稟性仁慈好行慧施若

得美味不專自受要與眾生然後方食凡所受物悉亦如是若自食時作是念言我身中有八萬戶蟲依於我住我身充樂彼亦充樂我身飢苦彼亦飢苦我今受此所有飲食願令眾生普得充飽為施彼故而自食之不貪其味復作是念我於長夜愛著其身欲令充飽而受飲食今以此食惠施眾生願我於身永斷貪著是名分減施云何為菩薩竭盡施佛子此菩薩得種種上味飲食香華衣服資生之具若自以受用則安樂延年若輟已施人則窮苦夭命時或有人來作是言汝今所有悉當與我菩薩自念我無始已來以飢餓故喪身無數未曾得有如毫末許饒益眾生而獲善利今我亦當同於往昔而捨其命是故應為饒益眾生隨其所有一切皆捨乃至盡命亦無所憾是名竭盡施云何為菩薩內施佛子此菩薩年方少盛端正美好香華衣服以嚴其身始受灌頂轉輪王位七寶具足王四天下時或有人來白王言大王當知我今衰老身嬰重疾癯獨羸頓死將不久若得王身手足血肉頭目骨髓我之身命必冀存活唯願大王莫更籌量有所顧惜但見慈念以施於我爾時菩薩作是念言今我此身後必當死無一利益宜時疾捨以濟眾生念已施之心無所悔是名內施云何為菩薩外施佛子此菩薩年盛色美眾相具足名華上服而以嚴身始受灌頂轉輪王位七寶具足王四天下時或有人來白王言我今貧窶眾苦逼迫唯願仁慈特垂矜念捨此王位以贍於我我當統領受王福樂爾時菩薩作是念言一切榮盛必當衰歇於衰歇時不能復更饒益眾生我今宜應隨彼所求充滿其意作是念已即便施之而無所悔是名外施云何為菩薩內外施佛子此菩薩如上所說處輪王位七寶具足王四天下時或有人而來白言此轉輪位王處已久我未曾得唯願大王捨之與我并及王身為我臣僕爾時菩薩作是念言我身財寶及以王位悉是無常敗壞之法我今盛壯富有天下乞者現前當以不堅而求堅法作是念已即便施之

乃至以身恭勤作役心無所悔是名內外施云何為菩薩一切施佛子此菩薩亦如上說處輪王位七寶具足王四天下時有無量貧窮之人來詣其前而作是言大王名稱周聞十方我等欽風故來至此吾曹今者各有所求願普垂慈令得滿足時諸貧人從彼大王或乞國土或乞妻子或乞手足血肉心肺頭目髓腦菩薩是時心作是念一切恩愛會當別離而於眾生無所饒益我今為欲永捨貪愛以此一切必離散物滿眾生願作是念已悉皆施與心無悔恨亦不於眾生而生厭賤是名一切施云何為菩薩過去施此菩薩聞過去諸佛菩薩所有功德聞已不著了達非有不起分別不貪不味亦不求取無所依倚見法如夢無有堅固於諸善根不起有想亦無所倚但為教化取著眾生成熟佛法而為演說又復觀察過去諸法十方推求都不可得作是念已於過去法畢竟皆捨是名過去施云何為菩薩未來施此菩薩聞未來諸佛之所修行了達非有不取於相不別樂往生諸佛國土不味不著亦不生厭不以善根迴向於彼亦不於彼而退善根常勤修行未曾廢捨但欲因彼境界攝取眾生為說真實令成熟佛法然此法者非有處所非無處所非內非外非近非遠復作是念若法非有不可不捨是名未來施云何為菩薩現在施此菩薩聞四天王眾天三十三天夜摩天兜率陀天化樂天他化自在天梵天梵身天梵輔天梵眾天大梵天光天少光天無量光天光音天淨天少淨天無量淨天徧淨天廣天少廣天無量廣天廣果天無煩天無熱天善見天善現天色究竟天乃至聞聲聞緣覺具足功德聞已其心不迷不沒不聚不散但觀諸行如夢不實無有貪著為令眾生捨離惡趣心無分別修菩薩道成就佛法而為開演是名現在施云何為菩薩究竟施佛子此菩薩假使有無量眾生或有無眼或有無耳或無鼻舌及以手足來至其所告菩薩言我身薄祿諸根殘缺唯願仁慈以善方便捨己所有令我具足菩薩聞之即便施與假

使由此經阿僧祇劫諸根不具亦不心生一念悔惜但自觀身從初入胎不淨微形胞段諸根生老病死又觀此身無有真實無有慚愧非賢聖物臭穢不潔骨節相持血肉所塗九孔常流人所惡賤作是觀已不生一念愛著之心復作是念此身危脆無有堅固我今云何而生戀著應以施彼充滿其願如我所作以此開導一切眾生令於身心不生貪愛悉得成就清淨智身是名究竟施是為菩薩摩訶薩第六施藏。

【論】第六佛子已下至施藏有九十三行經於此段中復分為二一佛子已下至分減施有三行半經明都舉十種施藏分二此菩薩已下直至是名菩薩第六施藏總說前十種施藏分已上十種施理事盡含如文自具。

【經】佛子何等為菩薩摩訶薩慧藏此菩薩於色如實知色集如實知色滅如實知色滅道如實知於受想行識如實知受想行識集如實知受想行識滅如實知受想行識滅道如實知於無明如實知無明集如實知無明滅如實知無明滅道如實知於愛如實知愛集如實知愛滅如實知愛滅道如實知於聲聞如實知聲聞法如實知聲聞集如實知聲聞涅槃如實知於獨覺如實知獨覺法如實知獨覺集如實知獨覺涅槃如實知於菩薩如實知菩薩法如實知菩薩集如實知菩薩涅槃如實知云何知知從業報諸行因緣之所造作一切虛假空無有實非我非堅固無有少法可得成立欲令眾生知其實性廣為宣說為說何等說諸法不可壞何等法不可壞色不可壞受想行識不可壞無明不可壞聲聞法獨覺法菩薩法不可壞何以故一切法無作無作者無言說無處所不生不起不與不取無動轉無作用菩薩成就如是等無量慧藏以少方便了一切法自然明達不由他悟此慧無盡藏有十種不可盡故說為無盡何等為十所謂多聞善巧不可盡故親近善知識不可盡故善分別句義不可盡故入深法界不可盡故

以一味智莊嚴不可盡故集一切福德心無疲倦不可盡故入一切陀羅尼門不可盡故能分別一切眾生語言音聲不可盡故能斷一切眾生疑惑不可盡故為一切眾生現一切佛神力教化調伏令修行不斷不可盡故是為十是為菩薩摩訶薩第七慧藏住此藏者得無盡智慧普能開悟一切眾生。

【論】第七佛子已下至開悟一切眾生有三十行經於此段中復分為五一佛子已下至涅槃如實知有十一行經且舉如實知世間法出世間法根末所集體相分二云何知己下至廣為宣說有三行經明都舉前法從緣所生本無所有分三為說何等已下至不由他悟有六行經明正說前受想行等無體成壞分四此慧藏已下至是為十有八行半經明十不可盡分五已下一行半經明得法善說分。

【經】佛子何等為菩薩摩訶薩念藏此菩薩捨離癡惑得具足念憶念過去一生二生乃至十生百生千生百千生無量百千生成劫壞劫成壞劫非一成劫非一壞劫非一成壞劫百劫千劫百千億那由他乃至無量無數無邊無等不可數不可稱不可思不可量不可說不可說不可說劫念一佛名號乃至不可說不可說佛名號念一佛出世說授記乃至不可說不可說佛出世說授記念一佛出世說修多羅乃至不可說不可說佛出世說修多羅如修多羅祇夜授記伽陀尼陀那憂陀那本事本生方廣未曾有譬喻論議亦如是念一眾會乃至不可說不可說眾會念演一法乃至演不可說不可說法念一根種種性乃至不可說不可說根種種性念一根無量種種性乃至不可說不可說根無量種種性念一煩惱種種性乃至不可說不可說煩惱種種性念一三昧種種性乃至不可說不可說三昧種種性此念有十種所謂寂靜念清淨念不濁念明徹念離塵念離種種塵念離垢念光耀念可愛樂念無際礙念菩薩住是念時一切世間無能燒亂一切異論無



能變動往世善根悉得清淨於諸世法無所染著眾魔外道所不能壞轉身受生無所忘失過現未來說法無盡於一切世界中與眾生同住曾無過咎入一切諸佛眾會道場無所障礙一切佛所悉得親近是名菩薩摩訶薩第八念藏。

【論】第八佛子已下至念藏有二十七行經於中大意復分為二一佛子已下至不可說三昧種種性有十八行經明得無限正念諸法分二此念有十種已下至第八念藏有九行經明得十正念時於一切法無過失分如十二部經名中祇夜此云應誦伽陀此云諷誦尼陀那此云因緣經優陀那此云無問自說。

【經】佛子何等為菩薩摩訶薩持藏此菩薩持諸佛所說脩多羅文句義理無有忘失一生持乃至不可說不可說生持持一佛名號乃至不可說不可說佛名號持一劫數乃至不可說不可說劫數持一佛授記乃至不可說不可說佛授記持一脩多羅乃至不可說不可說脩多羅持一眾會乃至不可說不可說眾會持演一法乃至演不可說不可說法持一根無量種種性乃至不可說不可說根無量種種性持一煩惱種種性乃至不可說不可說煩惱種種性持一三昧種種性乃至不可說不可說三昧種種性佛子此持藏無邊難滿難至其底難得親近無能制伏無量無盡具大威力是佛境界唯佛能了是名菩薩摩訶薩第九持藏。

【論】第九佛子已下有十四行經於中大意復分為二一佛子已下至不可說三昧種種性有十一行半經明聞持一切諸法無限分二佛子已下有三行經明此位菩薩所說諸法無限唯佛能了知故名持藏分。

【經】佛子何等為菩薩摩訶薩辯藏此菩薩有深智慧了知實相廣為眾生演說諸法不違一切諸佛經典說一品法乃至不可說不可說品法說一佛名號乃至不可說不可說佛名號如是說一世界說一佛授記說一脩多羅說一眾會說演一法說一根

無量種種性說一煩惱無量種種性說一三昧無量種種性乃至說不可說不可說三昧無量種種性或一日說或半月一月說或百年千年百千年說或一劫百劫千劫百千劫說或百千億那由他劫說或無數無量乃至不可說不可說劫說劫數可盡一文一句義理難盡何以故此菩薩成就十種無盡藏故成就此藏得攝一切法陀羅尼門現在前百萬阿僧祇陀羅尼以為眷屬得此陀羅尼已以法光明廣為眾生演說於法其說法時以廣長舌出妙音聲充滿十方一切世界隨其根性悉令滿足心得歡喜滅除一切煩惱纏垢善入一切音聲言語文字辯才令一切眾生佛種不斷淨心相續亦以法光明而演說法無有窮盡不生疲倦何以故此菩薩成就盡虛空徧法界無邊身故是為菩薩摩訶薩第十辯藏此藏無窮盡無分段無間無斷無變異無隔礙無退轉甚深無底難可得入普入一切佛法之門。

【論】第十佛子已下一段有二十四行經於中其意復分為三一佛子已下至何以故有十二行經明此位菩薩辯藏無盡分二此菩薩成就十種無盡藏已下至第十辯藏有十行經明正說十種辯藏分三有兩行經明辯藏無限分。

【經】佛子此十種無盡藏有十種無盡法令諸菩薩究竟成就無上菩提何等為十饒益一切眾生故以本願善迴向故一切劫無斷絕故盡虛空界悉開悟心無限故迴向有為而不著故一念境界一切法無盡故大願心無變異故善攝取諸陀羅尼故一切諸佛所護念故了一切法皆如幻故是為十種無盡法能令一切世間所作悉得究竟無盡大藏。

【論】第十一段中有八行經明總舉前十藏成後迴向法門分此十種藏為成當位自分十行令成滿故亦成後十迴向法門故每位皆然已上釋十行法門竟。

音切

諂

(丑琰切)。

誑

(居況切)。

姊

(子音)。

妹

(昧音)。

瞋

(昌真切)。

癡

(丑之切)。

皴

(側救切)。

嬰

(於盈切)。

滄

(渠營切)。

羸

(力為切)。

髓

(息委切)。

籌

(直由切)。

窶

(其矩切)。

迫

(百音)。

贍

(市艷切)。

矜

(居令切)。

詣

(魚計切)。

役

(亦音)。

腦

(奴老切)。

肺

(芳計切)。

枯

(胡古切)。

缺

(苦穴切)。

胞

(包音)。

胎

(台音)。

穢

(於廢切)。

嬈

(乃鳥切)。

遞

(特計切)。

# 大方廣佛新華嚴經合論卷第四十

唐于闐國三藏沙門實叉難陀譯經

唐太原方山長者李通玄造論

唐福州開元寺沙門志寧釐經合論

## 昇兜率天宮品第二十三

【論】第五會兜率天宮說十迴向法門於此會中序分正說流通者從此初昇兜率天宮是序分已下兩品是正說分兩品中至下動地興供是流通分兜率天宮說十迴向法門於此位中有三品經共成此位第一從初昇兜率天宮品三義如前一釋品名目者以昇天所至立名也兜率天者此云樂知足天也二釋品來意者明前十住十行二位以彰出世已成如來智慧之業今於此天以明隨見道者成如來大悲處世利生之業會融世間出世間不一不二法門是故此品須來凡大悲門初發心時以真智慧進修中悲有勝劣不同十住十行智慧兼修仍出世心多望此位大悲是理智位出世心終迴入生死智慈之悲十地之中長養大悲更令深厚是故善財十地法中從初地已去有九箇女天一箇瞿波是佛音為太子之時妻表悲十地位已終法悅是妻義故問云何於此天處說迴向法答曰如須彌頂上說十住明初生佛家住佛智慧之頂而無退動夜摩天上說十行法表行依法空一切無著至此兜率天宮表雖不離欲界處大悲門而於欲境常行知足無所染著但為饒益眾生處於世間又此天處於欲界自須彌已上五天之處中以會智悲令不偏故如四天王還依帝釋為主故是故而於此天說十迴向明和會真俗成大慈悲長處生死而不廢涅槃名為迴向從初發心住已來如是和會位終偏得其名

故名迴向此為以處表法昇進亦即不曾身有上下去來智悲恒徧故無中邊故但明寄處表一生菩薩處此天中果行滿故以明發心初始生如來智慧之家以佛智慧行大悲門即是圓滿如來果故果復常滿行復常行果行相嚴故號佛華嚴也十地十一地依此十住十行十迴向法三法成其功用更亦無別安立以是他化天中說十地時更不別作法事興供故但長養此位大智大慈大悲令深固圓滿故故名十地三隨文解釋者於此義中復分為二此會中都會五位眾總在其中如下諸王菩薩等總是一長科經意二隨文解釋第一長科經意者從初至經末約分為十一段第一爾時佛神力故已下至悉皆同等於中有七紙半經明兜率天王遙見佛來與諸天眾敷座莊嚴分復科為七段。

【經】爾時佛神力故十方一切世界一一四天下閻浮提中皆見如來坐於樹下各有菩薩承佛神力而演說法靡不自謂恒對於佛。

【論】第一爾時已下至恒對於佛有三行經明智身恒圓滿分隨文釋義者此昇兜率天品中云十方一切世界皆常對於佛者明圓智徧周。

【經】爾時世尊復以神力不離於此菩提樹下及須彌頂夜摩天宮而往詣於兜率陀天一切妙寶所莊嚴殿。

【論】第二爾時世尊已下至妙寶莊嚴殿可兩行經明如來大智徧周應感所見彼此無來去分釋義云不離菩提樹而昇夜摩兜率天者為菩提之智體本性無有依住徧往十方無去來今性無可得無有住處無有遷變不動不寂無所造作而隨根應十方世界於一切眾生前對現色身如應化度。

【經】時兜率天王遙見佛來即於殿上敷摩尼藏師子之座其師子座天諸妙寶之所集成過去修行善根所得一切如來神力所現無量百千億那由他阿僧祇善根所生一切如來淨法所

起無邊福力之所嚴瑩清淨業報不可沮壞觀者欣樂無有厭足是出世法非世所染一切眾生咸來觀察無有能得究其妙好。

【論】第三時兜率天王遙見佛來已下至無有能得究其妙好有七行經明天王殿上敷座分釋義云時兜率天王遙見佛來者明從前十行位向十迴向為遙見佛來入殿敷寶座者契會也如十住為以方便三昧顯現如來智慧法流即座有安置十行之中為以法身無相而為行體座云化作寶蓮華藏為表處行無染如蓮華故今此十迴向位中為成大悲赴俗座云敷座敷者開發義為表大悲赴俗開敷眾善之華至菩提之妙果故又敷者設義為表大悲赴俗設法以利生故不自求出世法故座體摩尼者明以大慈悲常在生死而無染汙以表摩尼名離垢寶座云師子者依主義也為如來是無畏之主故天諸妙寶之所集成者明妙理智悲萬行報得故是故經云過去修行善根所得一切如來神力所現者明一切諸佛福智萬行不異自佛神力故但自心理智中與一切諸佛同福智故為智同行同故云無量百千億那由他阿僧祇善根所生者明迴向中福智大悲行周故報也總云此座嚴飾是不可數無限善根所生一切如來淨法所起明以智起行無法不淨餘如文自具從此已下至第一段終有一百九十八行半經有一百八十四箇百萬億種諸莊嚴寶座及寶地虛空悉皆徧滿又有一百八箇百萬億種諸菩薩并諸天八部王眾入法及合掌思惟讚頌持幡等眾莊嚴寶地及虛空周徧圓滿又有十箇百萬億善根之所嚴潔。

【經】有百萬億層級周帀圍遶百萬億金網百萬億華帳百萬億寶帳百萬億鬘帳百萬億香帳張施其上華鬘垂下香氣普熏百萬億華蓋百萬億鬘蓋百萬億寶蓋諸天執持四面行列百萬億寶衣以敷其上百萬億樓閣綺煥莊嚴百萬億摩尼網百萬億寶網彌覆其上百萬億寶纓珞網四面垂下百萬億莊嚴具網



百萬億蓋網百萬億衣網百萬億寶帳網以張其上百萬億寶蓮華網開敷光榮百萬億寶香網其香美妙稱悅眾心百萬億寶鈴帳其鈴微動出和雅音百萬億栴檀寶帳香氣普熏百萬億寶華帳其華敷榮百萬億眾妙色衣帳世所希有百萬億菩薩帳百萬億雜色帳百萬億真金帳百萬億瑠璃帳百萬億種種寶帳悉張其上百萬億一切寶帳大摩尼寶以為莊嚴百萬億妙寶華周帀瑩飾百萬億頻婆帳殊妙間錯百萬億寶鬘百萬億香鬘四面垂下百萬億天堅固香其香普熏百萬億天莊嚴具纓絡百萬億寶華纓絡百萬億勝藏寶纓絡百萬億摩尼寶纓絡百萬億海摩尼寶纓絡莊嚴座身百萬億妙寶繒綵以為垂帶百萬億因陀羅金剛寶百萬億自在摩尼寶百萬億妙色真金藏以為間飾百萬億毗盧遮那摩尼寶百萬億因陀羅摩尼寶光明照耀百萬億天堅固摩尼寶以為窻牖百萬億清淨功德摩尼寶彰施妙色百萬億清淨妙藏寶以為門闥百萬億世中最勝半月寶百萬億離垢藏摩尼寶百萬億師子面摩尼寶間錯莊嚴百萬億心王摩尼寶所求如意百萬億閻浮檀摩尼寶百萬億清淨藏摩尼寶百萬億帝幢摩尼寶咸放光明彌覆其上百萬億白銀藏摩尼寶百萬億須彌幢摩尼寶莊嚴其藏百萬億真珠纓絡百萬億瑠璃纓絡百萬億赤色寶纓絡百萬億摩尼纓絡百萬億寶光明纓絡百萬億種種藏摩尼纓絡百萬億甚可樂見赤真珠纓絡百萬億無邊色相藏摩尼寶纓絡百萬億極清淨無比寶纓絡百萬億勝光明摩尼寶纓絡周帀垂布以為莊嚴百萬億摩尼身殊妙嚴飾百萬億因陀羅妙色寶百萬億黑栴檀香百萬億不思議境界香百萬億十方妙香百萬億最勝香百萬億甚可愛樂香咸發香氣普熏十方百萬億頻婆羅香普散十方百萬億淨光香普熏眾生百萬億無邊際種種色香普熏一切諸佛國土永不歇滅百萬億塗香百萬億熏香百萬億燒香香氣發越普熏一切百萬億蓮華藏沈水香

出大音聲百萬億遊戲香能轉眾心百萬億阿樓那香香氣普熏  
其味甘美百萬億能開悟香普徧一切令其聞者諸根寂靜復有  
百萬億無比香王香種種莊嚴雨百萬億天華雲雨百萬億天香  
雲雨百萬億天末香雲雨百萬億天拘蘇摩華雲雨百萬億天波  
頭摩華雲雨百萬億天優鉢羅華雲雨百萬億天拘物頭華雲雨  
百萬億天芬陀利華雲雨百萬億天曼陀羅華雲雨百萬億一切  
天華雲雨百萬億天衣雲雨百萬億摩尼寶雲雨百萬億天蓋雲  
雨百萬億天幡雲雨百萬億天冠雲雨百萬億天莊嚴具雲雨百  
萬億天寶鬘雲雨百萬億天寶纓絡雲雨百萬億天栴檀香雲雨  
百萬億天沈水香雲建百萬億寶幢懸百萬億寶幡垂百萬億寶  
繒帶然百萬億香鑪布百萬億寶鬘持百萬億寶扇執百萬億寶  
拂懸百萬億寶鈴網微風吹動出妙音聲百萬億寶欄楯周帀圍  
遶百萬億寶多羅樹次第行列百萬億妙寶窓牖綺麗莊嚴百萬  
億寶樹周帀垂陰百萬億寶樓閣延袤綺飾百萬億寶門垂布纓  
絡百萬億金鈴出妙音聲百萬億吉祥相纓絡嚴淨垂下百萬億  
寶悉底迦能除眾惡百萬億金藏金縷織成百萬億寶蓋眾寶為  
竿執持行列百萬億一切寶莊嚴具網間錯莊嚴百萬億光明寶  
放種種光百萬億光明周徧照耀百萬億日藏輪百萬億月藏輪  
並無量色寶之所集成百萬億香燄光明映徹百萬億蓮華藏開  
敷鮮榮百萬億寶網百萬億華網百萬億香網彌覆其上百萬億  
天寶衣百萬億天青色衣百萬億天黃色衣百萬億天赤色衣百  
萬億天奇妙色衣百萬億天種種寶奇妙衣百萬億種種香熏衣  
百萬億一切寶所成衣百萬億鮮白衣悉善敷布見者歡喜百萬  
億天鈴幢百萬億金網幢出微妙音百萬億天繒幢眾彩具足百  
萬億香幢垂布香網百萬億華幢雨一切華百萬億天衣幢懸布  
妙衣百萬億天摩尼寶幢眾寶莊嚴百萬億天莊嚴具幢眾具校  
飾百萬億天鬘幢種種華鬘四面行布百萬億天蓋幢寶鈴和鳴

聞皆歡喜百萬億天螺出妙音聲百萬億天鼓出大音聲百萬億天箜篌出微妙音百萬億天牟陀羅出大妙音百萬億天諸禰樂同時俱奏百萬億天自在樂出妙音聲其聲普徧一切佛刹百萬億天變化樂其聲如響普應一切百萬億天鼓因於撫擊而出妙音百萬億天如意樂自然出聲音節相和百萬億天諸禰樂出妙音聲滅諸煩惱百萬億悅意音讚歎供養百萬億廣大音讚歎承事百萬億甚深音讚歎修行百萬億眾妙音歎佛業果百萬億微細音歎如實理百萬億無障礙真實音歎佛本行百萬億清淨音讚歎過去供養諸佛百萬億法門音讚歎諸佛最勝無畏百萬億無量音歎諸菩薩功德無盡百萬億菩薩地音讚歎開示一切菩薩地相應行百萬億無斷絕音歎佛功德無有斷絕百萬億隨順音讚歎稱揚見佛之行百億億甚深法音讚歎一切法無礙智相應理百萬億廣大音其音充滿一切佛刹百萬億無礙清淨音隨其心樂悉令歡喜百萬億不住三界音令其聞者深入法性百萬億歡喜音令其聞者心無障礙深信恭敬百萬億佛境界音隨所出聲悉能開示一切法義百萬億陀羅尼音善宣一切法句差別決了如來祕密之藏百萬億一切法音其音和暢克諧眾樂。

【論】第四有百萬億層級已下至克諧眾樂有一百一十一行半經有一百八十四箇百萬億色類莊嚴寶座及虛空分釋義云有百萬億層級周帀圍遶者十住云百千十行云百萬十迴向云百萬億明昇位階級也百萬億金網者為善施教網明淨故百萬億華帳者以萬行含攝義故百萬億寶帳者觀一切眾生智可貴故可含攝故百萬億鬘帳者大悲垂俗益眾生故百萬億香帳張施其上者明張施戒定慧解脫知見香之業報華鬘垂下香氣普熏者明忍嚴垂飾百萬億華蓋者萬行覆育含識義也百萬億鬘蓋者慈蔭義也百萬億寶蓋者以法寶蔭俗義也諸天侍立者明能行行人也四面行列者總云四攝四無量也百萬億寶衣以

敷其上者明以大慈大悲之理智常處生死衣覆眾生無有休息之業報故百萬億樓閣綺煥莊嚴者明觀樓智閣差別觀智分別名綺煥莊嚴也百萬億摩尼網者明施教網漉諸惑垢故百萬億寶網者明教能護育眾生故百萬億寶纓絡網四面垂下者明以萬行為纓絡四攝攝眾生報名四面垂下飾故大要言凡隨智隨行隨慈隨悲隨波羅蜜隨觀照隨助道法隨大願所有報境因果相似今將此業果將法表之網表理智行教樓閣表觀智殿表正智利生宮表含育無限座表普印法空悲智萬行帳表隨根含攝眾生鈴表法音和悅華表道眼開敷亦表行華資果十百千萬億都該大數無限但隨法准而知之可見不煩更釋如梵云頻婆帳者此云身影也謂此帳光明能現一切影像於中現故頻婆羅香明此香光潔能現一切影像故亦以赤色光淨如頻婆果阿樓那香其色如日赫弈光明拘蘇摩華此有總別義總云一切艸木華也又有別者其華白色大小如錢似此白菊也樓閣延袤者言寶閣相連長遠也寶悉底迦此云佛智前億德之相具云佉阿悉底迦佉者樂也阿悉底迦者此云有也明有此相者有大樂故以座上莊嚴有此相樂寶天牟陀羅天鼓中之別名也因於撫擊方能出聲。

【經】有百萬億初發心菩薩纔見此座倍更增長一切智心百萬億治地菩薩心淨歡喜百萬億修行菩薩悟解清淨百萬億生貴菩薩住勝志樂百萬億方便具足菩薩起大乘行百萬億正心住菩薩勤修一切菩薩道百萬億不退菩薩淨修一切菩薩地百萬億童真菩薩得一切菩薩三昧光明百萬億法王子菩薩入不思議諸佛境界百萬億灌頂菩薩能現無量如來十力百萬億菩薩得自在神通百萬億菩薩生清淨解百萬億菩薩心生愛樂百萬億菩薩深信不壞百萬億菩薩勢力廣大百萬億菩薩名稱增長百萬億菩薩演說法義令智決定百萬億菩薩正念不亂百

萬億菩薩生決定智百萬億菩薩得聞持力持一切佛法百萬億菩薩出生無量廣大覺解百萬億菩薩安住信根百萬億菩薩得檀波羅蜜能一切施百萬億菩薩得尸波羅蜜具持眾戒百萬億菩薩得忍波羅蜜心不妄動悉能忍受一切佛法百萬億菩薩得精進波羅蜜能行無量出離精進百萬億菩薩得禪波羅蜜具足無量禪定光明百萬億菩薩得般若波羅蜜智慧光明能普照耀百萬億菩薩成就大願悉皆清淨百萬億菩薩得智慧燈明照法門百萬億菩薩為十方諸佛法光所照百萬億菩薩周徧十方演離癡法百萬億菩薩普入一切諸佛刹土百萬億菩薩法身隨到一切佛國百萬億菩薩得佛音聲能廣開悟百萬億菩薩得出生一切智方便百萬億菩薩得成就一切法門百萬億菩薩成就法智猶如寶幢能普顯示一切佛法百萬億菩薩能悉示現如來境界百萬億諸天王恭敬禮拜百萬億龍王諦觀無厭百萬億夜叉王頂上合掌百萬億乾闥婆王起淨信心百萬億阿脩羅王斷憍慢意百萬億迦樓羅王口銜繒帶百萬億緊那羅王歡喜踊躍百萬億摩睺羅伽王歡喜瞻仰百萬億世主稽首作禮百萬億忉利天王瞻仰不瞬百萬億夜摩天王歡喜讚歎百萬億兜率天王布身作禮百萬億化樂天王頭頂禮敬百萬億他化天王恭敬合掌百萬億梵天王一心觀察百萬億摩醯首羅天王恭敬供養百萬億菩薩發聲讚歎百萬億天女專心供養百萬億同願天踊躍歡喜百萬億往昔同住天妙聲稱讚百萬億梵身天布身敬禮百萬億梵輔天合掌於頂百萬億梵眾天圍遶侍衛百萬億大梵天讚歎稱揚無量功德百萬億光天五體投地百萬億少光天宣揚讚歎佛世難值百萬億無量光天遙向佛禮百萬億光音天讚歎如來甚難得見百萬億淨天與宮殿俱而來詣此百萬億少淨天以清淨心稽首作禮百萬億無量淨天願欲見佛投身而下百萬億徧淨天恭敬尊重親近供養百萬億廣天念昔善根百萬億少廣

天於如來所生希有想百萬億無量廣天決定尊重生諸善業百萬億廣果天曲躬恭敬百萬億無煩天信根堅固恭敬禮拜百萬億無熱天合掌念佛情無厭足百萬億善見天頭面作禮百萬億善現天念供養佛心無懈歇百萬億阿迦尼吒天恭敬頂禮百萬億種種天皆大歡喜發聲讚歎百萬億諸天各善思惟而為莊嚴百萬億菩薩天護持佛座莊嚴不絕百萬億華手菩薩雨一切華百萬億香手菩薩雨一切香百萬億鬘手菩薩雨一切鬘百萬億末香手菩薩雨一切末香百萬億塗香手菩薩雨一切塗香百萬億衣手菩薩雨一切衣百萬億蓋手菩薩雨一切蓋百萬億幢手菩薩雨一切幢百萬億幡手菩薩雨一切幡百萬億寶手菩薩雨一切寶百萬億莊嚴手菩薩雨一切莊嚴具百萬億諸天子從天宮出至於座所百萬億諸天子以淨信心并宮殿俱百萬億生貴天子以身持座百萬億灌頂天子舉身持座百萬億思惟菩薩恭敬思惟百萬億生貴菩薩發清淨心百萬億菩薩諸根悅樂百萬億菩薩深心清淨百萬億菩薩信解清淨百萬億菩薩諸業清淨百萬億菩薩受生自在百萬億菩薩法光明照耀百萬億菩薩成就於地百萬億菩薩善能教化一切眾生。

【論】第五有百萬億初發心菩薩已下至百萬億菩薩善能教化一切眾生有七十六行經明菩薩入法諸天八部眾都有一百八箇百萬億大眾海莊嚴寶地及虛空中分已下四十眾菩薩明見座莊嚴觀法倍倍入法昇進以為莊嚴之境四十眾者明十住十行十迴向十地位也明此天蘊修此四位法成普賢行自具故已下從百萬億天王已下至百萬億摩醯首羅天王有十六王總該已上欲界色界主且總明此十迴向法門徧於三界以智隨悲徧於六道利生自在如王故都舉十六種王名明彰此位總徧攝人天六道以智如王教化眾生自在無礙故初總百萬億天王明天王最自在故然別舉龍王諦觀明知根雨法自在夜叉王頂

上合掌守護自在乾闥婆王起淨信心者明以法樂悅樂眾生自在百萬億阿脩羅王斷憍慢者明以大悲入生死海謙下同事自在百萬億迦樓羅王口銜繒帶者大悲垂俗引接自在義故百萬億緊那羅王歡喜踊躍者明能以法歌樂悅眾生令歡喜自在故百萬億摩睺羅伽王歡喜瞻仰者明是腹行表恭敬義自在故百萬億世主稽首作禮者明四天王主導眾生軌則義故此是主人及神龍鬼等乃至地獄總攝在位百萬億忉利天王瞻仰不瞬者十住之位修方便進求之定義百萬億夜摩天王歡喜讚歎者如世間樂以歌頌之法樂以讚歎之明此天以十行法樂故百萬億兜率天王布身作禮者明此天大慈悲心布身如地荷負無倦義故百萬億化樂天王頭頂禮敬者明下心徹到大悲屈智至悲之極義也百萬億他化自在天王恭敬合掌者明會智悲生死涅槃無一異故百萬億梵天王一心觀察者明除細習義故百萬億摩醯首羅天王恭敬供養明智慧法身大悲圓滿可恭敬供養故此已上十六天王龍王等明智悲圓滿三界六道自在如王義故皆百萬億者表大願智悲行具足也百萬億菩薩發聲讚歎者明已上十六王總攝菩薩行徧皆可讚歎故百萬億天女專心供養者明前十六王等行無染大慈悲徧三界故百萬億同願天踊躍歡喜此欲界中天往昔同願亦明此位之中總同佛願行百萬億往昔同住天於往昔同住明此十迴向位菩薩皆同一切諸佛大悲願行住已下百萬億梵身天布身敬禮下至阿迦尼吒天恭敬頂禮明色界初禪已上行徧總有二十眾天總收色界諸眾初十六王等一時包含今次第別列無色界天定沉未堪現世發心化儀不及其境如此一段可十六行經自梵身天已下至阿迦尼吒天有二十眾天阿迦尼吒天是色究竟天此天是色界頂此已上二十眾天表此十迴向中大悲之行天者淨也明以大悲大智常處生死教化眾生如大自在而無垢染如梵身天布身敬禮者有二

義一恭敬如來二表法大悲謙下如地百萬億梵輔天合掌於頂亦有二義一敬佛二表法忻進百萬億梵眾天圍遶侍衛亦有二義一敬順於佛二表順正念度眾生故百萬億大梵天讚歎稱揚無量功德亦有二義一敬歎於佛二表法歎眾生有佛功德百萬億光天五體投地亦有二義一敬佛二表法望此位以大悲為地明以戒定慧解脫解脫知見投於生死慈悲之地百萬億少光天宣揚讚歎佛世難值亦有二義一敬世尊難遇二表法歎眾生菩提難發百萬億無量光天遙向佛禮亦有二義一敬佛二表法明教化一切眾生使令信解故稱為遙見百萬億光音天讚如來甚難得見亦有二義一難遇難見二表法歎自心難知正法百萬億淨天與宮殿俱而來詣佛此亦有二義如前一敬佛二表法明悲宮智殿圓滿含攝眾生百萬億少淨天以清淨心稽首作禮二義如前一敬佛二表法明理事恭敬百萬億無量淨天願欲見佛投身而下二義如前一敬佛二表法明垂慈救俗已下准義知之而以行行之如百萬億種種天皆歡喜者此天眾是色界欲界中禪類天故故云種種也是都稱表眾行具足言種種行饒益眾生故百萬億諸天各善思惟總言色界欲界天內天也都稱百萬億菩薩天護持佛座莊嚴不絕此但兜率天故亦是表法以法界為座體萬行為莊嚴此已上三眾通前有二十三眾從百萬億華手菩薩已下至百萬億灌頂天子舉身持座有十一眾菩薩四眾諸天子通為十五眾初百萬億華手菩薩雨一切華有三義一處空雨華供養佛二以空起行三明往世造華為因百萬億香手菩薩雨一切香亦有三義一雨香供養佛二明五分法身香三明往因之行以香供養百萬億鬘手菩薩亦有三義一雨鬘供佛二以忍為鬘三明往因造鬘供佛已下准義知之如百萬億諸天子從天宮出至於座所有二義一出宮供佛二明以智會悲百萬億諸天子以淨信心并宮殿俱亦有二義一并宮殿供佛二表悲智圓融百



萬億生貴天子以身持座亦有二義一持座供佛二表法此生貴住主第四波羅蜜以精進是持座義百萬億灌頂天舉身持座亦有二義一舉身持座供佛二表十住中灌頂智悲力用增強此四種天子者即是欲界兜率天中諸天子以經言略計次第十住合足亦明子者慈名為表修慈故彌勒號慈也已次百萬億思惟菩薩已下至善能教化一切眾生者此一段有十箇菩薩以淨三業或入住地莊嚴法會皆名義可解。

【經】百萬億善根所生百萬億諸佛護持百萬億福德所圓滿百萬億殊勝心所清淨百萬億大願所嚴潔百萬億善行所生起百萬億善法所堅固百萬億神力所示現百萬億功德所成就百萬億讚歎法而以讚歎。

【論】第六百萬億善根所生已下至百萬億讚歎法而以讚歎歎有五行經明十種善根莊嚴宮殿及寶座分釋義云自百萬億善根所生已下至而以讚歎有十百萬億眾善行所嚴如經具明。

【經】如此世界兜率天王奉為如來敷置高座一切世界兜率天王悉為於佛如是敷座如是莊嚴如是儀則如是信樂如是心淨如是欣樂如是喜悅如是尊重如是而生希有之想如是踊躍如是渴仰悉皆同等。

【論】第七如此世界已下至悉皆同等有五行經明都結十方同然分已上徒眾有一百十八種百萬億眾已上莊嚴有一百八十四種百萬億莊嚴為此段都數已上莊嚴及菩薩神天天女色類間襍或次或不次者意表此十迴向位是以智從悲成大悲海於人天六道中以無限徧周法界行門一時等化逐根與法或次或超或住或信或位階十地或人天善根無有一向次第安立以此莊嚴及菩薩神天表法間襍不依次第或菩薩眾有諸天或諸天眾中有龍神如是准義思之可見經意問曰十住但有諸天眾來迎世尊十行徒眾即有諸天及菩薩眾此會何故八部王眾

大眾廣博莊嚴色類甚多十地中不敘致天王及眾來迎入殿莊嚴高座等事何意其位高昇不陳廣供答曰十住有天無菩薩來迎如來所施供養者為十住位且明其初生佛智慧家未有先見道者但列諸天未有菩薩為初始從信位凡夫未得入聖位故以此初昇須彌頂品不列菩薩之眾但有諸天奉迎如來故明從此位方入聖流如昇夜摩天宮品即有諸天及菩薩眾稱揚讚歎者即明十住位已有見道入位故十行位昇進中即有諸菩薩眾而迎佛會入十行法門以十住十行設行眾行出世心多處世大悲猶未自在故所以眾不圓滿故如此兜率天宮諸天菩薩及莊嚴色類多者明此迴向之門會融悲智出世與世間一體成就大悲普育含識徧周利物不棄微生是故天王龍王八部諸王菩薩法王其眾無量莊嚴境界色相無邊表明悲位含弘濟生無限利物廣大獲益無窮是故此天莊嚴廣大如十地之位但約此十迴向大悲之際智育週周之門長養大悲使令堅厚更無餘法別有進求設復智有奇途只是此位之中微細是故佛昇他化更不別有徒眾承迎座體進修不論別加層級可知。

【經】爾時兜率天王為如來敷置座已心生尊重與十萬億阿僧祇兜率天子奉迎如來以清淨心雨阿僧祇色華雲雨不思議色香雲雨種種色鬘雲雨廣大清淨栴檀雲雨無量種種蓋雲雨細妙天衣雲雨無邊眾妙寶雲雨天莊嚴具雲雨無量種種燒香雲雨一切栴檀沉水堅固末香雲諸天子眾各從其身出此諸雲時百千億阿僧祇兜率天子及餘在會諸天子眾心大歡喜恭敬頂禮阿僧祇天女踊躍欣慕諦觀如來兜率宮中不可說諸菩薩眾住虛空中精勤一心以出過諸天諸供養具供養於佛恭敬作禮阿僧祇音樂一時同奏。

【論】第二爾時兜率天王已下至音樂一時同奏一段經明兜率天王為佛敷座已與諸天眾以淨心興供養雲及諸菩薩奉

迎如來分釋義云與十萬億阿僧祇兜率天子奉迎如來有二義一請佛入宮殿二表法以解脫無依住之大智處一切生死饒益眾生即迎佛義又一釋如創入聖位以方便三昧而入真門如此十迴向以取十住十行中無垢正智入大悲方便為迎佛入宮殿如三乘中地前三十心為方便十地見道如此經十信心為方便資糧十住初心為見道成佛十行十迴向十地十一地為資糧資糧十住初正見心成令慣習自在故為三乘教於三僧祇劫方成佛故設十地菩薩得三種意生身非是得佛智生身故以是十地向前三賢菩薩是資糧位十地見道為加行位十一地等覺位中普賢行方終十二地是妙覺佛果此佛華嚴其義先佛而後行以先覺佛果方以悲願之行用資覺體使悲智齊均以此義故號佛華嚴也是故今此兜率天王以將大悲之方便用資十住十行之中大智佛果為迎佛義故今此位教表法大體以將大悲之海用資十住十行之中佛智慧正覺故號之為迎佛故夫法無始終一念齊等萬行悲智當體圓終設教名言不可竝立名詮敘致似有前後義生體名者名無始末達教者境智不移此教意明混今古之為一際破情塵於當即也終不可作延促解始終見總不出無時之理和會一多差別之門也凡以前位向後位為遙見正契為佛來入宮以清淨心兩阿僧祇色華雲有二義一供佛二表法明大悲萬行徧周其雲具十種明法行圓滿皆從天身出者明智身興萬行也大眾天子天女歡喜頂禮者明以軌度法則利生令得樂故明菩薩大悲令眾生得樂是菩薩樂故如世人母其子樂者其母樂也兜率宮中不可說諸菩薩住虛空中精勤一心供養出過天者明以法空成行出勝世間有為行也此一段有十三種眾。

#### 大方廣佛新華嚴經合論卷第四十

音切

沮

(在呂切)。

瑩

(烏定切)。

綺

(去倚切)。

煥

(呼貫切)。

薰

(許云切)。

雅

(五賈切)。

綵

(倉宰切)。

窻

(楚江切)。

牖

(與久切)。

闐

(他達切)。

拘

(居音)。

鬘

(莫班切)。

懸

(胡涓切)。

織

(之翼切)。

袞

(莫候切)。

銜

(戶監切)。

謚

(莫必切)。

瞬

(舒閏切)。

諧

(戶皆切)。

蜚

(落戈切)。

筌

(空音)。

篋

(侯音)。

撫

(芳舞切)。

胷

(許容切)。

臆

(於力切)。